



**Winterheil (Sommerheil)|| Der Kleinen Catho-||lischen
Postill/ Jacobi || Feuchthij/ Weyhbischoffs|| zu Bamberg/
der H.|| Schrift D.||**

Darin[n]en kürztlich vn[d] Catholisch/|| alle Sontägliche Fest vn[d]
Feyrtägliche|| Euangelien ...

Feucht, Jakob

Cöln, M.D.XCV.

VD16 F 850

Der Ander Theil/ des Sommertheils/ der kleinen Catholische[n] Postill
Jacobi Feuchthij/ darinnen alle Fest vnd Feyertägliche Euangelien/ vom
ersten des Meyen/ oder von Philippi vnd Jacobi/ biß auff ...

[urn:nbn:de:hbz:466:1-61414](https://nbn-resolving.org/urn:nbn:de:hbz:466:1-61414)

Der Ander Theil/ des
 Sommertheils/ der kleinen
 Catholische Postill Jacobi Feuch-
 this/ darinnen alle Fest vnd Feyertägliche
 Euangelien/ vom ersten des Meyen/ oder von
 Philippi vnd Jacobi/ bis auff das Advent/
 Christlich/ kätzlich vnd Catholisch
 aufgelegt werden.

Am 1. tag
 Meyen.

Am Fest der heiligē Aposteln Phi-
 lippi vnd Jacobi/ Euangelium
 Ioan. xliij.



In der zeit sprach IESVS
 zu seinen Jüngern: Eus
 wer herb werde nit bes
 trübt/ vnd erschrecke nit.
 Glaubt ihr an GOTT/
 so glaus

so glaubet auch an mich. In meines Vatters Haus seynd vil wonungē. Wo es anders were/ wolt ichs euch gesagt haben. Dañ ich gehe hin euch die stell zu bereiten. Vnd so ich hingehen werde/ vnd euch die stell bereiten/wil ich widder kommen/ vnd euch zu mir nehen/ auff daß ihr seydt wo ich bin. Vñ wo ich hingehe/ das wisset ihr/ vnd den weg wisset ihr auch. Spricht zu ihm Thomas: Herr/wir wissen nit wo du hingehst/ vnd wie können wir den weg wissen? I E S V S spricht zu ihm: Ich bin der weg/ vnd die warheit/ vnd das leben. Niemand kompt zum Vatter/ dañ durch mich. Wenn ihr mich kennet/ kennet ihr auch meinen Vatter. Vnd von nun an werdet ihr ihn kennen/ vnd habt ihn gesehen. Spricht zu ihm Philippus: Herr/ zeig vns den Vatter/ so genüget vns. I E S V S spricht zu ihm: Binn ich so ein lange zeit bey euch/ vnd ihr habt mich nit kant? Philippe/ Wer mich sihet/ der sihet auch den Vatter. Wie sprichstu dann/ zeig vns den Vatter? Glaubst du nit/ daß ich im Vatter/ vnd der Vatter in mir ist? Die wort die ich zu euch rede/ die rede ich nit von mir selbs: der Vatter aber/ der in mir bleibt/ derselb thut die werck. Glaubte ihr dann nit/ daß ich im Vatter/ vnd der

Vat-

Joan. 2. 8

Joan. 1. 9

11. c
Joan. 6. 8

Joan. 10. 2

Joan. 3. 17. 8

11. f 14. 6

Vatter in mir ist? Wo nicht/ so glaube mir doch vmb der werck willen. Warlich warlich sag ich euch/ wer an mich glaubt/ der wirdt die werck auch thun/ die ich thu/ vnd wirdt grössere dann dise thun/ dann ich gehe zum Vatter. Vnd alles das ihr den Vatter in meinem Namen bitten werdet/ das wil ich thun/ auff das der Vatter gepreiset werde in dem Sohn. So ihr mich etwas bittet in meinem Namen/ das wil ich thun.

Eurer Herrs werde nit betrübt 2c.

Joan. xiiij.

Auff heut halten wir Catholische Christen/ allenthalben im Catholischen vnd Christlichen Papstthumb/ das Fest vnd herrlichen Feyertag zweyer heiligen Apostel vnd Jüngern Christi vnser Herrs/ nämlich/ Philippi auß Bethsaida in Galilea geboren/ vnd Jacobi des mindern/ so sonsten auch ein Bruder des Herren genennet wirdt/ welche beide auch/ als der Herr gehörtes Euangelium geredet/ dabey gewesen/ solchs von ihme angehört/ vnd volgentz ihren Glauben/ Leben/ Wort vnd Werck/ vleissig darnach gericht habe. Weil aber solchs Euangelium/ nit allein zu ihnen/ den Aposteln/ sonder auch zu vns vnd allen Christē/ so ihr wohnung nach diesem zergenecklichen Jamerthal/ ja so bald sich Leib vnd Seel scheiden/ droben im
Him.

Himmel zu haben begeren/ vom Herren geredet
ist worden/ welchem auch wir/ nit weniger als
sie/ auffzumerken/ gehorsam zu leisten/ nit weni-
ger als sie schuldig seynd/ wil von nöten seyn/ das
selbig/ auch vns auff heut fürzhalte. Weil aber
dasselbig vil zu lang/ vnd der schönen/ herrli-
chen/nützlichen Lehren/den Glauben vnd das Le-
ben betreffend/so vil in sich begreiffet/ daß sie in
einer so kurzen zeit nit mögen erörtert werden/
wollen wir nur zwey auß denselbigen zu handeln
fürnehmen/ nemlich/ den Anfang vnd Beschluß
gehörtes Euangelij.

Auff daß aber solches von mir vnd euch/ de-
sto ordenlicher vñ richtiger möge gehandelt vnd
vernommen/ verstanden vnd behalten werden/
soll diese Predig/ vnd die folgende alle (gleich wie
im Wintertheil auch geschehen) in zween Theil Theilig vñ
abgetheilt werden. Im ersten Theil vorhaben Inhalt dieser
der Predigt lehret der Herr seine Apostel vnd Predig.
vns: Wie sich ein Christ in verfolgung verhal-
ten soll? Im andern/ Wo vnd bey weme ein sol-
cher betrangter Christ/ hilff suchen vnd finden
soll? Vnd beyneben wollen wir auch anzeigen/
wie sich Philippus vnd Jacobus hierinnen ver-
halten haben. Solchs wölt ihr mit gedult anhö-
ren/so wil ich euch dasselbig willig/ vnd auff das
leichtest fürhalten. Hierzu wölle GOTT sein
Gnad vnd Segen verleihen ꝛc.

WAs nun den ersten Theil vorha-
bender Predig belangen thut/ wie sich
nemlich die Apostel vñ alle Christē zur
zeit ihrer verfolgung/trübsal/nachstellung/ ver-
jagung/

Im Himmel
vil wohnun-
gen.

jugung/ Peyn/ Marter vnd tod/ auch sonsten in
franchheit/ in Armut vnd anderer anfechtung
verhalten sollen/ lehret vns Christus der Herr
mit disen worten/ welche seynd der Eyn gang vñ
Anfang diß heutige Euan gelij: **Euer Herr**
erschrecke nit. Glaubt ihr an GOTT/ so
glaubet auch an mich. In meines Vatters
haus seynd vil wohnungen zc. Wann/ vnd
warumb Christus seine liebe Jünger/ nit nur die
zween/ Philippum vnd Jacobum/ deren Fest
wir auff heut halten/ sonder auch die anderen
Neun (dann Judas war diß mal nit bey ihnen/
sonder albereit hin gangen den Herren zu verra-
then) mit disen worten getröset habe/ ist diß die
Antwort:

Was sich
im letzten
Abendmal
Christi ver-
lossen.

Im letzten Abendmal so der Herr mit seinen
Jüngern zu Jerusalem gehalten/ wenig stun-
den vor seinem tod/ do er sich mit seinen Jün-
gern zu tisch gesetzet/ das Jüdisch Osterlamb mit
ihnen gessen/ vom tisch widerumb auffgestan-
den/ seinen Jüngern die füß gewaschen/ wider-
umb zu tisch gessen/ sich selbst/ vnder gestal-
ten Brot vñ Wein/ seinen Jüngern zur Speiß
vnd tranck gereicht/ fahet er an zu handeln von
seinem Verräther/ von seiner vnd ihrer ver-
folgung/ von seiner vnd ihrer verlassung/ von
seinem vñ ihrem tod/ vnd spricht vnder andern
zu ihnen: **Wahrlich wahrlich sage ich euch: Ei-**
ner vnder euch wirdt mich verrathen. Vnd:
Ich binn noch ein kleine zeit bey euch. Ihr wer-
det mich suchen/ vnd wie ich zu den Jüden ge-
sagt hab/ Wo ich hingeh/ da könt ihr nit hin

Joan. 13.

Christus zu
seinen Jün-
gern.

kom-

kommen. Vnd: Ich gehe hin zu deme der mich
 gesandt hat. Vnd: Ich werde fort mehr nit vil
 mit euch reden. Vnd: So euch die Welt hasset/
 so wisset das sie mich vor euch gehasset hat. Vnd:
 Haben sie mich verfolget/ so werden sie euch
 auch verfolgen. Das ihne Petrus verleugnen/
 alle andere Jünger aber verlassen werden. Das
 sie nit allein auß den Schulen der Jüden auß-
 geschlossen/sonder von ihnen auch getödtet wer-
 den ic. Vnd dergleichen mehr hat der Herr sei-
 nen Jüngern domaln vorgesagt/ darüber dann
 die Jünger/ so noch schwach vnd den H. Geist
 nit empfangen hetten/ sehr bekümmert vnd be-
 trübt seynd worden/ befragten sich vnder einan-
 dern: Wer der Verräther sene? Wo dann der
 Herr hin gehen wölle? Sie wölten ihne nit we-
 der verleugnen noch verlassen/ sonder mit ihme
 in den tod gehn/ welchs doch hernach/ als es an
 einen ernst gangen/ nit geschehen. Entsetzend
 sich auch gar sehr vber disen worten/ das nit al-
 lein ihr Herr Christus/ sonder auch sie selbst
 vil Peyn vnd Marter/ ja endtlich auch den bit-
 tern tod leiden soltē. Vnd diß so vil desto mehr/
 weil sie gesehen (als Joannes der heilig Euan-
 gelist/ so domaln am tisch gefessen/ vnd alle
 Wort Christi gehört/ seine Werck gesehen/ be-
 zeugt) das IESVS selbst im Geist betrübt
 war/ Welches er hernach mit außdruckentlichen
 worten bekennet/ vnd im Garten zu ihnen ge-
 sagt hat: Mein Seel ist betrübt biß in den tod.
 Auff das aber seine liebe Jünger/ auß diser sei-
 ner Valetpredig vñ trauriger vorsagung ihres

Die Jün-
ger vnder-
einander.

Jesus im
Geist be-
trübt.

Apostel wa-
ren schwach
ehe daß sie
den H. Geist
empfangen
haben.

Wirkung
des heiligen
Geists.

übel haltens/ vnd verfolgung/ nit so gar vnd zu vil bekümmert/ betrübt/ kleinmütig oder verzagt würden/ tröstet er sie widerumb. Dann ihme/ dem Herren/ nit vn bewust gewesen/ daß seine Jünger noch schwach/ den H. Geist noch nit empfangen/ vnd sich/ wie andere Menschen/ menschlich vnd fleischlich/ nit darumb allein/ daß er jekund von ihnen scheiden/ den tod leiden soll vnd will/ sonder auch vber einem jeden drau wort ihrer künfftigen verfolgung vñ tod/ leichtlich entsetzen vñ fürchte. Spricht derhalben der Herr zu ihnen: **Euer Herk erschrecke nit.** Als wolt der Herr zu ihnen gesagt haben: Es ist wol wahr/ daß ich vnd ihr vil Peyn/ Marter/ vñ endlich auch den tod leidē müssen: Ihr solt aber darumb nit erschrecken/ noch euch vor denen/ so euch den leib tödten/ aber der Seel nit schaden können/ fürchten. Ich will euch nit verlassen/ in verfolgung/ in euer not noch Tod/ vnd in kurzer zeit will ich sampt dem Vatter/ euch/ den H. Geist senden/ der soll euch nit allein lehren was ihr reden vnd antworten solt/ sonder euch auch dermassen im Glauben stercken/ euer Liebe in mich also enkünden/ zur bekantnuß meines Namens vnd Catholischen Glaubens/ vor Jüden vnd Heyden/ so begirig vnd eyferig machen/ daß ihr euch freuwen werdet/ verfolgung/ Peyn/ Marter vnd tod vmb meines Namens willen leiden. Er/ der H. Geist/ soll euch auch in euer Marter also beystehn/ daß ihr alle Peyn vnd tod/ leichtlich vnd ohne sonderliche schmerzen/ leiden solt.

So ist auch nit nörtig/ diser vrsach/ so hefftig bekümmert vnd traurig werden/weil ich gesagt/ daß ich von euch gehn werde. Dan ich sage euch die warheit: Ob ich gleich heut dise nacht von euch genommen/ gefangen/ hingefürt vnd morgen getödt werde/ so werde ich doch nit todt bleibē noch im Grabe verwesen/ sonder am dritten tag will ich widerumb aufferstehn/ lebendig auß dem Grab herfür gehn/ vnd zu euch kommen/ euch mehrmaln erscheinen/ mit euch reden/ handlen vnd wandlen/ essen vnd trincken. So ist's auch vnnötig daß ihr darumb traurig werdet/ weil ich am vierzigsten tag nach meiner Aufferstehung/ widerumb von euch zu meinem Himmelischen Vatter gehe/ seitemaln ich nit also noch darumb hingehn werde/ als solt ich euch verlassen. Mein. Ich bleibe bey euch biß zum Ende der Welt. Ja nit/ gut vnd notwendig ist es euch/ daß ich hingehe. Erstlich diser vrsach: Daß ich euch/ sampt dem Vatter/ den H. Geist sende/ welcher zu euch nit kommen wirdt/ wann ich nit hingehe. Darumb auch/ daß ich euch/ vnd allen frummen Christgleubigen Menschen/ das ort bereite droben im Hümel/ alda ihr bey mir Ewiglich wohnen solt: welchs ort/ ob es gleichwol von erschaffung Himmels vnd der Erden/ euch vermeynt vnd verordnet/ muß es doch erst durch mein Himmelfart eröffnet/ vnd euch zur wohnung taugenlich gemacht werden.

Am dritten tag ist Christus widerumb auffersstanden.

Joan. 14. 15. 16. Nutzbarkeit der Himmelfart Christi.

Matth. 23.

Disem allem/ ihr meine liebe Jünger/ wie jesu hnd gesagt/ ist also vnd nit anderst/ solt hieran auch genzlich nit zweiffen. Dann/ glaubet ihr

**Apostel ge-
porne Jüde.** an GOTT/ so glaubet auch an mich. Daß
mir ist nit vn bewust/ vnd ihr bekennt auch gern/
daß ihr geporne Jüden/ vnd also auß der zal der
jenigen seyd/ so an vnd in GOTT den Vatter
glauben/ welcher mit Mose vnd andern Pro-
pheten geredet/ euch die zehen Geyott vnd das
Gesaz geben hat. Wann dann nun GOTT der
Himmelisch Vatter/ euch/ jekund diß alles was
ihr alda von mir gehört/ gesagt hette/ weiß ich
wol/ ihr würdet an seinen worten nit zweiffen/
seiternaln ihr in ihn glaubt/ vnd wißt/ daß er nit/
weder liegen noch betriegen kan/ vnd diß alles ist
billich vnd recht. Weil aber deme also/ so glaubt
auch an vnd in mich nit weniger als in GOTT
den Vatter/ dann ich bin sein Einiger/ Eingeborner/
Natürlicher Sohn/ ihme vnd dem H. Geist in allen dingen gleich/ Ja sampt ihme vnd
dem H. Geist ein wahrer/ Ewiger GOTT/ also/
daß ich eben so wenig als er liegen oder betriegen
kan. Solt derhalben ihr an allem deme/ so ihr
jekund vñ jeder zeit von mir gehört/ nit zweiffeln/
sonder ebenmessigen glauben geben/ als wann
euchs GOTT mein Himmelischer Vatter selbst
gesagt hett.

**Christus ist
ein wahrer
Natürlicher
Sohn
Gottes.**

Auff daß aber weder seine Jünger/ noch je-
mädts anders/ so vil/ oder etliche Peyn/ Marter
vnd er wann auch den tod/ vmb Christi/ des Ca-
tholischen Glaubens/ vnd vmb der Warheit wil-
len leidet/ nit er wann vermeynen möchte: GOTT
werde ihme kein belohnung außtheilen/ sehet der
Herr als bald dise wort hinzu: In meines
Vatters Haus seynd vil wohnungē. Wo

es andst were/wolte ich euchs gesagt habē.
 Seines Vatters Hauß ist das Himmelreich/
 die Wohnung der Ewigen frewd vnd Selig-
 keit. Darinnen ist GOTT mit seiner Glory vnd
 Herrligkeit/darinnen ist MARIA die H. Mutter
 GOTTES. Darinnen seynd die Engel GOT-
 TES. Darinnen seynd die Apostel/ H. Marty-
 rer/ Weichtiger/ Jügel/ Frauen/ Witfrauen/
 sampt den jenigen so hie auff Erden im Ehtand
 gelebt/ Catholisch glaubt/ vnd Christlich gestor-
 ben seynd. Ob gleichwol dise alle Selig seynd/
 vnd ohne vnderlaß das H. Angesicht GOTTES
 schauen/so seynd doch neun Chör der Engeln/
 also/ daß immer einer höher dann der ander ist.
 Also seynd auch alle Heiligen eigentlich vnd we-
 sentlich Selig/ aber an der zufelligen Beloh-
 nung vnd Gaben seynd sie einandern nit gleich.
 Der jenig/ so neben dem Catholischen Glauben/
 sehr geliebt/ vil gelitten/ vnd in seinem leben vil
 guts gethon hat/ der hat im Himmel einen an-
 dern Sitz/ ein höhere wohnung/ vnd grössere
 fron/ daß der ander/so auch Catholisch/ frumb
 gewesen ist/ aber doch nit vil gelitten vmb Christi
 willen/auch so vil guts/ als jener/ nit gewirckt
 in seinem leben. Vnd die gelehrten/sprich: Da-
 nit/die Gerechten/sprichet der Weiß Man vnd
 Christus/ werden leuchten wie die Sonn vnd
 Sternē in ihres Vatters Reich. Vnd/wie der
 H. Paulus lehret; Ein andere klarheit hat die
 Sonn/ein andere klarheit hat der Mond/ ein an-
 dere klarheit haben die Sterne/denn ein Stern
 hat einen vnder schid von den anderen Sternen

Wer im
 Hauß Got-
 tes sey.

Neun Chör
 der Engel.

1. Cor. 12. 15.

Dan. 12.

Sap. 7.

Matth. 13.

1. Cor. 15.

Ein Heilig
 hat mehr
 klarheit dan
 der ander.

Am Feyertag der H. Aposteln

in der klarheit. Also auch die Auferstehung der todten zc.

Nach deme
wir hie Rit-
terlich sech-
tē/ also wer-
den wir dort
herrlich ge-
krönt.

Will verhalten vnser lieber Herr Christus/
seinen Jüngern mit disen Worten: In meines
Vatters Haus seynd vil Wohnungen zc.
dis anzeigen: Daß sie/ die Apostel alle/ samptlich
auch sonderlich/ ein hohe oder nidrige Wohnung
im Himmel bekommen sollen/ nach deme sie hie
auff Erden vil oder wenig/ willig oder vnwillig/
ymb seines heiligen Namens willen leiden wer-
den. Die geringste Peyn vnd Marter/ geschwi-
gen des Tods/ solle ihne neben besizung der Sel-
ligkeit/ mit zufelligen Gnaden/ Gaben vñ Kron
nit ohne belohnet bleiben. Also auch zu antwor-
ren von anderer ihrer mühe vnd arbeit/ lehren
vnd Predigen/ ermanen vnd bekeren. Sie sollen
nit traurig / sonder auß vorsagung diser ihrer
verfolgung frölich werden/ vnd wissen: Daß al-
le Peyn/ Marter vnd Tod hie auff Erden gelit-
ten/ gegen der Belohnung in seines Vatters
haus/ nichts sene.

Was bißhero/ ihr Geliebten in GOTT/ von
den Aposteln Christi gesagt ist worden/ soll auch
von allen vnd jeden Christen/ so jeder zeit gelebt/
noch leben/ vnd forthin biß zum Jüngsten tag le-
ben werden/ verstanden vnd geredt seyn. Das
wissen wir wol/ vnd zwar auß dem H. Mund
Christi selbst: Daß wann wir ihme nachfol-
gen wollen/ müssen wir vnser Creuz auff vns
nehmen vnd ihme nachfolgen: wo nit/ so seynd
wir seinen nit wirdig. So kan es auch weder der
Teufel noch die Welt leiden/ daß die recht gut
Catho

Matth. 16.

Mar. 8.

Luc. 9. 14.

Catholischen Christen/ohne anfechtung/verfol- ^{Wahr}gung/Peyn/Marter vñ Tod leben könden/son- ^{Christe müs-}der müssen immer/ jekund vom Fleisch/ jekund ^{sen immer}vom bösen Geist/ jekund von der Welt/ von den ^{verfolgung}Tyrannen/Rehern/verfolgung leiden: müssen ^{leiden.}eintweder Christum vñ den Catholischen Glau-
ben verleugnen/ oder sich lassen stöcken vnd blö-
cken/ Martern vnd tödten. Will dann nun je-
mandts vnder vns/der Ewigen verdänuß vber-
haben/ der Ewigen Seligkeit theilhafftig/vñ de-
sto einer höhern Kron in vnfers Vatters hausß
gewertig seyn/ der muß auff der bekätnuß Chri- ^{Verharren}sti vnd des Catholischen Glaubens/ biß an das ^{biß zum ende}ende seines lebens verharren/ vnd solte er auch ^{de.}den bitteren tod leiden müssen.

Wie sich aber hierzu ein Catholischer Christ
fernere verhalten möge vnd soll/ wollen wir je-
kund/ im andern vnd letzten theil vorhabender
Predigt/lehren vnd hören.

Zeweil vil/ vnd sondlich die Gnad
vnd beystand GOTTES/ zur Gedult
in trübsal/ zur bestandthafftigkeit in
bekantnuß des Christlichen Namens vnd Ca-
tholischen Glaubens/ erfordert wirdt/ reiket
vns Christus der Herr/ ja fordert von vns/
wir sollen ihne sicherlich vnd fecklich vmb hilff/
Gnad vnd Beystand anschreyen/ verspricht
beyneben vns zu hören/ erhören/ vnd gern helf-
fen/ vnd diß seynd seine wort vnd Beschluß
diß heurigen Euangelij: Vnd alles das ihr
den Vatter in meinem Namen bitten wer-
det/ das will ich thun/ auff daß der Vate

In 8 Creuz
mochen.

Im Namen
Gottes bit-
ten.

In allem
vnserm an-
ligen sollen
wir zu Gott
leuffen.

Verstendtg
soll man von
Gott bit-ten.

ter gepreiset werde in dem Sohn. So ihr mich etwas bittet in meinem Namen/ das wil ich thun. Was im Namen GOTTES bitten heisse vnd seye/ haben wir an einem anderen ort gehandelt/ ist derhalben alda solchs widerumb zu erholen nit von nöten/ gnug ist mit zweyen worten zu meldē: Daß der jenig im Namen GOTTES bittet vnd bittet/ der nit begert/ einweder was wider den Willen GOTTES/ seines Nechsten/ oder wider seiner Seelen heil ist. In vorhabender Materij aber/ danon wir auff heut handlen/ thun wir nit/ weder wider den Willen GOTTES/ nit wider die Liebe vnser Nechsten/ noch wider vnser Seelen heil/ wañ wir nemlich in verfolgung der Tyrannen/ Türckē/ Keger/ so vns vom Christlichen Glauben/ vnd der bekantnuß des heiligen Namens Christi/ abwendig zu machen/ mit worten/ wercken vnd Schwerdt/ vnderstehn/ zu GOTT lauffen/ vmb hilff/ Rettung/ beystand/ Gnad/ vnd behütung seiner Christlichen Kirchen/ schreyen: Auch nit/ wann wir in andern anligen/ als in Armut/ Kranckheit/ traurigkeit/ zu ihme kommen/ ihne als vnsern barmhertzigen vnd gütigen Vatter/ bitten/ er wölle vns vor allem vbel behüten vnd entledigen.

Doch muß in disen beiden/ nämlich in verfolgung wegen des Catholischen Glaubens/ vñ anderer täglichen trübsal/ vernünfftig/ verstendig/ mit gutem vndercheid vmb hilff von GOTT gebetten/ oder nit gebetten werden.

Was das erste Pünctlin/ als die verfolgung wegen

wegen des H. Namens Christi/belange/kan vnder andern auff zweyerley weiß vnd wege/wider den Willen GOTTES gehandelt werden.

Erstlich: Do sich jemandis willig vnd mutwillig/ohne not vnd nutz der Christlichen Kirchen/soll sich niemandis in gefahr vnd hand des Türcken/ Tyrannen oder Keker geben wolt/darumb/das er möchte wegen des Christlichen Glaubens gemartert vnd getödt werden. Ob einen solchen Menschen hierzu/der gute Geist oder sein eighum sucht vnd Ehrgeizigkeit getrieben hette/könte nit gewiß angezeigt werden. Vnd wann dis recht/löblich/vnd Christo angenehm were/so könnten sich in einem Monat/alle Catholische Christen in die hand vnd Schwerdt des Türckens/anderer Mamelucken vnd Keker ergeben. Dis aber hiesse den Christlichen Glauben vnd die Christliche Kyrch nit erweitert/sonder in einem Monat aufgelescht / vnd also / zweifels ohne/GOTT mehr erzürnt dann geliebt. Vnd ist also nit nötig/das man GOTT bitte/vns in die hand der Feind des Christlichen Glaubens zu geben darumb das wir Marterer werden / seitemaln wir auch sonst wol könden selig werden. Also seynd auch die zwölff Apostel/zween vnd sibentzig Jünger/ein gute anzahl vnder den fünffhundert Brüdern / vnd sonst vil tausent Lehrer vnd Prediger/in die länder der Unglaubigen/Juden vnd Heyden gezogen / nit eigentlich dieser vrsach das sie sich mutwillig in Peyn/Marter vnd Tod ergeben/sonder/das sie lehren/Predigen/ vnd vil volcks zu Christo bekeren wollen.

So lesen wir auch in H. Schrift mehrmaln/
daß Moses/ Josua/ die Machabeer/ das Volck
vnd Glauben GOTTES zu erhalten/ wider die
Vnglaubigen gestritten haben/ vnd diß nit allein
auff sonderlichem gefallen/ sonder auch auß be-
uelch GOTTES.

Vnd das noch mehr ist/ kan vnd mag auch
(meines erachtens) ein Christ/ so jezund den
Türcken/ Tyrannen oder Keker vor augē siher/
weist daß er sterben muß/ kan aber noch entwei-
chen/ lenger bey seinem leben vnd ein Catholi-
scher Christ bleiben/ so soll er / sprich ich/ auß-
reissen/ vnd sich nit willig noch mutwillig in ge-
fahr begeben/ auff daß er nit darinnen verder-
be. Es were denn sach/ daß ihme GOTT ein
andere offenbaret hette / nemlich/ daß er eben
jezund vnd alda leiden müsse/ oder/ daß er jezund
mit seiner Bekantnuß Christi/ Peyn/ Marter
vnd Tod/ einen mercklichen nutz schaffen könnte/
zur sterckung vnd bekerung viler leut. Christus
vnsrer Herr/ ist vns desse selbst ein Exempel/
dann auch er/ sampt seiner lieben Mutter vnd
dem Joseph/ die verfolgung Herodis Aescaloni-
te geflohen ist. Widerumb zur anderen zeit/ als
ihn die Jüden auff einen Berg gefürt/ auff daß
sie ihne hinab stürzten/ gieng er mitten durch
sie hin. Zum dritten/ als sie ihn steinigen wolten/
gieng er zum Tempel hinauß / vnd verbirget
sich. Der Engel selbst fület Petrum den ober-
sten vnder den Aposteln auß der hand vnd fer-
cker Herodis Agrippe. Der H. Paulus liesse
sich zu Damasco in einemkorb vber die Mau-
ren

Ecc1.3.

Matth.2.

Luc.4.

Joan.8.

Acor.12.

2,Cor.11.

ren hinauß/ vnd entranne dem Landtuoht des Königs Arete/ der ihn greiffen wolt. So hat der Herr selbstē gesagt: Wann sie euch in einer Stadt verfolgen/ so fliehet in ein andere. Soll derhalben niemands GOTT bitten/ daß er ihne den Vnglaubigen in die hand geben wölle: solle sich auch keiner selbstē willig vnd mutwillig in gefahr begeben/ er wisse daß auß sonderlicher offenbarung/ daß es eben jekund vnd also der will GOTTES seye.

Fürs ander/ do aber jemandts von Vnglaubigen/ von Ruckern/ gefangen vnd zu verleugnung des H. Namens Christi vnd des Christlichen Catholischen Glaubens gehalten würde/ soll er sich gänglich in den willen GOTTES begeben/ vnd in seinem Namen von ihme bitten vnd begeren/ daß jekund sein Göttlicher Will geschehē soll. Seye es der Will GOTTES/ daß diser kelch von ihme genommen soll werden/ vnd er seinen Namen lenger bekennen/ mehr gutes hie auff Erden thun/ mit ermanē/lehren/ Schreiben/ Predigen lenger der Kyrch vorstehn soll/ im Namen GOTTES/ so seye er gehorsam vnd willig lenger vnd vleissiger in seinem Weinberg zu arbeiten. Wo nit/ sonder sey es sein Göttlicher Will/ daß er eben jekund seinen Namen vnd Glauben bekennen/ vnd deromegen sein Blut vergiessen vnd den bitteren tod leiden soll/ so seye er auch willig/ geneigt vnd bereit/ jekund zu sterben. Allein bitte er GOTT ganz Gott bitten vnderthenig vmb beystand/ seinen Segen vnd vmb bey- Gnad/ daß er kecklich/ vnerschrockē vñ bestandt- stand.
hafftig/

hafftig/ seinen H. Namen vnd Glauben bekennen/ vnd allerley Peyn/ Marter vñ tod/ gedultig leiden/ Christlich sterben/ ewig selig werden/ vnd droben ins Himmel ein desto höhere tron erlangen möge. Also soll; jener GOTT nit bitten/ daß er ihne/ ohne vrsach/ in die hende seiner Feind geben soll: Diser nit/ daß ihn GOTT wider seinen Göttlichen Willen darauß nehmen soll/ auff daß sie all beide im Namen GOTTES betten vnd bitten.

Ebenmessig möchte auch (wann dise Predig nit zu lág wurde) von andern/ wo nit durchauß/ doch eins theils/ so in Trübsal/ Armut/ Kranckheit/ angst vnd not/ widerwertigkeit vnd andern anligen beladen/ geantwortet werden. Dan auch

Im Namen
Goues bitten.

Bitten vmb
gedult.

ein guter theil derselbigē/ GOTT/ in seinem Namen/ etwann auß hinlessigkeit/ etwann auß nit achtung/ verachtung/ Bnglauben/ vmb behütung vor allem vbel/ vmb das Brot vnd tägliche Narung/ vmb abwendung der Kranckheiten vnd anderer Beschweruß nit bittet. Der ander theil aber/ bittet nit vmb Gedult/ solche Kranckheit/ Armut vnd andere Nuten/ so ihnen GOTT wegen ihrer Sünd geschickt/ zu leiden vnd endlich selig werdē. Aber von disem kan sekund nach notturfft/ seitemaln ohne das dise Predig albereit ihr gebürliche lerg erreicht hat/ nit gehandelt werden/ zu seiner zeit soll es geschehen.

Mit wenig worten wollen wir zum Beschluß diser Predig vermelden/ wie sich dise zween H. Apostel Philippus vnd Jacobus/ deren Fest wir auff heut halten/ hierinnen verhalten haben.

Phi

Philippus war von Bethsaida in Galilea gepo-
ren/vnd alters halben der jüngst vnder den Apo-
steln/hat nach der Apostel theilung zwentzig Jar
in Sythia geprediget / vnd die Barbarischen
Scythen schier all zum Christlichen Glauben
bekert/vñ Kyrche gebawet/vñ Priester gewey-
het / den Abgott Martis umbgeworffen / das
Creuz auffgericht/einen giftigen Dracken auß-
getilget. Darnach ist er in Asien gen Hierapolis
gezogen/daselbstē die Ketzerey der Ebioniter auß-
gelescht/auch seinen tod siben tag vor an gewist.
Ist von den Vnglaubigen gefangē/gecreuzigt/
auch am Creuz versteinigt worden/vñ also zum
Herren gefaren im siben vnd achtzigsten Jar sei-
nes alters 2c.

Jacobus (welcher auch ein Bruder des Her-
ren genennet ist worden/seitemaln sie/dem fleisch
nach/auf zweyen Schwestern geporen/vnd ein-
andern auch nit vngleich gesehen haben) der
Minder/ist von Mutter leib geheiligt gewesen/
hat nie keinen Wein/ noch tranck so truncken
macht/getruncken/die haar nit geschoren/ war
allein mit einer Leinwath angethon/ vnd einer
solchen Heiligkeit/das das Volck sich trang/vnd
zanclet damit es seinen kleidsaum anrūret/hat
die erste Mess zu Jerusalem gehalten/emösig im
Gebett / hat als ein Bischoue die Kyrchen zu
Jerusalem dreissig Jar regirt. Ist endlich von
den Hohenpriestern/wegen der bekantnuß Chri-
sti/ab der zinnen des Tempels gestürzet/ vnd do
er noch für sie bettet/ ist er gesteiniget/ vnd mit
einer Färber oder Walcker stangen zu tode ge-

Philippus
von Beth-
saida.

Philippus
ist gecreuzigt
get vnd ver-
steinigt
worden.

Jacobus
ein Sohn
Alphei vnd
Marie Cleo-
oppe.

Jacobus
hat die erste
Mess zu Je-
rusalem ge-
halten.

Jacobi tod.
schla.

schlagen/ vnd bey dem Tempel begraben worden 22.

Haben also gehört/ daß sich beide gemelte Apostel diesem heutigen Euangelio durchaus gemess verhalten haben. Sie haben sich/ den Namen Christi zu bekennen/ weder vor den Jüden noch Heyden nit entsetzt/ haben sich zu leiden vnd sterben nit beschwert/ aber doch sich selbst auch mitwillig nit in gefahr begeben: do sie aber gefangen seynd worden/ haben sie Christum nit verleugnet/ auch wider seinen Willen des Todes nit begert vberhabē zu seyn/ sonder vmb beystand vnd Gnad GOTTES gebetten/ bestendig vñ willig zu leiden vnd sterben. Auff daß auch wir ihnen/ zur zeit der not/ hie auff Erden/ vñ volgendes in das Himmelreich nachfolgen mögen/ so lasset vns zu Christo vnserm Heiland also betten:

Ein Gebett
zu Christo
vnserm Her-
ren/ den künig-
sten Inhalt
dieser Predig
begreifffend.

Wir dancken dir erstlich/ O Herr
IESU Christ/ daß du in deinem
letsten Abendmal/ nit allein dei-
nen Jüngern/ sonder auch vns Christen
allen zu vor gesagt hast: Daß die rechten
Christen/ wegen deines heiligen Namens
vñ Christlichen Glaubens/ von der Welt/
von den Vnglaubigen/ Tyrannen/ Kes-
ser/ vil verfolgung/ nachstellung/ Neid/
Haf/ zorn/ Peyn/ Marter/ vnd zu zeiten
auch den bitteren Tod leiden müssen/ vnd
daneben vns getröst/ wir sollen geherzig/
vnerschrocken vnd bestandthafftig seyn.
Bitten dich derhalben gank vnderthenig/
vmb

Am tag d̄ H. Junckfrauē Walpurgē. 29.

umb sendung deines H. Geists / der uns
vns̄er Herz also erleuchten wölle / daß wir
nach dem Exempel Philippi vnd Jacobi /
deren Fest wir auff heut halten / zur selbi-
gen zeit / willig vnd biß in den tod bestendig
seyn mögen / vnd also mit ihnen selig / vnd
droben im Himmel desto einer herrliche-
ren Wohnung mögen theilhaftig wer-
den / Amen.

Am tag der H. Junckfrauen

Walpurgē / zum Theil im Eych

statter Bistumb Feyerlich.

Am 1. tag
im Meyen.

Wiff heut / nemlich auff das
Fest Philippi vnd Jacobi / so am
ersten tag im Meyen gefalle / wirdt
im löblichen vnd gut Catholischen
Bistumb Eychstat / das Fest der heiligen Junck-
frauen Walpurgē gehalten / welche ein Doch- Walpurga
ter des Engellendischen Königs Richardi / vnd eines Kö-
ein Schwester Willibaldi des ersten Bischoues nigs Doch-
zu Eychstat / vnd Wunibaldi des H. Abts zu ter.
Heydenheim / gewesen ist. Dife Walpurga war
samt ihrem Vatter / Willibaldo / Wunibal-
do / Bonifacio / Willibrordo / Wigberto / Leb-
no / Sola ꝛc. vast die erste so in Engelland / wel-
che Insel noch voller Abgötterey vnd finster-
nuß war / den Christlichen Glauben / auß ver-
kündigung vnd Predigt eines Augustini vnd
Meliti vom Pappst Gregorio Magno dahin ge-
sandt / angenommen hat / reiset volgendts samt
ihrem

30 Am tag der Junckfrauwē Walpurge.

ihrem Vatter Richardo (nach deme ihr Mutter gestorben) vnd beiden Brüdern zum heiligen Land. Nach volnbrachter Reif (Richardus ist zu Luca gestorben) wurde Willibaldus gen Eychstat vom H. Bonifacio zum Bischoue verordnet. Wunibaldus aber vnd S. Walpurg kamen an den ort in obern Francken/sekund Heydenheim genant/daselbsten ein Kloster zu Ewigem Gottesdienst auffzurichten / wie auch domaln geschehen/ alda S. Walpurg vil Junckfrauen vnder sich gehabt/vnd zu aller Gottesforcht vnd Christlichen tugenden auffgezogen hat. Vnd sie selbst hat GOTT embfig/ mit betten/fasten/ vnd andern Christliche vbungentag vnd nacht gedient/ endlich in Christo entschlaffen/ vnd im Kloster Heydenheim begraben worden. Von dannen sie/nach gar wenig Jaren/zur zeit Engarij/durch den dienst der Erzpriester Waltonis vnd Adelingi vnd der Gottliebende Luibile/mit GOTTES lob vnd danck/gen Eychstat transferirt vnd gebracht ist worden. Welche ehrliche bestattung hernach/ Erkenboldus (sonsten Erckenwaldus) der achttest Bischoue daselbsten/zur zeit des Königs Arnulphi/vmb das 890 Jar würdiglich geachtet vnd geziret hat/im Kloster zu Eychstat S. Walpurga genat/alda GOTT anfenglich vil Wunderzeichen gewirckt/ fleusst noch algemach Del auß ihrem Grab vñ Reliquien/ so auß Wirkung GOTTES/ zu vilen dingen nützlich vnd frefftig ist ic. Dise H. Walpurg wölle bey GOTT vnser Fürsprecherin seyn/auff daß auch wir hie auff Erden/

Anno 760.

Munsterus
vermehne
S. Walpurg
seyne in
ihrem Kloster
zu Eychstat
gestorben.
Lib. 3. Col.

†

An Erfindung des H. Creukes. 31

Erden/ neben dem Catholischen Glaubē/ Gottes-
fürchtig leben/ Christlich sterben/ vnd endlich sel-
lig werden mögen/ Amen.

Euangelium vnd Predigen mögen
auff heut gebraucht werden/ so an
S. Künigūdis/ Margarethe/ oder
Katharine/ gesetzt seynd worden.

Am herrlichen tag der Erfindung Am 3. tag
im Meyen.
des heiligen Creukes/ Euange-
lium Ioan. iij.

In d zeit war ein Mensch
vnder den Pharisern/ Ioan. 7. e
19. d
mit namen Nicodemus/
ein oberster vnder den Jū-
den. Der kam zu I E S V
bey der nacht/ vnd sprach
zu ihm: Meister/ wir wissen/ daß du bist ein
lehrer von GOTT kommen. Dann nie-
mand kan die zeichen thun/ die du thust/ es Ioan. 9. b
sey dann GOTT mit ihm. IESVS ant-
wortet vnd sprach zu ihm: Warlich war-
lich sage ich dir/ Es sey denn daß jemand
von neuwem widerumb geboren werde/
kan er das reich GOTTES nicht sehen.
Nicodemus sprach zu ihm: Wie kan ein Ioan. 4. b
6. f
Mensch geboren werden/ wenn er alt ist?
Kan er auch von neuwem in seiner Mut-



Joā. 4. b 7. b
Tit. 3. a

Rom. 8. a

ter leib gehen/ vnd widerumb geboren werden? IESVS antwortt/ Warlich warlich sage ich dir: Es sey denn/ daß jemand geboren werde auß dem Wasser vnd heiligen Geist/ so kan er nit eyngehen in das Reich GOTTES. Was vom fleisch geboren wirdt/ das ist fleisch: vnd was vom Geist geboren wirdt/ das ist Geist. Laß dichs nit wunderen/ daß ich dir gesagt hab/ ihr müßet von neuwem geborē werden. Der wind bläset (oder wehet) wo er wil/ vnd du hörest sein wehen (oder sauffen) wol: aber du weißt nit von wannen er kompt/ vnd wohin er feret. Also ist ein ieglicher der auß dem Geist geboren ist. Nicodemus antwortt/ vnd sprach zu ihm: Wie mag solchs geschehen?

schehen? I E S V S antwortt vnd sprach zu ihm: Bistu ein Meister in Israel/ vñ weisest das nicht? Warlich warlich sag ich dir/ Wir reden das wir wissen/ vnd zeugen das wir gesehen haben/ vnd ihr nempt vnser zeugnuß nit an. Glaubt ihr nit/ wenn ich euch von irdischen dingen sage/ wie würdet ihr glauben/ wenn ich euch von Himlischen dingen sagen würde? Vnd niemand steigt auff gen Himmel/ denn der vom Himmel herab kommen ist / nemlich des Menschen Sohn/ der im Himmel ist. Vnd wie Moses die Schlangen in der wüste erhöhet hat/ also muß des Menschen Sohn erhöhet werden/ auff daß ein jeglicher der an ihn glaubt/ nit verloren werd/ sonder das ewig leben hab.

Ephes. 4. 9

Num. 21. 6

Joan. 8. 6

12. D

Wie Moses die Schlangē in der wüste erhöhet/ also muß des Menschen Sohn erhöhet werden. Joan. iij.

AS wir Catholische Christen auff heut für einen Feyertag haben/ Warumb auch gehörtes Euangelium auff heut geprediget werde/ ist diß die Antwort: Auff heut haben wir den tag der Erfindung des heilige Creudes/ daran Christus I E S V S/ für die Sünd der ganken Welt gelitten hat / daß nämlich

c 2 auff

Helena hat
das Creuz
erfunden.

auff disen heutigen tag / vor dreyzehenthalb-
hundert Jaren / die heilige Helena / ein Mutter
des Keyfers Constantini / als sie auß eyngebung
des H. Geists gen Jerusalem kommen / die Jü-
den / nach dem jenigen ort alda Christus gecreu-
ziget worden / gefragt / das heilig Creuz daran
er gelitten (welches die Gottlosen Jüden sampt
den Regeln vnd Titul / auch beide Creuz der
Schecher so mit ihme gecreuziget worden / da-
selbsten tieff in die Erden begraben / auff daß es
von den Christen / nit / weder gesucht / gefunden /
noch mit gebürlicher ehr geehrt möcht werden)
gesucht / auß anweisung eines Jüden / so Judas
geheissen / vñ hierzu mit Gefencnuss / hunger vnd
durst genöthigt / gefunden / vnd durch aufferwe-
ckung einer Edlen Frauen / so eben domaln ge-
storben / von den zwey Creuzen der Mörder / so
mit ihme gecreuzigt / vnder schidet / ehrlich vnd
herrlich sampt den Regeln / vnd Titul daran ge-
schriben : I E S V S von Nazareth ein König der
Jüden / bey zwey hundert vnd drey vnd zwentzig
Jaren nach Christi Sepurt / erhoben / eins theils
ihrem Sohn zugeschickt / etlich zu Jerusalem ge-
lassen / den Abgöttischen Tempel Veneris / so die
Gottlosen daselbsten (die Christen vom selbigen
ort abzuschrecken) gebauwet / verstorret / vñ einen
Christlichen Tempel an die statt auffgerichtet ic.
Gehörtes Euangelium wirdt auff heut gepre-
digt / seitemaln des heiligen Creuzes darinnen
von Christo selbst (wiewol nit mit eignem Na-
men) meldung geschicht / do er gesagt: Gleich wie
Moses die Schlangen in der Wüsten erhöhet
habe /

habe/ also müsse auch er/ nämlich am Creuk/ erhöhet werden.

Von diesem allem wollen wir in vorhabender **Thellung** Predigt weitläuffiger handeln/ vnd nämlich in **vnd Inhalt** zween Theil theilen. Im ersten/ handeln wir **dieser Pre-** von der Schlangen Moses. Im andern/ vom **dige.** Creuk Christi/ was/ vnd wozu diser jedes auffgerichtet/ vñ genuket habe. Hierzu wölle mir vnd euch **GOTT** seine Gnad verleihen zc.

Was der Herr Christus ein langes vnd ernstlichs Gespräch gehalten mit Nicodemus einem Obersten der Jüden so bey der nacht zu ihme kommen/ von der Widergespurt/ das ist/ vom H. Tauff/ vnd andern mehr/ spricht er endlich zu ihme: Wie Moses die Schlangen in der Wüste erhöhet hat/ also muß des Menschen Sohn erhöhet werden. Von dieser Schlangen Mose geben wir auß heiliger Schrift disen bericht: Vnd das **Num. 21.** Volck (die Kinder Israel) gewann ein verdrieff vber die arbeit/ vnd das ziehen/ vnd redet wider **GOTT** vnd Mosen/ vnd sprachen: **War. Kinder Is-** umb hastu vns auß Egypten gefürt/ daß wir **rael mur-** stürben in der Wüste? Denn es ist kein Brot **meln wider** noch Wasser hie/ vnd vnser Seel hat jekund **Gott vnd** keinen vnwillen (oder greuwel) vber diser vnacht- **Mosen.** parlicher speiß. Darumb sandte **GOTT** der Herr fewrige Schlangen vnder das Volck/ die bissen das Volck/ daß ein groß Volck in Israel starb. Da kamen sie zu Mose/ vnd sprachen: Wir haben gesündigt/ daß wir wider den Her-

Moses richtet ein schlangen auff.

ren vnd wider dich geredet haben. Bitte den Herren/das er die Schlangen von vns wende. Moses der batte für das Volck. Do sprach der Herr zu Mose: Mache dir ein ärinne Schlangen/ vnd richte sie zum zeichen auff. Wer gebissen ist/vnd sihet sie an/ der soll leben. Do machte Moses ein ärinne Schlangen/ vnd richtet sie auff zum zeichen. Vnd wann jemandts dise Schlangen gebissen hetten/ so sahen sie die ärinne Schlangen/vnd wurden gesundt/ vnd bliben lebendig.

Matth. 12.
Jon. 3.

Exod. 16. 17.
Joan. 6.
1. Cor. 10.

Genes. 14.
Psal. 109.
Heb. 9.

Hieraus lernen wir erstlich: Daß gleich/wie schier alles so sich mit Christo vnserm Herren im Neuwen Testament verlossen/im alten Testament/eintweder sein Weissagung oder Figur vnd bedeutnuß gehabt hat/das es eben also auch mit seinem Creuxopffer geschaffen sey. Jonas/ so drey tag vnd drey nacht im Bauch des Walfisches gelegen/ ist ein vorbedeutung der Begrebnuß Christi gewesen. Vnsers wahren vnd heiligen Sacraments des Altars/ des wahren Fleischs vnd Bluts Christi vnder gestaltẽ Brot vnd Weins/ ist das Jüdisch Himmelbrot/ so ihnen GOTT vom Himmel in die Wüste hat regnen lassen/vnd das Felsenwasser/ ein Figur vnd vorbedeutung gewesen. Vnsers heiligen Messopffers ist ein Figur gewesen das Opffer des Königs vnd Priesters Melchisedechs/ (wie dan auch Christus ein Ewiger Priester nach seiner ordnung ist) welches Brot vnd Wein war/ Das Opffer Christi aber am Creux ist nach der ordnung Aarons ic. Also solte vnd muste auch die

die auffrichtung vnd erhöhung Christi vnser
 Herren / ihren Schatten / Figur / vnd Vorbe-
 deutung haben im alten Testament / näm- Num. 21.
 lich die erhöhung der Schlangen von Mose an Joan. 3.
 einem holz. Vnd daß deme also / bezeugt Chri-
 stus selbstn mit obgemelten worten Gleich
 wie Moses die Schlangen erhöhet / also
 muß des Menschen Sohn erhöhet wer-
 den.

Fürs ander lernen wir auch auß disen we-
 nig worten: Daß Christus vnser lieber Herr /
 nit ohne alles gefahr / oder auß anrichtung
 vnd schickung der Jüden / sonder auß ordnung
 vnd vorwissen GOTTES / eben also vnd am
 Creuz hat leiden sollen vnd wollen: derhalben
 er selbstn / vns Christen zu mehrern Trost
 vnd sterckung vnser Glaubens in ihn / solchs
 nit allein auff heut dem Nicodemo / sonder auch
 zu andern zeiten seinen Jüngern vnd vns vor-
 gesagt hat / auß daß / wann solchs geschehen
 werde / (wie dann vor 1542 Jaren geschehen
 ist) sich niemands an ihme / als solte er nit
 der wahre Sohn GOTTES seyn / zweifeln / son-
 der wissen solt / daß es also im alten Testament /
 nit allein weißgesagt / sonder auch durch dise
 Schlangen / so in der Wüste von Mose erhö- Num. 21.
 het / vorbedeutet / vnd von ihme selbstn weißge- Joan. 3.
 sagt worden sey.

Zum dritten sollen wir Christen auch alda
 lernen: Daß / wann wir nit mit den Jüden /
 von GOTT durch fewrige Schlangen / vergiff-
 te Luft / Pestilenz / wilde Thier / Türcken / Th-

rannen / Reker / Krieg / Theurung / Hunger /
 Durst vnd andere Nuten gestrafft wöllen wer-
 den / so müssen wir auch mit ihnen nit wider
 GOTT / nit wider sein Wort oder Werck / thun
 vnd lassen / murren: sonder ihme in allen dän-
 gen recht geben / wie er dann nit vnrecht thun
 kan / vmb alle gutthaten ihme möglichsten danck
 sagen / vmb alles so wir zu Leib vnd Seel bedürf-
 fen / vnderthenig bittē / auff daß er vnser GOTT
 vnd getreuer Vatter / wir aber seine gehor-
 same kinder erfunden werden. GOTT der
 Himmelisch Vatter hatte die kinder Israel
 auß Egypten land / auß dem gewalt vnd schwe-
 ren Dienstbarkeit Pharaonis erlöset / durch
 das Rote Meer gefürt / vnd nun jekund ihnen
 in der Wüste nit durch auß ihres gefallens es-
 sen vnd trincken verschaffet / als bald werden sie
 nit allein vndanckbar / sonder auch vngedultig
 vnd vnwirsch wider GOTT vnd Mosen. Ge-
 dencken nit mehr an die grosse gutthaten / wun-
 derwerck vnd Barmherzigkeit / so sie durch Mo-
 sen von GOTT empfangen haben / geschwigen
 daß sie ihme darumb / wie sie billich schuldig ge-
 wesen / gedanckt / vnd jekund mit diser Speiß
 vnd tranck in der Wüste gedult getragen hetten.
 Darumb hat ihne GOTT zur Straff geschickt /
 fewrige Schlangen / welche vil kinder Israel ge-
 bissen / vnd die jenige so gebissen worden / seynd
 gestorben.

Wls. Gott
 soll nemand
 murren.

Vndanck-
 bark. It der
 kinder Is-
 rael.

Straff Gre-
 tes der Kin-
 der Israel.

Wann wir Christen alle / samplich vnd son-
 derlich / die vrsachen vnser täglichen Straffen
 vnd Nuten / deren / als menigklich bekennen
 muß /

muß/ gewißlich nit wenig seynd/ ernstlich erwe-
 gen/ ihnen mit höchstem vnd möglichstem vleiß
 nachgedencken wolten/ wurden wir warhafftig
 vnd bald finden auch die jenigen so wir jekund
 bey den kindern Israel gesehen haben. Wie vil
 meynstu/ lieber Christ/ daß eben jekund dñmal
 vnd alda vnder vns in disem Gotteshaus vnd
 Predigt zu finden seyen/ so kaum in einer Wo-
 chen/ erwann in einem Monat/ ja erwann in ei-
 nem ganken Jar vnd noch lenger/ nit ein mal
 auff ihre knie niderfallen/ vñ auß innigkeit ihres
 Herzens/ mit auffgereckten Hendē zu GOTT/
 ihme/ vmb alle empfangene Gutthaten/ billichs
 Lob vñ Danck sagen? Wahrlich ich trage sorg/
 es seyen der selbigē nit wenig vnder vns. Nit we-
 nig seynd gewißlich auch der jenigen/ so GOTT/
 ernstlich vnd täglich/ vmb alles so ihnen forthin
 zu Leib vñ Seel/ zur auffenthaltung des zeitlichen
 vnd Ewigen lebens von nöten/ bitten. Vnd do sie
 gleich alle tag das H. Vatter Unser/ vnd in
 demselbigen vmb das täglich Brot bitten/ bet-
 ten sie doch so schläfferig/ daß sie mehrmaln nit
 auff die wort mercken/ vnd also selbstē nit wis-
 sen/ wie vnd was sie bitten vnd betten. Deren
 seynd auch nit wenig vnder vns/ so sich des jeni-
 gen/ so ihnen GOTT geben/ vnd noch täglich
 gibt/ vnd zwar ein zimliche notturfft/ nit genü-
 gen lassen/ wöllen mehr haben weder von nöten/
 noch sie bedörffen/ vnd erwann zu ihrer Seelen
 heil nutz ist. Derhalben ist es vergebentlich vnd
 vnnörig zu fragen: Warumb vns GOTT täg-
 lich mit so vil Nutzen vnd Geißlen/ disen also/
 c s einen

Vndanck-
 barkelt der
 Christen ge-
 gen Gott.

Inleffig-
 keit im Ge-
 bett.

Vergebent-
 liche Frag.

einen andern anderst heimsuche vnd straffe? setztemaln eben die vrsachen/ darumb die kinder Israhel mit den fewrigen Schlangē gestrafft seynd worden/ auch bey vns Christen hauffrechtig zu finden seynd.

Daß dan GOTT die jenigen Jüden/ so von den fewrigen Schlangen gebissen/ durch anschawung einer ärinnen Schlangen widerumb hat wöllen gesundt machē/ lernen wir zum vierten: Daß/ ob wol GOTT ohne die ärinne Schlangen/ allein mit einem Wort/ ja nur mit seinem Göttlichen Willen/ in einem augenblick alle verwundte kinder Israhel hette können gesundt machen/ hat er doch solchs nit thun/ sonder hierzu dise Schlangen/ gleichsam als ein Instrument vnd Berckzeug brauchen wöllen/ also/ daß alle die jenigen/ so dise Schlangen nur anschawen wurden/ sollen gesundt werden. Christus hette ja jenes Weib/ so zwölff Jar den Blutgang gehabt/ mit einem Wort oder Willen leichtlich können gesundt machen: wolt doch solchs nit thun/ dann vermittelst der anrührung des Saumes seines kleides. Ebenmessig antworten wir auch von den francken Gerasernern/ so er auch durch anrührung seines kleides gesundt gemacht hat. Durch den Schatten des H. Petri/ durch das Schweißtrüchlin des H. Pauli/ hat GOTT die franckē gesundt gemacht/ die Teufel außgetriben/ welches er doch sonst wol hette volnbringen können: dennoch wolt er hierzu gleichsam als einen Berckzeug/ den Schatten Petri vnd Facilet Pauli brauchen.

Jenen

Gott wirkt
et durch
Mittel.

Matth. 9.

Mar. 6.

Matth. 14.

Act. 5.

Act. 19.

Jenen todten wolt GOTT aufferwecken/ doch
 nit/dan allein durch anrührung des Heiligthumb
 des verstorbenen Propheten Helisei. GOTT wolt
 dort vil Wunderzeichen wircke/franckē gesundt
 machen/Blind gesehend/ die besessnen des Feu-
 fels ledig/ doch bey dem Grabe vñ Heiligthumb
 Stephani. Also wolte er auch den ersten fran-
 cken gesundt machen/ so des morgens sich im
 Reichschwäñ gebadet hat. Also wolte er auch di-
 se verwundten gesundt machen/ doch durch an-
 schawung diser ärinne Schlangen zc. Auß wel-
 chem allem wir lernen: Daß GOTT nit allein
 durch Mittel vns Menschen mehrmaln helffen
 wil/sonder auch/an einem ort mehr als an einem
 andern/ durch diß Mittel mehr als durch jenes/
 durch diß Heiligthumb so vil/ vnd dise Wunder-
 zeichen/durch ein anders Heiligthum mehr oder
 weniger/ vnd andere Wunderzeichen: gleich wie
 er auch durch die Heiligen selbstē/ als sie noch
 auff Erden gelebt/ (als auch der H. Paulus be-
 zeugt) nit einerley/ auch nit durch einen allerley
 Gnaden/Gaben/ Wunderwerck erzeigt vnd ge-
 wirckt hat/ sonder durch disen dise/ durch einen
 andern andere/ auch an disem ort dise/an einem
 anderen andere. Vnd gleich/ wie die kinder Is-
 rael nit gesündigt haben/in deme sie hilff vnd ge-
 sundtheit gesucht haben an dem jenigen ort/ al-
 da ihnen GOTT hat helffen wöllen/nämlich bey
 der ärinne Schlangē/ doch nit von der Schlan-
 gen/sonder von GOTT: Also sündigen auch nit
 allein nit/ sonder thun gar recht auff den heuti-
 gen tag/ die jenigen Christen/ so hilff/ gesunde-
 heit

4. Reg. 13.

August. Tom. 5. lib. 22. de Ciuit. Dei, cap. 8.

Joan. 5.

Num. 21.

Gott erzeiget mehrmaln hilff/ durch Heiligthumb.

1. Cor. 12.

Christen mögen wol Balsam gehen.

heit vnd anders suchen/an dem jenigen ort/ vnd beyden jenigen Mitteln/ wo vnd durch welche ihnen GOTT helffen wil vnd hilfft/ doch auch nit der gestalt/ als ob sie die hilff eigentlich vom ort oder Mittel suchē/ sonder von GOTT/ deme es gefelt eben dise hilff an disem ort vnd durch dis Mittel zu erzeigen: nit angesehen auch/ daß GOTT allenthalben ist/ vnd allenthalben helffen kan/ jedoch weil es GOTT also gefelt/ wil vns Christen nit gebüren/ ihme/ zil/ maß vñ ordnung fürs schreiben vnd fragen wöllen: Warum er dis also vnd nit anderst/ jenes aber anderst vnd nit also/ mache? sonder seinem Göttlichen Willen sollen wir vns gemess verhalten/ vmb alle seine Gutthaten/ lob vnd danck sagen/ vnd dieselbigen/ an disem oder jenem ort/ durch dis oder jenes Mittel/ wo vnd wie er vns helffen wil/ gern annehmen.

Vnd dis seye für den ersten Theil diser Predig/ von der ärinne Schlangen/ ihrer Erhöhung/ vnd was GOTT durch anschawung derselbigen gewirckt hat/ gnug gehandelt. Jetztund wöllen wir vom Creuz Christi/ seiner erhöhung/ vnd nutzbarkeit derselbigen/ lehren vnd hören.

Also muß des Menschen Sohn/ spricht Christus zu Nicodemo/ erhöht werden/ auff daß ein jeglicher der an ihn glaubt/ nit verloren werde/ sonder das Ewig leben habe. Fürnemlich haben wir auß disen worten Christi vnser Herrs/ vnder andern

der drey ding zu mercken. Erstlich: Wer erhöhet muß werden. Zum andern: Wie. Zum dritten: Warumb/ oder die vrsach seiner erhöhung.

Drey Puncten zu lernen auß diesen Worten Christi.

Also muß erhöhet werden der Sohn des Menschen. Diejenigen/ so in heiliger Schrift nur eins theils/ vnd zwar nur in den Euangelien belesen seynd/ die wissen wol: Daß/ wann/ Christus vom Sohn des Menschen geredt/ daß er sich selbst verstanden hat. Vnd nit diser vrsach/ als ob er nit auch der wahre/ Einige/ Natürliche/ Sohn GOTTES seye: sonder/ sein Demütigkeit vor den Jüden/ so ihme auffsezig/ neidig vnd heßig waren/ zu erzeigen/ die dann jmer vrsach suchten/ ihne anzeklagen. Darumb auch/ daß er wider vil Keger/ so bald hernach kommen/ sein wahre Menschheit offenbaret/ vnd meniglich lehret: Daß er nit nur GOTT/ sondern auch ein Mensch/ vnd ein wahrer Natürlicher Mensch seye/ nit nur durch sein Mutter gangen oder herkommen wie ein Wasser durch einen Canal: sonder/ daß er warhafftig/ auß Wirkung des H. Geists/ vnd auß ihrem allerheiligsten vnd reinem Blut/ geporen vnd Mensch worden sey.

Wer erhöhet muß werden.

Christus warumb ein Sohn des Menschen.

Daß er dann sagt/ der Sohn des vnd nit deren Menschen/ ist auch nit ohne sonderliche vnd merckliche vrsach geschehen. Wir Menschen alle vnd jede/ keinen außgenommen auß der ganken Welt/ (alda rede ich nit von Adam/ so auß der Erden/ auch nit von Eua/ so auß einem Ripp gemacht ist worden) seynd Söhne

Christus ein Sohn/ nit deren/ sonder des Menschen.

oder

Christus ist
mit Josephs
Sohn.

oder Döchter/ nit des/ sonder deren/ das ist/ nit
nuz eins/ sonder zweyer Menschen/ nämlich des
Vatters vñ der Mutter. Ein andere meynung
aber hat es mit Christo vnserm Heiland/ dersel-
big/ ist nit/ weder empfangen noch geboren von
Männlichem Samen: sonder vom heiligen
Geist ist er empfangen/ vnd von einer Junc-
frauen geporen wordē/ ist volgentz/ nit zwey-
er/ sonder nur eines Menschen/ nämlich MA-
RIAE/ Sohn/ nach seiner Menschheit/ GOT-
TES aber nach seiner Gottheit. Vnd also haben
wir für das erste Pünctlin die antwort: Wer er-
höhet muß werden/ nämlich/ des Menschen MA-
RIAE Sohn/ welcher ist Christus/ der diß selb-
sten geredet/ vnd sich mehrmaln selbstē also ge-
nennet hat.

Wie Chri-
stus müsse
erhöhet wer-
den.

Nam. 21.

Wie diser Menschen Sohn Christus/ müs-
se erhöhet werden/ spricht er von sich selbstē:
Wie Moses die Schlangen in der Wü-
ste erhöhet/ also muß des Menschen Sohn
erhöhet werden. Moses machte ein Arinne
Schlangen/ richtet dieselbige auff an einem
Holz in die höhe/ mitten vnder dem Volck/ al-
so/ daß sie von meniglich vnd jedermann mochte
gesehen werden/ vnd ein jeder der dieselbi-
ge gesehen/ vnd von fewrigen Schlangen ver-
wundet war/ der wurde gesundt. Wie man ge-
meinglich vnd allenthalben das jenig Holz/
daran gemelte Schlang auffgericht ist wor-
den/ abmalet/ so ist es an der Form vnd ge-
stalt/ dem Creuz/ daran der Herr auffge-
richtet

Des heiligen Creukes.

45

richtet ist worden/ vast ehnlich gewesen. So wissen auch alle Christen wol: Daß der Herr/ nachdeme er an sein Creuk gehefftet/ offentlich vnder dem Himmel/ vor der Stadt Jerusaleum/ vor allem Judenuolck in die höhe auffgerichtet ist worden/ vnd also biß zur zeit daß Jerund die Sonne wolt nider gehn/ am Creuk gehangen/ von meniglich daran gesehen worden: von Jüden/ von Obersten der Priester/ von Kriegsknechten vnd andern daran ver-spottet vnd gelästert: vom Longino/ als er schon gestorben/ in die Seiten gestochen worden/ darauff als bald Wasser vnd Blut geloffen. Vom selbigen Creuk ist er zu abends/ von diesem Nicodemo/ mit welchem er heut dise wort geredet/ vnd vom Joseph/ widerumb abgenommen vnd begraben worden. Also/ daß warhafftig vnd eben in vnd mit diesem Sohn des Menschen vnd GOTTES/ erfüllet ist worden/ was durch dise ärinne Schlangen vorbedeutet ist worden.

Fürs dritte wollen wir auch die vrsach vnd nutzbarkeit seiner Creukigung vnd Erhöhung am Creuk lehren vnd hören: Gehört haben wir/ daß Moses die Schlangen in der Wüste/ auß beuelch GOTTES/ diser vrsach auffgerichtet hat/ auff daß die jenigen/ so auß verhencknuß vnd Straff GOTTES/ wegen ihres murmels/ wider ihne von den fewrigē Schlangen gebissen/ durch anschawung derselbigen widerumb gesundt würden. Die vrsach aber/ darumb Christus gecreukigt vnd am Creuk erhö-

Vnder dem hellen Himmel ist Christus am Creuk auffgerichtet worden.

Nicodemus vnd Joseph haben Christum vom Creuk genommen vnd begraben.

Warumb Christus gecreukigt sey worden.

Christus
der rechte
Schlangentretter.

erhöhet ist worden/ welcher kein Schlang/ sonder der rechte Schlangentretter gewesen ist/ zeigt er selbst mit disen Worten an: Auff das ein jeglicher der an ihn glaubt/ nit verloren werde/ sonder das Ewig leben habe. Gleich wie vnser Schlangentretter Christus/ so am Creuz erhöhet ist worden/ vil vnd weit/ ja vnendlich vnd vnaussprechlich mehr gewesen ist/ dann die erhöchte ärinne Schlang im alten Testament: also ist er auch vmb ein mehrere vrsach erhöhet worden/ also ist auch ein mehrer frucht vnd nutzbarkeit/ auß diser/ dann auß jener erhöhung/ eruolget.

Psal. 50.

Das Murren vnd Brummen der Kinder Israels wider GOTT vñ Mosen/ wegen der vnangenehmen speiß vñ tranck/ war die anfengig vnd meiste vrsach/ der Erhöhung der ärinne Schlangen in der Wüste. Die Sünd aber Adams vnd Eues/ ja aller vnd jeder Menschen Sünd/ (wie wir dann noch/ wegen ihrer vbertretung/ in Sünden empfangen vnd geporen werden) so wider GOTT volbracht ist worden/ ist vnd seynd ein vrsach gewesen/ darumb vnser Herr Christus am Creuz mußte erhöhet werden vnd sterben. Vnd wegen diser vnd aller Sünden/ seynd wir/ nit nur in einen leiblichen Biß der fewrigen Schlangen/ sonder in den Ewigen Biß/ Peyn vnd Tod/ des fewrigen vnd Hellschen Teufels gefallen/ darinnen wir immer vñ Ewig hetten leiden müssen/ wo vns nit diser Schlangentretter / der versprochne Messias vnd Sohn GOTTES/ geporen/ wo er nit am Creuz

Gen. 3.

Creuz erhöhet vnd gestorben were. Hat der-
halben vnser erhöchter Schlangentretter am
Creuz/nit nur/wie die Jüdische äriñe Schlang/
(oder GOTT/durch anschawung derselbigen),
vnsern leib/ sonder auch die Seel gesundt ge-
macht/ von allen vnd jeden Sünden entlediget.

Ja Christus/ vnd allein Christus/ sonst nie-
mandes weder im Himmel noch auff Erden/ ist
der jenig/der gnug/ gar gnug/ oberflüssig gnug/
vñ mehr als gnug gethon hat/ für meine Sünd/
für deine Sünd/ ja für alle Sünd/ nit nur etli-
cher Menschen/ sonder der ganzen Welt: nit
nur für etliche Sünd/ sonder für alle Sünd/
Erblich vnd Wirklich/ Tödlich vnd lästlich/ für
alle straff zeitlich vnd Ewig/ Also/ daß alle Men-
schen auff der ganzen Welt/ vñ die ganze Welt
(mit muß/sonder) kan selig werden/ dann er hat
mit seinem heiligen Leiden/ bittern tod vñ Creuz-
uerdienst/ den Teufel überwunden / die Sünd
hingenommen/ die Hell zerrissen/ das Himmel-
reich eröffnet.

Christus
hat gnug
gethon für
alle Sünd.

Hierinnen ist aber (ihr geliebten in GOTT) Wie wir
vil/gar vil/ja vns Christen jegund alles gelegen/
wie wir vns seines heiligen Verdiensts theilhaff-
tig vnd selig machen müssen. Do die kinder Is-
rael/dort/schon lang vnd vestiglich glaubt het-
ten/GOTT habe ihnen die Schlangen diser vr-
sach auffrichten lassen/ auff daß ein jeder fran-
cker/so solche ansehe/gesundt werde:wolten aber
doch mit dem Werck nit dazu gethon haben/
wolten nit hinzu gangē seyn/wolten die Schlan-
gen nit angeschawet vnd gar nichts gethon/
d dann

Wie wir
vns des h.
Verdiensts
Christi müs-
sen theilhaff-
tig machen.

d dann

dann nur glaubt haben/ so wurden sie langsam
 ja nimmer mehr gesundt seyn worden/ sonder
 müsten/ sie wolten oder wolten nit/ gestorben
 seyn. Also ist auch mit der Erhöhung vnd Creutz
 uerdienst vnseres Heilands zu antworten: Er hat
 zwar gnug gethon für alle Menschen/ aber doch
 nit also/ daß darumb alle Menschen/ wider ihren
 willen vnd eigens hinzu thun/ müssen oder kön
 den selig werden. O Nein/ sonst müsten auch al
 le Vngleubige/ Jüden/ Heyden/ Mamelucken
 selig werden. So ist auch der Glaub hierzu ni
 gnug/ sonsten wurden auch die Ketzer/ vnd Gott
 lose/ vnpußfertige Christen selig. O Nein. Gnu
 hat er für vns gethon/ vñ wir könden oder müs
 sen jekund nit von neuwem gnug thun/ oder et
 was verdienen das er am Creutz nit verdient
 habe. Das müssen wir aber thun/ wann wir
 seines H. Verdiensts/ vnd endlich des Ewig
 lebens wollen theilhaftig werden: Durch ver
 ordnete Mittel von GOTT/ müssen wir vñ
 desselbigen theilhaftig machen. Solchs Mit
 tel aber ist nit allein der Glaub/ wie etlich leut
 diser zeit fälschlich vermeynen/ vnd sich selbst
 immer vnd Ewig damit versüren: sonder sol
 che Mittel seynd auch die H. Sacramenten/
 haltung vnd warnemung der Gebott GOT
 TES/ die Liebe GOTTES vnd des Necht
 sten/ die guten Werck/ die Werck der Barm
 herzigkeit/ vnd was dergleichen Christlichen
 vbnungen mehr seynd. Abermal nit der gestalt/
 als solten oder wolten wir dadurch etwas von
 neuwem verdienen/ was nit Christus am
 Creutz

Glauben ist
 nit gnug.

Mittel zur
 Seligkeit
 von nöten.

Creuz verdient hat: Nein/ sonder/ daß wir desselbigen/ vns / durch gemelte Mittel/ fähig vnd theilhaftig wöllen/ können/ vnd müssen machen.

Also haben wir kürzlich/ doch gnugsame vnd gründliche antwort angehört: Warumb die Schlang im alten Testament/ vnd warumb der rechte Schlangentretter Christus/ im Neuen Testament/ am Creuz auffgericht vnd getödt ist worden: Jene/ zur hinnemung der leiblichen franckheit: diser/ zur verzeihung aller Sünd/nachlassung aller straff/ gesundtheit vnd die Seligkeit zu bringen dem Leib vnd der Seel immer vnd Ewig.

Behalten sollen wir derhalben auß diser Beschluß
dieser Predig. kurzen vnd leichten Predig: Erstlich/ Daß im alten Testament/ durch die ärinne Schlangen/ vorbedeutet vnd von Christo selbst dem Nicodemo weißgesagt ist worden/ daß er wölle vnd sölle am Creuz erhöht vnd getödtet werden. Daraus vnser Glaub in ihn/ als in den wahren Sohn GOTTES/ deme nichts vnberußt/ vnd nit ohne alles gefahr also gelitten hat/ gesterckt wirdt. Daß die kinder Israhel/ in anschawung der Schlangen am leib gesundt seynd worden: Wir aber in anschawung seiner Erhöhung/ durch einen wahren lebendigen Glauben/welcher mit der Liebe GOTTES vnd des Nächsten bekleidet ist/ werden ledig/ der leiblichen vnd geistlichen franckheit/ vnd nach disem leben selig in Ewigkeit/ Amen.

Gebett zu
Christo vn-
serm Herrē
vber dise
Predigt.

Du miltiger/ gütiger Herr IESV
Christ/ der du mit allem Nico-
demo/ sonder auch vns Christen
allen zuuor gesagt hast/ daß du am Stam-
men des heiligen Creukes erhöhet vnd
sterben müßtest/ wegen der Sünd der gan-
zen Welt: desse thun wir vns auff das al-
ler höchste bedancken/ dann dadurch vn-
ser Glaub in dich nit wenig gesterckt wirdt.
Nun wissen wir auch wol/ daß darumb
alle Menschen selig werden/ seitemaln
alle Menschen/ sich deines heiligen Ver-
diensts/ durch von dir verordnete Mittel
theilhaftig machen. Derhalben bitten
wir dich ganz vnderthenig/ vmb einen sol-
chen verstand/ daß wir dieselbigen Mittel
nit allein wissen/ sonder auch also ins werck
richten mögen/ daß wir deines heiligen
Creukuerdiensts/ vnd endlich der
Ewigen frewd vnd Selig-
keit/ mögen theilhaftig
werden/
Amen.

Amen

Am tag des H. Joannis 2c.

51

Am Tag Joannis vor der Lateinischen
Porten/zum theil im Bistumb
Bamberg feyerlich.

Am 3. tag
im Meyen.

Dieser Joannes/desse Feyertag
wir auff heut halten/ist Joannes
der heilig Euangelist vnd Apostel
Christi/ ein Bruder Jacobi des
grössern. Dieser Joannes/ als er
zu Epheso das Euangelium Christi mit grossen
muth verkündiget/ mochte solchs der Teufel len-
ger nit mehr/weder sehen noch leiden/befiget den
Blutgirigen Keyser Domitianum/das er Jo-
annem von Epheso gen Rom ließ führen/daselb-
sten vor einem thor/ Porta Latina genant/war-
de er in ein vass vol siedigs Del gesetzt/ auch zu-
vor mit Geißlen geschlagen/vnd wie ein thor be-
schoren. Als er aber vnuerletzt blieb/ ist er in die
Insel Patmos verschickt worden/daselbst er
das Wunderbarlich Buch seiner Offenbarung
geschriben hat. Die Christen haben an dem ort/
do der Ofen gewesen/einen Altar vnd Capel-
len/vnd nit weit dauon ein köstliche Kirchen ge-
bauwet / dahin jährlich an diesem tag ein grosse
Walfart geschicht 2c. Joannes der H. Euange-
list/wölle bey GOTT/desse H. Angesicht er ohne
vnderlaß sibet/ jeder zeit der Catholischen Für-
sprech seyn/ Amen.

Joannes der
H. Euange-
list prediget
zu Epheso
das Euang-
gelium Chri-
sti.

Auff heut mag das Euangelium
vnd Predig gebraucht werden/ so
wir im Wintertheil vmb Weyhen-
d 3 nach

52 Am tag des H. Mart. Pangratis.
nachten/ an seinem Festag gefest haben
dahin ich den günstigen Leser/ vnd ange
henden Prediger/ will gewisen haben.

Am 12. tag
Meyen.

Am tag des H. Martyrers Pan
gratis/ zum theil im Costanker Bis
stumb feyerlich.

Päcratius
vñ Dionysi
us werden
getaufft.

Päcratius/ desse Feyertag wir
auff heut halten/ ist von Edlen
Eltern geporen/ von seinem Va
ter Elionio seinem Bruder Dio
nysio am todtbeth hefftiglich vñ
ernstlich beuolhen. Welcher Dionysius/ ihme
den knaben Pancratium befolhen seyn ließ/ vñ
reiset mit ihme ein fart von Phrygia nach Rom
vnd am Wege kamen sie an Berg Celius ge
nant/ darauff Papst Cornelius/ auß forcht der
Tyrrannen Diocletiani vñ Maximiani/ verbot
gen lage: zu disem Papst kommen dise zween
hören von ihme GOTTES Wort/ vnd bekeren
sich/ werden auch vom Papst getaufft. Bald
nach angenommen Glauben stirbt Dionysius
voller guter Werck. Aber Pangratus/ ein knab
bey fünffzehen Jaren/ lasset sich mitten in der
Diocletianischen verfolgung frey hören/ Er
seyne Christglaubig worden: nit angesehen/ daß
er wol gewist/ daß alle die jenigen/ so den Christ
lichen Glauben bekennen/ sterben musten. Er
kompt für Gericht/ vnd dieweil er Edel vñ
noch Jung war/ handelt man mehr mit der gü
te gegen ihme dann mit andern gefangnen.
Pan

Am Fest der H. Himmelfart Christi. 53

Pangratus aber saget vnerschrockē zum Richter: Die Christen haben von dem lebendigen GOTT/ einen solchen verstand vñ Gnad/ daß sie die Verfolger so wenig fürchten/ als etwas so ander wand gemalet ist. Do schämet sich der Richter/ daß er von einem kind also beschämet werde solt/ vnd liesse ihme sein Haupt abschlahen. Do fandte sich ein Christin/ Decauilla genant/ die begrube ihn heimlich mit köstlicher Specerey. Also hat der H. Pangratus/ die kron der Seligkeit Anno 260. erlangt/ welche auch vns GOTT nach disem zergeneßlichen leben mittheilen wölle/ Amen.

Auff heut werden die Euangelia vnd Predigē/ wie an der Bekerung Pauli/ Georgij/ Marci/ Stephani/ Laurentij zc. gebraucht.

Am heiligen Fest der Himmelfart Christi/ Euangelium
Marci xvj.

Blest/ da die eilff zu tisch sassen/ erschiene er ihnen/ vnd verwis ihnen ihren vnglauben vnd ihres hertzen hertigkeit/ daß sie nicht geglaubt hetten denen/ die ihn gesehen hetten aufferstanden. Vnd er sprach zu ihnen: Gehet hin Matth. 28. 8
in alle Welt/ vnd prediget das Euangelion



Act. 5. b 8. a

16. e 19. a

Act. 2. a

Luc. 10. d

Act. 14. b

28. a

Act. 28. a

Luc. 24. d

Act. 1. b 7. g

Heb. 2. a

gelion aller Creaturn. Wer da glaubt vnd getaufft wirdt/ der wirdt selig werden. Wer aber nit glaubt/ der wirdt verdampft werden. Die zeichen aber/ die da volgen werden denen die da glauben/ seynd diese: In meinem namen werden sie Teufel austreiben/ mit neuwen zungen reden/ schlangen vertreiben: vnd do sie etwas tödtlichs trincken/ wirdts ihnen nit schaden. Auff die francken werden sie die hend legen/ so wirdts besser mit ihnen werden. Vnd der Herr IESVS/ nachdem er mit ihnen geredt hatte/ ward er auffgehoben gen Himmell/ vnd sitzt zur rechten hand GOTTES. Sie aber giengen auß/ vñ predigten an allen orten/ vnd der Herr wirkte mit

te mit ihnen / vnd bekrefftiget das wort
durch folgende zeichen.

Wer da glaubt vnd getaufft wirdt / der
wirdt selig werden. Wer aber nit glaubt /
der wirdt verdampt werden.

Mar. xvj.

Stimmen ahermal wol vber
ein mit einandern / diß heutig Fest
vnd gehörtes Euangelium / also /
daß ein jeder / so eintweder / das
Fest ernstlich betrachtet / auch leicht
lich die vrsach wissen kan / darumb gemeltes
Euangelium auff heut geprediget wirdt. Oder /
do jemandes heutig Euangelium mit vleiß le-
sen vnd ernstlich erwegen wirdt / lernet er leicht-
lich darauf / daß wir auff heut / das Fest der aller-
heiligsten Himmelfart Christi vnser Heilands
halten. Daß nämlich Christus vnser Herr / so
nach seiner Gottheit als ein Ewiger Sohn sei-
nes Himmelschen Vatters / vom hohen Him-
mel hieher auff Erden kommen / auß MARIA
der H. Junckfrauen Mensch geporen / etlich
vnd dreißig Jar hie auff Erden gebliben / den
Tod gelitten / begraben worden / widerumb am
dritten tag von den todten aufferstand / auff
heut / welcher ist der vierzigste tag nach seiner
Aufferstehung / widerumb / in beyseyn seiner
Jünger / hinauff im Wolcken in Himmel gefa-
ren sey / alda sihet er zur rechten seines vnd vn-
ser Himmelschen Vatters / wie den wir Chri-

d s sten

sten alle samptlich vnd sonderlich/ täglich in vnserm Catholischen vnd Apostolischen Glauben/ vnd nur gern/auch billich/ bekennen.

Ob Gott
will/mittler
zeit in der
grossen Po-
stul.

Theilüg vnd
Inhalt diser
Predig.

Von disen beiden/nämlich von seiner Himmelfart vnd Sizen zur Rechten seines Vatters/wollen wir zur andern zeit handeln/Jezund aber gehörtes Euangelium in zween Theil theilen. Im ersten wollen wir handeln von dem jenigen/ so sich im heutigen Euangelio/ ehe daß der Herr gen Himmel gefaren/ verlossen hat. Im andern/ was hernach gesch:hen sey. Welchs ihr mit ernst vnd gedult anhören wölt/ so will auch ich mich/ euch dasselbig auff das leichtest vnd kürzest fürzhalten/ nit beschweren. G O T T aber/ lasset vns vmb seinen beystand anruffen ic.

ES ist heut der vierzigste tag / daß Christus vnser lieber Herr von todten auferstanden ist/ vnd zwischen diser zeit/ ist er seinen Jüngern vnd andern mehrmaln erschienen/ mit ihnen geredet/ gewandert/ gessen vñ getruncken/ auff daß weder sie/ noch jemandts anders/ an seiner Auferstehung zu zweifeln nit vrsach noch gelegenheit hette. Vnd als jezund die zeit/ vnd eben der tag seiner Himmelfart/ vorhanden war/ wolte er/ ehe daß er gen Himmel aufffüre/ ihnen noch ein mal erscheinen/ sie mit ihme hinauß nehmen an den Delberg / auff daß sie nit allein sein wahre Auferstehung wissen/ sonder auch sein Himmelfart sehen sollen. Vnd hierauff spricht der H. Euangelist Marcus im anfang diß heutigen Euangelij also:

Zu

Zu letzt/do die eilff zu Tisch saßen/erschien er ihnen/ vñ ruckt ihn auff ihren Vnglauben/ vnd ihres Herzen hertigkeit/ daß sie nit geglaubt hatten/denen/ die ihn gesehen hatten auffstanden. Es seynd fürnemlich drey vrsachen/darumb der Herr auff heut/seinen Jüngern/nach ein vnd eben das letzte mal vor seiner Himmelfart erscheinen hat wollen. Die zwo hören wir im ersten Theil diser Predig/die dritte im andern Theil.

Die erste vrsach wirdt in gemelten worten Erste Vrsach/darüb begriffen/nämlich/daß er ihnen auffruckt et daß der Herr seit ihren Vnglauben in sein Auferstehung/daß die Jüngern sie nit glaubt hatten denen/so ihn gesehen dieß mal hat hatten auffstanden. Es war nun vorhanden/erschienen wollen. den die zeit/daß der Herr Christus widerumb von diser Welt scheiden/vnd durch sein Himmelfart zu seinem vnd vnserm Himmelischen Vater gehn solt vnd wolt/nun aber seine Jünger in der ganzen Welt seine zeugen seyn mußten: war von nöten/ja das notwendigest/daß sie selbst in die Auferstehung Christi glaubten/vnd volgendts andern solche auch verkündigte. Weil sie aber auch domaln/im Glauben noch zimlich schwach waren/nit angesehen/daß ihnen der Herr seit des Ostertags biß auff heut etlich maln selbst erschienen/mit ihnen geredet/geßen vnd gewandert/wolte vnd mußte der Herr ihnen auff heut/zum Beschluß vñ abschide/ihren Vnglauben verweisen: Daß/wann sie je ihme/daß er warhafftig auffstanden seye/nit glauben wolten/

ten/so solten sie doch andern glauben/ so ihn gesehen/vnd ihnen verkündiget haben/ dann er ja vom tag seiner Auferstehung ihren etlichen bis auff heut vnd oft gnug erschienen seye. Erstlich sey er erschienen Marie Magdalenen in gestalt eines Gärtners. Zum andern/ andern Frauen/ so vom Grab kamen/ vnd ihme zu füssen fielen/vnd ihme an seine fuß griffen. Zum dritten/ihren zweyen/ so auff's Dorff giengen/ welchen auch die Apostel nie glaubt haben. Zum vierten/Simou Petro. Zum fünfften/Cleophe vnd einem andern Jüngern/(etlich vermeynen diser sey Lucas/ etlich Nathanael/ gewesen) die nach Emaus giengen. Zum sechsten/seinen Jüngern/als sie bey samen verschlossen vnd Thomas nit bey ihnen war/do er zu Emaus vor den zweyen verschwunden. Dife sechs mal (villeticht mögen die dritte vnd fünffte ein Erscheinung seyn) ist er erschienen am tag seiner Auferstehung. Zum sibenden/Jacobo dem kleinen. Zum achtetē/allen Jüngern acht tag nach dem Ostertag/ als Thomas bey ihnen war. Zum neunten/am Meer bey Tiberias Petro/Thome/Nathanaeli/den Sönen Zebedei/ vnd zweyen anderen Jüngern. Zum zehenden/auff dem Berg Thabor mehr dann fünff hundert Brüdern/deren etlich vor ihme niderfielen/ etlich zweifelten an ihme. Zum eilfften hat sich der Herr (spricht Lucas) nach seinem leiden/ lebendig erzeigt/ durch mancherley erweisung vierzig tag lang/ vom tag der Auferstehung bis auff den heutigen tag seiner Himmelfart. Zum zwölfften/ füret der Herr seine

Mar. 16.
Joan. 20.
Matth. 28.

Mar. 16.

Luc. 24.
1. Cor. 15.
Luc. 24.

Ibidem.
Joan. 20.
1. Cor. 15.

1. Cor. 15.
Joan. 20.

Joan. 20.

Matth. 28.
1. Cor. 15.

Actor. 1.

seine Jünger/nämlich auff heut/auff der Stadt
Jerusalem hinaus auff den Oelberg/faren alda
gen Himmel/das sie es alle sehen.

Mar. 16.

Luc. 24.

Act. 1.

Siehe lieber Christ/ diser vrsach hat der Herr
auff heut seine Jünger gestrafft/das sie noch nit
festiglich an sein Auferstehung glaubt hatten/
so er ihnen doch mehrmaln selbstn erscheinē/mit
ihnen geredet/gewandert/gessen/sie angebla-
sen/den H. Geist mitgetheilt/ihnen hend vnd
füß/Wunden vnd Negelmal gewisen/anzuta-
sten/greiffen/ihre hend vñ Finger dareyn legen
verwilligt. Zu deme seye er nit allein ihnen/son-
der auch andern erschienen/von welchen sie doch
sein Auferstehung soltē gelernet haben. Vnd ist
zwar dise straff nit vnbillich/sonder billich/nötig
vnd nützlich gewesen/nit allein den Aposteln/son-
der auch vns vnd der ganzen Welt. Dann do
die Apostel in ihne vnd sein Auferstehung nit
waren Glenbig worden/hetten sie vns solchen
auch nit verkündiget/vnd weren also wir noch
auff den heutigen tag/nit Christen/sonder Vn-
glaubige Heyden.

Straff Chri

st nützlich

vnd notwen-

dig.

Weitleuffiger hieruon/nämlich von der Auff-
erstehung Christi/zu handeln/ist nit nötig/Erst-
lich diser vrsach: Weil kein Mensch (GOTT sey
lob vnd danck gesagt) vnder vns allen ist/so an
die Auferstehung Christi nit festiglich glaubet/
vnd solchs im Apostolischen Glauben nit täglich
bekennet. Darumb auch/weil solchs in H. Oster-
feyertagen gnugsam geschehen ist/vñ zwar füg-
licher dann auff heut.

Christen

weisen nit

an der Auff-

er-
stehung

Christi.

Die ander vrsach/darumb der Herr auff heut
seinen

Die ander

vrsach.

seinen Jüngern/vor seiner Himmelfart/hat erscheinen wollen / wirdt auß folgenden Worten Christi gelernet / Vnd er sprach zu seinen Jüngern: Gehet hin in alle Welt/ prediget das Euangelium allen Creaturen. Wer da glaubt vnd getaufft wirdt/ der wirdt Selig werden. Wer aber nit glaubt/ der wirdt verdampft werden. Christus vnser lieber Herr vnd Heiland/ der da gewesen ist/ ist vnd bleibt ein Priester nach der Ordnung Melchisedechs in Ewigkeit / ist von seinem Vatter hieher auff Erden gesandt worden/ den Armen das Euangelium zu verkündigen/der hatte auch seine Jünger im letzten Abendmal / durch dis wort: Das thut zu meiner gedechtnuß/ zu Priestern geordnet/ darumb/ daß auch sie/ neben verkündigung seines Wortes/ das jenig thun solten/ was er im letzten Abendmal gethon hat/ vnd dis nit nur zu Jerusalem/nit nur an einem ort oder land/sonder in der ganzen Welt. Nun hetre aber der Herr bishero/ seine Jünger nit in die ganze Welt/sonder nur in das Jüdisch land/ zu den verlornen Schaffin des hauses Israel gesandt/ mußte derhalben solchs jekund geschehen / ehe daß er gen Himmel auffsur. Spricht derhalben: Gehet hin in die ganze Welt/ einer in dis/ jener in jenes land/ vnd prediget das Euangelium allen verstendlichen Creaturen/ allen Menschen auff Erden/ den Heyden vnd Jüden verkündiget dis Euangelium vnd fröliche Botschafft: Daß der ganzen Welt/ Heil durch mich

Genes. 14.
Psal. 109.
Heb. 7.
Joan. 14.
Esa. 61.
Luc. 4.

Beuelch
Christi seinen Jüngern.

mich widerfahren sey: Daß sie durch mich Verzeihung aller ihrer Sünd vnd das Ewig leben bekommen möge. Verkündiget ihnen/nämlich allen Menschen/daß der versprochne Messias vnd Natürliche Sohn GOTTES geboren/gelitten/gestorben/begraben/aufferstanden/vnd widerumb gen Himmel auffgefahren seye/ allen vnd jeden frummen Christgleubigen Menschen das ort zu bereiten/auff daß/wo er ist/auch sie seyen. Verkündiget ihnen: Daß sie nit können noch mögen selig werden/wann sie nit in mich/als in den wahrē Natürlichen Sohn GOTTES glauben: vnd diß nit stuckweiß/sonder vollkommenlich müssen sie den wahren/Christlichen/Catholischen Glauben haben vnd bekennen/mit allen seinen Stücken/Puncten vnd Artickeln/wie ihr solchen von mir gelernet/vnd noch auß eyngebung des H. Geists lernen werdet.

Nit allein aber müßt ihr Predigē/sonder auch die H. Sacramenten reichen. Derhalben so tauffet sie auch in dem Namen des Vatters vnd des Sohns vnd des H. Geistes/zur abwaschung der Erbsünd/vnd aller Sünd so vor dem Tauff begangen seynd worden. Dann wer da glaubt vnd getaufft wirdt/der wirdt selig werden. Erstlich sollen vnd müssen alda die Eltern/vnd zwar alle Christen/ vleissig achtung geben/daß ihre Christkinder/bey zeit/ als bald sie geporen/ ohne verzug getaufft werden: sonsten mögen sie/ so sie ohne den Tauff sterben/nit selig werdē/ wie zu seiner zeit etwas weitläuffigers solle gehandelt werden.

Ohne den Glauben in Christum wirdt niemands selig.

Ohne den Tauff im willen oder werck/wirt man nit selig.

Zum

Zum andern/ ist allen Menschen/ so nach diesem zeitlichen leben begeren Selig werden/ also wol zu mercken vnd vleissig achtung zu geben: Daß sie sich nit/wie vil leut vñ gemeinglich alle Lutherischen diser zeit/ selbstē verfürē auß diesen Worten Christi: Welcher glaubt vnd getaufft wirdt/der wirdt selig werden/ In deme sie etwan vermeynen möchten: Zur Seligkeit sene nichts/ dann nur der Glaub vnd Tauff / vnd nit auch das thun/von nöten. Dann was Marcus also von den Worten Christi/ so er dñmal zu seinen Jüngern geredet/aufgelassen/hat der H. Euangelist vnd Apostel Christi Mattheus/ so selbstē dabey gewesen / vnd alle Wort auß dem H. Mund Christi in seine ohren gehört / hinzu gesetzt/nämlich: Vnd lehret sie halten alles was ich euch gebotten hab. Also daß Glauben allein nit gnug ist/wie sie fälschlich vermeynen/ sonder man muß auch halten / thun vnd Wircken/ Dann ein jeder wirdt geurtheilt/nit allein nach seinem Glauben/ sonder auch nach seinen Wercken/ vnd wirdt empfahen/nach deme er Gut oder Böß gewesen ist.

Matth. 28.
Glauben allein ist nit gnug.

Joan. 5.
Matth. 23.

Stentige werde Wunderzeichen thun.

Auff solchen beuelch seinen Jüngern gegeben/nämlich/lehren vnd die H. Sacrament reichen/sampt allem dem jenigen so zu solchem Ampt gehört/spricht der Herr: Daß die Bleubigen grose Wunderzeichen thun werden/ Sie werden Teufel austreiben/ mit newen zungen reden/Schlangen vertreiben/Vnd so sie etwas tödliches trincken/ soll es ihnen nit

nit schaden. Durch aufflegung ihrer hend
sollen die francken gesundt werden. Das
GOTT gemelte Wunderzeichen alle / vnd der-
gleichen noch vil andere / nit allein durch die Apo-
stel / durch das Schweißtrüchlin Pauli / durch den Actor. 5 19.
Schatten Petri / sonder auch durch die hand vi- 16. 2. 28. 3.
ler tausent H. Lehrer / Martyrer vñ Beichtiger /
beuor auß im anfang der Christenheit / gewirckt
habe / ist diß mal / weitläuffig mit verlust der zeit
vnd verlengerung diser Predig / zu erweisen vn-
nötig / seitemaln solchs neben heiliger Schrift
der ganken Welt bewust / vnd mit warheit nie-
mandts leugnen kan / wie dann auch die Unca-
tholischen selbstn wider ihren Willen vnd ohne
dancß bekennen müssen.

Vnd zwar war es sehr vnd hoch von nöten / Wunder-
daß GOTT im anfang der Christenheit / also zeichen im
wenig Christen / aber vil Heyden vnd Jüden wa- anfang der
ren / durch die Apostel vnd andere Prediger / mit Christenheit
allein sein Wort verkündiget / sonder auch das je- von nöten.
nige / so sie predigten / mit mitwirkenden Wun-
derzeichē besteriget / diser vrsach / auff daß die jeni-
gen Vnglaubigen / so durch die Predig nit mocht-
ten bekert werde / doch durch die Wunderzeichen
zum Christlichen Glauben gebracht würden / wie
dann mehrmaln geschehen ist.

Daß dann GOTT diser zeit / nit so vil / nit so Vrsach / dar-
grosse / oder doch nit so hauffechtige Wunder- rumb diser
zeichen durch die Gläubigen wirckt / als domaln zeit die Wun-
geschehen / ist gewißlich die vrsach: Daß solche di- derzeichē nit
ser zeit nit so notwendig als domaln / seitemaln als zur Apo-
Iehund der Heydnisch vnd Jüdisch Vnglaub stel zeit.
e mehrs

mehrs theils außgerentet/ vnd nit nötig ist/ den
 Christlichen Glauben/ den alleinseligmachenden
 Catholischen Glauben/ durch Wunderzeichen
 auff ein neues außzubreiten/ dann wir solchen
 (GOTT lob) albereit haben/ vnd nun etlich hundert
 Jar im Teutschland gehabt haben. Aber
 nichts desto weniger wircket GOTT/ noch schier
 täglich/ jekund durch disen/ bald durch einen an
 dern Catholischen Prediger/ jekund diß/ dann
 ein anders Wunderzeichen/ vnd beuor auß
 den jenigen Menschen so leiblich vom Bösen
 Geist besessen seynd/ welche GOTT/ des Teufels
 durch die hand der Catholischen Prediger ledig
 machet: welches nit allein allen Catholischen
 sonder auch den Lutherischen vnd andern Felt
 stüchtigen auß der Catholischen Kirchen/ so
 gentlich bewust ist/ daß sie solchs nit leugnen kö
 den/ sonder bekennen müssen sie/ daß ihme alle
 vnd nit anderst sey. Weil aber sie/ die Neuwert
 selbst geloffnen vnd nit gesandten Predicanten
 keins/ gar keins/ auch das geringste Wunderzei
 chen nit vermögen/ mißgünnen sie solchs auch
 den Catholischen/ lernen von den Jüden/ Christo
 stum vnd seine Wunderwerck lästern/ vnd spre
 chen auch: Die Catholischen/ oder (wie sie spre
 chen) die Päpstischen Prediger/ (wie auch die
 Jüden zu Christo gesagt) treiben Teufel durch
 Beelzebub/ vnd also einen Teufel mit dem an
 dern auß/ welchs/ als sie selbst wol wissen/ vnd
 abermal bekennen müssen/ nit wahr ist. Dann
 als der Herr selbst gelehret hat/ ein Teufel den
 andern nit austreibt/ sonsten müste er ihme selbst
 stein

Mißgunst
 der Luthere
 rischen Pre
 dicanten.

Luc. 11.

sten zu wider seyn/ vñ also sein Reich nit bestehn.

Wir Catholische Christen warten zwar immer/ wann doch die Caluinischen vnd Luthertischen Predicanten/ ihren neuwen Glauben/ ja Vnglauben/ ein mal mit einigem Wunderzeichen bestertigen wöllen/ warten aber doch vmbsonsten/ vnd ist nicht vngleublich/ daß wañ man schon alle Predicanten in einem Mörstel zerstieß/ vnd machet einen Predicanten darauß/ so vermöchte er doch nit einen hincfenden Hund gesundt zu machen/ dauon wir zur andern zeit vnd ort weitleunffiger gehandelt haben.

Wunderzeichen der Lutherische Predicantē.

Vnd diß hat der Herr auff heut/ nämlich am vierzigsten tag nach seiner Aufferstehung/ ehe dann er gen Himmel gefarē/ zu seinen Jüngern geredet: Ihnen ihren Vnglauben in ihn/ vnd sein Aufferstehung/ verwisen: Sie/ zu Predigen vnd die H. Sacramenten auftheilen in die ganze Welt außgesandt: Daß er durch sie grose Wunderzeichen wirken wölle/ versprochen/ welches alles dann reichlich vnd oberflüssig geschehen ist.

Un wollen wir hörē/ was sich weiters im heutige Euangelio/ vñ fürnemlich nach seiner Himmelfart/ verlossen habe. also volgē die wort des Euangelistē: Vnd der Herr/ nachdeme er mit ihnen geredet hatte/ ward er auffgehoben gen Himmel/ vnd hat sich gesest zur rechten GOTTES. Wo Christo Diß ist geschehen am Delberg vor der Stadt Jerusaleim / alda er auch zu vor mehrmaln

stus gen Himmel gefaren.
gebet.

gebettet/verrathen vnd gefangen ist worden/do
hin sie der Herr/nachdeme er mit ihnen zu Jeru
salem gessen/geführt hat/vnd augenscheinlich gen
Himmel gefaren ist. Die weise diser Himmelfar
hat der H. Euangelist Lucas in der heutigen Ep
stel etwas klerers also beschriben:

Act. i.

Vnd do er solchs gesagt hett/ward er vor ih
rem Angesicht auffgenommen/vnd ein Wolc
entpfieng ihn auß ihren augen. Vnd als sie ihn
nach sahē in den Himmel farend/Sihe/do tra
ten neben sie zween Männer in weissen kleidern
welche auch sagten: Ihr Männer von Galilea
was stehet ihr vnd sehet in den Himmel? Diser
IESVS/welcher von euch ist auffgenommen in
den Himmel/der wirdt kommen/wie ihr ihn ja
gesehen habt gen Himmel faren. Von der Him
melfart Christi außfürlich zu handeln ist (wie im
Eyngang diser Predig gemeldet) diß mal vnser
fürnehmen/auch die gelegenheit diser kleinen Po
still/nit. Gnug sene vnd ist es vns Catholischen
Christen auff diß mal/das wir wissen/im Her
zen glauben/vnd mit dem Mund bekennen/das
jenig/ so wir im Catholischen/ Apostolischen
Glauben täglich sprechen/vor GOTT vnd der
ganken Welt bekennen: Er ist auffgefaren
gen Himmel/vnd sitzet zur rechten GOT
TES. Das ist: Wir glauben im Herzen vnd
bekennen mit dem Mund/das Christus IESVS
der versprochne Messias/ der wahre Natürliche
Sohn GOTTES vnd MARIAE/nach deme er
gelitten/gestorben/begraben/aufferstanden/am
vierzigsten tag/uämlich auff heut/ mit leib vnd
Seel

Vnser
Glaub.

Seel/Gottheit vnd Menschheit/sichtbarlich vnd
wesentlich/ auß eigener krafft/gewalt vñ macht/
in den Himmel hinauff gefaren sey: Vnd seye
dem Vatter vñ dem H. Geist/ein gleicher/mech-
tiger/Ewiger GOTT/ohne anfang vnd ende in
Ewigkeit/ vnd ohne disen Glauben vnd bekant-
nuß/bekommet niemands die seligkeit.

Wie sich die Jünger/als der Herr gen Him-
mel gefaren/verhalten haben/spricht Marcus
im heutigen Euangelio: Sie aber giengen

aus/ vnd predigten an allen orten. Ist das
die Jünger als bald/ am selbigen oder folgen-
den tag/in alle Welt außgangen seyen/sonder/
erst nachdeme sie am H. Pfingstag den H. Geist
empfangen hatten/welchs vns abermal Lucas
in Geschichten der Apostel beschreibet/mit disen
worten: Welchen er sich auch lebendig erzeiget
hat vierzig tag durch mancherley erweisung/
vnd redet mit ihnen vom Reich GOTTES/vnd
aß mit ihnen/vnd befahl ihnen das sie nit von
Jerusalem wiechen/sonder warteten auff die
verheissung des Vatters 2c. Vnd bald hernach:
Da (als der Herr jekund gen Himmel gefa-
ren) wandten sie sich widerumb gen Jerusalem
vom Berge der da heist der Delberg/welcher ist
nahe bey Jerusalem/ vnd hat eins Sabbaths
reise/vñ als sie hineyn kamen/stigen sie auff den
Soller/da denn sich enthielten Petrus vnd Jo-
annes 2c. Auff disem Soller/alda die Jünger
mit Christo das Osterlamb gessen hetten/blieben
sie (ihren bey hundert vnd zwenzig) bis auff den
Pfingstag/vnd nachdeme sie den H. Geist em-
pfangen/

Jünger
Christi pre-
digen an al-
len orten.

pfangen/seynd sie außgangē in die ganze Welt
vnd predigten das Euangelium/den Christli-
chen/Catholischen Glauben/an allen orten.

Wiewol es diser zeit nit so sehr/als domaln
nötig/das alle vnd jede Prediger/in alle land das
Euangelium zu verkündigen außgehen/ seit
maln wir nit/wie zur selbigen zeit/weder Jüde
noch Heyden/sonder Christen seynd/vñ also
jeder Bischoue vnd Prediger seiner Schäf-
fleißig auff vnd außwarten soll/auff das sie
den Wölffen sicher/vnd bey dem H. Euang-
lio/bey dem wahren/Christlichen/Catholischen
Glauben mögen erhalten vnd endlich selig wer-
den: so haben doch gewißlich/vnd am allerme-
sten diser zeit/beide/die Bischoue vnd Prediger
ein sonderliche/nützliche vnd notwendige le-
re zu nemmen. Die Bischoue von Christo/Die
Prediger von den Aposteln. Nit allein hat der
Herr Christus/als er hie auff Erden gewan-
dert/selbsten fleißig vnd ernstlich gepredigt
sonder wolte auch nit/das die Welt/nach seiner
Himmelfart/ohne Prediger seyn solte: sende
derhalben auß/nit nur in das Jüdisch land/nur
nur in diß oder jenes ort/sonder in die ganze
Welt/nit nur zwölff Apostel/sonder auch zwölff
vnd sibenzig Jünger/vnd jeder zeit vnzalbar
lich vil frummer/gelehrter/vnd guter Predi-
ger. Also könnte es auch den Bischouen diser zeit
nit schaden/stündte wol/das sie auch selbsten
Personlich predigten/wurden gewißlich mehr
nutz vnd frucht bey allem Volck schaffen/dann
sonsten zween/drey/oder mehr Prediger:nit auß-
gesehen

Bischoue
sollen von
Christo ler-
nen.

gesehen auch / ob schon etwann andere Predi-
ger mehr Gnad / als sie / von GOTT / hierzu em-
pfangen hetten / vnd dem gemeinen Volck an-
mütiger / als sie / zu hören weren / wurde doch ein
jeder lieber in eines Bischoues / dann in eines
Capellans Predig gehn. Do sie aber je selbst
nit predigen wolten / oder / wegen der wichtigen
vnd vilen obligenden geschafften / nit könten / sol-
ten sie doch ein milttere hand haben gute vnd ge- **Seltz bestete**
lehrte Prediger zu bestellen : vnd nit nur an das **nit gute Pre-**
jenig ort / alda sie ihren Sitz haben / sonder auch / **diger.**
aufsenden in das ganze Bistumb vnd die jeni-
ge örter / alda sie Schäßlin haben / für welche sie
auch / wenn sich Leib vnd Seel scheiden / antwort
geben müssen. Es gehet jezund (leider) an etli-
chen orten von statt wie es mag / vnd nit wie es
solt. Prediger / die wenig gelehrt / auch zum Pre-
digen wenig taugenlich seynd / lassen sich mit ei-
ner geringen besoldung (weil sie wol wissen daß
sie mehrers nit versehen noch verdienen kön-
den) genügen / werden angenommen / vnd et-
wann (wegen des losen Seltz) die gelehrten vnd
gute Prediger nit geachtet / oder doch auff das
wenigst jhnē nit nachgetrachtet / so doch / GOTT
lob / derselbigen mehrmaln nit wenig zu bekom-
men weren. Vnd das noch mehr zu erbarmen
vnd sünd ist / werden hin vñ her in etlichen Stiff-
ten / an statt der Pfarherrn / Böß / vermeynte
Prediger / ja Seelmörder an statt der Seelsor- **Seelmörder**
ger / gefunden / so die Schäßlin von der Catholi- **für Seel-**
schen weide / in das Ewig sterben führen. Wee **sorger.**
vnd abermal wee / hie vñ dort wee / allen vñ jeden

Bischöuen/ allen vnd jeden Weltlichen Potentaten/ allen vnd jeden Geistlichen Prelaten/ so solche Seelmörder/eintweder an vnd auffnehmen/oder doch die von andern auffgenommen/oder selbst engetrungen/nach vermögen nit abschaffen/mit Catholischen Predigern nit besetzen / sonder lassen alles also gut vnd frumme Meune gerad seyn : vnd diß erwann auß hinfichtigkeit/ auß Faulheit/ auß nit achtung/ auß geistigkeit/ auß forcht der Welt/oder auß andern vorgebenlichen/vnbindigen vrsachen/ wann sie nit die Woll haben/ es ergehe gleich den Schäflein wie GOTT oder aber der Teufel wölle. Es lassen

Wer ohren sich wol leiben/ wie es sich aber Seelen werden zu hörē hat/ der hōre. wirdt die zeit mit sich bringen. Welche ohren zu hören haben/ denen seye hiernon/vnd also/ auch diß mal/ gnug gesagt.

Prediger sollen von den Jüngern Christi lernen.

Es haben aber zwar die Prediger/ deren ich mich den geringsten gern bekennen thu/auch ihr Exempel vnd notwendige lehr von den Jüngern Christi zu lernen : Nit nur etliche / sonder alle Apostel seynd außgangen zu Predigen/ nit nur an die jenigen ort alda man albereit gleubig/vnd sie sicher/lieb vnd werth gehalten seynd worden/sonder in die ganken Welt/ mittē vnder die Vngleubigen vnd Tyrannen : haben geprediget/nit was man gern gehört/vnd einem jeden gefallen hat/sonder/was die warheit gewesen ist/darüber haben sie auch gern vnd gutwillig/alles/endlich auch den tod gelitten ꝛc. Bil aber vnder vns Predigern (do ich mich auch billich vnder die Prediger/doch den geringsten/zellen soll) seynd

zum

zum Predigen so faul/träg vnd hinlessig/das wir in einem Monat kaum ein Predig thun. Ja etwann in einem Jar oder gar nit predigen wir/eintweder ist der Bentel zu vol/ oder der Bauch zu groß/ oder der faulkeit zu vil. Vnd gemeinglich wollen predigen die jenigen/ so hierzu wenig Gnad haben/vñ die jenigen so GOTT mit herrlichen Gaben begabt/ vnd menigklich/ den Gelehrten vñ Ungelehrte anmütig zu hören seynd/ die ligen auff der faulen seiten/oder bringen sonst ihre tag vergebentlich hin/ nit angesehen/ das sie weder schwaches leibs seynd/ noch das Euangelium schriftlich verkündigen.

Anderer seynd/ so gleichwol wollen predigen/ vnd predigen auch nach vermögen/ aber doch nur an den jenigen orten/ do die Schässin vor den Wölffen sicher seynd/ alda eitel Schaf vnd keine Wölff seynd/ alda alle zuhörer Catholisch seynd/ alda sie von vnd vor der Welt/ den Catholischen Glauben vnsträfflich vnd genslich ohne einige eynrede/ predigen mögen. An den jenigen orten aber/ alda man nit durchauß Catholisch ist/ wollen sie/ eintweder gar nit predigen/oder doch den Mantel also nach dem Winde hencken/ das sie jedermann gefallen mögen. Solche Prediger wirdt Christus vor seinem Himmelischen Vatter nit bekennen/ seitemaln sie ihne vnd den Catholischen Glauben/ nit offentlich vnd außtruckenlich vor der Welt bekenne haben/wie sie dann schuldig gewesen seynd. Der halben/ weil sie die Welt mehr geliebt vnd gefürcht haben/das GOTT/ werden sie auch ihre

Ursach/darumb die Prediger nit predigen.

Prediger fürchtē sich.

Den Mantel nach dem Winde hencken.

besoldung von der Welt vnd nit von GOTT haben. Dise beide haben die lieben Apostel nit gethon/ sonder sie all haben geprediget/ an allen enden vnd orten/ wo es von nöten gewesen/ vnd haben gesagt was die warheit ist/ es habe gefallen oder nit gefallen wem es wolle oder nit wolle: welchen wir billich/ wo es von nöten/ vnd so vil vns möglich ist/ nachuolgen sollen.

An statt des Beschluß vorhabender Predig (weil sie albereit ihr gebürliche leng erreicht hat) wollen wir zu Christo vnserm Heiland also bitten vnd betten:

Sebett zu
Christo vn-
serm Herrē.

W Ir sagen dir lob vnd danck/ du
miltiger gütiger GOTT Herr
IESV Christ/ daß du dich auff
heut/ am H. tag deiner Himmelfart/ de-
nen Jüngern noch ein mal offenbaret/ ih-
nen vnd vns dadurch dein wahre Auffe-
stehung lehren hast wollen. Darumb auch
dancken wir dir: Daß du vor ihrem Ange-
sicht/ zu deinem vnd vnserm Himmelschen
Vatter hast gen Himmel auffaren wol-
len/ desse sie in der ganken Welt zeugen
seyn solten/ wie sie dan/ so bald sie den H.
Geist empfangen/ in die ganze Welt auß-
gangen/ das H. Euangelium geprediget/
vnd die H. Sacramenten außgespendet
haben. Wir bitten dich/ O Herr IESV
Christ/ sende auch vns iekund vnd jeder-
zeit/ solche Apostel/ Bischoue/ Prelaten
vnd

Am tag des H. Papsts Urbani. 73

vnd Prediger/ daß der wahre Christliche
Catholische Glaub möge erhalten/ erweitz-
tert/ vnd der Vncatholisch außgereutert/
vnd wir alle selig werden/ Amen.

Am tag des H. Papsts vnd Mar- Am 25. tag
tyrers Urbani/ zum theil im Costan- im Meyen.
ker Bistumb feyerlich.



User Urbanus/ so hernach zu
Rom ein Papst vnd dieses Na-
mens der erste war/ ist zu Rom
von Edlen Eltern geporn/ vnd ein
Christ von juget auff. Vnder der
verfolgung des Keyfers Alexandri seynd auß
seiner Predig vnd Lehr/ bey fünff tausent Men-
schen zu Christo bekert/ vnd mit der Marter ge-
frönt worden. Er aber ward endlich mit seinen
dreyen Priestern/ nämlich/ Romano/ Diony-
sio/ vnd Chromatio/ auch mit zweyen Diaco-
nen/ nämlich/ Martiali vnd Luciano/ gefangen/
vil Peyn vnd Marter gutwillig gelitten/ vnd
endlich enthauptet worden/ vnd also die kron
der Seligkeit erlangt.

Urbanus
ein Papst
zu Rom.

Ze jenigen Euangelien vnd Pre-
digen mögen nit vnfüglich auff
heut gebraucht werden/ so an der
Bekerung Pauli/ Georgij/ Marci/ Lau-
rentij vñ Stephani vermerckt seynd wor-
den.

Am

74. Am tag des H. Beicht. Maximini.

Am 29. tag
Im Meyen.

Am tag des heiligen Beichtigers
vnd Bischoues Maximini/ zum theil
zu Trier feyerlich.

Maximinus auß Aquitania bür-
tig/ ist gen Trier gewandert/ do
selbst er sich so Christlich vñ Ehr-
lich gehalten/ das ihne Agricius der
selige Bischoue daselbst/ zu sei-
nem Succedenten oder nach ihme künfftigen
Bischoue instituirt vnd designirt hat/ dareyn
auch die ganze Clerisey vnd das Volck verwilli-
get hat. Diser Bischoue hat den verjagten Bi-
schouē Arhanasium auß Orient/ lange zeit heim-
lich auffgehalten. Er hat auch den Kekerischen
Bischouē zu Cōln Euphraten/ in einem Syno-
do/ daselbst gehalten/ helffen abscken. Er ist
auch auff ein zeit gen Turon gereiset den H. Bi-
schouen Martinum zu sehen vnd hören. Als er
auff ein zeit sein Vatterland besuchet/ verschied
er daselbst/ an welches statt Paulinus Bischou-
ue worden ist. Sein Heiligthumb seynd durch
den Bischouen Hildolphum/ von Aquitania gen
Trier gebracht worden / alda GOTT erstlich/
gleich wie auch bey den Gräbern Sanct Eucha-
rij/ Valerij/ Materni/ nit geringe Wunderzei-
chen gewirckt hat ꝛc.

Anno 350.

Anno 460.

Levangelien vnd Predigen/ wie am
tag Wilibaldi/ Henrici/ Nicolai/
Martini ꝛc.

Am

Am heiligen Festtag des Hochwirdigen
Sacraments oder Fronleichnam
s Christi / Euang. Joan. vj.



In der zeit sprach d' H're
zu seinen Jüngern: Mein
Fleisch ist warhafftig ein
speiß / vnd mein Blut ist
warhafftig ein tranck.
Wer mein fleisch isset /
vnd mein blut trincket / der bleibt in mir /
vnd ich in ihm. Wie mich gesandt hat der
lebendig Vatter / vnd ich lebe vmb des
Vatters willen: also der mich isset / derselb
wirdt auch leben vmb meinet willen. Dis
ist das Brot / das vom Himmel kommen
ist. Nit wie euwere Väter haben Himmel
brot

Am heiligen Fest des H.
vnd seynd gestorben. Wer von disem Brot
isset/ der wirdt leben in ewigkeit.

Dis ist das Brot/das vom Himmel
kommen ist. Ioan. vj.

As die Catholischen Christen
in der ganzen weiten Welt/ auff
heut/ für ein herrlichs vnd Christ-
lichs Fest halten/ weist nit allein
GOTT vnd alle Catholische Chris-
ten/ sonder auch der Teufel/ der Türck/ die Jü-
den/ alle Mamelucken vnd Vncatholische Chris-
ten. Disen aber allen/ gefelt heutigs Fest nit zu
gleich. GOTT/ vnd allen Gottliebenden Ca-
tholischen Christen gefelt es gar wol: GOTT
selbsten/ ehren/ loben vñ preisen die Catholischen
in vnd mit disem heutigen Fest. GOTT nimt
solche Ehrerbietung vnd anbettung vñ mit wi-
dergeltung von allen vnd jeden Catholischen
Christen gar gern an. Dem Teufel aber vnd al-
len Vngleubigen gefelt dis Fest durchaus ja gar
nit: Dann sie mögen nit leiden/ daß Christus
solle als der Sohn GOTTES angebetet wer-
den: vil lieber wolten sie/ daß er/ als der Sohn
GOTTES geleugnet/ gelästert/ vnd sie für den
Sohn GOTTES gehalten vñ angebetet wür-
den/ wie dann der Teufel auff ein zeit selbsten zu
Christo gesagt hat: Er solle für ihne niederfal-
len vnd ihne anbetten. Etliche andere/ so gleich-
wol bekennen/ Christus seye der wahre Natür-
liche Sohn GOTTES/ vergönnen ihme aber
nit

Matth. 4.

nit/ daß man ihne im H. Sacrament ehren vnd anbetten soll.

Eben diser ursach/ daß die ganze Welt sehen vnd bekennen soll: Daß Christus nit allein der wahre Sohn GOTTES/ sonder auch eigentlich vnd wesentlich im H. Sacrament sey/ hat die H. Christlich Kyrch auff heut/ ein sonderlichs Fest verordnet/ daran das H. Sacrament/ das ist/ Christus IESVS/ wahrer GOTT vnd Mensch/ im H. Sacrament/ öffentlich/ in gemeiner Procession solle herumb getragen/ vnd meniglich zu ehren vnd anbetten fürgestelle werden.

Ursach dieser Procession mit dem H. Sacrament.

Mir ist wol bewust/ Daß vil Eynreden seynd wider diß H. Fest/ Umtragung vñ Anbettung diß H. Sacraments/ können aber all auff ein mal nit erörtert werdē. Wöllen derhalben auff diß mal/ allein nach den zweyen Theilen dieser Predig/ von disen zweyen Punct/in handeln. Erstlich/ wider die Calvinischen vnd Zwinglischen: Das Christus warhafftig/ mit Fleisch vñ Blut/ Leib vnd Seel/ Gottheit vñ Menschheit/ im H. Sacrament vorhanden seye. Zum andern/ wider die Lutherischē: Daß Christus nit nur zur zeit der niessung im H. Sacrament sey/ sonder/ so bald die Wort der Eynsetzung von einem Catholischē Priester/ vnder dem H. Ampt der Meß/ vber Brot vnd Wein gesprochen werden/ vnd bleibe volgendts ein Sacrament/ so lang/ wie lang die Gestalten Brots vnd Weins bleiben/ man niesse solchs oder nit/ man schliesse dasselbig eyn oder trage es in öffentlicher Procession umb etc.

Theilung vnd Inhalt dieser Predig.

vmb 2c. Von der Umtragung aber vnd Anbetung desselbigen/ soll mitler zeit (ob GOTT wil) am heutigen Fest in der grossen Postillgnugsam gehandelt werden.

Zekund lasset vns vorhabende Predig mit ernst anhören/ vnd vnsern Glauben darauff stercken.

WAs dan erstlich die Calvinischen/ Zwinglischen/ Decolampadischen vñ andere dergleichen leut belangen thut/ so sich auch als Christen nennen vnd bekennen vnd diß heutig heilig Fest verwerffen/ geschicht diser vermeynten vrsach: Christus/ sprechen sie/ ist nit/ weder mit fleisch noch blut/ weder mit Leib noch Seel/ weder mit Gottheit noch mit Menschheit im Sacrament/ wirdt auch darinnen eigentlich vnd wesentlich nit genossen/ sonder allein das Brot vnd Wein zu seiner gedechnuß genommen. Soll derhalben/ als der wahre Christus/ GOTTES vnd MARIAE Sohn/nit/weder gezeigt/vmbgetragen/noch vil weniger angebetet werden 2c. Wie falsch aber vnd Bruchristlich dise ihr Eynrede sey/ soll jekund auß GOTTES Wort (doch auff diß mal kürzlich) angezeigt werden. also spricht Christus im heutigen Euangelio: Mein fleisch ist warhafftig ein speiß/ vñ mein blut ist warhafftig ein tranck. Wer mein fleisch isset/ vnd mein blut trincket/ der bleibt in mir/ vnd ich in ihme 2c. Daß Christus der Herr alda/ von seinem wahren Leib/ fleisch vnd blut/ von einem wahren

Caluinische
Ketzerey.

Bekentnuß
Christi vom
H. Sacra-
ment.

wahren niessen / essen vnd trincken / geredet habe / ist leichlich auß seinen selbst eignen worten zu lernen / do er außdrucklich vnd vndisputirlich zu seinen Jüngern vnd den Jüden gesagt hat: Mein Fleisch ist warhafftig ein speiß / vnd mein Blut ist warhafftig ein tranck. Do er aber sein Fleisch vnd Blut / ein geistliche Speiß vnd Tranck genennet hette / so möchte solchs den Calvinischen vnder die Arm greiffen / alda sie für diese Speiß vnd Tranck den Glauben in Christum verstehn wöllen. So haben auch alle H. Lehrer (wie auch der Ketzer Joannes Hus selbst auff dem Concilio zu Costenz) bekennet vnd gelehrt: Daß Christus alda von seinem wahren fleisch vnd blut gehandelt / geredet / vnd verstanden hab.

Christus be-
stetigt mit
seinem höch-
sten schwur.

Joannes
Hus zu Cos-
tens ver-
brennt.

Auß den vorgehenden worten diß heutigen Euangelij / kan eben solchs auch gelernet werden: Dañ nach deme der Herr mit fünff Bro-
ten vnd wenig Fischen vber die fünff tausent
Menschen gespeiset / vnd die Jüden bald hernach widerumb ein solchs ob ein anders Wunderzeichen gern von ihme gesehen hetten / vnd zu ihm sprachen: Was thust du dann für ein zeichen? auff daß wir sehen vnd glauben dir / was wirckestu? Vnsere Vätter haben Himmelbrot
gessen in der Wüste ꝛc. Do sprach IESVS zu ihnen: Wahrlich wahrlich sage ich euch: Moses hat euch nit Brot vom Himmel geben / sonder mein Vatter gibt euch das recht Brot vom Himmel / dann diß ist das warhafftig Brot / das vom Himmel kompt / vnd gibt der Welt

Wunderzei-
chen Christi.

Joan. 6.

Exod. 16.

f das

Jüdisch
Himmelbrot.

das leben. Hie redet der Herr vom Jüdischen
Himmelbrot/ redet auch von der Christen Him-
melbrot. Das Jüdisch Himmelbrot war ein
leiblichs Brot/ gleich dem Coriander Samen.

Christlich
Himmelbrot.

Das Christlich Himmelbrot/ ist das Fleisch
vnd Blut Christi/ ein warhafftige Speiß vnd
tranc/ so denen/ welche es würdig empfangen
das leben gibt ic.

Frag an die
Caluinische.

Ist dann nun/ als auß der verheißung Chri-
sti (dann dise wort hat er beyseuffig anderthalb
Jar vor seinem letzten Abendmal geredt) er-
senbar/ sein Fleisch warhofftig ein Speiß/ vnd
sein Blut warhafftig ein tranc/ So wollen
vns die Caluinischen berichten: Wann/ wo
oder wie wir Christen sein Fleisch vnd Blut
warhafftig niessen/ essen vnd trincken/ auff daß
er in vns vnd wir in ihme bleiben? auff daß
wir das leben haben? Bekennen müssen vnd
müsten sie ja/ do sie nit willig vnd mutwillig
der bekanten Warheit vnd dem außdruckent-
lichen Wort GOTTES/ wider ihr eigens Ge-
wissen handelten/ daß solchs sonst nirgents
geschicht/ vnd eigentlich geschicht im H. Sacra-
ment des Altars/ vnder gestalten Brot vnd

Was Chri-
stus ver-
spricht/ das
ist vnd muß
wahr seyn.

Weins. Dann warumb wolte Christus sei-
nen Jüngern/ vnd allen Glaubigen Christen
sein Fleisch vnd Blut zu einer warhafftigen
Speiß vnd Tranc/ miter zeit zu geben ver-
sprochen haben/ wann er volgendts solchs
im Werck vnd mit der that nit wolte geleistet/
vnd eigentlich/ Wesentlich/ sein Fleisch vnd
Blut zur Speiß vnd tranc nit wolte gereicht
haben?

haben? Er kan ja nit / weder liegen noch betriegen.

Nun wollen wir jekund auch mit grund der warheit / vnd eben auch vnd widerumb auß dem H. Mund Christi selbstem erweisen: Daß er seinen Jüngern / hernach / laut diser verheißung / vor seinem tod / sein Fleisch vnd Blut / warhafftig zur speiß vnd tranck gereicht / sein wahres Fleisch vnd Blut seyn bekant hat. Daß deme gewißlich also / vnd nit anderst sey / soll vns erslich einer bezeugē / der selbstem dabey gewesen / do der Herr solchs gereicht hat / der selbstem in seine ohren alle Wort gehört so der Herr domaln gereicht / mit seinen augen hat er gesehē was der Herr domaln gethon hat / in seinen Mund hat er selbstem vñ eben auch domaln das H. Sacrament / das wahr Fleisch vnd Blut Christi / empfangen vnd genossen: der wirdt freilich vns gnugsamen / satten vnd warhafftigen Bericht geben können / was sich domaln zwischen dem Herren vnd seinen Jüngern verlossen / was er ihnen gereicht / vnd was sie empfangen haben / seinen leib / fleisch vnd Blut / oder nur ein zeichen vnd bedeutung desselbigen.

Diser zeuge soll nämlich der H. Euangelist vnd Apostel Christi Mattheus selbstem seyn / der bezeugt: Daß der Herr Christus / diser seiner verheißung statt geben vnd gnug gethon habe / am letzten Abēd mal so er mit seinen Jüngern am abēd zu vor / ehe dann er den tod gelitten / zu Jerusalem gehalten hat / mit disen wortē: Do sie aber zu nacht assen / name IESVS Matth. 26.

f 2 das

Erwelsung
dz das wahre
Fleisch vnd
blut Christi
im H. Sa-
crament sey.

Das ist
mein Leib.
Das ist
mein Blut.

Gottlosig-
keit der Cal-
uinischen.

Caluinischen
straffen Chri-
stum lüg.

Verfälsch-
ung der Worten
Christi.

das Brot/ Benedeyet vnd brach es/ vnd gab es
den Jüngern/ vnd sprach: Nemet hin vnd es-
set/ Das ist mein Leib. Vnd er name den Kelch/
vnd saget danck/ vnd gab ihn den/ vnd sprach:
Trincket alle darauß/ dann das ist mein Blut
des newen Testaments/ welches vergossen
wirdt für vil zur vergebung der Sünd. So hell
vnd klar/ so verstandlich vnd außdruckentlich
seynd dise wort des H. Euangelisten Matthei
so er auß den wercken vnd Mund Christi ge-
nommen hat/ daß mich nur wunder nimmet
wie ihnen doch die Caluinischen vnd Zwingli-
schen widersprechen dörfen. Gewißlich geben
sie der ganken Welt zu verstehn/ daß sie weder
dem Euangelisten noch Christo glauben/ son-
der/ als vnüberschampte leut/ sie beide lüg straf-
fen. Mit hellen vnd disputirlichen Worten hat der
Herr zu seinen Jüngern gesagt/ (nach dem er
den Segen vber Brot vnd Wein gesprochen)
Ihnen dasselbig zur Speiß vnd tranck gereicht)
Nemet hin vnd esset? Was? Das/ so ich euch
reiche. Was ist's? Ehe dann ichs in die hand
nam/ war es Brot vnd Wein. Was ist's dann
jekund? Es ist mein Leib/ Es ist mein Blut.
Dis seynd ja helle/ Teutsche/ verstandliche/ vnd
disputirliche wort: Das ist mein Leib/ das ist
mein Blut. Welcher Geist/ ja welcher Teufel/ hat
dann die Caluinischen gelehrt/ dise wort Christi
verfälschen/ vnd also auflegen oder verstehn/
als wann Christus gesagt hett: Nemet hin
esset vnd trincket: Das bedeutet meinen Leib/
das

das bedeutet mein Blut. Oder: Das ist ein Fi-
gur/ oder ein zeiche vñ bedeutung meines leibs.
Diß vnd dergleichen hat ja Christus vnser lie-
ber Herr niemaln gedacht/ wil geschweigen ge-
redet/ gar nit aber also gemeynt.

Nun ist aber je ein mal vnd alle mal vnlaug-
bar/ vnd die ganze Christenheit muß bekennen:

Daß alle zwölff Apostel/ domaln/ nit allein das
jenig/ so ihnen der Herr gereicht/ als das wahr
fleisch vnd Blut Christi empfangen vnd ge-
nossen haben/ sonder/ daß sie auch volgendts/
das H. Sacrament/ anderst nit/ dann als das
wahr Fleisch vnd Blut Christi / andern Chri-
sten gereicht haben. Wann dann Christus der
Herr/ das doch vnmöglich ist/ seinen Jüngern
nur auff einen schein/ nur mit worten vnd nit in
der that selbst/ sein Fleisch vnd Blut gereicht
hette/ so müste er nit allein (welches doch auch
vnmöglich ist) seine Jünger betrogen haben/
sonder were (welches Gottloß zu gedencen/ wil
geschweigen zu sagen were) auch ein vrsach ge-
wesen/ daß die Apostel volgendts/ auch in dar-
reichung des Sacraments / vil andere betro-
gen hetten. Ja GOTT wurde seiner zusa-
gung nit nachkommen seyn/ alda er seiner
Kirchen versprochen/ ihr biß an das ende der
Welt beywohnen/ vnd sie doch (nach der Cal-
uinischen meynung) biß auff disen heutigen
tag/ in disem mercklichen irrthumb hert stecken
lassen.

Ist derhalben ein offentliche vnwarheit/ das
die Calvinischen fürgeben: Im H. Sacrament

f 3 seye

Apostel ha-
ben das H.
Sacrament
empfangen
vnd andern
gereicht.

Gott wohe-
net seiner
Kirchen
bey/ biß an
den Jüng-
sten tag.

seye nichts dann nur Brot vnd Wein/ vnd ein Figur oder Bedeutung des leibs vnd Blut Christi: Derhalben solle man das H. Sacrament auff heut/ noch zur andern zeit/ nit vmbtragen/ noch als den wahren Sohn GOTTES vnd MARIAE/ zeigen/ ehren/ noch anbeten lassen.

Erwisen ist auß der zeugnuß des H. Euangelisten Matthei: Daß der Herr Christus in letzten Abendmal/ vnder gestalten Brot vnd Weins/ seinen wahren leib vnd Blut/ zur speiß vnd tranck gereicht hat. So hat er auch seinen Jüngern/ vnd allen Catholischen Priestern durch dise wort/ Das thut zu meiner gedechtnuß/ auß Brot vnd Wein/ sein Fleisch vnd Blut zu machen gewalt geben. Also/ daß noch auff den heutigen tag/ so bald ein Catholischer Priester die verordnete Wort/ vber Brot vnd Wein/ im Ampt der H. Mess spricht/ vor handen ist/ der leib vñ Blut Christi/ ja der ganze/ volkommenliche Christus/ mit leib vnd Seele/ Fleisch vnd Blut/ Gottheit vnd Menschheit. In derhalben billich vnd Christlich/ daß er im H. Sacrament/ als der Sohn GOTTES vnd MARIAE gelobt/ geehrt/ gepriesen vnd angebetet werde.

Unser fürnemen wider die Caluinischen/ erweisen auch die Euangelisten Marcus vnd Lucas/ welcher wort alda anzuziehē/ will die gebürliche lenge des ersten Theils vorhabender Predig nit gestatten. Allein wöllen wir zwey Wort/ so Christus in darreichung seines leibs/ zu seinen

Apostel
seynd Priester
wordē.

Catholische
Priester
könden das
Sacramēt
machen.

Gott soll
man anbeten.

Mar. 14.
Luc. 22.

Jüngern gesagt/ welche Mattheus vnd Marcus außgelassen/ Lucas aber gesetzt hat/ ein wenig erwegen: Das ist mein Leib/ der für euch geben wirdt. Was für ein Leib am H. Karfreitag/ am stammen des H. Creuzes/ für vns geben sey worden/ wissen wir Catholische Christen wol/ nämlich/der jenig Leib/ so auß MARIA geporen/ so hie auff Erden gelebt/ gessen vnd getruncken/ gelehrt/ vnd Wunderzeichen gethon/ der Fleisch vnd Blut/ Leib vnd Seel/ Gottheit vnd Menschheit gehabt/ ja der Mensch vnd GOTT gewesen ist/ derselbig Leib ist für vns geben worden/ vnd nit nur ein Figur/ zeichen oder bedeutung seines Leibs. Weil daß der Herr Jesu im Abendmal/ vnder der gestalt des Brots/ eben denselbigen Leib/ so am Creuz gehangen vnd für vns geben ist worden/ seinen Jüngern gereicht hat/ so müssen sie ja seinen wahren Leib/ vnd nit nur ein zeichen oder Bedeutung desselbigen/ empfangen haben/ ist volgendts noch auff den heutigen tag im H. Sacrament des Altars/ das wahr Fleisch vnd Blut Christi/ ja Christus selbst/ eigentlich vnd Wesentlich/ vnd nit ein zeichen oder Bedeutung desselbigen.

Christus ist für vns gegeben worden.

Vnd wann wir Catholische Christen/ kein einige zeugnuß/ weder der Euangelisten noch Christi hetten/ deren wir doch volauff haben/ so weren/ vnser fürnemen wider die Caluinischen zu erweisen/ doch dise wort des heiligen Apostels Pauli gar gnug: Der Mensch prüffe oder probire sich zuuor/ als daß esse er von dem Brot/ vñ

1. Cor. 10.

Paulus vñ
H. Sacra-
ment.

Ein vnder-
scheid zw-
schen dem
Brot so mā
zu hauff is-
set/vñ dem
H. Sacra-
ment.

trincke von dem Kelch. Dañ welcher vnwürdig
isset vñ trincket/ der isset vñ trincket ihme selb-
sten das Gericht/ dieweil er nit vñderscheidet
den leib des Herren. Warumb solte oder mü-
ste sich der Mensch lang vñ vil im Glauben
vñ Leben probiren/ wann er essen vñ trincken
wolt/ wann die Speiß nichts dann nur Brot
vñ Wein/ nur ein Bedeutung des Leibs vñ
Bluts Christi/ vñ nit sein eigen Fleisch vñ
Blut selbsten were? Warumb solte der Mensch
des Gerichts vñ der Verdammuß schuldig
seyn/ so vnwürdig ein gemeines Brot vñ Wein
isset vñ trincket? Wahrlich/ wann deme alle
so were kein Christen mensch des Ewigen Le-
bens versichert. Vñ zwar bedarffs nit vil strei-
tens/ der H. Paulus entscheidet disen zant selb-
sten/ do er spricht/ Dieweil er nit vñderscheidet
den leib des Herrē/ sonder vermeynt das
H. Sacrament seye nur ein Brot/ wie das ja-
nig so er zu hauff isset etc.

Unug seye hiemit wider die Caluinischen
im ersten Theil diser Predig/ erwisen: Das im
H. Sacrament des Altars/ nit nur ein Figur/
Bedeutung oder zeichen des Leibs vñ Bluts
Christi/ sonder das wahr Fleisch vñ Blut Chri-
sti (ja Christus selbsten mit Fleisch vñ Blut/
Leib vñ Seel/ Gottheit vñ Menschheit/ wes-
sentlich vñ eigentlich in der warheit vorhanden
seye. Vñ volgendts auff ihren nichtigen Ein-
trag: Man solle das Sacrament nit vñbrin-
gen/ dann Christus seye nit darinnen/ sonder
mit

nur ein zeichen vnd bedeutung / gnugsam ge-
antwortet.

Sod zwar ist sich nit so sehr vber die
Abtrünnigen Calvinisten zu verwun-
dern / daß sie diß heutig H. Fest abgethon
haben / seitemaln sie nit glauben / daß Christus
im H. Sacramēt fene. Aber an die Lutherischen
ist sich vber die massen sehr vnd hoch zu verwun-
dern / seitemaln sie / die leut vberreden wollen / sie
glauben daß das wahr fleisch vnd Blut Christi /
ja Christus selbstē / der wahre Sohn GOTTES
vnd MARIAE / im H. Sacrament des Altars
fene / vnd wollen ihme doch sein gebürliche vnd
Göttliche Ehr im H. Sacrament nit erzeigen /
haben dises heutig H. Fest ohne alle wichtige vr-
sach abgeschafft / als etliche vermeynē darumb :
Daß man GOTT / ob er schon im H. Sacra-
ment ist / doch darinnen nit anbetten soll / so man
doch GOTT anbetten soll alda er ist / im Him-
mel / in einem Busch / in gestalt einer Tauben /
im H. Sacrament / oder wo er ist. Aber / wie im
Eyn gang diser Predig gemeldet / soll mitler zeit
hieron auß fürlich gehandelt werden.

Andere Lutheraner seynd / die gleichwol auch
(als sie fürgeben) glauben : Daß Christus im
H. Sacrament sey / doch zur zeit wann man das
selbig niesset / vñ sonst nit / derhalben wollen sie
dasselbig weder vmbtragē noch anbetten. Herge-
gen ist dises vnser Christliche Catholische Lehr /
welche auß dem H. Mund GOTTES selbstē
erwisen kan werden : Daß / so bald ein Catholi-
scher Priester / die Wort des Abendmals / im H.

Über die
Lutherische
verwundert
sich die gan-
ze Welt.

Gott soll
man anbet-
ten / wo er ist

Der ander
irrhumb der
Lutherische.

Catholische
Lehr vom

H. Sacra-
ment des
Altars.

Christus
bleibt im H.
Sacrament.

Ampt der Mess/ vber Brot vnd Wein spricht/
als bald vorhanden seye / das fleisch vnd Blut
Christi / ja Christus selbst / als ein wahrer
GOTT vnd Mensch / vnd bleibe also im H. Sa-
crament / so lang / wie lang die gestalten desselbi-
gen Brots vnd Weins vorhanden seynd / man
niesse dasselbig vber kurz oder lang / man behal-
te es auff oder schliesse dasselbig eyn / man trage
dasselbig vber die gassen zu den francen oder in
der Procession vmb die Stadt / oder man stelle
dasselbig auff den Altar. Vnd / das volgendts
recht seye / Christum / im H. Sacrament ehren/
offentlich den Christen darstellen / ihme seine ge-
bürliche Ehr vnd Anbettung zu erzeigen beueh-
hen vnd lehren.

Es were aber auch wol nöria / auff gemelten
Puncten / weitleuffig vnd außfürlich zu antwor-
ten / aber diß mal kans nit geschehen / seitemaln
dise Predig ihr gebürliche leng bey zeit vber schrei-
ten wurde : mit wenig / doch verstendlichen vnd
warhafftigen worten / soll es auff diß mal (bisß
zu seiner zeit weitleuffiger) geschehen.

Christus ist
vnsrer zeug.

Nun so sage vns her du Gütiger warhaffti-
ger GOTT Herr IESV Christe / ist dein wahr
fleisch vñ Blut im H. Sacrament gewesen / erst
zur zeit / als die Apostel dasselbig genossen haben /
oder / als bald du die Wort vber Brot vñ Wein
gesprochen hast ? Also bezeugen von ihme die H.
Euangelisten / so das Nachtmal beschriben ha-
ben. Do sie aber zu nacht assen / nam IESVS das
Brot / Benedeyet vnd brach es / vnd gabs den
Jüngern / vnd sprach : Nempt hin vnd esset / das

Matth. 26.

Mar. 14.

Luc. 22.

ist mein leib. Vnd er nam den Kelch / saget danck / vnd gab ihn den / vnd sprach: Trincket alle darauff / dann das ist mein Blut ic. Gern wolte ich wissen vnd von den Lutherischen selbstem hören / ob sie auch disen Worten Christi / von herken glauben / oder nit glauben. Glauben sie Christo nit / so seynd sie nit würdig / daß sie sollen Christen genennet werde / vnd volgendts nit / daß wir mit ihnen schriftlich hiernon handeln sollen. Glauben sie aber Christo vnd seinen Worten / der Eynsakung des heiligen Abendmals / so müssen sie / wider ihren willen / vnd ohne danck / wann sie anderst der Warheit beyfallen wollen / bekennen: Daß das heilig Sacrament / außserhalb des gebrauchts oder niessung seye. Was hat dann der Herr von disem H. Sacrament / so bald er die Wort darüber gesprochen / vnd ehe daß die Jünger dasselbig genossen / ja ehe daß sie noch eigentlich gewist haben / daß sie eben jekund / vnder gestalten Brot vnd Wein / sein fleisch vnd Blut empfahen solten / bekennt? Hat er zu seinen Jüngern gesagt: Nempt hin vñ esset / das wirdt mein leib / wann ihr esset? Trincket / das wirdt mein Blut / so bald ihr trincket? Hat er also gesagt? O Nein. Wann er also gesagt hette / so müsten vnd wolten wir den Lutherischen gern gewonnen geben / vnd bekennen / daß das fleisch vnd Blut Christi nit im H. Sacrament were / so lang / bis daß man dasselbig niesset. Vil anderst / ja nit auff Lutherisch / sonder auff gut Catholisch hat Christus im letzten Abendmal vor seinen Jüngern bekennt: Daß sein fleisch vnd Blut

Das ist als bereit mein leib vnd Blut.

Das heilig Sacrament ist außserhalb der niessung.

Also hat Christus nit gesagt.

im

im H. Sacrament seye/auch vor der niessung/ja so bald die Wort vber Brot vnd Wein gesprochen seynd worden. Darumb sagt er/als er das H. Sacrament noch in henden hett: Nempt hin

Er sagt nit: vnd esset/ Das ist (albereit) mein Leib. **Trink**
Das wirdt: et/das ist (albereit) mein Blut. **War dann di-**
sonder/ das ses/so der Herr in seiner hand gehabt/ehe daß die
ist. Jünger/weder gessen noch getruncken haben/
sein fleisch vnd Blut gewesen/ so muß ja noch
auff den heutigen tag im H. Sacrament / ehe
daß man dasselbig empfalet/ vnd volgendts auß
serhalb der niessung vnd des gebrauches / das
wahr fleisch vnd Blut Christi seyn.

So ist bey mir auch nit gleublich / daß der Herr/nach der zal der zwölff Apostel/zwölff Partickel Brots genommen/vnd einen jeden in sonderheit gesegnet oder gebenedeyet hab/(vnd do deme gleich also were/wurde vns vnd vnserm fürnehmen doch nichts dadurch benömen seyn) sonder/ein Brot hat er in die hand genommen/dasselbig zu mal durch sein Wort zum Sacrament gemacht/als bald ist dasselbig/das H. Sacrament gewesen/ehe daß er den ersten Partickel herab gebrochen hat. Vnd als er dem ersten Apostel (der seye Petrus/Joannes/oder ein anderer gewesen) einen Partickel gereicht/ ist nit nur derselbige das H. Sacrament gewesen/sonder auch das ander alles so er noch in der hand gehabt/ehe daß solchs die Jünger von ihme empfangen haben. Ebenmessig ist auch vom Kelch oder Blut Christi zu antworten: Ein mal hat er Wein in Kelch geschenckt/ein mal hat er den Segen

Die Luthere
rischen beif
sen dñß Nüss
lin auff.

So ist bey mir auch nit gleublich / daß der Herr/nach der zal der zwölff Apostel/zwölff Partickel Brots genommen/vnd einen jeden in sonderheit gesegnet oder gebenedeyet hab/(vnd do deme gleich also were/wurde vns vnd vnserm fürnehmen doch nichts dadurch benömen seyn) sonder/ein Brot hat er in die hand genommen/dasselbig zu mal durch sein Wort zum Sacrament gemacht/als bald ist dasselbig/das H. Sacrament gewesen/ehe daß er den ersten Partickel herab gebrochen hat. Vnd als er dem ersten Apostel (der seye Petrus/Joannes/oder ein anderer gewesen) einen Partickel gereicht/ ist nit nur derselbige das H. Sacrament gewesen/sonder auch das ander alles so er noch in der hand gehabt/ehe daß solchs die Jünger von ihme empfangen haben. Ebenmessig ist auch vom Kelch oder Blut Christi zu antworten: Ein mal hat er Wein in Kelch geschenckt/ein mal hat er den Segen

Segen darüber gesprochen/ein mal hat er zu seinen Jüngern gesagt/ Das ist mein Blut: als bald war es sein Blut/ ehe daß er den Kelch auß seinen henden geben hat/ ehe daß sie den Kelch genommen vnd getruncken haben. Vnd nit allein hat der erste Apostel das wahre Blut Christi getruncken/ sonder/ als er auffgehört hat zu trinckē/ ist auch albereit das ander alles/ so noch im Kelch gewesen/ das wahr Blut Christi gewesen/ vnd ist nit erst einem jeden im Mund zum Blut Christi worden.

Wann dise Lehr/ ja diser wohn oder Kezeren der Lutherischen wahr were/ sihe lieber Christ/ was für ein Absurdum vnd Gottlosigkeit daraus volgen wurde/ ja müste/ welchs doch nit wahr/ nit möglich/ noch Christlich seyn kan. Wann im H. Sacrament/nach deme die Wort der Eynsetzung vber Brot vñ Wein gesprochen seynd worden/noch das fleisch vnd Blut Christi nit vorhanden seynd/ vnd so lang nit/biß daß man dasselbig niesset: so muß ja die niessung/vnd nit die Wort Christi/das Sacrament machen/dieweil es erst ein Sacrament in der niessung/ vnd zu vor nichts dann nur Brot vnd Wein soll gewesen seyn/ ob gleich der Segen vor der niessung darüber gesprochen ist worden. Warzu bedarff man dann der Wort Christi?

Warumb (auff daß dise Predig ihr gebürliche lenge nit vberschreite) hat der H. Clemens/ ein Jünger des Apostels Petri/die vbergeblibne Parttel des leibs des Herren/ mit zitter vnd forcht die Priesterschaft behalten heissen?

War.

Gottlosig-
keit vñ höch-
ste Narrheit
der Lutheri-
schen.

Clem. Epist.
2. ad frat. Do-
mini.

Cypr. Ser. 5.
de Lapis.

Warumb bezeugt Cyprianus vor 1300 Jahren: Daß ein alank oder schein vom H. Sacrament/ so ein Weib in ihrer truhē gehabt/ vnd dasselbig vnwürdig niessen wolt/ außgangen seye/ also/ daß das Weib nit hinzu gehn noch dasselbig niessen könt?

Wunder-
zeichen ges-
chehē durch
das H. Sa-
crament.

Wie vil seynd jeder zeit Wunderzeichen geschehen vnd gesehen worden / bey dem heiligen Sacrament? Als/ do die Jüden dareyn gestochen/ vnd Blut herauß geloffen ist/ vnd diß alles außserhalb der niessung? Auß welchen allen volget: Daß das heilig Sacrament außserhalb der niessung/ vnd ja ein Sacrament ist/ so bald die Wort der Eynsetzung Christi/ vber Brot vnd Wein gesprochen werden. Von disem weitläufiger/ ob GOTT will/ zur andern zeit.

Cyrrillus ad
Calosyrium.

Zum Beschluß diser Predig/ wollen wir den H. Erzbischoue Cyrillum/ so vor eilff od zwölffhalbhundert Jaren der Kirchen zu Alexandria vorgestandē/ den Lutherischen hierauff also lassen antwortē: Ich höre (hat Cyrillus zum Bischoue Calosyrio geschriben) daß etliche sagen: Wann vom Sacrament biß auff den andern tag etwas vberbleibe/ diene die Segnung gar nichts/ vnd seye nit mehr der Leib Christi. Aber solche leut/ so also dauon redē seynd toll vñ torechtig. Dann es ist kein anderer Christus/ es wirdt auch sein H. Leib nit verendert/ sonder die krafft des Segens vnd lebendmachende Wirckung bleibt alle zeit in demselbigen. Bishero Cyrillus.

Die Luthere-
rischen beif-
sen diß Nāß
In auff.

Seye

Sehe hiemit in vorhabender Predig/ gnuß. Beschluß.
 sam, vnd mit grund der Wahrheit erstlich wider
 die Caluinischen erweisen: Daß im heiligen Sa-
 crament des Altars/ nit nur ein Figur/ zeichen
 oder Bedeutnuß des fleischs vnd Bluts Chri-
 sti/sonder/Christus selbstem mit fleisch vñ Blut/
 leib vnd Seel/ Gottheit vnd Menschheit/ war-
 hafftig vorhanden sey. Vnd fürs ander/wider
 die Lutherischen: Daß diß alles im H. Sacra-
 ment wesentlich/eigentlich/ vnd vollkommenlich
 vorhanden seye/ so bald der Segen von einem
 Catholischen Priester/ vber Brot vñ Wein ge-
 sprochen wirdt/ vnd nit erst zur zeit wann man
 dasselbig niesset. Vnd endlich wider diße beide:
 Daß sie vnbillich vnd vnchristlich gehandelt/ in
 deme sie diß heutig heilig Fest abgeschafft haben:
 Vnd/daß wir Catholische Christen recht daran
 thund/ daß wir auff heut/ vnd zu andern zeiten/
 das H. Sacrament/ darinnen Christus ist/ in
 öffentlicher Procession vmbtragen/ ehren/ vnd
 den wahren GOTT anbetten.

Ben diser bekantnuß vnd Glauben/Worten
 vnd Wercken/ wollen vnd sollen wir Catholi-
 sche Christen/nach dem löblichen Exempel vn-
 ser Christlichen vnd Catholischen Voreltern se-
 ligen/biß an das ende vnser lebens verharren.
 Auff daß solchs geschehen möge/

Sagen wir dir / O Herr I E S V Bebett zu
 Christ/ möglichsten danck/ daß du Christo vn-
 demen Jüngern vnd allen Chri- sern Herren.
 sten/ ein zeitlang vor deinem tod/ das H.
 Sacra

94 Am tag des H. Erzbischoues Bonifacij.
Sacramēt des Altars/ dein wahr Fleisch
vnd Blut/ zur Speiß vnd tranck/ nit al-
lein eynzuseßen versprochen/ sonder / in
deinem letzten Abendmal warhafftig eyn-
gesetzt/ vnd deinen Jüngern gereicht hast:
nit ein Figur/ zeichen oder Bedeutung
deines leibs vnd Bluts/sonder dein fleisch
vnd Blut selbstē: welches nit erst in der
messung/ sonder so bald du den Segē vber
Brot vñ Wein gesprochen hast/ vorhan-
den ist gewesen. Wir Catholische Chri-
sten bitten dich ganz vnderthenig/ vnd
verstand/ daß wir diß heutig Fest/ löblich
vnd ehrlich halten mögen/ auff daß wir
nach disem zeitlichen leben das Ewig er-
langen/ Amen.

Am 5. tag
Junij.

Am tag des H. Erzbischoues vnd
Martyrers Bonifacij/ zum theil zu
Meynk Feyerlich.

Iser heilig Martyrer vnd
Erzbischoue zu Meynk Bonifaci-
us/ so nit vnbillich der Teutschen
Apostel mag genennet werden/ ist
auff Engelland gen Rom kömē
ward vom H. Papp Gregorio dem andern
zum Bischoue geweyhet / vnd zu predigen ins
Teutschland geschickt/ da er Buchen/ Francken
Beyern/ Thüringen / Hessen/ Windisch mark
vnd Friesland/ sampt andern Prouincien des
Teusch

Am tag des H. Erzbischoves Bonifacii. 95

Deutschlands durchwandert / vil Volcks befe-
ret vnd dem Catholischen Glauben vnderwirf-
fig machet / auch auß bewilligung des Pappsts
die Bistumb im Teutschland außgetheilet /
Burchhardum zu Wirzburg / Bilibaldum zu
Eychstat / Johannem zu Salzburg / Erbertum
zu Freysingen / Gaibaldum zu Regenspurg /
vnd Biuilium zu Passaw zu Bischove ma-
chet / vnd das Bistumb zu Mens sechs vnd
dreissig Jar löblich regiert hett / erwölet er Lul-
lum an sein statt. Ist endlich zu Dockinga in
Frießland / sampt etlichen Mitbischoven vnd
andern treuwen Dienern GOTTES / mit dem
schwerdt jämmerlich ermördt worden : sein leib
wurde in ein Kloster Fuld / so er in einem Bu-
chenwald gebawet / gefürt. Seine schrifftten Anno 755.
seynd noch vorhanden / vnd bezeugen sein heiligs
leben vnd Väterliche sorg für das Teutsch-
land ic. Diser wölle bey GOTT / desse heiliges
Angesicht er ohne vndlast sibet / vnser Fürsprech
seynd / auff daß auch wir Gottsförchtig vnd Ca-
tholisch leben / sterben / vnd endlich selig werden
mögen / Amen.

E Banzelien vnd Predigen mögen
auff heut mit vnfüglich gebraucht
werden / wie hievor am tag des H.
Vrbani gemeldet ist worden.

8

Am

96 Am tag der H. Martyrern Vitu

Am 15. tag
Junii.

Modesti/ Crescentie/ zum theil im Bam-
bergischen/ Wirzburgischen/ Augspurgi-
schen vnd Costanker Bistumb
feyerlich.

Vitus auß Lucania (doher
auch Vitus Lucanus geheissen
zwischen Apulien vnd Calabria
von einem Heydnischen/ bösen
doch sehr reichen Vatter/ mit
men Hylas/ geporen/ welches alles doch die
knab/ so bey zwölff Jahren war/ nit achtet/ sonder
euffert sich der Welt/ bethet immer vnd diene
GOTT. Solche Gottsforcht mercket sein Va-
ter Hylas/ vnd mißfiel ihm sehr/ wolt Vitum
zur Abgötterey halten. Vitus aber der zwölff-
rig antwortet dem Vatter/ daß er gentslich
dacht seye/ keinen GOTT/ dann den lebendigen
GOTT im Himmel/ anzubetten. Do war der Va-
ter sehr erzürnt/ ließ vnd hieß das kind mit Ro-
ten streichen/ befolhe volgendes Vitum Mod-
sto vnd Crescentie zweyen Heydnischen Ehen-
ten/ die solten das kind vom Christlichen Glau-
ben zum Heydnischen vñ Abgöttischen Bglaub-
ben bringen. Vitus aber hat sie beide zum Chris-
tlichen Catholischen Glauben bekert. Auff solch
wurde Vitus (nachdeme er zu vor vom Vatter
sehr geschlagen ist worden) Modestus vnd Cre-
scentia in einen feurigē Backofen (sonsten wird
gemeinglich ein Hase gemalet) darinnen Vit-
vñ Bech zerlassen/ geworffen/ seynd aber vnuer-
lest auß hilff des Engels/ ja GOTTES/ wider-

Am tag des H. Martyrers Viti. 97

umb herauß kommen. Darnach liesse sie der
Kenser Diocletianus zu Rom / desse sohn Vi-
tus zu vor vom bösen Geist entlediget hat / an ein
Rame auffhencken / vnd lang peynigen. Aber
der zwölffjähig knab Vitus / batte den Herren /
daß er sie erlöset : da ward der Luft betrübt / das
Erdrich erbidmet / die Donner brauseten / vnd
das Ungewitter erschlug vil Heyden. Der Ken-
ser aber flohe im schrecken dauon / der Engel lö-
set die Heiligen auff / vnd füret sie vber den Fluß
Silarum / von dannen sie kommen waren / da
selbsten sie mit Gebett dem Herren ihre Seelen
auffgaben vnder einem Baum. Vnd die Edel Anno 288,
Fraw Florentia nam der Heiligen leiber / vnd
begrub sie mit Specereyen an dem ort Maria-
nus genant ꝛc.

Vff heut mag das Euangelium vnd
Predig gebraucht werden / so an S.
Laurentij tag gesezt ist. Vder die je-
nigen / so an anderer Martyrer tag ver-
merckt seynd worden / als Georgij / Mar-
ci / Stephani / ꝛc.

Am tag des H. Priesters vñ Mar-
tyrers Albani / zum theil zu
Meynk Feyerlich.

Am 21. tag
Junij.

Abanus ist zur zeit des Kensors
Diocletiani auß der Insel Mansia
gen Rom zogen / vnd sampt Theo-
nesto vnd Br so zum Papst kömen /
3 2 den

den Segen/tröstung das Wort GOTTES zu predigen/empfangen. Dann/vom Papst Leone dem ersten diß Namens/gen Meyland zum H. Bischoue Ambrosio/von dannen vber das Gebirg gen Augspurg/welche Stadt durch auß mit der Arrianischen Kekeray vergifft war/alda blibe Ursus wider gemelte Kekeray zu Predigen: zogen Albanus vnd Theonestus gen Speyr/von dannen in Franckreich. Nachdeme aber Ursus zu Augspurg gemartert war/kamē Albani vnd Theonestus gen Meynk/predigten den Ethen vnd Arrianern den Catholischen Glauben bestendiglich: als bald wurde Albanus gefangen/gegeißlet/vnd mit dem Schwerdt enthauptet. Der todte Körper aber (als alle Historien klerlich anzeigen/welches auch bey GOTT/da noch grössere Wunderzeichen durch seine Heiligen gewirckt/nit vnmöglich ist) hat den Kopf in die hend genommen/vnd an die stadt/do er herwollen begraben seyn/getragen. Daselb stien hernach der Bischoue Nicholpbus ein Kirchengebawen/vnd S. Albani Grab erhöhet vnd geziert/ ligt aussershalb Meynk. GOTT wolle auch vns bestendigkeit auff dem Catholischen Glauben verleihen/auff das auch wir mit Albanos mögen selig werden/Amen.

Anno 380.

Euangelium vnd Predig/wie von andern heiligen Martyrern/als an Pauli Bekerung/Georgij/Marcij/Laurentij/Stephani/ꝛ.

Am

Am tag der heiligen zehen tausent 99

Martyrer / zum theil im Costancker
Bistumb Feyerlich.

Am 22. tag
Juli.

Achatus / ein Oberster hatte
vnder ihm zehen tausent Kriegs-
knecht / so noch Henden vnd Un-
glaubig waren / welche (vnder den
Keysern Adriano vnd Antonino)
wider die Agarener vnd Euphratenser kriegen
soltten / vermochten aber nit / dann ihr gegentheil
war ihnen zu starck: do empfiengē sie bericht vom
Engel / wann sie in Christum glauben wolten /
soltten sie wider ihre feind Sige erlangen / wel-
che beide als bald eruolget seynd. Als der Keyser
diß vernommen / hat er beuolhen sie zu peyni-
gen / Martern vnd tödten / wie Christus gelitten
vnd getödtet ist worden: als bald wurden sie auff
dem berg Ararat gezeislet / gekrönt / gecrenkiget.
Seynd also in ihrem Blut getaufft worden / vnd
an dem Creutz als rechte Christen ihren Geist
auffgeben / von den Engeln abgenommen / vnd
auff dem selbigen Berg / so in Armenia nit weit
von Alexandria gelegen / begraben worden. Dife
zehentausent Martyrer wollen jekund vnd jeder
zeit GOTT für vns bitten.

Evangeliē vnd Predigen von vi-
len Martyrern / oder wie hievor
am tag des heiligen Albani ver-
merck.

9 3

Am

100 Am Fest der Geburt Sanct Jo-
annis des Tauffers / Euan-
gelium Luc. j.

Am 24. tag
Juni.



In der zeit / kam Elisabeth
ihr zeit / das sie gebären
solt. Und sie gebar einen
sohn. Und ihre nachbar-
en vñ gefreundten hö-
ren / das der Herr gross
barmhertzigkeit an ihr gethan hette / vñ
freuweten sich mit ihr. Und es begab sich
am achten tag / kam sie zu beschneiden das
kindlein / vñ hiessen ihn nach seines vatters
namen Zacharias. Und sein mutter ant-
wortt vñ sprach: Nit also / sonder er soll
Joannes heissen. Und sie sprachen zu ihr:

Genes. 17.
Leut. 17. c

Ist doch niemand in deiner freundschaft
 der also heisse. Vnd sie winketen seinem
 vatter/wie er ihn wolt heissen lassen. Vnd
 er fordert ein täfelin/schrieb vnd sprach:
 Joannes soll sein name seyn. Vnd sie ver-
 wunderte sich alle. Vnd alsbald ward sein
 mund vnd zung auffgethan/vnd er redet/
 vnd benedeiet GOTT. Vnd es kam ein
 forcht ober alle nachbauren. Vnd alle diß
 geschicht ward rüchtig auff dem ganzen
 Jüdischen gepirge/vnd alle die es höreten/
 namens zu herzen/vnd sprachen: Was/
 meynstu/wil auß dem kindlin werden?
 Dann die hand GOTTES war mit ihm.
 Vnd sein vatter Zacharias ward erfüllet
 mit dem heiligen Geist/vnd weissagt/vnd
 sprach: Gebenedeiet sey GOTT der Herr
 Israels/dan er hat besucht vnd erlöset sein
 volck. Vnd hat vns auffgericht ein horn Leutt. 25.6
 der seligkeit/in dem hause seines dieners Psal. 131.6
 Davids: Als er geredt hat durch den mund
 seiner heiligen Propheten/so von anfang
 der Welt gewesen seynd: Daß er vns erlö-
 set von vnsern feinden/vñ von der hand al-
 ler die vns hassen: Vñ barmhertzigkeit er-
 zeigete vnsern Vätern/vñ gedecht an sei- Genes. 22.6
 nen heiligen bund/vñ an den end den er ge-
 schworē hat vnserm vatter Abraham/vns Esa. 38.6
 zu geben: Daß wir ohne forcht erlöset auß Heb. 9.6

der hand vnser feinde/ ihm dienen in heiligkeit vnd gerechtigkeit/ vor ihm all vnser leben lang. Vñ du kindlin wirst ein Prophet des Höchsten heissen/ dann du wirst vor dem Herren gehen/ daß du seinen weg bereitest/ vñ erkantnuß der seligkeit gebest seinem Volck/ zu vergebung ihrer Sünden/ durch die herzlichliche barmherzigkeit vnser GOTTES/ durch welche vns besuchet hat der Oriens auß der höhe. Auff daß er erschiene denen/ die da sitzen in der finsternuß vnd schatten des tods/ vnd richte vnser re füsse auff dem wege des frides. Vnd das kindlin wuchs/ vnd ward starck im geist vnd war in der Wüsten/ biß daß er solt hien für treten für das volck Israel.

Bil werden sich seiner Gepurt freuen.
Luc. j.



Ite Welt hat es im brauch (ihre geliebten in GOTT) daß sie sich am Geburts tag ihrer kinder erfreuet/ wie wir sehen/ daß man solche nit allein auff was statlich mehrmaln mit grossem Pomp vnd Bracht zum heiligen Tauff bringet/ vnd gleich/ als wann es nit ein Geistlicher/ sonder ein Weltlicher Acc re/branget: sonder/ daß man auch einen Weltlichen gar zu grossen vnd vberflüssigen Freßschel (so man gemeinglich ein Kindschenck nennet) anfahet/ gleich als wann sonst das kind nit

Obermächtiger Bracht auff den Kind schencken.

oder eben diser vrsach geboren were. Hergegen
trauret die Welt/ vnd weinet zur zeit/ wann ih-
re kinder widerumb/ eintweder durch Marter
oder natürlichen Tod/ auß diesem Jamerthal
scheiden/darumb/ daß sie ihre kinder vnd freund
(als sie vermeynen) nun sollen verloren haben/
oder doch auff das wenigest ein zeitlang gera-
then/nämlich biß zum Jüngsten tag.

Disem entgegen hat die H. Christliche/ All-
gemeine/ Catholische Kyrch im brauch: Daß
sie frölich vnd herrlich helt/ mit seyren/ singen/
lesen/ Predigen vnd dergleichen GOTT gefelli-
gen diensten/ vnd vbungten mehr/ nit die Ge-
burts tag ihrer kinder/ sonder den tag des lei-
dens/ Tod vnd sterbens/ daß sie so ritterlich ge-
fochten/ gern vnd gutwillig alles vmb Christi
Namens willen gelitten/ durch ihre Marter/
Peyn/ Tod oder bestandthafftige bekantnuß des
Christlichen Catholischen Glaubens/ die kron
der Ewigen Seligkeit erlangt/ vnd gutwillig dis
zergentlich vnd jämmerlichs Jamerthal verlas-
sen/ vns ein Exempel ihnen nachzufolgen gelas-
sen haben.

Drey Fest werden im ganken Jar außge-
nommen/ daran auch die Christliche Kyrch ge-
burts tag oder Geburts Fest haltet. Das erste
vnd fürnemste am H. Weyhennacht tag/ die
Geburt vnser Heilandts IESV Christi. Das
ander am achteten tag Septembris / nämlich
den Geburts tag MARIAE seiner heiligen Mut-
ter. Das dritt am vier vnd zwensigsten Junij/
welcher tag heut ist/ halten wir das H. Fest/ nit

Den Mar-
tertag ihrer
kinder hält
die Christ-
lich Kyrch
herrlich.

Drey Ge-
purtis tag
hältet die
Kyrch fey-
erlich.

der Enthauptung/sonder der Geburt Joannis
des heiligen Tauffers vnd Vorleuffers Christi
vnser Herrs vnd Seligmachers.

Doch geschichts nit ohne sonderliche vrsachen/
das eben diser dreien Geburts tag in der
Kyrchen gehalten wirdt/ als Christi/ seiner
Mutter/ vnd seines Vorleuffers Joannis/ mit
zu jedem deren Festen gehört soll werden. Jo
hann aber wollen wir allein von Joanne dem
Tauffer handeln/ Vnd im ersten Theil vorhabender
Predig anzeigen: Was sich mit vnd von
disem H. Tauffer/ vor/ in/ vnd nach seiner Geburt/
bis zu seinem Tod beyleuffig verlossen habe.
Im andern: Was sich mit Zacharia seinem
Vatter/ von der zeit seiner Empfengnuß/ bis
zur Geburt oder Beschneidung zugetragen habe
vnd als dann wollen wir beschliessen/ vnd auch
GOTT beuelhen. Joannes der Tauffer vnd
Vorlauffer Christi/ desse Geburts tag wir
heut halten/wölle bey GOTT/ desse heiliges
Angezicht er ohne vnderlaß sihet/ vnser Fürsprecher
seyn/ auff das solches glücklich vnd nützlich
möglicherweise verrichtet werden.

Die erörterung des ersten Theils vorhabender
Predig/ kanfüglich vnd nützlich auß dem H.
Euangelisten Luca angezeigt werde: Was sich
zwischen dem Engel GOTTES vnd Zacharia
Joannis Vatter/ von der verkündigung/
empfengnuß/ vnd gepurt Joannis verlossen
habe/ vnd nämlich von wort zu wort/ wie
solche Histori Lucas im anfang seiner
Euangelischen beschreibung verzeichnet hat/
welches

Thellung
vnd Inhalt
diser
Predig.

ches ihr/verhoffentlich gern anhören werdet/vñ
 solt/ seitemaln solchs das H. Euangelium vnd
 Wort GOTTES selbst ist. Zu der zeit Hero- Luc. 1.
 dis (spricht der H. Euangelist Lucas) des Königs
 Judee/ war ein Priester vom loßstatt Abia/ mit
 namen Zacharias/ vnd sein Weib von den doch-
 teren Arons/ deren name war Elisabeth. Vnd
 sie waren alle beide gerecht vor GOTT/vñ wan-
 derten in allen Gebotten vnd Säkungen des
 Herren vntadelich. Vnd sie hatten kein kind/
 dann Elisabeth war vnfruchtbar / vnd waren
 alle beide wol betagt. Vnd es begab sich/ do Za-
 charias des Priesters Ampts pflaget vor GOTT/
 zur zeit seines loß/ nach gewonheit des Priester-
 thums/ ist er nach dem loß aufgangen/ daß er
 räuchern solt/ vnd gieng in den Tempel des Her-
 ren. Vnd die ganz menge des Volcks war auf-
 sen im Gebett zu der stund des räuchern. Vnd
 es erschien ihm der Engel des Herren/ vnd
 stundt zur rechten am Räuchaltar. Vnd do ihn
 Zacharias sahe/erschrack er/ vnd es kam ihn ein
 forcht an. Aber der Engel sprach zu ihm: Fürchte
 dich nit Zacharia: dann dein Gebett ist erhöret/
 vnd dein Weib Elisabeth wirdt dir einen Sohn
 geben/ des Namen soltu heissen Ioannes.
 Vnd du wirst sein frewd vnd fröligkeit haben/
 vnd vil werden sich seiner Geburt freuwen.
 Denn er wirdt groß seyn vor dem Herrē/ Wein
 vnd starck getränk wirdt er nicht trincken/
 vnd wirdt noch in Mutter leib erfüllet werden
 mit dem heiligen Geist/ vud er wirdt der kinder
 von Israël vil bekeren zu GOTT ihrem Her-
 ren.

ren. Vnd er wirdt vor ihme hergehen im Geiſt
vnd krafft Elie/ zu beferen die Herzen der Väter
zu den kinderen/ vnd die Vngleubigen zu der
weiſheit der Gerechten/ zu bereiten dem Herren
ein vollkommen Volck. Vnd Zacharias sprach
zum Engel: Wo bey ſoll ich das erkennen? Denn
ich bin alt/ vnd mein Weib iſt betaget. Der En-
gel antwortet/ vnd sprach zu ihm: Ich bin Ge-
briel der vor GOTT ſtehet/ vnd bin geſandt
dir zu reden/ vnd dir diſe gute Botschafft zu
bringen. Vnd ſihe/ du wirdſt ſtumme vnd nicht
reden können/ biß auff den tag/ da diß geſchehen
wirdt/ darumb/ daß du meinen worten nicht ge-
glaubt haſt/ welche ſollen erfüllet werden zu ih-
rer zeit. Vnd das Volck wartet auff Zachari-
am/ vnd verwundert ſich daß er ſo lang verzo-
het im Tempel. Vnd do er herauß gieng/ könt er
nicht mit ihnen reden. Vnd ſie merckten daß er
ein Geſicht geſehet hatt im Tempel. Vnd er er-
wählet ihnen/ vnd blieb ſtumme. Vnd es begab ſich
do die zeit ſeines Ampts auß war/ gieng er heim
in ſein hauß. Vnd nach den tagen ward Eli-
ſabeth ſein Weib ſchwanger/ vnd verbarg ſich
fünff Monat/ vnd sprach: Alſo hat mir der Herr
gethon in den tagen/ do er mich angeſehen hat
daß er meine ſchmach vnder den Menſchen von
mir neme. Bißhero auß dem H. Euangeliffen
Luca/ was ſich vor der Geburt Joannis verlo-
fen hat.

Eltern Jo-
annis des
Täuffers.

Darauß wir erſtlich lernen/ wer die Eltern
Joannis geweſen ſeyen/ nämlich/ Zacharias/
ein frummer Gottsförchtiger Prieſter des al-

ten Testaments/ vnd Elisabeth/ auß dem fürnemlichen vnd herrlichen geschlecht Arons/ des Bruders Moysi. Dife beide/ Zacharias vñ Elisabeth/ ob sie gleichwol alt/ vnd zu deme auch Elisabeth vnfruchtbar war/ also/ daß sie von andern Jüden verachtet wurden/ wie auch dem Joachim vnd Anna/ M A R I A E der H. Jungf. frauen Eltern/ auff ein zeit widerfahren/ do der Priester sein Dyffer nit annehmen wolt/ hat sich doch GOTT vber sie erbarmet vnd sein Gebett erhört/ nach zeugnuß des Engels Gabriels/ der zum Zacharia gesagt/ Dein Gebett ist erhört/ vnd verheisset ihm auß Elisabeth einen Sohn/ nämlich Joannem den Tauffer/ desse Fest wir auff heut halten. Hier auß haben wir auch zu lernen: Daß GOTT die frummen/ gerechten/ andechtigen/ Gottsförchtigen Menschen/ so zur zeit der not zu ihm schreyen/ nit verlasset: sonder/ so sie ein billichs vnd solchs begeren/ so nit wider GOTT/ nit wider ihren Nechsten/ nit wider ihr selbst eigne Seel ist/ gern höret/ erhört/ vnd sie ihres bitts gewehret. Difer gute frumme Zacharias sampt seiner geliebten Elisabeth/ hetten auff diser Welt kein grössere frewd erleben vnd wünschen könden/ dann daß sie würdig waren/ kinder auff dise Welt zu bringen. Selig hetten sie sich gewißlich vor GOTT vñ der Welt geachtet/ do ihnen GOTT nur einen einigen Erben bescheret hett/ nit allein der vrsach/ daß sie die Welt mehrten/ sonder auch dem fluch vnd weltlichem spott/ so die vnfruchtbaren vnderworffen/ entrinnen möchten/ lassen

Die Vnfruchtbar wurden von den Jüden verschmecht.

Gott erhört die jentgen so zu ihm ruffen.

lassen derhalben nit ab / auch in ihrem grossen
alter / GOTT vmb kinder zu bitten. Was ge-
schicht? GOTT sihet ihr höchste frumbkeit vnd
ernstlichs Gebett an / erhört sie / machet Elisabeth
fruchtbar / in neun Monaten hat sie einen Sohn
Joannem den Tauffer.

Joachim vñ
Anna, gepet-
ten Mari-
am die mut-
ter des Her-
ren.

Ein solches Exempel lesen wir auch von Jo-
achim vnd Anna / welche / als sie zwenzig Jahr
beneinander in ihrer Ehe gewohnet / vnd doch
keine kinder gehabt / vnd er Joachim auff ein zeit
einer Kyrchwehung auch sein Gab oder Opfer
auff den Altar legen wolt / redet ihn der Priester
mit zornigen worten an / vnd sagt / Es ge-
heire sich nit / daß die vermaledenten des Gefases
dem Herren des Gefases auffopffern sollen / vñ
triebe ihn vom Altar hinweg: welches dem Jo-
achim wehe gethon / schamet sich auch sehr / wolt
nit mehr zu hauß zu seiner haußfrauen Anna
gehn / sonder zu seinen Hirten auff das felder / do
selbsten bittet er ohne vnderlaß GOTT gar sehr
mit weinenden augen / er wölle ihn doch erhören
disen fluch oder straff von ihm nehmen vñ mit
kindern begnaden. Ebenmessig hat auch Anna
weinend gebetten vmb ihren Mann Joachim
vnd kinder. Vnd GOTT hat sie beide erhört
vnd Anna wirdt schwanger / gepiret MARIAM
die Mutter des Herren.

Von einer andern Anna lesen wir / so ein
haußfraw Elkane vnd auch vnfruchtbar wolt
welches sie auch offtermaln hören vnd ihr ver-
weisen must lassen: die gieng auff ein zeit in den
Tempel / bittet GOTT mit weinenden augen: Er
wolt

1. Reg. 1.

wolt dise weltliche schmach vñ ihr nehmen/ vñ ihr einen Sohn geben/ hergegen wolte sie ihme denselbigen für eigen versprechen. GOTT hat sie erhöret/ vñ einen Sohn/ mit Namen Samuel/ geben. Dergleichen lesen wir auch von Abraham vnd seiner Haußfrawen Sara. Sollen derhalben weder die vnfruchtbaren Esteren/ noch andere Menschen mit andern anligen/ als Armut/ krankheit/ verfolgung/ nachstellung/ oder dergleichen anstoß beschwert/ an GOTT nit zweifeln/ vil weniger an der Barmherzigkeit GOTTES verzweifeln: sonder/ wie Zacharias vñ Elisabeth/ wie Joachim vnd Anna/ wie Elkana vñ Hanna/ wie Abraham vñ Sara/ frum/ Gottes fürchtig/ andechtig vnd gerecht seyn/ GOTT vñ den Nächsten so vil möglich lieb haben/ vnd daneben GOTT vmb abwendung alles vbel/ vmb darreichung alles des jenigen/ so zu leib vnd Seel von nöten/ vnderthenig bitten/ vnd sich also in den Willen/ Schutz vnd schirm GOTTES beuelhen/ der hat die seinen niemaln verlassen.

Gen. II. 18.

An Gott vnd seiner Barmherzigkeit/ soll niemands zweifeln.

Die Allmechtigkeit GOTTES lernen wir auch auß diser wunderbarlichen that GOTTES vnd Geburt Joannis. Menschlich dauon zu reden/ ohne sonderlichen beystand vnd mitwirkung GOTTES/ haben Zacharias vnd Elisabeth/ auch Joachim vnd Anna/ Elkana vnd Hanna/ Abraham vnd Sara/ wol gewist/ daß nit möglich noch natürlich sey/ daß sie/ als vnfruchtbare/ vnd darzu erst in ihrem grossen alter/ sollen kinder geperen. Derhalben/ als auff ein zeit der Engel GOTTES zum Abraham

Gott ist Allmechtig.

Gen. 18.

ram saget/ Sein hauffraw Sarai solte/ ehe das
ein Jar herumb keine/ seinen Sohn geben/ vnd
Sarai solchs hinder der thür höret/ lachet sie
vnd vermeynt/ es were vnmöglich/ das solchs

Luc. 1.

wahr seyn solt. Aber bey GOTT ist alle ding

Luc. 2.

möglich: vnd Zacharias vnd Elisabeth zeugten
Joannem/ Joachim vnd Anna MARIAM/ Es
fana vnd Hanna Samuelem/ Abraham vnd
Sara Isaac. Also ist auch noch auff den heuti-
gen tag/ GOTT/ zu thun nichts vnmöglich/ noch
ches wir Christen alle glauben vnd wissen sollen
ja teglich erfahren.

Joannes
ein fürref-
fenlicher
Mann.

Fürs ander habē wir gehört/ wie das GOTT
selbsten durch seinen Engel Gabriel/ dise Ge-
burt Joannis des Tauffers hat verkündigen
lassen dem Zacharie/ vnd eben im Tempel/ als
er dem Gottesdienst gepflegt/ darauß zu lernen
Das Joannes nit ein geringer vnd schlechter
sonder ein fürnemer Mann must werden/ wie
er dann/ der Engel/ selbsten vnd domaln auch
dem Zacharie bekennet/ das er ein Vorleuffer
Wegbereiter Christi vnd Fürirer sein werde
wie er hernach vnd auch Christus selbsten be-
kant haben.

Gott vnd
seinen Bot-
ten soll man
glauben.

Das dritte/ so wir auß oberzelten wortē des
H. Euangelisten Luce gelernet haben/ ist das
Das wir den Worten GOTTES vnd seiner Bot-
gaten glauben/ oder aber der straff darüber ge-
warten müssen/ dauon vns der heutige Zacharie
as wol zu sagen weist: Dann da er den Worten
des Engels Gabriels/ so er auß beuelch GOTTES
TES zu ihme geredt/ das nämlich sein Weib
einen

einen Sohn geperen solt/ nit glaubet/ oder doch
 auff das wenigest daran zweifelt/ musste er ge-
 strafft werden/ vnd neun Monat ein stum̄ blei-
 ben. Als der Engel Gabriel vber ein halb Jar
 hernach zur H. Junckfrauen MARIAE/ auch
 auß beuelch GOTTES sprach/ Sie werde vom
 heiligen Geist empfahen/ schwanger werden/ ei-
 nen Sohn mit Namen IESVS geben/ sprach
 sie: Sihe/ ich bin ein Maagd des Herren/ mir ge-
 schehe nach deinem wort. Vnd als sie/ MARIA/
 solches ihrer Nummen oder Befreundin ange-
 zeigt/ sprach sie/ nämlich die heutig Elisabeth/ zu
 ihr: Selig bistu/ die du glaubt hast/ daß es wirdt
 volnbracht werdē/ was zu dir gesagt ist von dem
 Herren. Vnd ohne zweifel sagt Elisabeth solchs
 der vrsach/ weil sie wol gewist/ warumb GOTT
 ihren Zachariam eben derselbigen zeit zu stum̄
 gemacht het/ weil er nämlich dem Engel nit
 glaubt het. Was domaln dergleichen vnd an-
 ders mehr von Joanne durch den Engel Ga-
 briel weißgesagt ist worden/ was sein Ampt/
 thun vnd lassen/ wohnung vnd Kleider/ Speiß
 vnd tranck seyn werden/ wurde alda auch nur
 mit wenig worten zu erinnern/ vil zu lang
 werden.

Luc. 1.

Was sich nur in seiner Gepurt verlossen/be-
 findt sichs wahr seyn/ was der Engel ein zim-
 lich lange zeit zuvor/ zu seinem Vatter Zacha-
 rias gesagt hat/ nämlich: Vil werden sich sei-
 ner Geburt freuwen/ welches auch geschehen/
 vnd der H. Euangelist im anfang diß heu-
 tigen Euangelij/ mit disen worten bezeugt:

h Aber

Nachbaurē
soltē sich
mit einan-
dern freu-
wen.

Aber Elisabeth kam/ nach den Worten GO-
TES des Allmechtigen/ durch den Engel Ga-
briel zum Zacharias gethon/ ihr zeit/ daß sie
Joannem den Tauffer vnd Vorlauffer Christi
gebenen solt. Vnd sie gepar einen Sohn
dauon wir auff heut handlen/ vnd desse Fest
auff heut halten. Was geschach? Vnd ihr
nachbaurē vnd gefreundten höreten/ Da-
der Herr grosse Barmhertzigkeit an ih-
re gethon hett/ vnd freuweten sich mit ihr.
Als nit vngleublich/ (doch wil ich nichts eigen-
lich beschlessen haben) vnd auch zum theil an
dem H. Euangelio abgenommen kan werden
wirdt MARIA die H. Mutter Christi/ auch bey
diser gepurt Joannis des Tauffers gewest
seyn. Dann/ der Engel Gabriel bezeugt/ daß
Elisabeth zur zeit/ do er MARIAE den Gruss
kündiget/ albereit sechs Monat schwanger ge-
wesen sey. So bezeugt der Euangelist Lucas/ daß
MARIA erst nach solchem Gruss vnd ihrer em-
pfengnuß vom H. Geist/ zu Elisabeth vber das
Gebirg gangen/ vnd seye vber solchs drey Mo-
nat bey ihr gebliben/ so machen nun die sechs
vnd drey/ Neun Monat/ vnd volgendts von der
Empfengnuß bis zur Geburt beyleuffig ein vol-
kommenliche zeit. Also/ daß die frewd desto grö-
ser gewesen ist/ nit darumb allein/ daß Elisa-
beth/ so zu vor vnfruchtbar war/ jekund aber ei-
nen Sohn auff dise Welt geboren hat/ sonder
auch/ weil ihr liebe Base oder Numme MARIA
auch vorhanden/ welche jekund auch bis in den

drit

dritten Monat schwanger / vnd doch nichts desto weniger ein keusche vnd reine Junckfraw gewesen ist / vor / in / vnd nach ihrer Geburt / noch / vnd in Ewigkeit. Weil dann deme also / wie wahr ist / Daß GOTT durch den Engel Gabriel hat verkündigen lassen / vnd der Engel hat solchs zum Zacharias gesagt / nämlich / daß sich zur zeit der Geburt Joannis des Tauffers / vil freuwen werden: Vnd der Euangelist Lucas bezeugt / daß sich nachbawren vnd freund / do er geporen / sehr gefreuwet haben: Warumb solten oder wolten dann nit wir Christen vns noch vil mehr freuwen / vnd eben den heutigen tag seiner Geburt / nit feyerlich / mit singen / lesen / Predigen / bitten vnd betten herrlich halten / seittemaln doch wir Christen jekund vil besser wissen / vnd eben auß dem Mund Joannis vnd Christi selbst / wer Joannes gewesen ist / dann domaln die Nachpauren Zacharie gewiß haben?

Daran zweifelt niemandts / daß wann ein Mensch / ein herrlicher gewaltiger Potentat / ein Mechtiger Keyser oder König / einen oder mehr Legaten zu vns sendet / mit beuelch / daß er selbst zu diser oder jener zeit zu vns kömen wolle: wir wurden vns nit allein auff ein solche herrliche zukunfft eines so gewaltigen Potentaten freuwen / rüsten / auff daß wir ihn nach aller gebür empfangen vnd annehmen möchten: sonder wir wurden auch solchen Botten vnd Legaten mit höchster frewd annehmen / vnd ihme als

h 2 le Chr /

Martha ein
erfolge Zuck
fraw.

Den Feyer-
tag Joannis
sollen wir
Christe her-
lich halten.

le Ehr/so vil vns möglich/erzeigen/mit ihme fre
 lich seyn/vñ nach vnserm vermögē mit Schan
 ckungen verehren zc. so sprich ich noch ein mal
 Warumb wolten dann wir Christen/eben auff
 heut/ **GOTT** dem Allmechtigen zu lob vnd
 ehren nit einen Feyertag halten/mit bitten/betten
 dancksagung vñ allerley Gottesdienstē/dienen
 darüb/weil er vns auff heut gesandt vñ Menscheit
 hat werden lassen/seinen eignen Vorlauffe
 den jenigen/so ihne getaufft hat: den jenigen/
GOTT seinen Himmelschen Vatter auß dem
 Himmel reden gehört/den H. Geist in gestalt
 ner tauben gesehen: den jenigen/so mit sinnen
 auff ihn gezeigt vnd gesagt hat/Diñ ist das Lamb
GOTTES/welcher hinweg nimpt die Sünd der
 ganzen Welt: den jenigen/so von ihme gesagt
 hat/Ich binn nit Christus. Er ist mitten vnder
 euch gestandē/desse ich nit würdig bin seine schu
 riemen auffzulösen. Ich tauffe im Wasser/
 aber wirdt tauffen im heiligen Geist. Von w
 chem Christus selbstē bekennt; Er seye sein Vor
 lauffer vñ Engel/vñ welchem Malachias weiß
 gesagt/so dem Herren den wege bereiten soll: Er
 seye Elias/ein Prophet/vnd mehr als ein Pro
 phet: Ja vnder den Weibern seye niemaln ein
 grösserer geporen/dann eben diser heutige Jo
 nes/ein Täufer vnd Vorlauffer Christi. Der
 halben wir Christen vns auff disen heutigen he
 ligen Feyertag/nit allein mit **GOTT**/mit dem
 Engel/mit Zacharia/mit Elisabeth/mit **MARIA**
 vnd allen nachpaueren sehr freuven/sonder auch
 ernstlich **GOTT** dem Allmechtigen Vatter/vñ
 seinem

seinem geliebten Sohn vnserm Heiland IESV Christo/dancken/ vmb dise verkündigung/ vorse-
 sendung vnd Gepurt Joannis des Tauffers/
 der vns nit allein den weg zum Tauff/Puß/Pre-
 dig/ Christlichem Wandel/ züchtigen messigen
 vnd Gottsförchtigem leben/ sonder auch zum
 Christlichen Glauben in dich/ vnd volgendts
 auch in das Ewig leben/bereitet hat. D wol wer-
 den Abraham/Isaac/Jacob/Dauid/sampt an-
 deren Patriarchen vñ vil tausent kinder Israel/
 in der Vorhell/so ein vnsegliche frewd gehabt ha-
 ben/als sie Joannem gesehen/ vnd von ihme ge-
 hört: Daß er der Vorlauffer Christi/des wahrē
 Messie vnd Natürlichen Sohn GOTTES sey/
 Daß Christus schon vor etlichen Jaren geporen
 vnd nun in wenig Jaren den Tod leiden/sie auß
 der Vorhell erlösen/ vnd in das Ewig Vater-
 land eynführen werde. Gewißlich hette ihnen
 kein grössere frewd weder im Himmel noch auff
 Erden widerfahren können. Lasset vns derhalben
 neben der heiligung dises heutigen tags/ neben
 vnser frewd vnd dancksagung zu GOTT/ auch
 Joannem den Tauffer vnd Vorlauffer Christi/
 desse heiliges Angesicht vñ wahre Gottheit er oh-
 ne vnderlaß sihet/bitten/ daß er wölle mit vns zu
 GOTT treten/mit vns bitten/vnd von GOTT
 erlangen helffen/ das jenig/ so vns hie auff Er-
 den/vnd nach disem zeitlichen leben das Ewig zu
 erlangen/ von nöten ist.

Die in der
 Vorhell ha-
 ben sich vber
 der zukunfft
 Joānis sehr
 erfreuet.

Fürs ander/ so sich in seiner Geburt verlof-
 fen/hören wir/ daß Elisabeth vnd die gefreund-
 ten/ nit einig waren vber den Namen/mit wel-

Der Vor-
 lauffer Chri-
 sti sollte nit
 Zachari. 8/

sonder Jo-
annes heis-
sen.

chem diß kind genennet solt werden. Etliche/ vñ
gemeinglich alle nachpaurē/ woltē disen Sohn
weil er der erste war auß Elisabeth geporē/ nach
seinem Vatter auch Zacharias nennen/ welches
doch Elisabeth nit gestattē/ sonder ihn Joannes
nennē wolt/ der vrsach/ weil sie ohne zweifel auß
eyngebung des H. Geists (dañ ob gleich Zach-
arias solches gewist/ vñ vom Engel selbstē gehört
hat er doch/ weil er ein stumme war/ solchs der El-
sabeth nit sagen können) wol gewist/ daß der En-
gel Gabriel von GOTT beuelch bekommen/ er sol-
te mit Zacharias/ sonder Joānes heissen/ wie auch
MARIA beuelch bekommen/ daß ihr Kind andern
nit dann IESVS heissen solt. In deme sie aber
so vnder einander zanketen vmb den Namen
diß kinds/ winketen sie seinem Vatter Za-
charie/ wie er ihn wolt heissen lassen. Hier
auß ist schier nit vnfüglich zu schliessen/ dz GOTT
Zachariam nit allein an der rede/ sonder auch
am gehör gestrafft/ vnd also ein stummen vnd taub-
en gemacht habe/ sonst hettē sie ihn fragen
konden/ vnd were nit von nöten gewesen ihm
zu winken. Vnd diß kind wirdt auch auß be-
uelch seines Vatters Joannes genennet.

Was sich nach der Geburt mit diesem kind
im leben biß zu seiner Enthauptung/ verlossen
beschreiben alle vier Euangelisten/ Matthaeus/
Marcus/ Lucas vnd Joannes/ weit leuffig/ wol-
ches alles alda zu erzellen wurde nit allein der
erste Theil vorhabender Predig/ sonder auch die
ganke Predig vnd noch zwo oder drey darzu/ zu
lang werden: wirdt derhalben dißmal gnug seyn
allen

Luc. 3.
Mar. 1.
Matth. 3.
Joan. 1.

alles auff das fürhest vñ mit wenig worten fürk-
lich auß dem Euāgelio durchlauffen. Das kind-
lin/spricht der H. Euangelist Lucas/wuchs vnd

Luc. 1.

ward starck im Geist/vnd war in der Wüste bis
daß er solt herfür treten für das volck Israel.
Vnd in dem fünffzehnesten jar des Keyfers Ti-
berij/ do Pontius Pilatus Landpfleger/Joan-
nes aber in der Wüste war/vñ nun weder Wein
noch starck tranck getruncken/Hewschrecken vñ
wilden Hönig gessen/ein kleid von Camel harē/
geschabe zu ihm das wort GOTTES in der

Luc. 3.

Matth. 3.

Wüste/vnd er kam zum Jordan/vñ alle gegend/
tauffet im Wasser/prediget Puff/bezeuget daß
er nit Christus/sonder nur ein Vorlauffer sey/
Christus aber seye auch schon geporen/vñ er ha-
be ihn getaufft/vnd gesagt: Diß ist das Lamb
GOTTES so der Welt Sünd hinnimpt. Wirdt
endlich vom Herode Antipa in Gefengnuß ge-
legt/weil er ihn wegen seines Bruders Philipp

Mar. 6.

Weib gestrafft/vnd endlich als der Lumpen He-
rodiadis Tochter vmb sein Haupt getanck/zu
Macheron enthauptet/vnd seligklich verschiedē.
Seye hiemit gnug gesagt vom ersten Theil diser
Predig/Was sich vor/in/vnd nach der Gepurt
Joannis/von seiner Verkündigung/Empfeng-
nuß/Gepurt/Beschneidung/leben vnd Tod
verloffen hat.

Z On Zacharia seinem Vatter wöl-
len wir jekund auch handeln. Diser Za-
charias Joannis Vatter/war ein Prie-
ster des altē Testaments/frumb/Gottsförchtig
vnd andechtig/dienet GOTT vleissig im Tem-

Zacharias
ein frummer
Priester.

pel/ mit allerley Gottesdienst: war GOTT
 angenehm/ daß er ihn auchhöret/ erhöret/ seines
 bitts gewehrt/ do er vmb einen Erben gebet
 „ hat/ ließ ihme den Engel Gabriel/ eben im Tem
 „ pel vnder dem Gottesdienst anzeigen: Elisabet
 „ soll empfangen vnd einen Sohn geben: welche
 „ doch Zacharias nit glaubt/ sonder an den wo
 „ ten GOTTES vnd des Engels gezweifelt hat
 „ derhalben er von GOTT gestrafft ist worden/
 „ lang/ biß daß Joannes geboren vnd beschnitten
 „ ist worden/ do könte Zacharias widerumb red
 „ lobet GOTT vnd sprach: Gebenedeyet sey
 GOTT der Herr von Israel/ denn er hat
 besucht vnd erlöset sein Volk 2c.

Zacharias
 Benedeyet
 oder lobet
 Gott.

Bil schöne Pünctlin vnd Lehren möchren ab
 da vom H. Zacharia genommen werden: in de
 ren etlichen wir ihme nachfolgē/ in etlichen aber
 nit nachfolgen sollen/ auff daß wir nit auch/ wie
 er/ von GOTT gestrafft werden.

Priester sol
 len von Za
 charia lernē.

Daß Zacharias zur zeit des Gottesdienstes in
 der kyrchen vleissig/ vnd in verrichtung des jenu
 gen/ dazu dann die Priester des alten Testaments
 verbunden/ embsig gewesen ist/ lernen billich wir
 Priester des newen Testaments/ ihme hierin
 nen nachzeuolgen/ vnd auch wie er/ zur zeit/ wann
 wir sollen in die Kyrchen kommen/ nit die letzten
 dareyn vñ die ersten widerumb darauff lauffen/
 oder etwann gar außbleiben sollen/ dann war
 hafftig GOTT vns nit vnstrefflich haltē wirdet
 wie wir vermeynen: Wann wir nun gute feiste
 Psründen vnd ein gewaltigs Eynkommen ha
 ben/ wir gehen in die Kirchen oder nit/ so seye

Priester/ so
 mehr auff
 ihren Bauch

wie wir vermeynen: Wann wir nun gute feiste
 Psründen vnd ein gewaltigs Eynkommen ha
 ben/ wir gehen in die Kirchen oder nit/ so seye

es schon gnug vnd wol außgericht; wann sich ^{dann auff} aber leib vnd Seel scheiden werden/ als dann ^{Gott ach-} werden wir erfahren/was wir eyngenommen vnd ^{tung geben.} darumb gethon haben. Wer ohren zu hören hat/ der höre.

Das GOTT auch das Gebett/so die Priester ^{Das Gebett} in der kyrchen vnder dem Gottesdieust für sich ^{der Priester} selbsten/vnd für andere volnbringen/ lieber vnd ^{in der kyrche} ehe erhöre/ dann das jenig Gebett/so an andern ^{vnder dem} orten/vnd doch auch recht geschicht/ist vns auch ^{Gottesdieust} Zacharias ein gewisses Exempel. Nit allein hat er GOTT im Tempel vmb einen Erben gebetten/ sonder ist im Tempel gehört vnd erhört worden/ wie vns der H. Euangelist Lucas bezeugt: Das GOTT den Engel Gabriel zu ihme in den Tempel gesandt/vnd anzeigen lassen. Er habe ihn erhört/vñ sein Weib Elisabeth/ob sie gleich alt vnd dazu vnfruchtbar sey/solle sie doch von ihme empfangen/vnd einen Sohn/mit namen Joannes/geben. Diser vrsach ist billich vnd recht von der Christlichen Catholischen Kyrchen verordnet/ ^{Priester ble-} das die Priester/in/vnd außserhalb der H. Mess/ ^{ten nit allein} in anderen Gebetten/nit allein für sich selbsten/ ^{für sich selb-} sonder auch für alle Christglaubige Menschen ^{sten / sonder} bitten vnd betten sollen/ wie auch Moses mehr ^{auch für ein} maln für die kinder Israel/vnd der H. Paulus ^{gäbe Christ-} für die Corinthier vnd andere gethon/vnd von ^{liche Ge-} GOTT nit wenig erlangt haben. ^{mein.}

Es sollen aber auch die andern Christen alle/ so nit Priester seynd/ hie lernen: Ob gleichwol das Gebett GOTT angenehm ist/ es geschehe in oder außserhalb der kyrchen/ so nennet doch der

h s Herr

Der Tempel
ist ein Bett-
haus.

Herr den Tempel selbst ein Bett-
haus/ welches auch hierzu vnd wegen anderen Gottesdiensten
aufferbauen ist/ darinnen auch GOTT/ ehe/
dann an einem anderen ort/ weil auch gemeinlich
ihren vil darinnen zu mal bitten vnd betten/
erhören will. Sollen derhalben die rechtschaffnen
Catholischen Christen/ desto öfter dareyn zuso-
men kommen/ von GOTT bitten vnd begeren
alles was ihnen zu leib vnd Seel von nöten/ vnd
dancken vmb alles das jenig/ so sie zu leib vnd
Seel die tag ihres Lebens empfangen haben.

Das/ zum andern/ Zacharias von GOTT ge-
hört ist worden in deme/ so er/ Menschlich vnd
Natürlich dauon zu reden/ ein vnmögliches ding
begert hat/ nämlich/ daß sein Hausfrau Eliza-
beth/ so nun wol betagt vnd darzu vnfruchtbar/
empfahen vnd ein kind geben solt/ lernen wir:
Das vns GOTT nit allwegen erhört/ wañ wir
vermeynen er werde vns gewiß erhören/ vñ off-
termals erhöret/ wañ wir nit vermeynen daß er

Wann vns
Gott nit er-
hört.

vns hören vnd erhören werde. Nämlich erhört
er vns nit/ wann wir etwas begeren/ so eintwe-
der wider seinen Göttlichen Willen/ oder wider
die liebe vnseres Nechsten/ oder wider vnser See-

Wann vns
Gott erhört.

len heil ist. Do es aber wider deren keins ist/ so
höret vnd erhöret er vns. Weil aber nit ein jeder
einfaltiger Christ als bald/ vnd ja er wann gar
nit wissen kan: Wann er etwas wider GOTT/
seinen Nechsten/ oder wider sich selbst bittet/
so seze er alles mit Christo GOTT dem Himme-
lischen Vatter heim/ vnd spreche: Nit mein
Will/ sonder dein Will der geschehe: nit wie ich
will

will / sonder wie du wilt / also vnd nit anderst
 will ich auch. Vnd in disen zweyen / nämlich /
 GOTT vleissig im Tempel mit betten vnd ande-
 ren Gottesdiensten dienen / Ihne auch vmb alles
 so vns von nöten bitten / sollen wir dem heiligen
 Zacharia nachuolgen.

Worinnen
 wir Zacha-
 ria nachuol-
 gen sollen.

Das aber Zacharias an den worten GOT-
 TES gezweifelt / vnd dem Engel nit festiglich
 glaubt hat / sollen wir ihme nit nachuolgen / son-
 der wissen vñ vngewizelt glaubē: Das GOTT
 nit allein Allmechtig / sonder auch warhafftig / nit
 allein warhafftig / sonder auch Allmechtig ist. Al-
 les das GOTT durch sich selbst / durch seine
 Engel / oder durch einen Menschen verkündiget /
 das muß wahr vnd kan nit anderst seyn: vnd
 GOTT kan nit / wann er gleich wolt / vnd wolt
 nit / wann er schon könnte / weder liegē noch betrie-
 gen. Alles was GOTT will / (dañ er will nichts /
 es seye dañ recht) das kan er thun: vnd er muß /
 er wolle oder wolle nit / Allmechtig seyn / wie er /
 der Engel Gabriel selbst / zu MARIAE gesagt:
 Bey GOTT ist alle ding möglich. Er hat Him-
 mel vnd Erden auß nichts gemacht / auß der Er-
 den den Adam / auß einem Ripp ein Weib / auß
 einem Weib ein Salksaul / auß einer Ruten ein
 Schlangen / auß Wasser Wein / auß Brot vnd
 Wein sein fleisch vnd Blut / vnd alles was er
 will / kan er schaffen vnd machen. Derhalben sol-
 len wir hierinnen dem Zacharias nit nachfol-
 gen / sonder festiglich glaubē / Was GOTT sagt /
 vnd die guten Engel verkündigē / daß ihme war-
 hafftig also vnd nit anderst seye / nit angesehen /
 daß

Gott kan nit
 vurecht thū.

Luc. 1.

Ungleubige
leut dier
zeit.

Catholische
Christe/ wie
sie sich in
Glaubens
sachen ver-
halte sollen.

daß solchs mehrmaln vber vnser vernunfft vnd verstand ist. Also findet man diser zeit leut/ so die fürnemsten Artickel vnser Christlichen Glaubens/ als von der H. Dreyfaltigkeit/ vom H. Sacrament des Altars/ weder vnder einer noch beyden Gestalten nit glauben wollen. Darumb sagen sie/ es seye wider vnd vber ihr vernunfft vnd verstand/ gleichsam als wañ man vnsern Glauben sehen/ greiffen/ mercken/ verstehn vñ mit vnserm verstand gänglich ergreiffen müste/ welches doch kein Glaub/ sonder ein erfahrung were. Vñ eben darumb/ weil wir die Artickel vnser Christlichen Glaubens/ nit/ weder sehen noch mit vnser vernunfft begreiffen könden/ glauben wir sie. Difes wissen/ verstehn/ vnd nit glauben wollen bringt nit allein Juden/ Heyden/ Türcken/ Mamelucken/ Caluinischen/ sonder auch noch vil andere so sich selbstn für Christen halten/ zur ewigen verdammuß. Die Catholischen Christen sollen GOTT/ dem Wort GOTTES durch die Engel/ heiliger Schrift oder offenbarung des H. Geistes in den H. Concilien/ Christlich vñ einfaltig/ ohne alles griblen/ zancken/ glauben/ vnd nit alles nach ihrem vnuerstendigen Verstand/ als mit einer Richtschnur aufmessen wollen/ sonder denselbigen gefangen vnd den Glauben in die hand nehmen/ bey dem einhelligen gleichstimmenden/ Catholischen/ Apostolischen/ Römischen/ alleinseligmachenden Glauben/ leben/ sterben/ vnd selig werden.

Do wir aber diß nit thun/ sonder noch/ wie Zacharias/ an den Worten GOTTES/ des Engel

gels/der H. Schrift/an den Stücke/Puncten
 vnd Artickeln des Christlichen / Catholischen/
 Glaubens zweifeln/ vnd also im Vnglaubē ster-
 ben werden/ sollen wir wissen/ daß wir nit nur/
 wie Zacharias/ leiblich vnd zeitlich/ sonder im-
 mer vnd Ewig/ an der Seel biß zum Jüngsten
 tag/ volgendts an leib vnd Seel in Ewigkeit/
 in dem Hellschen Fewr gestrafft werden/ nach
 zeugnuß Christi/der gesagt: Welcher nit glaubt/ Mar. 16.
 der wirdt verdampt werden. Ja dise dreuwung
 vnd vorsagung wirdt er vns so wenig vmb son-
 sten gesagt haben/ als dem Zacharie auff heut/
 do ihme der Engel gesagt: Er solle biß zur Ge-
 burt Joannis Stumm bleiben/ welches dann/
 als vns der H. Euangelist Lucas bezeugt/ gesche-
 hen ist. Ja am achten tag seines kindts gepurt/
 als man dasselbig iekund beschneiden wolt/ kōn-
 te er noch nit reden/ mußte in ein Täfelin schrei-
 ben wie das kind heissen solt. Also hat auch ge-
 wislich Zacharias erfahren/ daß G O T T beide
 ist/nämlich/warhafftig vnd Allmechtig. War-
 hafftig/weil er ihme hat lassen anzeigen/ er soll
 Stumm werden: Allmechtig/ daß er ihne zum
 Stummen hat machen können/vnd zwar eben
 so lang/wie lang er ihne gedreuwet hat/biß daß/
 spricht der Engel/ diß alles vollendet wirdt:
 nämlich/ biß daß Elisabeth empfahet/ biß daß
 sie das kind geporen/ biß daß dasselbig am ach-
 teten tag beschnitten wurde/ wie dann gesche-
 hen/ als auß dem heutigen Euangelio zu lernen.
 Do es solt beschnitten werden/ kōnte Zacharias
 so vil nit reden: Sein Name soll Joannes seyn/
 sonder

Lobgesang
Zacharie.

sonder musste solchs schriftlich antworten: S
bald aber das kind beschnitten war/ fienge er wo
derumb an zu reden/ GOTT loben/ehren vnd
preisen/ vnd sagt auß innigkeit seines herrkens:

Gebenedeyet sey GOTT der Herr von
Israel/ dann er hat besucht/ vnd erlöset sein
volck ꝛ. Dis ist ein schöner Lobgesang Za
charie zu GOTT vnserm Himmelschen Vate
ter/ ist auch lang/ also daß er einer oder etlicher
Predigen wol würdig vnd nötig bedörffte/ kan
aber auff dis mal/ bis zu seiner vnd gelegnen ze
nit geschehen. Allein wollen wir iekund hier
dis mercken/ behalten/ vnd ins Werck richten.
Wann wir auch/ wie Zacharias vor dem En
gel/ geredet haben was nit recht ist/ sollen wir
widerumb mit ihme lernen reden was recht ist.
Erstlich/ vnd so bald wir widerumb reden/ mit
ihme GOTT loben/ehren vnd preisen/ vmb alle
empfangene Gutthaten lob vnd danck sagen: be
kennen/ Daß er vns/ do wir vnrecht thund/ bo
lich straffe/ vnd vns gutes thue auß eitel Gnade
vnd Barmherzigkeit: vnd bitten/ Daß er vns
noch forthin/ was vns zu leib vnd Seel von nö
ten/ geben wolle.

Mit Zacha
ria sollē wir
Gott loben.

Also haben wir/ in disen zweyen Theilen von
habender Predig/ kürzlich gehört: Was vnd wer
Joannes seye. Was sich mit ihme/ vor/in/ vnd
nach seiner Geburt verlossen hat: Was vnd wer
Zacharias gewesen/ vnd was sich mit ihme zu
getragen. Joannes der H. Tauffer vnd Bot
lauffer Christi/ dessen leiblichen Geyurts tag
(am

(am tag seiner Enthauptung den geistlichen
 Geyurts tag) wir auff heut halten/ wölle dro-
 ben im Himmel vor dem H. Angesicht G O T-
 T E S/ aller Catholischen Christen (die andern
 bedörffens nit/ sie müssen in Himmel/ sie wöl-
 len oder wöllen nit) Fürsprech seyn/ auff daß sie
 hie auff Erden Göttsfürchtig leben/ Catholisch
 glauben/ Christlich sterben vnd selig werden mö-
 gen/ Amen.

Du Gütiger GOTT/ Herr Gebeylts zu
Gott dem
Himmeli-
schen Vate-
ter.
 Himmelscher Vatter/ der du nit
 allein die Geyurt deines geliebten
 Sohns/ sonder auch seines Vorlauffers
 Joannis des Tauffers/ durch deinen Erz-
 engel Gabriel hast verkündigen/ vnd Za-
 chariam/ darumb daß er deinem Wort nit
 glaubt/ straffen wöllen: Wir bitten dich
 ganz Demütig durch deinen Sohn vn-
 sern lieben Herren I E S V M Christum/
 vmb beystand/ daß wir Joanni vñ Zacha-
 rie in allem billichen/ das Leben vñ Glau-
 ben betreffend/ nachuolgen mögen hie auff
 Erden/ auff daß wir mit ihnen volgendts
 auch nach disem zeitlichen leben in das
 Ewig eyngehn/ vnd daselbsten sampt dem
 gangen Himmelschen Heer ohn ende
 in Ewigkeit wohnen mö-
 gen/ Amen.

Amen

Am 20. tag
Juni.

Am Fest der zweyen Aposteln
Petri vnd Pauli/ Euange-
lium Matth. xvi.



Mar. 8. d
Luc. 6. g

Joan. 6.

In der zeit kam IESVS
in die Gegend der Stadt
Cesarea Philippi/ vnd
fraget seine Jünger/ vnd
sprach: Für wen haltet
die leut den Sohn des
Menschen? Sie sprachen: Etlich halten
ihn für Joannem den Tauffer/ die andern
für Eliam/ etlich für Jeremiam/ oder et-
nen auß den Propheten. Er sprach zu ih-
nen: Für wen halt ihr mich den? Da ant-
wortt Simon Petrus/ vñ sprach: Du bist
Christus des lebendigen GOTTES Sohn.
Vñ IESVS antwortt/ vñ sprach zu ihm:
Selig

steln

Selig bistu Simon Jonas Sohn/ dann Matth. 11. e
 fleisch vnd blut hat dir das nit offenbaret/ Joan. 6. e
 sonder mein Vatter im Himmel. Vnd ich
 sag auch dir/ du bist Petrus/ vnd auff disen
 fels wil ich bauwen meine Kyrchen. Vnd
 die porten der Hellen sollen sie nit vberwel- 1. Cor. 10. a
 digen. Vnd dir will ich geben die schlüssel Esa. 28. a
 des reichs der Himmeln: Vnd alles was 1. Par. 17. a
 du binden wirst auff Erden/ soll auch ge- Matth. 18. b
 bunden seyn in den Himmeln: Vnd alles Joan. 20. a
 was du lösen wirst auff Erden/ soll auch
 loh seyn in den Himmeln.

Ich sage dir: Du bist Petrus/ vnd auff dis-
 sen Felsen wil ich bauwen meine
 Kyrchen. Matth. xvj.

Auff heut halten wir Catholi-
 sche Christen in der gansen Chri-
 stenheit/ das Fest vñ Feiertag der
 zweyen heiligen Apostel/ Petri/ des
 obersten vnder den Aposteln: vnd
 Pauli/ so erstlich/ als er noch ein Verfolger Chri-
 sti vnd seiner gewesen/ Saulus geheissen/ vñ ein
 gewaltiger Lehrer/ Prediaer vnd Apostel Christi
 worden ist. Darumb auff heut/ seitemaln sie all-
 beid auff heut/ zu Rom/ wegen des Christlichen Petrus vnd
 Catholischen Glaubens/ gemartert vnd getödt Paulus auff
 seynd worden. Petrus ist gecreuziget worden/ heut gemar-
 Paulus aber enthauptet. tert.

Diser vrsach hat die H. Christlich Kyrch auff
 i heut/



ESVS
 r stad
 / vnd
 er/ vnd
 halten
 yn des
 halten
 andern
 oder cu
 zu ihu
 Da ant
 Du bist
 Sohn
 u ihm:
 Selig

heut/ein solchs Euangelium zu lesen vnd Predigen verordnet/darinnen nit allein Petri (des H. Pauli kan im Euangelio nit meldung geschehen seitemaln er zur selbigen zeit noch kein Christ/ vnd weniger aber sampt Petro vnd andern ein Apostel gewesen ist) sonder auch seiner Bekantnuß von Christo/anstruckentlich meldung geschicht/ welcher bekantnuß wegen sie allbeid hernach nänlich auff heut/getödet worden seynd.

Theilung
vnd Inhalt
diser Predigt.

Nun wollen wir/vermög diß heutigen Euangelij/von disem allem/nänlich von Christo/vn Petro/Paulo/ihrer Bekantnuß/vnd bestandhaftigkeit auff derselbigen/etwas weitläufftiger handlen. Vnd fürnemlich im ersten Theil: Von der herrlichen Bekantnuß Petri von Christo. Was vnd Wer er sey. Im andern: Von der Belohnung/so Petrus verdient vnd von Christo empfangen hat. Welches ihr mit ernst/gedacht/ vleiß vnd gedult anhören wolt. So mag auch ich euch alles auff das leichtest vnd kürzest gern fürhalten. GOTT wölle vns zu beide theilen/ mir vnd euch/ sein Götlichen Segen Gütlich mittheilen zc.

Warumb
Christus
auff dise
Welt kommen.

Christus vnser lieber Herr vnd Signmacher/ ist diser vrsach von der Schickung seines vnd vnser Himmelschen Vaters außgangen/vnd kommen auff dise Welt/ daß er Mensch solte geporen werden/volgen im rechten alter im land hin vnd wider/vn fürnemlich oder zu ersten im Jüdischen land zu predigen/Wunderzeichen thun/vnd für der ganzen Welt den versprochenen Messiam

vnd wahren Sohn GOTTES/erkleren solt. Di-
 se beide/nämlich/das er Christus jimmer von ei-
 nem ort zum andern gewandert/vnd das er sich
 den Sohn GOTTES bekennt habe/seynd leicht-
 lich auß dem anfang diß heutigen Euangelij zu
 lernen: In der zeit/nämlich an einem Mit-
 woch/welcher war der neun vnd zwenzigst. Ju-
 lij/im zwey vnd dreißigsten Jar Christi vnseres
 Heilands/do kam I E S V S in die Gegend
 der Stadt Cesarea Philippi. Hier auß ist
 das erste zu lernen/nämlich/der grosse vleiß/mü-
 he vnd arbeit/eiser vnd ernst/lust vnd liebe/zu
 volnbringen vnd vleissig zu verrichten das jenig/
 so ihme von sich selbst vnd von seinem Hünne-
 lischen Vatter zu verrichten auffgelegt ist wor-
 den. Er ist nit lang (nach deme er das dreißigste
 Jar seiner Menschheit nach erreicht/ vnd zu
 Predigen angefangen hat) an einem ort gebli-
 ben/sonder von einem ort/Stadt/Flecken/
 Marckt vnd Dorff in das ander gereiset/vleis-
 sig geprediget/ernstlich gesucht das jenig so
 verloren war. Wie er dann auch dißmal/in
 den Grenken Magedan/geprediget/die Pha-
 riseer vnd Saduceer wegen ihrer heuchleren
 gestrafft/als bald hinüber gefaren vnd kom-
 men in die Gegend vnd Grenken der Stadt Ce-
 sarea Philippi. Dife Stadt (nach zeugnuß der
 jenigen so vber diß heutig Euangelium geschri-
 ben haben) ist erstlich Lachis genennet worden/
 welche miter zeit die Sohn Dan (so ein Sohn
 Jacobs gewesen) zerstört/widerumb erbau-
 wen/vnd nach dem Namen ihres Vatters

Christus ein
 vleissiger
 Prediger.

Die Stadt
 Cesarea Phi-
 lippi erstlich
 Lachis ge-
 nent.

Dan genennet. Welche Stadt lang hernach
 Philippus ein Bruder Herodis Antipe / wo-
 cher Joannem enthauptet / erweitert / vnd
 was besser erbauret / zu ehren des Keyfers
 berij / von welchem er den vierten theil des
 nigreichs seines Vatters Herodis Ascalonit
 empfangen / Cesaream / vnd wegen seines Na-
 mens / Cesaream Philippi genennet hat / he-
 nach hat sie Paneas geheissen. Sonsten ist noch
 ein Cesarea in Palestina gewesen / in welcher
 der Hauptmann Cornelius gewohnet ic. Nun
 in diser Gegend oder Grenzen gemelter Stadt
 fraget der Herr seine Jünger / vnd sprach
 Für wen halten die leut den Sohn des
 Menschen ? Die vrsach / darumb der Herr
 sich selbst / mehrmaln / den Sohn des Men-
 schen / dann GOTTES genennet hat / ist
 fels ohne vor diser zeit / vnd villeicht mehr
 nur ein mal / angezeigt worden / vnd derhalben
 jekund hierinnen lang zu verharren vnmög-
 lich. Gnuß sene es vns auff diß mal / mit wenig wo-
 ten / ein oder zwo vrsachen anzeigen vnd hören
 Erstlich / Daß der Herr stiehen wolt alle solch
 reden / dadurch die Jüden vrsach nehmen
 suchen möchten / ihne der Ehrgeizigkeit zu
 schuldigen / vnd volgendts zu schmehen vnd
 stern. Darumb auch / daß er jeder zeit sein
 mütigkeit erzeigen / volgendts vns nach seinem
 Exempel zur Demütigkeit anreizen vnd bringen
 wolt. Darumb auch : Weil er nit / wie wir
 zweyer Menschen / sonder nur eines Menschen
 MARIAE Sohn ist. Daß er auch wider die
 Reg-

Christus ein
 Sohn des
 Menschen
 Marie.

Ketzer / so hernach (wie dann geschehen) seine wahre Menschheit leugnen wurden / der gansen Welt mehrmaln gesagt hette : Er seye warhafftig des Menschen Sohn vnd selbstenn auch wahrer Mensch. Darumb auch : Daß er iekund von seinen Jüngern anhören wolt / Ob sie ihne auch mehr oder nit mehr / als nur einen Menschen seyn / glaubten ? Es fraget aber alda der Herr seine Jünger nit diser vrsach / als ob er zu vor nit gewißt solt haben : Wer vnd Was man ihme antworten werde. Dann ihme ist nichts verborgen / weder verganges / noch zukünfftiges. Ja ihme ist eigentlich nichts weder verganges noch zukünfftigs / sonder alles gegenwertig / vnd vor augen : was aefchehen ist / vñ was noch geschehen wirdt / das sibet vnd weiß er alles albereit / dann er nit nur wie vnser einer ein Mensch / sonder auch zu mal wahrer GOTT ist. Sonder darumb hat er gefragt : Daß auch die anderen Apostel / auß der Antwort des obersten vnder den Aposteln Petri / lernen solten : Was sie von Christo halten vnd glauben sollen. Vnd ist also dise Frage vnd Antwort vmb der Apostel vnd nit Christi willen eruolget. Seitmaln auch Christus einen Obersten vnder den Aposteln / vnd nach seiner Himmelfart einen gemeinen Seelforger / Vicarium / Stathalter vñ Amptsuerwalter / das ist / einen gemeinen Hirten / vber seine Schäfflin vnd Lämmer haben wolt / vnd diser eben Petrus seyn solt / wolte er die Apostel zu mal fragen / der rechte aber solt für sie all antwort geben / wie bald hernach gehört

Ketzer / so die wahre Menschheit Christu ge-
leugnet :

Cerdon, Pro-
clianita, Ap-
pelles, Mani-
chæi, Priscil-
ianus, Valē-
tinus, Apollō-
naris, &c.

hört soll werden. Jezund wollen wir zuvor anzeigen/was ihr Antwort in gemein/des gemeinen Judentums meynung von Christo/ gewesen sey.

**Meynung
des Judentums:
Wer Christus
sey.**

**Matth. 16.
Mar. 8.
Luc. 9.**

**Pharissee
vergönnen
Christo kein
Ehr.**

**Matth. 11.
Luc. 10.**

Als der Herr auff dem Wege also gefragt/ Was die leut von ihm halten/ sprachen seine Jünger: Etlich halten dich für Joannes den Tauffer/ die andern für Eliam/ etliche für Jeremiam/ oder einen auß den Propheten. Welcher/ oder welche vnder den Aposteln alda Christo dem Herren also geantwortet/ hat weder Matthens/ Marcus/ noch Lucas/ so doch alle drey diese Histori beschriben/ angezeigt/ ist auch zu wissen nit von nöten/ seitens der sie/ die Apostel/ alda/ nit für ihr Person geantwortet/ sonder allein den wohn vñ meynung des Volcks angezeigt haben. Was dan die Antwort oder meynung des Volcks/ daß Christus/ Joannes der Tauffer/ Elias oder Hieremias/ oder sonst ein Prophet seyn solt/ belangen thut/ zu vermuten/ daß solche mehr des gemeinen Judentums/ dan der Hohenpriester/ Schriftgelehrten vnd heuchlerischen Pharissee gewesen sene. Dann sie ihm solche Ehr vnd so vil wurden vergönnen haben/ wie ihre lästerverreden so sie mehrmaln wider ihne außgespenet/ ein verfehlbarer zeug seynd. Ist also auch alda erfüllt worden das jenig/ so der Herr auff ein zeit seinem Vatter gar ernstlich gesagt hat: Vatter/ ich sage dir danck/ daß du solchs vor den Weisen verborgen hast/ vnd den kleinen geoffenbar

fenbarer. Dann also Vatter ist es gefällig ge-
wesen vor dir.

Wiewol aber auch diß Judenvolk / oder die
jenigen von welchen oder für welche die Apostel
diß mal auff des Herren Frag geantwortet ha-
ben / nit durchaus / ja gar nit wol getroffen ha-
ben / seitemaln sie den Herren nit für den Sohn
GOTTES / sonder nur für einen heiligen Man /
vnd Propheten GOTTES / gehalten haben : ist
doch nit zu zweiffen (dann sie dißmal noch nit
bessers gewist) dann daß sie noch / wo nit alle /
doch der meiste theil / vollkommenlich in Chri-
stum vor ihrem tod gleubig seyen worden. Das
haben sie gewist / vnd eins theils selbstn gese-
hen / eins theils von andern gehört : Daß Jo-
annes der Tauffer ein frummer / gerechter Mensch
gewesen sey / der an Wohnung / Kleider / Speiß
vnd tranck ein strenges vnd hartes Leben geführt
hat. Seitemaln sie aber Joannem / welchen
Herodes Antipa zu Macheron enthaupten hat
lassen / nit mehr haben sehen können / (dann er
ist heimlich auß anhaltung der Ehbrecheri-
schen Lumpen Herodiadis / in einer Gefenck auß
ermordet worden) vnd Christus auch frumb /
gerecht war / tauffet auch / wircket grosse Wun-
derzeichen / vermeynt das Volk / er were Joan-
nes der Tauffer. Wie dann Herodes Antipas
selbstn / als er die Wunderzeichen Christi ge-
hört / zu seinen knechten gesagt hat : Diser ist Jo-
annes der Tauffer / (den ich enthaupten hab las-
sen) er ist von den todten aufferstand / darumb
ist sein thun so gewaltig. So haben sie auch wol

Joannes
wirdt ent-
hauptet.

Matth. 14.

Malach. 4. gewist/ daß Elias mitler zeit / widerumb zu ihnen solt kommen. Wisten auch/ daß Hieremias ein frummer vnd heiliger Prophet gewesen ist. Vnder disen dreyen/ muß diser Nazarener gedacht das Judenuolck/ einer oder doch auch das wenigste ein anderer vnd nit ein geringe Prophet seyn.

Wer Christus sey.

Diemeil aber Christus der Herr / mehr als Joannes der Tauffer / als Helias / Hieremias oder sonsten ein Prophet war / vnd derhalben diß Judenuolck noch weit an der erkantnis vnd rechten bekantnis Christi fehlet / fraget er seine Jünger: Für wen haltet ihr mich dann? Als wolt er zu ihnen gesagt haben: Diß Volck oder die jenigen so mich für Joannem / Heliam / Hieremiam halten / seynd noch weit vom Wege / wissen noch nit Was vnd wer ich binn / haben aber villsicht / noch / etlich vnder ihnen / bishero anderst von mir nit gehört noch gesehen / vnd also bessers zu wissen gelegenheit nit gehabt. Nun aber / werde ich mich ihnen mit Worten vnd Wercken besser erkleren / als dann werden sie sehen / hören vnd glaubig werden. Mer euch aber meinen Jüngern / die ihr vöm anfang bey mir gewesen / hat es weit vnd vil ein andere meynung. Ihr habt mich offermaln hören predigen / was vnd wer ich binn euch verkündiget. Die Wunderzeichen / so ihr von mir hauffentlich gesehen habt / bezeugen von mir / Was vnd Wer ich seye: derhalbē wolte ich ein Antwort von euch meinen Jüngern haben / was euwer meynung

ja Glauben von mir seye? Da antwortet Si-
 mon Petrus/ vnd sprach: Du bist Chri-
 stus des lebendigen GOTTES Sohn.
 Der Herr hat alle Jünger in gemein gefragt/
 aber doch wol gewist/ welcher/ vñ was er für ein
 Antwort geben werde. Dann es ja gewislich nit
 ohne sonderliche schickung GOTTES geschehē/
 ja GOTT hat es selbst also geordnet/das eben
 derjenig/ im Namen aller Apostel/ antworten
 solt/welchen der Herr einen gemeinen Hirten/
 nit nur dises oder jenes Lands oder Bistums/
 sonder vber alle seine Schäflein vnd Lämmer der
 gangen Welt stellen wolt/ wie er ihme dann dis-
 mal verheissen/ vnd nach seiner Auferstehung
 volliglich Gewalt geben hat/do er zum dritten
 mal zu ihme gesagt: Weide meine Schaf/wei-
 de meine Lämmer. Nämlich ist Petrus/ oder
 Simon ein Sohn Joannis / derselbig / so oh-
 ne Rathschlag der andern Jüngern/ auch ohne
 offenbarung seines fleisches vnd Menschlichen
 verstandes/sonder auß schickung/ wirkung vnd
 eyngebung des H. Geistes/ antwortet: Wer
 oder was soltestu seyn? Du bist Christus/
 der vor langst versprochne Messias von deinem
 Himmelschen Vatter dem Abraham/ Isaac
 vnd Jacob/auch dem H. Königlichen Prophe-
 ten David vnd anderen/ wie vns dann die Pro-
 pheten weißgesagt haben. Vnd nit allein bistu
 Christus/ so nach verheissung GOTTES auß
 einer Junckfrauen mußte geporen werden/
 vnd volgendes ein wahrer Mensch vnd eben
 MARIAE Sohn seyn/sonder zu disem bistu auch

Petrus bekät-
 nuff/ Wer
 Christus

sey.

Petrus ein
 gemelner
 Hirt der
 Schäflein
 vnd Läm-
 mer Christi.

Joan. 21.

Gen. 17. 26.

28.

Psal. 131.

Esa. 7.

stel
 ob zu
 hierem
 gewesen
 arener
 och auf
 geringe
 mehr al
 remia
 rhalb
 anten
 frag
 r mit
 haben
 für Jo
 nd noch
 nd vor
 h vnd
 rt noch
 heit ni
 en mit
 s dann
 en. Ma
 anfang
 ander
 en Pro
 idigen
 ffecht
 d Wer
 en euch
 unng
 ja



des lebendigen GOTTES Sohn/ sein
ner/ einiger/ Natürlicher/ Ewiger Sohn/ ihm
gleich ein wahrer Ewiger GOTT ohne anfang
vnd ohn ende.

Petrus der
oberste vn-
der den A-
posteln.

Diß ist ein herrliche bekännuß Petri des ober-
sten vnder den Aposteln vñ Christo vnserm He-
land. An diser bekantnuß ist aller Menschen he-
vnd Seligkeit gelegē. Ohne dise mündliche oder
herrliche bekantnuß (bey denen so zu ihrem ver-
stand kommen seynd) kan vnd mag niemant
selig werden. Wer nit glaubt: Daß diser Chri-
stus/ diser IESVS/ diser Nazarener/ diser Sohn
MARIAE/ auch GOTTES Sohn seye/ der muß
immer vnd Ewig verdampft werdē. Also wider-
faret allen Jüden/ Türcken/ vnd sonstigen vñ
Mamelucken vnd Ketzern/ so Christum/ den
Vatter vnd H. Geist einen gleichen GOTT
der nennen noch bekennen wollen.

Drey Per-
sonen/ ein
Gott.

Wir Christen aber/ lernen/ ja wissen auß dem
H. Mund vnd Wort GOTTES/ vnd auß vn-
serm Christlichem Apostolischem Glauben/ daß
der Herr Christus/ der Vatter vnd H. Geist
gleichwol drey vnderschiedliche Personen/ aber
doch nur ein GOTT seynd/ der vns erschaffen
erlöset vnd geheiligt hat. Derhalben sollen/ wol-
len vnd müssen wir auch zu Christo sagen
Petro: Du bist Christus ein Sohn des lebend-
gen GOTTES. Vnd von diser bekantnuß wol-
len wir vns nit lassen abwendig machen/ weder
den Teufel/ Tyrannen/ Ketzern/ das Gelt/ die
Welt/ nit/ weder Peynn/ Marter noch tod: son-
der/ auß diser bekantnuß können/ wollen vnd
müssen

müssen wir leben/sterben/vnd selig werden.

Also haben wir den ersten Theil vorhabender Predigt vollendet/vnd kürzlich neben andern darinnen gehört die Bekantnuß Petri von Christo: Daß er des lebendigen GOTTES Sohn seye. Nun wollen wir die Antwort Christi dar auff/vñ die belohnung Petri vom Herren/wegen diser herrlichen Bekantnuß/auch anhören.

Auff solche herrliche vñ ganz Christliche Bekantnuß Petri / von Christo / Wer er sey / antwortet er ihme also: Selig bistu Simon/ du Sohn Jonas/ dann fleisch vnd blut hat dir das nit offenbaret / sonder mein Vatter im Himmel. Daß Petrus erstlich vnd mit seinem eignen Namen Simon geheissen/ lernen wir auß dem H. Euangelisten Joanne/do er lehret: Daß Andreas ein Bruder dises Petri/ als er noch Joannis des Tauffers Jünger gewesen/ Christi Joann. 1. stum gesehen hatte wandern/ gieng er zu seinem Bruder Petro/ vnd sagt: Wir haben den Messias funden/ welches ist verdolmetschet der Gesalbte. Vñ füret ihn zu IESV. Do ihn IESVS ansah/sprach er: Du bist Simon Jonas (oder/ wie er an einem andern ort zu ihme sagt/ Joann. 21. Joann. 21. nis) Sohn/ du solt Cephas heissen/ das wirdt Simon oder verdolmetscher/ ein Fels. Diser vrsach nennet Petrus Joannes Sohn. der Herr auch auff heut anfanglich ihne mit seinem ersten Namen Simon/ bald hernach auch mit seinem andern Namen/ Cephas oder Petrus. Selig bistu wegen diser deiner bekantnuß/

nus/ daß ich der ewige GOTTES Sohn seye.
 Dann mir nit unbewust/ daß du/ ob du gleich
 noch der zeit einest anders sagen/ nit also bekenn
 nen/ sonder mich auß forcht der Jüde das dritte
 mal verleugnen wirst/ so wirstu doch nach
 vollkommenlicher Puß/ vnd sterckung des H.
 Geistes/ auff diser Bekantnus verharren/ be
 stendig darauff bleiben/ vnd derowegen den bö
 tern tod/ ja den tod des Creuzes leiden: derhal
 ben bistu jekund in der hoffnung/ daß aber nach
 der Seel/ bis an den Jüngsten tag/ volgend
 mit Leib vnd Seel im werck selig ohne ende in
 Ewigkeit.

Don Gott
 haben wir
 das Gut.

Doch soltu lieber Petre/ dich/ desse weder
 vbernehmen noch berühmen/ vil weniger aber
 hierumb vndanckbar erfunden werden/ seit
 maln du dise herrliche Bekantnus nit auß noch
 von dir selbst/ sonder auß offenbarung GOTTES
 hast/ deme hastu zu dancken/ vnd vndertho
 nig bitten/ daß er dich bis an das ende auff diesem
 Glauben vnd bekantnus stercken/ behalten/ vnd
 wider alle feind des Christlichen Namens/ er
 halten wolle.

Glauben
 muß man/
 daß wir nit

Alda haben wir Christen/ ja alle Menschen
 so da begeren Christen vnd endlich selig zu wer
 den/ zwo fürneme nützliche vnd sehr notwendige
 Lehren zu merckē. Die erste ist: Daß wir nit nur
 das jenig glauben müssen/ so vns zu glauben
 leichtlich ankommet/ so vnser Fleisch vnd schwä
 cher Verstand vernemen/ mercken vnd be
 greiffen können. O Nein/ dann do deme also
 werden wir nichts weniger daß Christen seyn.
 Ja

Ja das jenig so wir hören/ sehen/ greiffen vnd
 eigentlich durch vnsern geringen Verstand be-
 greiffen können/ ist/ eigentlich dauon zu reden/
 greiffen können/ ist/ eigentlich dauon zu reden/
 kein Glaub/sonder ein Erfahrung. Vnser Ver-
 stand ist hierzu vil zu gering: vnsern Verstand
 müssen wir in solchen hohen wichtigen Artickeln
 vnsern Glaubens gefangen/ vnd den Glauben
 in die hand nehmen/ vnser Herr GOTT dem
 H. Geist öffnen/ vnd demütig bitten/ daß er das
 selbig dermassen erleuchten wölle/ daß wir das
 jenig/ so wir nit verstehn können/ doch einfaltig
 glauben mögen. Petro/ der noch ein grober
 Mensch vnd newlich ein Fischer gewesen/ war es
 nit möglich in seinem verstand zu finden: Daß
 diser Christus/ nit allein MARIAE vnd nit Jo-
 sephs/ sonder GOTTES Sohn seyn solt: den-
 noch hat er solchs glaubt vnd bekant/ seitern
 ihme GOTT solchs verkündiget hat. Darumb
 müssen auch wir/ nit/ als ob diß oder jenes nit
 recht noch Christlich seyn/ zweiffeln/ weil wir
 solchs nit eigertlich verstehn noch begreiffen kön-
 den/ sonsten müsten die meiste vnd fürnemste
 Stück vnsern Christlichen Glaubens alle fal-
 len. GOTT dem H. Geist/ der vns solchs neben Gott ver-
 H. Schrift/ in den H. Concilien lehret/ sol-
 len vnd müssen wir vertrauwen/ vnd gentslich
 glauben.

sehen noch
 begreiffen
 oder ver-
 stehn kön-
 nen.

Gott ver-
 trauwen.

Zum andern lernē/ auß obgemelten worten/
 die jenigen/ so etwann einen mehrern verstand/
 geschickligkeit vnd erfarnuß in Glaubens sa-
 chen haben/ dann andere einfaltige leut/ daß sie
 sich derowegen nit erbrechen/ erheben/ vbernem-
 men

Gott sollen
wir um alle
Gnaden
und Gaben
dancken.

Wer vnd
was Pe-
trus seye.

1. Cor. 3.

Christus ist
allein das
lebendigma-
chēd Haupt.

men noch berühmten / vil weniger aber ihnen
selbsten zumessen sollen als habe ihnen solchs ih-
eigen fleisch vnd vermögen offenbaret : sonder-
der im Himmel ist / vom selbigen haben sie / was
sie haben : seynd derhalben schuldig / weil sie von
einem andern vil Gnad vnd Gaben empfangen
haben / daß sie GOTT auch vil für einem an-
dern dancken / vnd das jenig so sie für andern
künden vnd wissen / andern auch gern vnd treu-
lich mittheilen sollen. Von disen beiden zu seiner
zeit weitläuffiger.

Auff obgemelte wort vnd Bekantnuß Pe-
tri / sagt iesund Christus Simoni auch wer er
sey / vnd spricht : Vnd ich sage auch dir : Du
bist Petrus / vnd auff disen Fels wil ich
bauwen mein Kyrchen / vnd die pforten
der Hellen sollen sie nit vbergweltigen.
Christus ist / nach zeugnuß des H. Pauli / das
rechte Fundament vnd Grunduest / darauß sein
Kyrchen gebauwen / aufferhalb welches / ni-
mands kan oder mag selig werden / vñ nämlich
durch dise bekantnuß Petri : Du bist Christus ein
Sohn des lebendigen GOTTES. Es ist auch
Christus / vñ allein er Christus / vnd sonst ni-
mandts / das rechte / wahre / alleinseligmachen-
des vnd lebendigmachends Haupt seiner Christ-
lichen Kyrchen hie auff Erden / in welches wir
seine Glider hoffen / vertrauen vnd glauben
sollen vnd müssen / wann wir anderst wollen
selig werden. Ob gleich deme also / wie wahr ist /
so hat doch er / Christus der Herr / nach seiner
Him-

Himmelfart hie auff Erden vber sein Christliche Kyrchen/ ein Verwaltends Haupt/ einen gemeinen Vorsteher vnd Seelsorger vber alle seine Schäflein vnd Lemmer haben wollen: welcher sie lehren/ regieren/ speisen vñ trencken soll: vor welchem auch die strittigen Artickel des Glaubens erörtert/ vnd die falschen Lehren/ als verdamliche Kezeren erkennt sollen werden. Welcher auch/ als der Oberste vnd Vorsteher der anderen Apostel/ Bischouen vnd Priester/ seyn sollte. Vnd diß nit vnbillich. Dann do

Ein verwaltends Haupt Christi hie auff Erden.

GOTT diß im alten Testament gethon/ vnd so scharpff darüber gehalten hat/ daß der jenig Mensch/ so dem Obersten Priester nit gehorsam gewesen/ hat sollen getödtet werden/ warumb sollte er dann nit auch ein Verwaltends haupt im newen Testament haben/ seitemaln wir des selbigen eben so wol/ ja noch nötiger bedörffen/ als die Jüden im alten Testament bedörfft haben?

Deut. 17.

Ein Oberster Priester im alten Testament.

Diser gemeine Hirt aber/ vnd hie auff Erden Amptsuerwalter Christi/ solt vnd must eben der jenig seyn/ zu welchem auff heut Christus gesagt: Du bist Petrus/ das ist ein Fels/ vnd auff disen Felsen will ich mein Kyrchen bauen. Als wolt er gesagt haben: Auff

Petrus ein verwaltends Haupt der Kyrchen Christi.

dise dein herrliche Bekantnuß/ daß ich Christus des lebendigen GOTTES Sohn sey/ vnd auff dein tragendes Ampt so ich dir jekund versprochen/ vnd nach meiner Auferstehung/ vor meiner Auffart/ vbergeben wil/ wil ich bauen/ als auff ein verwaltends Fundament vñ Haupt/

mein

mein Kirchen/ welcher du vnd deine Ordentlich
 che Nachkömmling/ in Glaubens vnd Lebens
 chen/ Christlich vorstehn/ maß vnd ordnung
 fürs schreiben solt; vnd welcher dich nit hören wil
 der soll nit weniger gestrafft werden/ als der
 nig/ soden Willen vnd das Gebott des sichtba
 lichen Hauptes vnd Hohenpriesters verachtet
 hat. Doch wil ich mit Gnaden/ Gaben vnd
 Segen/ sampt dem Vatter vnd H. Geist/ meiner
 Kirchen/ als das wahre unsichtbarliche
 Haupt/ jeder zeit also vnd dermassen vorstehn
 daß die pforten der Helle/ das ist/ weder der
 Teufel noch die Hell/ weder Jüden/ Türcken
 Heyden/ Tyrannen/ Keger noch andere Widers
 sacher vnd feind/ sie nit vbergewaltigen sollen
 Das ist: Also wil ich (wil Christus sprechen
 Petro) meiner Kirchen/ desse verwaltend
 Haupt ich dich verordnen wil/ vorstehn/ daß
 bis an den Jüngsten tag nit zergehn/ noch von
 einigen feinden gar vndertrückt werden sol
 Dann ob gleich wol jezund auff disen tag/ vnd
 von der stund meiner Himmelfart/ bis zum Jüng
 sten tag/ jñer ohne vnderlaß sich Gottlose leu
 finden werden/ so nit allein dich vnd deine Nach
 kömmling als das Verwaltend Haupt/ sondern
 auch mein ganze Kirchen verfolgen werden/ so
 soll doch ihnen nimmermehr gestattet werden
 dieselbigen gar vnderzetrücken vnd vertilcken
 Das wirdt wol geschehen/ Daß mein Schiff
 sincken/ aber nimmer mehr vertrincken wirdt
 Selig aber seynd die jenigen/ so bis an das ende
 verharren werden.

Kyrch Chri
 sti bleibe biß
 an den Jüng
 sten tag/ vol
 gendts E
 wlg im Him
 mel.

Vnd disem allem ist hiemit nichts benummen/ daß Petrus hernach/ nach diser verheissung Christi/ gefallen/ vnd ihne zum dritten mal verleugnet hat: Dann noch domaln Christus/ sein Kirchen weder auff Petrum noch sein bekantnuß gebawen/ sonder allein versprochen hett/ hernach erst/ nach der verleugnung Petri/ nach der Auferstehung Christi/ kurz vor seiner Himmelfart/ ist solchs geschehen/ do nämlich der Herr Petrum zum dritten mal gefragt/ Ob er ihne lieb habe/ vnd ihne zum dritten mal seine Schaf vnd Lemmer (nit nur etliche/ sonder alle/ spricht der H. Bernardus) zu weiden beuolhen hat.

Uelendung
d vermehus
ten Ehre
de/der Ne
wächristen.

Joan. 21.

Lib. 2. de Cō-
fid. ad Euge.

So ist auch darumb der Primas Petri vnd seiner Nachkömmling nit gefallen/ seitemaln/ etwann diser oder jener Papst/ für sein Person möchte in Sünd/ etwann in Keckerey oder Vnglauben gerathen seyn. Dann hiemit nit das Ampt/ sonder die Person/ welche auch sündigen vnd irren kan/ gesündigtet vnd gejrrret/ hat aber darumb solche Sünd vnd irrthumb/ der Kirchen/ als ob es nit Sünd noch irrthumb sey/ nachzuolgen nit angemutet/ vil weniger beuolhen oder gebotten/ ja nit weder beuelhen noch gebieten können. Also ein Burgermeister do er sündigtet/ sündigtet sein Person vñ nit sein Ampt/ ist derhalben die Person vnd nit sein Ampt strafflich. Vnd do er es zu grob mache/ auch die Burger schafft auff seine mißrettung/ Sünd/ vngesorsam vnd dergleichen ziehen wolt/ so soll er abgesetzt/ aber darumb das Burgermeister Ampt nit

Die ander
vermeinte
Ehrede.

Ein Exem-
pel.

nit verworffen/ sonder einem anderen/ so hier zu taugenlich ist/ vberantwortet werden. Hieruon zu seiner zeit außfürlich.

Schlüssel
der Himmeln
werden Pe-
tro verspro-
chen.

Marth. 18.
Joan. 20.

Lösen sollen
die Priester.

Binden sol-
len die Prie-
ster.

Die ander verheiffung Christi Petro geschehen/ ist dise: Vnd dir wil ich geben den Schlüssel der Himmeln: Vnd alles was du binden wirst auff Erden/ soll auch gebunden seyn in den Himmeln: Vnd alles was du lösen wirst auff Erden/ soll auch loß seyn in den Himmeln. Wiewol alle Bischouen vnd Priester/ vnd nit nur Petrus sampt seinen Nachkömmlingen den Bischouen zu Rom zu binden vnd lösen von Christo gewalt empfangen haben/ nämlich/ durch das H. Sacrament der Pusz in der Absolution lösen sie vnd sprechen den Menschen ledig aller bereyten vnd gebeichterten Sünd/ alda auch diß fürnemen ist das loben zu bessern vnd frumb werden: Die vnbereyten vngebeichterten Sünd aber/ darüber man nit Reu vnd leit hat/ dauon man nit abstecken wil/ die löset man nit/ sonder bindet sie: Vnd jene seynd auch vor GOTT gelöset/ vnd dise gebunden: So hat doch Petrus alda/ als ein vberwaltends Haupt vnd Stathalter Christi/ eintheils/ ein mehrere verheiffung als andere Apostel/ Bischouen vnd Priester. Dann sonst nem wie Petro/ in sonderheit/ sonder allen mal diser gewalt geben ist worden/ Auch nit mit Petro in Himmeln/ sonder im Himmel. Vnd das noch mehr/ vnd hieher dienstlicher ist/ hat er zu keinem Jünger in sonderheit/ als wie zu Pe-

tro zum drittē mal gesagt: Beide meine Schaf/
weide meine Lämmer. Wirdt derhalben vnbil-
lich gesagt: Petrus habe vom Herren nit meh-
rern gewalt/ vnd besondere Priuilegien für an-
dere Apostel empfangen/ wie wir dan mitler zeit
aufsürlich erweisen/ jekund aber dise Predigt/
seitern sie ihr gebürliche leng albereit erreicht/
beschliessen wölle/ weil wir nach vnserm verspre-
chen in disem andern Theil gehört: Wer vnd
was Petrus seye/ Was ihme alda von Christo
für ein verheiffung geschehen sey.

Nun behalten wir auß dem ersten Theil ge-
hörter Predig diß Merckpunctlin für andere: diser Pre-
Das nämlich ein jeder Mensch auß diser Be-
kännuß zu vnd von Christo/ Du bist Chris-
tus ein Sohn des lebendigen GOTTES/
leben vnd sterben soll/ vñ vns nichts dauon las-
sen abwendig machen/ nach dem Exempel der
zweyen Apostel Petri vñ Pauli/ deren Fest vnd
Feyertag wir auß heut halten: welche beide auch
auß diser Bekännuß gelebt/ gemartert vñ getödt
seynd worden/ vnd zwar allbeid an einem tag zu
Rom. Petrus/ nach deme er der Kirchen zu An-
tiochia sibē Jar/ der zu Rom aber/ als ein gemei-
ner Hirt/ fünff vnd zwenzig Jar vorgestanden/ Petrus
wurde gecreuziget/ also/ daß er mit dem haupt ^{wirdt ge-}
zur Erden hienge/ dann er achtet sich vnwürdig ^{creuziget.}
mit Christo seinem Herrē auffwerts zu hangen
vnd zu sterben: sein heiliger leib ward von seinen
zweyen Jüngern/ Marcello vnd Apuleo ab dem
Creuz genommen/ vnd in Vaticano begraben.

Paulus
wirdt ent-
hauptet.

Heiligtum
Petr und
Pauli zu
Rom.

Gregorius
11. diser zeit
Papst.

Paulus aber/ nachdeme er vil geprediget/ weit
gereiset/ vil leut bekert/ zu Philippis mit Nuten
geschlagen vnd in kercker gelegt/ auch bey den
füßen an ein Holz gehefft/ zu Nystris gesteinigt
zu Iconio vnd Thessalonica von seinen Mä-
gönern verfolget/ zu Epheso für die wildē Thier
geworffen/ zu Damasco in einem Korb ober die
maur abgelassen/ zu Jerusalem geschlagen/ ge-
bunden vnd geschmecht/ ist endlich vnder Ma-
rone vor der Stadt Rom enthauptet worden
alda noch die drey Brunnen zu sehen/ so in
der Marter auß der Erden entsprungen/ da
Haupt drey sprüng gethon/ (welche auch ich selb-
sten gesehen hab im 72 Jar) vnd noch starck
sehen/ ist in S. Ostiensis begrabē worden. Kurtz
jedund allbeider leib vnd Heiligtumb zu Rom
bey S. Petro in der kleinen Capell vnder einem
Altar. Vnd diß alles haben sie darumb gelitten
daß sie bekennet haben: Christus seye des lebend-
gen GOTTES Sohn. Disen beiden/ sprich ich
sollen auch wir nachuolgen/ vnd vns von diser
Bekantnuß nit abwendig machen lassen. Sitt
ander lernen wir auch auß diser Predig: Daß
Christus nach seiner Himmelfart/ hie auff Er-
den seiner Kyrchen/ ein sichtbarlichs vnd ver-
waltends Haupt hat haben wollen/ welches da-
maln Petrus/ vnd jedund sein Nachköm-
ling Gregorius der dreyzehēde Bischove oder Papst
diß Namens/ zu Rom auff dem Stul Petri ist
deme wir in allen billichen vnd Christlichen Din-
gen gehorsam zu leisten schuldig seynd/ wollen
wir nit von Christo als Heyden vnd Publica-
nen

nen gehalten werden. Hierauff wollen wir zu
GOTT vnserm Himmelschen Vatter also bit-
ten vnd betten:

GOTT Himmelscher Vatter/ Gebettlin zu
Gott dem
Himmelschen
Vatter.
Der du/nach zeugnuß deines gelieb-
ten Sohns vnser Herrs IESV

Christi/ Simoni sein Herrs dermassen er-
leuchtet hast/ daß er hat glauben vnd mit
dem Mund bekennen mögen: Christus/
ja IESVS von Nazareth/ seye nit nur
MARIAE/ sonder auch der versprochne
Messias/ vñ dein Natürlicher Sohn/ de-
rowegen dann auch dein Sohn/ ihme die
Schlüssel der Himmeln verheissen/ vnd
volgendts als sein verwaltendes Haupte
vñ gemeinen Hirten seiner Schästlin vnd
Läster verordnet hat: Vnderthenig bit-
ten wir dich/ du wöllest auch vnser Herrs als
so erleuchtē/ daß wir mit Petro/ Christum
deinen Sohn seyn/ bis an das ende erkens-
nen/ auch ihne Petrum vnd seine Nach-
kömmling für ein Verwaltends

Haupt seiner Kyrchen bekenn-

nen/ vnd also selig wer-

den mögen/

Amen.

¶ 3 Am

Am Fest der Heimsuchung der
 Seligen Junckfrauen M A:
 RIAE/ Euangelium Luc. j.

Am 2. tag
 Julij.



In der zeit/ Stunde M A:
 RIA auff in denselbigen
 tagen/ vnd gieng eilende
 auff das Gebirg/ in ein
 stadt Juda/ vnd kam in
 das hauß Zacharie/ vnd
 grüßet Elisabeth. Vnd es begab sich/ als
 Elisabeth den gruß M A R I A E hörte/
 sprang das kind in ihrem leib mit freuden
 auff/ vnd ward vol des heiligen Geistes/
 vnd rieß herauß mit grosser stimme/ vnd
 sprach: Gebenedeiet bistu vnder den weis
 bern/

bern/ vnd gebenedeiet ist die frucht deines
 leibs. Vnd wazer kompt mir das/ das die
 Mutter meines Herren zu mir kommet?
 Dañ sihe/ so bald die stuß deines grusses in
 meinen ohren erschollen ist/ da ist auffge-
 sprungen mit freuden das kind in meinem
 leibe. Vñ selig bistu/ die du geglaubet hast/
 daß es wirdt volbracht werden/ was zu dir
 gesagt ist von dem Herrē. Da sprach MA-
 RIA: Mein Seel machet groß den Her- Esa. 61. 6
 ren/ vnd mein Geist hat sich erfreuwet in
 GOTT meinem Heiland. Dañ er hat an-
 gesehen die demut seiner magd. Dann si-
 he von disem nun an/ werden mich selig sa-
 gen alle Geschlecht. Dann er hat grosse
 ding an mir gethan/ der da mechtig ist/ vñ
 sein Name ist heilig. Vñ sein barmherzig-
 keit weret von eim geschlecht ins ander/ bey
 denen die ihn fürchten. Er hat gewalt er-
 zeigt mit seinem arm/ vnd zerstrawet die 1. Reg. 2. 6
 da hoffertig seynd in ihres herzen gemüt. Ecc. 10. 8
 Er hat abgesetzt die gewaltigen von dem
 stul/ vnd erhaben die demütigen. Die hun-
 gerigen hat er mit gütern erfüllet/ vnd die
 reichen leer gelassen. Er hat auffgenom-
 men seinen diener Israel/ vnd gedacht seiner
 barmherzigkeit. Wie er geredt hat zu vn- Gen. 21. 6
 sern vättern/ Abraham vnd seinem samen
 ewiglich. Vnd MARIA blieb bey ihr/ bey

drey Monaten/ darnach keret sie wider
umb heim in ihr hauß.

Mein Seel machet groß den Herren/ vñ
mein Geist hat sich erfreuet in GOTT
meinem Heiland. Luc. 1.

Bis heut halten wir Catho-
lische Christen/ das herrlich Fe-
st vñ Feyertag der Heimsuchung
der aller heiligsten Junckfrawen
M A R I A E/ nit daß sie auff heut von

jemandts heimgesucht sey worden/ sonder/ daß
sie vber das Gebirge gangen/ vñ Elizabetham
ihr Nuñnen oder Basen heimgesucht vñ gegrü-
set hat/ vñ diß am allermeisten auß volgender
Ursach: In den jenigen Worten so disem heuttigen
Euangelio vorgehn/ bezeugt vns der H. Euang-
gelist Lucas: Daß der Erkengel Gabriel/ auß
beuech G O T T E S/ zu der H. Junckfrawen
M A R I A E kómen vñ verkündiget habe/ daß sie vom
H. Geist empfahen vñ einen Sohn geperen wer-
de: vñ auff daß sie hieran desto weniger zweifeln
(wie sie dan nit gezweifelt/ sonder den Worte des
Engels glaubt hat) desto mehr aber sich erfreu-
wen solt/ verkündiget ihr d' Engel auch/ Daß Eli-
zabeth/ des H. Zacharie haußfraw/ so albereit all-
rñ vnfruchtbar war/ von Zacharia empfangen
vñ nun ein halbes Jar schwanger gehe. Disß
alles was sie vom Engel gehört/ auch ihr freud
daß sie vom heiligen Geist empfangen hett/ sich
auch mit Elizabeth/ wegen ihrer empfeng-
niß zu freuwen/ ihr auch in der Kindelbeth zu
dienen/

Ursach/
warumb
Maria E.
Elizabetham
heimgesucht
hat.

dienen/ist die H. MARIA auff heut vber das Gebirg zu ihrer Nummen oder Basen Elisabeth gangen/vnd sie gegrüßet/diß alles/wie jekund gemeldet/auß grosser frewd verkündiget.

Was dann nun dise beide/die Junct fraw vñ Ehfraw/so beide vbernatürlich schwanger waren/jene ohne einen Mann/dise von einem Mann aber doch in ihren alten tagen vnd vnfruchtbarkeit/als sie zusammen kommen/gethon/vnd mit einandern geredt haben/wollen wir jekund (so vil der Euangelist beschriben vnd die zeit diser Predig vergönnen wil) lehren vnd hören. Vnd **Thellig vnd im ersten Theil: Was Elisabeth zu MARIA ge- Inhalt diser Predig.** sagt. Im andern: Was MARIA zu Elisabeth von GOTT verkündiget. Diß alles wöllet ihr mit gedult/ernst vnd andacht auff das kürzest vnd leichtest anhören. MARIA die H. Mutter GOTTES/wölle hierzu bey ihrem Kind vnser Fürsprecherin seyn ꝛc.

L He daß wir können zum gesprech/so die H. MARIA vnd Elisabeth mit einandern gehalten/müssen wir zuuor die vorgehende wort des H. Euangelisten/vnd anfang diß heutigen Euangelij/erwegen: In der zeit/Stundt MARIA auff in denselbigen tagen ꝛc. Die vrsach/darumb Papst Urbanus/dises Namens der sechste/gemeltes Fest auff Anno 1388. heut/nämlich auff dem andern tag des Heymo- Urbanus der sechste/ nats/zu feyren (wiewol es nit allenthalben zu hat diß Fest zu feyren feyren gebottē wirdt) verordnet habe/ist mir nit eigentlich bewust: glaube aber/daß solchs nit verordnet.

† 5 ohne

ohne sonderliche vrsachen geschehen sene / seit
 maln sich doch / gehörtes Euangelium nit auff
 heut / sonder (so vil möglich zu finden) am vierten
 tag des Apriln verlossen hat. Am fünff vñ zwöl-
 figsten tag des Merzen / ist der Engel Gabriel
 MARIA gen Nazareth komen / vñ ihr den Gruß
 verkündiget / auff welche verkündigung als bald
 der Euangelist spricht : MARIA stundt auff
 in denselbigen tagen / nämlich do sie diesen
 Gruß vom Engel gehört hatt / am zehenden tag
 hernach stundt sie auff / vnd kam zu Elizabeth
 Dann do sie erst auff heut solte auffgestanden
 vnd zu Elizabeth kommen seyn / wurde sie ge-
 wisslich Elizabetham in der Kindelbeth gefun-
 den haben / seitemaln es iekund der vierte Mo-
 nat ist das MARIA vom Engel gehört Elizabeth
 sene schwanger / vnd war domaln albereit sechs
 Monat gewesen / das sie vom Zacharia empfan-
 gen hat : als aber MARIA zu Elizabeth kom-
 men / sage Ioannes nit in der Wiegen / sonder
 hupffet auff in seiner Mutter leib. Auff heut aber
 trifft es zu / das MARIA widerumb von Eliza-
 beth geschiden vnd gen Nazareth gangen / dann
 sie drey Monat bey ihr gebliben. Aber darauß
 gar nichts gelegen / das diß Fest auff heut / vñ
 auff den vierten tag des Apriln / gehalten wirdt.
 Diß habe ich allein diser vrsach gesagt / weil
 anfang diß heutigen Euangelij spricht / In den
 tagen / das man beyseuffig wissen möge / in wel-
 chen tagen / nämlich als MARIA den Gruß
 vom Engel gehört hette / Stundt MARIA
 auff

Was Ma-
 ria zu Eliza-
 beth gangen.

auff/ zu Nazareth/ von dem ort alda sie ohne zweifel gebettet/ GOTT den Allmechtigen gelobt/geehrt/geprisen/vmb alle empfangne Gutthaten gedanckt/vmb alles was ihr zu leib vnd Seel von nöten/ gebetten/ vnd darauß den Gruß des Engels angehört hett. Vnd gieng eilends auff das Gebirg/in ein Stadt Juda/ vnd kam in das hauß Zacharie/ vnd grüßet Elizabeth. Die H. Euangelisten schreiben mehrmals/ daß der Herr mit seinen Jüngern hinauff gestigen seye gen Jerusalem/ Wie er selbst auff ein zeit zu ihnen gesagt: Sibe/ wir gehen hinauff gen Jerusalem &c. Darauß zu lernen: Daß Jerusalem auff der höhe auff einem Gebirg gelegen ist/ vnd Nazareth im Thal/ der vrsach mußte vnd wolte auch auff heut die liebe MARIA auß Galilea in Judeam vber das Gebirg gehn/ in ein Stadt Juda. Wie dise Stadt Juda/ darinnen Zacharias vnd Elizabeth gewohnet/ geheissen/ hat der Euangelist nit angezeigt/ ist derhalben so gar eigentlich nit bewußt. Die Pilger so im heiligen Land gewesen/ sprechen/ dise Stadt seye zwischen Jerusalem vnd Bethlehem gelegen/ vnd das hauß Zacharie/ seye hernach zu einem Spital oder zur solchen wohnung gemacht wordē/ dareyn die Pilger/Fremdling/ arme vnd francke leut cyngenommen seynd worden. Disen stimmen gnugsam vberlein/etliche vnder den Lehrern/so vermeynen/ dise Stadt seye Hebron gewesen/ welche/ als Egesippus vnd Josephus bezeugen/nit weit von Jeru.

Matth. 20.

Mar. 10.

Luc. 18.

Jerusalem

auff einem

Gebirg ge

legen.

Wohn

Maria

gangen sey.

Egesipp. lib. 5.

cap. 23.

Joseph. lib. 7.

c. 8. & 7.

Genes. 23.

Genes. 23.

2. Reg. 2. 5.

3. Reg. 2.

Zacharias
ein Priester.Marta gleg
ellendis.

Jerusalem gelegen / welche Stadt sonsten auch Kiriath Arba / vnd Mamre genennet ist worden / alda Sara gestorben / Alda David zum König gesalbet / vñ sieben jar daselbsten geregirt hat. Es ist aber auch hieran nit vil gelegē / dise Stadt sene Hebron oder ein andere gewesen: gewiß ist das MARIA in der Jüdischen Stadt eine auß dem Berg gangen ist / vnd das Zacharias der Priester des alten Testaments nit weit von Jerusalem gewohnet hat / seitemaln er den Gottesdienst / wann die zeit an ihn kommen / daselbsten verrichtet hat.

Wie sich aber MARIA auff der Reise von Nazareth gen Hebron / oder an das jenig ort / alda Zacharias vnd Elizabeth gewohnet / verhalten habe / lehret vns der Euangelist auch / vñ spricht: Sie gieng eilendis / das ist / behend vnd geschwind jimmer ohne verzug stracks fort / stellet sich nit ein halbe stund hieher / dan ein stund dorthin: gaffet nit jekund in dis / dan an ein anders ort: zellet nit jekund dise Heuser / dan jener ließe jedermann schaffen vnd handlen ihr geschafft / gieng sie auch iren wege jimmer fort / stellet sich nit jekund an disen / bald an einen andern schnattermarck: war nit fürwichtig alle ding zu sehen vñ wissen / was sich vnder wegen jekund alda dann dort verlossen hat / sonder / darumb sie außgangen ist zu Nazareth / nämlich Elizabetham ihr Freundin zu grüssen / darumb vnd also ist sie jimmer fortgeloffen / (dann allein was die zeit vnd notturfft / zu essen vñ trincken erfordert hat sie geruhet / seitemaln sie / als abzunehmen

vber die zwenzig Meil/der selbigen Lands art/ge-
reiset) biß sie zu Elizabeth kommen ist.

Etliche Merckpunctlin lernen wir Christen Etliche leh-
aus diser behenden Reiß der H. Junckfrauen ren von Ma-
MARIA. Erstlich/ Daß sie gewißlich dise Reiß/ ria.
nit auß eigener anmutung/ vil weniger auß für- Auß anre-
wik oder vergebenlicher vrsach/ sonder auß an- gung des H.
reizung vnd anleitung des H. Geists/ desse sie Geists hat
vol gewesen/ fürgenommen vnd volbracht hat: Maria sich
vnd sich also nit abschrecken lassen/weder die wei- diser Reiß
te des weges/ weder das hohe vnd vnebne Ge- vnderfangē.
birg/ weder vngewitter/ noch andere gefahr/ so
ihr sonsten hetten begegnen mögen. Also sollen Don Ma-
auch wir Catholische Christen/ auff das baldest ria ternen al-
vnd vleißigest zu volbringen/ nit vnderlassen le Christen.
das jenig/so vns eintweder von GOTT zu thun
geoffenbaret/ oder sonsten in H. Schrift/ oder
in den H. Concilien gebotten ist/ oder auch das
jenig so wir vns selbstn GOTT damit zu die-
nen aufflegen/ es seye Wallarten gehn/ fasten
oder dergleichen Gottesdienst: auch nit angese-
hen/ daß der Teufel/ das Fleisch/ die Welt/ das
Gelt vnd Mund Christen vns hieruon abwien-
dig zu machen ohne vnderlaß ihren möglichen
vleiß ankeren/ vnd beschliessen also andern das
Himmelreich/ dareyn sie doch selbstn nit kom-
men wollen.

Darumb eilet auch MARIA so sehr zu ihr Vrsach/ dar-
Freundin Elizabeth/ daß sie mit ihr von den umb Maria
Göttlichen dingen/ so sie vom Engel gehört het/ zu Elizabeth
te/reden möcht: Daß sie nämlich voller Genad kommen.
vnd der Herr mit ihr seye/ daß sie vber oder für
alle

Die ander
Lehr von
Martha.

Welcher vñ
Junctfrau-
wen sollen
von Martha
lernen.

Fürwitzige
Weiber vñ
Junctfrau-
wen.

alle Weiber gebenedeyet seye/ daß sie empfan-
gen habe vom H. Geist vnd den Sohn des aller-
höchsten geperen werde. Vnd zu disem allem ha-
be ihr der Engel auch angezeigt: Daß sie/die al-
te Elizabeth/ von GOTT erhört/ vnd vor sechs
Monat schwanger worden seye. Disß vnd des
gleichen von GOTT vñ seinen Gutthaten/ red-
te MARIA mit Elizabeth reden. Also sollen auch
wir Christen/ behends vnd gern gehen/ an die
nige ort/ alda man von GOTT/ vom WORT
GOTTES/ von Göttlichen/ Geistlichen/ züch-
tigen/ Ehrlichen sachen handelt vnd redet: Vñ
nit/ wie etlich im brauch haben/ zu solchen leuten
vnd an solche ort lauffen/ alda nur von schand-
lichen/ leichtfertigen/ vppigen dingen gehandelt
wirdt.

Zum dritten lernen von diser H. MARIA die
le Weiber vnd Junctfrauen: Daß wann es
die not erfordert/ daß sie außgehn müssen/ vñ
land/ vber die gassen/ oder in ein anders hauß
daß sie auch wie MARIA/ eilends/ behend vñ
geschwind auff der strassen vnd gassen fortgehn
sollen/ vnd eilen an das jenig ort vnd zu den
nigen leuten/ bey welchen sie zu schaffen vnd
was zu verrichten haben: sollen/ was ihnen be-
uolhen/ vleissig verrichten/ als dann ohne verzög-
widerumb zu Hauß gehn/ dem Mann/ Vatter
oder Mutter/ Herren oder Frauen anzeigen
was sie außgericht vnd geschafft haben. Disß
thund aber die fürwitzigen Weiber / vnd unge-
rathne Kinder / vnd unwillige Junctfrauen
nit/ sonder gehen auff der gassen vñ vñ wie ein
Schnecken

Schneck / stellen sich jekund alda zu disem / dann dort zu einem oder zu einer andern / schleiffen die Schären / vnd machen etwan zehen Schnattermärcft / (hierzu werden drey Weiber vnd neun Gänß erfordert) che daß nur auß einem hauß in das ander gehen / oder gaffen sonsten hin vnd wider / vnd haben ginlöffel feil / kommen auch nicht bald widerumb zu hauß / wann sie gleich ihr geschafft außgericht haben / müssen sonsten noch ein sinnd zu tallen vñ lallen haben: welches doch keiner frummen Frauen / noch züchtigen Junckfrauen wol anstehet / sonder wirdt wider solche gebraucht das gemeine Sprichwort: Man höret bald am klang / was für ein Hasen / Oder am gesang / was für ein Vogel ist. Oder / Ein Dieb zieret den Galgen wol / Ein Pfarherr den Pfarhof / Ein Mönch sein Kloster / Ein Fraw ihr hauß ic. Ein jeder Herr / Mann vnd Vatter / wirdt seiner Frauen / Weib vnd Kind / wann er auß der Predig zu Hauß kompt / vom Text wol weiter zu sagen wissen. Disß von der Reiß MARIAE. Jezund von Elizabeth.

Gemeine
Sprichwörter.

Nach deme MARIA zu Elizabeth kommen / vnd sie gegrüßet hett / hat sichs weiter also verlossen: Vnd es begab sich (spricht der Euangelist) als Elizabeth den Gruß MARIAE hörte / sprang das kind in ihrem leib mit freuden auff / vnd war vol des H. Geists. Mit was worten MARIA Elizabetham ihr gefreundin gegrüßet habe / hat der Euangelist nit angezeigt: aber nit zu zweiffen / so bald sie

Elizabeth
vol des H.
Geists.

ein

Joannes
der Tauffer
springt auff
in seiner
Mutter
leib.

Maria
tregt den
Herrē/El-
zabeth den
Diener.

Maria ist
die seligste
vnd würdig-
ste vnder al-
en Junc-
frauen vñ
Fraumen/ so
je gelebt ha-
ben.

einandern empfangen vnd umbfangen/ hat die
liebe MARIA angefangen zu erzellen/ das je-
nig/ was sie vom Engel gehört hat auß beuelch
GOTTES/von ihr vnd von Elizabeth verkünd-
get: als bald ist nit allein das junge kind Jo-
nes der Tauffer in seiner Mutter leib erfrem-
worden/ vnd ja vor grosser frewd auff-
sprungen/ sonder die Mutter ist auch erfüllt
werden des H. Geists/ vnd diß ohne zweifel alle
auß schickung vnd wirckung desse/ welchen die
H. MARIA jekund etlich tag in ihrem leib
tragen hat. Vnd billich hupffet in Mutter leib
auff/ vor der zukunfft Christi der jenig/ so
Vorlauffer Christi werden vnd seyn solt. Wel-
lich wirdt die jenig vom H. Geist erfüllet/wegen
der zukunfft MARIAE/welche den Herren/leib
aber nur den Diener im leib getragen hat: wo-
ches Elizabeth auß offenbarung des H. Geistes
gar wol gewist/ derhalben rieffet sie herauf
mit grosser stimme/ vnd sprach: Gebenedey-
det bistu vnder den Weibern/ vnd gebenedey-
nedeyt ist die Frucht deines leibs. Als wol
Elizabeth zu MARIA gesagt haben: Vnder al-
len Weibern vnd Juncfrawen so je gelebt/ so
jekund leben/ vnd noch bis zum Jüngsten tag leben
werden/bistu MARIA die Seligste/ die heiligste
vnd würdigste: Dann du/ vnd sonsten keine auß
der ganken Welt/ ist würdig/ vnd von Ewigkeit
von der H. Dreyfaltigkeit zu einer Mutter GOT-
TES außervölt gewesen. Vnd nit allein bistu
für alle Weiber vnd Juncfrawen der ganken
Welt

Welt gebenedeyet / sonder auch vnd noch vil
mehr ist gebenedeyet die Frucht / die du noch in
deinem leib tregst / vnd mitler zeit auff dise Welt
bringen wirst / welche ist Christus IESVS der
versprochne Messias / welcher nit allein dein / son- *Die fruchte
des Leibs
Marie.*
der auch GOTTES Sohn ist / welcher sein Be-
nedeyung nit von dir / sonder von Ewigkeit ge-
habt / du aber hast dein Benedeyung von ihme
bekommen.

Das aber Elizabeth auß eyngebung vnd of-
fenbarung des H. Geists / mit welchem sie nun
erfüllet / gewist habe / das MARIA / GOTTES
Sohn empfangē / in ihrem leib trage / vnd auff
dise Welt geperen werde / ist einem jeden leicht-
lich auß disen worten zu lernen : Vnd woher
kumpt mir / das die Mutter meines Her- *Maria ein
Mutter des
Herren.*
ren zu mir kommet ? Vnd solchs bestetiget
vnd erweist sie auch mit ihrem kind / welches in
ihrem leib auffgehupffet sey / vnd spricht ferner :
Vnd selig bistu / die du glaubt hast / dann es
wirdt volbracht werden / was zu dir gesagt
ist von dem Herren / nämlich durch den En-
gel Gabriel / das du vom H. Geist empfahen /
vnd den Sohn des aller höchsten geben wer-
dest. Vnd da du nit glaubt hettest / würdest du so
wenig als mein Zacharias von GOTT ohne ge- *Luc. 1.*
strafft gebliben seyn. Vnd dis von der Keiß MA-
RIAE vnd der H. Elizabeth / sonsten wurde diser
erste Theil / vnd volgendts die ganze Predig zu
lang werden. Tzund wollen wir auch von der
H. MARIA vnd ihrem lobgesang zu GOTT / so
nach

nach dem anfang desselbigē das Magnificat ge-
nennet wirdt/ so vil die zeit einer halben Predig
leiden vnd vergönnen wirdt/ handeln/ als dann
Eurer Andacht GOTT beuelhen.

MEs MARIA/ die H. Jungfraw vnd
Mutter GOTTES/ vermerck: Das
GOTT der H. Geist/ der H. Elizabeth
albereit geoffenbaret/ daß sie den Sohn GOT-
TES empfangen vnd geberē solt/ wolte sie solchs
auch lenger nit heimlich halten/ sonder selbsten
bekennen/ vnd daneben GOTT also dancken/ be-
ben/ ehren vnd preisen: Mein Seel machet
groß den Herren/ vnd mein Geist hat sich
erfreuwet in GOTT meinem Heiland.
Dis heilig lobgesang das Magnificat/ hat die
zeit nit wenig Feind/ gleich wie MARIA selbsten
so dis lobgesang gemacht/ auch vnder den jenn-
gen so sich doch Christen nehen dörfen. Erstlich
gefelt ihnen nit das aller erste wort/ Magnificat
nämlich: Mein Seel machet groß den Her-
ren/ vnd sprechen: Wo vnd wie MARIA sampt
ihrer Seel/ vnd allen ihren krefftē/ den Herren
Christum oder GOTT den Himmelschen Vate-
ter groß machen köne/ seitemaln er doch so groß/
herrlich/ gewaltig vnd mechtig/ daß er gröffer/
herrlicher/ mechtiger vnd gewaltiger nit sein
künde: er bedörffe der großmachung MARIAE/
auch der ganken Welt nichts. Ja MARIA vnd
wir Menschen alle/ werden von ihme/ vnd nit er
von vns groß gemacht. So sene Christus/ als die
Frucht MARIAE/ nit von der Mutter/ sonder ih-

Lobgesang
Marie zu
Gott.

Narrische
Zynrede
der Neuen
Christen wi-
der das Ma-
gnificat
Marie.

leib vom kind gebenedeyet / Selig vnd heilig worden zc. Disß alles vnd der gleichen / lieber Christ / ist eigentlich nichts anders / dan nur ein Wortzank / oder ein Wortkrieg / so von etlichen Halb-Christen vnd MARIAE Feinden / wider vns Catholicischen auff die ban gebracht wirdt / seitemaln sie sonst nichts wichtigs wider vns vnd die H. MARIAM (auff daß sie die Anruffung vñ Fürbitt der Heiligen vernichten möchten) fürbringen könden. Dann / wer nit Kalck hat / der muß mit Laim mauren.

Halb Christen dieser Zeit.

Es ist nit weder der will noch meynung MARIAE gewesen: Daß sie könde oder wölle den Herren / weder Christum / den sie domaln in ihrem leib getragen / noch GOTT den Vatter / welcher ihr kürzlich zu vor (sampt dem Sohn / vnd H. Geist) den Engel Gabriel gesandt / groß vnd mehr machen / dann er zu vor gewesen sey vnd in Ewigkeit bleibt. Nein / Sonder GOTT den Herren (man verstehe alhie gleich Christum den Herren / oder GOTT den Vatter / oder alle drey Personen in einer Gottheit) der von Ewigkeit / ohne jemandts hilff oder großmachung Groß / ja der aller größest / der aller gewaltigest vnd Mechtigest gewesen ist / vnd derselbige ohne vnser hilff vnd hinzu thun / ohn ende in Ewigkeit bleibt / denselbigen will MARIA von vnd auß grund ihres Herzens vnd allen krefften / als den Größten bekennen / loben / erheben / ehren vnd preisen / für den Größten im Himmel vnd auff Erden halten. Dissem nit vngleich hat vns Christus der Herr selbst im heiligen Vatter

Meynung Marie.



Matth. 6.

Luc. 11.

Der Name
Gottes in
Ewigkeit
heilig.Der Will
Gottes ge-
schicht.Martha ver-
halte dich
der heiligen
Schrift ge-
mäß.

ter Unser also gelehrt betten: Geheiligt wer-
de dein Name. Nun wissen wir Christen alle
wol: Daß der Name GOTTES in vnd für
sich selbst so heilig ist / daß er heiliger nit
seyn köndte / geschwigen daß er erst von vns / vnd
durch vnser bitten vnd betten / köndte heiliger ge-
macht werden. Dennoch will Christus von vns
haben / wir sollen täglich sagen: Geheiligt wer-
de dein Name. Darumb / daß der Name GOT-
TES / so von Ewigkeit heilig gewesen / vnd in
Ewigkeit heilig bleibt / wir bitten betten / oder
bitten vnd betten nit / auch von vns geheiligt
get / gelobt / geehrt vnd gepriesen werde / vnd
erst von neuwem von vns heilig oder noch heiliger
gemacht werde. Also müssen wir auch sagen:
Dein Will der geschehe / gleich wie im Him-
mel also auch auff Erden. Der Will GOTTES
in sich selbst geschieht jeder zeit / im Himmel
vnd auff Erden. Vnd GOTT thut was er will
im Himmel vnd auff Erden / auch ohne vnser
bitten vnd betten. Allda bitten vnd betten aber
wir / vmb hilff vnd Gnad GOTTES / daß auch
wir Menschen / die wir noch auff Erden leben
den Willen GOTTES / den beuelch vnd Gebot
GOTTES volnbringen / warnemmen vnd hal-
ten mögen / also daß auch sein Will in vnd von
vns geschehe.

Zu demie so hat MARIA hterinnen / der heiligen
Schrifte vñ ihrem Vatter dem H. Könige
lichen Propheten David nachgeuolget / der
allen Glaubigen also gesagt: Magnificate Do-
minum mecum, & exaltemus nomen eius in
idipsum

in ipsum. Machet groß/ lobet/ ehret vnd preise Psal. 33.
 mit mir den Herren/ vnd lasset vns mit einan-
 dern seinen Namen erhöhen. Anderstwo sage
 der H. David von vnd zu sich selbst hiernon al-
 so: Lobe den Herren mein Seel/ vñ was in mir Psal. 103.
 ist/ seinen heiligen Namen. Lobe den Herrē mein
 Seel/ vnd vergiß nit was er dir guts gethon hat.
 Vnd: Ich wil den Herren loben alle zeit/ sein lob Psal. 34.
 soll immerdar in meinem Mund seyn 2c. Dar-
 umb vnd also spricht auch die H. MARIA auff
 heut zu Elizabeth: Mein Seel machet groß
 den Herren. Das ist/ Mein leben/ oder die
 Seele so meine gliedmassen im ganzen leibe/ vnd
 was darinnen lebet/ regieret/ die erhebet/ lobet
 ehret vñ preiset den Herren. Vnd mein Geist
 hat sich erfreuwet in GOTT meinem
 Heiland. Das ist/ Mein vernünfftige Seel/
 mein gang erkentnuß/ damit ich GOTT erken-
 ne/ neben allen inwendigen bewegungen/ welche
 der H. Geist in mir erwecket vnd erreget/ die tan-
 ket/ hupffet/ springet vñ triumphiret in meinem
 leib/ vnd wil mir für grosser frewd zum Mund
 auß faren / also erfreuwet sie sich / nit ab diser
 Welt/ nit in weltlicher frewd/ nit in dem Welt *in weme*
 vnd Gut diser Welt/ nit in essen vñ trincken/ nit *sich Maria*
 in Hoffart vnd vbermut / sonder in GOTT *erfreuwe.*
 meinem Heiland.

Dis ist der Syngang vnd anfang dis Lobge-
 sangs MARIAE zu GOTT. Im folgenden
 Spruch oder Vers zeigt sie die vrsach an/ dar-
 umb sie GOTT also zu loben bewegt vnd genö-

**Maria ein
demütige
Magd des
Herren.**

**Undanck-
barkeit der
Christen ge-
gen Gott.**

**Ursach der
Straffen
Gottes.**

tigt werde/ vnd spricht: Dann er hat angese-
hen die demut seiner Magd 22. Hieruon kan
dihmal zeit halber/ vnd vorhabender Predig ge-
bürllicher leng wegen/ weitleuffiger nit gehand-
let/ sonder muß biß zur gelegnen zeit auffgeschre-
ben werden. Aber zum Beschluß diser Predigi
wollen wir noch dise zwei lehren auß obgemelten
worten **MARIAE**/anhören/ mercken/ behalten
vnd vnser leben hiernach richten. Als **MARIA**
vom Engel gehört/ daß sie **GOTT** würdig ge-
achtet ein Mutter des Herren seyn/fahet sie an
GOTT loben/ ehren vnd greifen auß gantz
ihrer Seel/ krefft vnd vermögen/ Ja so
sehr/daß ihr Geist gänglich **GOTT** zu loben er-
hebt ist worden. Wir Christen empfahen teglich
vil vnd manigfaltige Gutthaten von **GOTT**
ja alles was wir seynd vnd haben/ gehabt ha-
ben/vnd noch bekommen/ das seynd vnd haben
wir von **GOTT**: vnser aber seynd gar wenig
die solchs ernstlich erwegen/ noch weniger die
GOTT/wie sie schuldig seynd vnd billich solten
lob vnd danck darumb sagen/ vnd **GOTT** die
Ehr geben. Darumb wirdt **GOTT** zuzeiten vnd
mehrmaln verursacht/vns/nit zu geben das je-
nig so wir auch zur auffenthaltung des leibs vnd
lebens bedörffen/ sonder lasset vns etwan ein
zimlich lange zeit/ in angst vnd not/ hunger vnd
kummer/ armut vnd franckheit stecken: welches
nit geschehe/ do wir mit der **H. MARIA**/ **GOTT**
vmb die empfangnen Gutthaten vleissig danck-
ten/vnd vmb anders so vns von nöten/ernstlich
anhielten.

Zum andern lernen wir von der H. MARIA:
 Daß sich vnser Geist/ vnser Seel/ vnser Herz/
 Gemüt/ Sinn/ Verstand vnd Gedancken/ vn-
 ser ganker Leib/ alle krefftten vnd vermögen/ freu-
 wen sollen in dem jenigen/ so vns zu Leib vñ Seel
 nützlich vnd nötig ist. Ja in dem jenigen/ so vns
 Leib vnd Seel immer vnd Ewig selig machen
 kan: nämlich sollen wir vns erfreuen in Chri-
 sto vnserm Heiland/ der kan vns hie erhaltē vnd
 dort selig machen. Wer disen Heiland hat/ der
 hat gnug/ ob er schon sonstens nichts hat. Vnd
 wer disen nit hat/ der hat nichts/ wann er gleich
 anders alles hat. Etliche leut erfreuen sich in
 ihrer Reichthumb/ grossen Gelt vñ Gut/ Haus
 vnd Hof/ Wisen vnd Acker: welches ihnen doch
 GOTT heut geben/ morgen widerumb nehmen
 kan: welches ihnen doch die Dieb stelen/ das
 Feuer verzere/ das Ungewitter vmbbringen
 kan/ oder doch zur stund des tods verlassen müs-
 sen/ vnd nehmen nichts mit ihnen/ ja nit gern
 gibt man ihnen ein zimlich vnd ehrlichs Leich-
 tuch/ man bestattiget sie nit nach Christlichem
 brauch zur Erden/ nit angesehen/ daß Gelt vnd
 Guts gnug vorhanden ist/ vnd muß vber diß al-
 les auch die seel erst erwartē wo sie vom gerech-
 ten Richter hin geschafft wirdt. Dañ diß wahr/
 vnd ein mal gewiß ist/ daß das Gelt mehr maln/
 do es mißbraucht vnd zu geizig behalten wirdt/
 ein vrsach der verdammuß ist. Etliche andere er-
 freuen sich in ihrer gesündtheit/ jungen/ schö-
 nen/ starcken Leib/ vnd gedencen nit/ daß wol so
 vil Käiberhäut als Rühaut gen marckt gebrache
 werden:

Worinnen
 sich vnser
 Seel erfreu-
 wen soll.

Vergeblliche
 freud.

Ein gesun-
der werde
bald franck.

Hoffart hat
auch bald
ein ende.

werden/erwegē nit/das̄ einer heut gesundt/mo-
gen franck/heut franck/vñ morgen todt ist: heut
schön / morgen aussesig / heut gerad / morgen
krumb vnd lamb/ein wochen gesundt / dann er
wan ein gankes Jar franck. Dise erfreuwen sich
auch nit in ihrem Heiland. Andere erfreuwen
sich in Hoffart / schönen Kleidern / in grossen
weltlichen Ehren/in grossen Titeln vñ Namen
in grosser Kunst vnd Gunst / in spilen / Jagen
essen vnd trincken / in kriegē vnd dergleichē / we-
che ding doch alle zeitlich vnd zergenclich seyn.
Welchem GOTT solche ding oder dergleichē
für einem andern vergōnt hat / der solle sich der
selbigen mit danck sagung / messig vnd nach
turfft gebrauchen / vnd nit mißbrauchen / noch
sein endliche hoffnung vñ frewd darauff setzen.
Dann ein solcher Mensch wirdt betrogen von
seiner hoffnung vnd frewd / die nit Ewig / sonder
nur zeitlich ist / darumb / seitmaln er sich nit
vber den Weltlichen vnd zergenclichen vnd nit
vber den Himmelschen vnd Ewigen dingen
freuwet hat.

Die H. MARIA hat sich recht / vñ im rechten
erfreuwet. Mein Geist / spricht sie / hat sich er-
freuwet nit in zeitlichem oder zergenclichem
sonder in GOTT meinem Heiland / der
die Ewige frewd vnd Seligkeit selbstē ist / we-
cher Heiland vnd frewd ohn ende ist. In diesem
Heiland Christo / sprich ich / lieben Christen / laß
set vns auch erfreuwen / all vnser frewd / hoff-
nung vnd trost / all vnser wolart / heil vnd selig-
keit auff ihn setzen / in solcher frewd Catholisch
glaube

glauben/ Christlich leben/ so werden wir auch
 immer vnd Ewig erfreuwet/ vnd mit MARIA
 sampt allem Himmelschen Heer selig werdē. Hier-
 auff wollen wir/ zum Beschluß diser Predig zu
 GOTT dem Himmelschen Vatter also betten:

GOTT Himmelscher Vatter/ Gebett zu
Gott dem
Himmelschen
Vatter.
 der du sampt deinem geliebten
 Sohn vnd H. Geist/ MARIA'M

die H. Junckfrauwē/ nit allein von Ewig-
 keit zu einer Mutter des versprochenē Mes-
 sie deines Sohns erwöhlet/ vnd ihr solchs
 durch den Erxengel Gabriel verkündiget
 hast/ sonder auch ihr/ der H. Junckfrau-
 wen/ durch den H. Geist geoffenbaret/ daß
 sie zu Elizabeth vber das Geping gehen
 solt/ auff daß die Empfengnuß deines
 Sohns der H. Elizabeth/ Zacharie vnd
 andern bekant würde: Stehe auch vns
 bey mit deinem Göttlichen Segen/ daß
 wir/ nach dem Exempel MARIAE/ ohne
 verzug vnd eilendts zum guten lauffen/
 vns vor GOTT vnd der Welt/ wie sie/
 demütigen/ vnd all vnser frewd in deinen
 Sohn vnsern Heiland setzen/ vnd also
 nach disem zeitlichen vnd zergenglichen
 leben das Ewig erlangen mögen. Hierzu
 wöllest du/ O heilige MARIA/ bey dei-
 nem Kind vnser Fürspreche-
 rin seyn/ Amen.

Am tag des H. Adalrici.

Am 4. tag
Julij.

Am tag Adalrici des H. Reichthü-
tigers vnd Bischoues zu Augspurg gewes-
sen/ zum theil im Costancker/ Augspurgi-
schen vnd Meynkischen Bi-
stumb feyerlich.

Adalricus
von Edlem
Stammen.

Adalricus/ desse Fest oder Fe-
ertag wir auff heut haltē/ ist zu Di-
lingen in Schwaben von Edlen
Eltern/ Hugbaldo/ vnd Dietburg
der Tochter Burchhardi des Her-
zogen in Schwaben/ geboren/ vnd als bald in sei-
ner jugent/ von seinen Eltern in das Kloster zu
S. Gallen gesandt/ darinnen er gute Künst vnd
sitten gelernet/ vnd jeder zeit GOTT gedienet hat/
zoge zu seinen Christlichen Eltern gen Dillingen/
die sandten ihn zu Adalberon Bischouē zu Aug-
spurg/ der hat ihn lieb/ von wegen seiner Tugend
vñ geschicklichkeit/ also/ da er seines raths in gro-
sen sachen brauchet: ward nach Adalberone vnd
Hiltine Bischoue zu Augspurg/ wurde nit mü-
sig erfunden/ hat gelesen oder gebettet/ oder mit
andern wichtigen sachen beladen: pfleget offter-
maln an seinem tisch die Armen zu haben/ speiset
vnd kleidet dieselbigen/ casteyet seinen leib hart/
also/ daß er kein fleisch esse/ vñ kein leinwath son-
der ein wüllens ruch an seinem leib trug/ wachet
mehrmaln im Gebett: verschiede endlich im fri-
den im drey vnd achtzigsten Jar seines alters/
da er fünffzig Jar Bischoue gewesen. Den sei-
ner Begrebnuß/ ist S. Wolfgang Bischoue zu
Regenspurg gewesen/ in Sanct Affra kyrche zu
Augsp

Anno 973.

Augsburg/ welche iehund S. Ulrichs kyrch ist/
alda GOTT anfanglich mit geringe Wunder-
zeichen volnbracht. Diser S. Ulrich wolle bey
GOTT vnser Fürsprech seyn/ daß auch wir/biß
an das ende vnser lebens Catholisch glauben/
frumb vnd Christlich leben/ Gottselig sterben/
vnd mit ihme selig werden mögen/ Amen.

Alß heut werden die Euangelien
vnd Predigen/ als an S. Wilibal-
di/ oder Martini vnd Nicolai geles-
sen vnd gepredigt zc.

Am Feyertag des H. Bischoues

Wilibaldi/ im Eychstätter Bistumb fey-
erlich/ Euangelium Marth. v. Auch wie an
der Bekerung Pauli/ Martini/
vnd Nicolai zc.

Am 7. tag
July.

In der zeit/ sprach der
Herr zu seinen Jüngern:
Ihr sendt das Salz der
Erden. Wo nun das
Salz zu schanden wirdt/
wo mit soll man dann
salzen? Es ist zu nichts mehr nuß/ dann
daß es hinaus geschütt/ vnd von den leuten
zerretten werd. Ihr sendt das Liecht der
Welt. Ein Stadt die auff ein berg ligt/
kan nit verborgen werden. So zündt man
auch nit ein Liecht an/ vnd setzt es vnder ein
Sümerin/ sonder auff einen Leuchter/ auff
daß

Mar. 9. e
Luc. 14. d

Mar. 4. b
Luc. 8. b ii. e



Matth. 5. a
1. Pet. 2. b

Matth. 3. c
2. c d
Luc. 18. d
Joan. 18. a
19. c
Luc. 16. e
Esa. 40. a

Daß es allen denen leuchte / die im hauß
seynd. Also soll scheinen euwer Liecht vor
den Menschen / daß sie sehen euwere gute
Werck / vñ preisen euwern Vatter / der in
den Himmeln ist. Bedenck nicht / daß ich
koffen sey das Gesetz oder die Propheten
auffzulösen. Ich bin nicht koffen auffzulö-
sen / sonder zu erfüllen. Ja fürwar sag ich
euch / biß daß Himmel vnd Erd zergehen
wirdt nicht zergehen der kleinste Buchsta-
be / noch ein Titel vom Gesetz / biß daß al-
les geschehe. Wer nun eins von den klei-
nsten Gebotten aufflöset / vnd lehret die leut
also / v wirdt der kleinst geheissen im Him-
melreich. Wer es aber thut vnd lehrt / der
wirdt groß geheissen im Himmelreich.

Wo

Wo nun das Saltthumb oder zu schanden wirdt/ wo mit soll man dann salzen? Matth. v.

Iewol sonsten auff heut (auch im Eychstätter Bistumb/ alda S. Bilibaldus der erste Bischove gewesen/ vnd noch feyerlich gehalten wirdt) das jenig Euangelium: St. Matth. 19.

he wir haben alles verlassen/ vnd seynd dir nachgenolget ic. gesungen/ gelesen vnd gepredigt wirdt/ habe ich doch dasselbig auff heut vnderlassen/ vnd jekund gehörtes Euangelium zu handlen fürnehmen wollen/ diser vrsach erstlich: Weil ich dasselbig am H. Fest der Bekering Pauli außgelegt hab/ auff daß nit ein Euangelium mehrmaln/ vnd ein anders kein mal gehandelt werde. Darumb auch: Weil jekund verlesens Euangelium/ nit weniger als das jenig/ auff disen heutigen Feyertag des H. Bischoves Bilibaldi bequem gelesen vnd gepredigt wirdt/ seitemaln Bilibaldus der H. Bischove/ ein rechts vnd gutes Salt gewesen/ welches vil herker der Vngleubigen nit allein in Engelland sampt seinem H. Vatter Richardo/ (König in Engelland) seinem Bruder Wunibaldo/ hernach Abt zu Heydenheim/ vnd seiner Schwester Walpurga: sonder auch in Teutschland/ zu Christo vnd dem Catholischen Glaubē gebracht hat/ durch beide Mittel/ der embsigen Predig vnd Christlichem leben. Darauff dan auch dis heutig Euangelium gerichtet ist/ wie wir jekund

*Vrsach/
darumb dis
Euangelium
auff heut
gepredigt
wirdt.*

*Hieruon
weiteuffst
ger am tag
Wunibaldt
vnd Wal-
purga ge-
handlet.*

in vor

in vorhabender Predig weitteuffiger lehren vñ hören wollen.

Thellung
vnd Inhalt
difer Pre-
dig.

Auff das aber solchs desto ordelicher von vns verrichtet/vñ desto richtiger von euch möge vernommen werden/ soll dise Predig auch/wie die anderen all/in zween Theil abgetheilt werden. Im ersten wirdt angezeigt: Was nit allein die Apostel/sonder auch alle Prediger für ein Lehr führen vnd Predigē sollen/auff das sie ein gutes Salt seyen. Im andern: Wie sie sich im Leben verhalten sollen/auff das die Menschen sehen ihre gute Werck vnd preisen den Vatter der im Himmel ist. Dis wölt ihr mit gedult anhören/so will ich euch solchs willig/auch auff das leichtest vñ fürhest fürhaltē. Hierzu wölle mir vnd euch GOTT seiner Segen vnd Gnad verleihen/ Amen.

In dem anfang diß heutigen Euangelij hielte der Herr ein zimlich lange vnd schöne Predig auff einem Berge/ als vil Volck's bey ihme war/ (an einem Donnerstag/ welcher der 14 Julij im 31 Jar Christi gewesen ist) wie man nämlich müste Selig werden/ nach vollendter Predig wendet er sein Rede zu seinen Jüngern fürnēlich/ vnd spricht: Ihr seyd das Salt der Erden. Wo nun das Salt thumb oder zu schanden wirdt/ wo mit soll man salzen? Es ist zu nichts nutz mehr/ dann das es hinaus geschüttet vnd von den leuten zertretten werde. Drey fürneme Pünctlin wölle wir auß diesen Worten Christi erörtern: Erstlich/ zu wem der Herr

Herr dise wort geredet hab. Zum andern/ Was er alda durch das gute vnd nichts nütziges Salk verstehn wolle. Zum dritten/ von der straff der jenigen/ so ein nichts nütziges Salk seynd.

Wiewol der Herr dise wort zu seinen Jüngern geredet/ so wiler doch solche nit allein zu seinen Jüngern/ sonder auch zu allen den jenigen/ so in das Ampt der Jünger tretten/ gesagt haben/ als nemlich allen Predigern/ den zwey vnd sibenzig Jüngern/ allen Bischoven/ Priestern/ Pfarherrn/ vnd in summa allen den jenigen/ so sich des Geistlichen Standts vnderfangen/ vnd andere mit Predigen/ schreiben vnd lehren/ im Glauben vnd Leben vnderrichten solten. Wie er dann auch nit nur zu den Aposteln/ sonder allen Predigern gesagt hat: (do es von nöten) Gehet hin in die ganze Welt/ (dann es ja nit möglich/ daß ihren zwölff die ganze Welt durchreisest vnd bekert solten haben) vnd prediget das Euangelium allen Creaturen zc. Wie dann der Prediger von der zeit der Apostel/ bis auff disen heutigen tag schier vnzalbarlich vil tausent gewesen seynd/ noch seynd/ vnd bis zum Jüngsten tag nit mangeln wirdt.

Nun hat aber/ fürs ander Püncklin/ Christus der Herr/ deme als dem wahren GOTT nichts vnberust/ gar wol gewist: Daß nit alle die jenigen/ so sich des Predigampts vnderfangen wurden/ rechtschaffne/ warhafftige/ Christliche/ Catholische Prediger/ sonder ein guter (ja ein böser) theil derselbigen/ werden falsche Propheten/

Dise wort hat der Herr zu alle geistlichen/ vnd fürnemlich zu alle Predigern geredet.

Matth. 28.

Mar. 16.

Jeder zeit seynd falsche Propheten gewesen/ vñ noch.

**Vnderschied
der warhafftigen
vñ betrieglichen
Prediger.**

pheten/ Keker/ vermeynte Christen/ verlogne vñ
betrogne Predicanten seyn/ derhalben so mach
er als bald einen vnderschied zwischen den war
hafftigen vnd falschen Predigern. Vergleichet
die Catholischen Prediger sampt ihrer reinen
Catholischen Lehr/ einem guten wolgeschackten
Salk: Die falschen Propheten aber/ sampt ih
rer betrieglichen Lehr vnd Kekerrey/ einem nichts
nützigen Salk.

**Salk machet
alle Speiß wol
geschmack.**

Vnd diß billich/ vnd zwar nit ohne sonderliche
ursachen: Dañ do man wil daß der Mensch
dise oder jene Speiß essen/ vnd solche ihme zum
leib/ leben vnd leiblicher gesundtheit gedeyen mö
ge/ muß man dieselbige gemeinglich alle saltzen/
so vil billich recht vnd gnug ist: sonsten/ do sie nit
gesaltzen/ oder mit einem nichts nützigen Salk
gesaltzen wirdt/ hat sie weder geschmack noch
lieblichkeit/ ist weder sawr noch süß/ mehr ein ur
sach der krankheit dann der gesundtheit/ darü
ber hat der Mensch mehr ein abscheuen dann
ein begirde vnd lust zu essen.

**Geistliches
Salk.**

Ebenmessig mögen wir auch antworten von
der Geistlichen Speiß/ so in das Ewig leben be
leitet/ dadurch nit allein der leib/ sonder auch die
Seel gespeiset/ vnd zur Seligkeit erhalten wirdt/
daß aber diß geschehe/ ist von nöten/ daß diese
Geistliche Speiß mit einem recht guten Salk
gekocht vnd gesaltzen werde. Diß gute Salk/ ist
das wahre Wort GOTTES/ der reine Christ
liche Catholische Glaub; do derselbig in vnser
Herg geworffen wirdt/ ist es zum Ewigen leben
recht gesaltzen. Hergegen aber/ do das Salk
thumb

**Gutes
Salk/ das
Wort Got
tes.**

thumb vnd nichts nutz ist/ das ist/ do die Lehr/
 ein Ketzerey/ ein falsche Lehr/ ein neuwe Lehr/ vnd
 der Lehrer ein Ketzerey/ ein falscher Prophet/ ein
 vermeynter selbstgewachsener Predicant vnd ein **Luthersche**
 getauffter Priester ist/ (wie dann Luther ge- **Predicantē**
 schriben/ alle Menschen seyn Priester/ vnd ein **werdē Prie-**
 jeder Christ werde zum Priester getaufft/ wel- **ster geborē.**
 ches doch eben so wahr ist/ als daß sie wollen
 Catholische Christen seyn) so ist alles unge-
 schmack/ vnd zum Ewigen leben nit dienstlich/
 sonder schedlich vnd hinderlich/ was damit ge-
 salsen wirdt. Das ist: Alle solche ungesalsne **Predicantē**
 vnd ungeschmalkne Predicanten/ sampt ihrer **seynd unge-**
 falschen Lehr/ bringen vmb den Leib vnd vmb die **salsen vnd**
 Seel/ alle diejenigen/ welche von ihrer Speiß **ungeschmal-**
 essen/ welche ihr Lehr/ Unglauben vnd Ketzerey **gen.**
 annehmen/ glauben/ vnd also sterben jimmer
 vnd Ewig.

Muß derhalben ein jeder Christ/ wer dersel-
 big auch jimmer ist vnd seyn mag/ so er anderst
 GOTT/ seinen Leib vnd Seel/ die Ewigen frewd
 vnd Seligkeit lieb hat/ do er anderst auch den
 Teufel vnd das Hellsch fiewr fürchtet/ so vil ih-
 me Menschlich vnd möglich/ achtung geben:
 Wenn er sein Seel vertrauwe/ einem alten Ca-
 tholischen Prediger/ der ein gutes Salt/ den
 wahren Christlichen Catholischen Glauben pre-
 diget/ oder einem neuwen selbstgelehrten Predi- **Predicantē**
 canten/ des Lehr mit dem vergiffenen vnd thum- **seynd selbst**
 ben Salt Lutheri besprengt ist. **gelehrt.**

Es ist wol wahr/ daß ein gemeiner einfal- **Heimliche**
 tiger/ geringuerstendiger Mensch/ so nit studirt **Eynrede.**
 m vnd

vnd täglich mit seiner handarbeit muß beladen
 seyn/ die ganze Wochen zu schaffen gnug hat
 daß er das liebe Brot gewinne/ vnd also sich
 selbst/ sein Weib/ kind vnd gesind ernehre/ mit
 so gar bald vnd leichtlich vnder den warhafftigen
 vnd falschen Predigern/ vnder der Catho-
 lischen vnd Ketzerischen Lehr / vnder dem guten
 vnd thumben Saltz/ vnder schid wissen kan: Er
 temaln alle Prediger vnd Predicanten/ Catho-
 lisch/ Caluinisch/ Lutherisch/ Zwinglisch/ Widen-
 täuferisch vnd was dergleichen Gesindlin mehr
 ist/ alle bey Gott vnd dem Teufel/ bey Leib vnd
 Seel/ bey stein vnd bein schweren/ sie/ vnd ein je-
 der habe den rechte/ wahren/ Christlichen Glauben
 das wahr/ rein/ pur Euāgelium vnd Wort
 GOTTES/ diejenige Lehr/ dadurch man möge
 fünde vnd müsse selig werden: also/ daß/ wie ge-
 meldet/ ein gemeiner Ley schier noch nit eigent-
 lich wissen kan/ welchem Prediger vnd Lehr er
 glauben vnd vertrauen soll.

Jede Predi-
 ger wöllen
 den rechten
 Glauben
 haben.

Antwort.

Ob wir gleichwol hierauff weitläuffigen
 gründlichen vnd außfürlichen bericht geben
 könten/ wil doch solchs die zeit vnd die Materie
 auch Theilung vorhabender Predig nit vergön-
 nen. Jedoch/ auff daß nit die Einfaltigen vnder
 euch gar trostlos vnd lehrlos hierinnen gelassen
 werden/ sollen auff diß mal zwey/ vnd nur zwey
 Merckpünctlin/ vnd auch dieselbigen auff das
 kürzest vnd leichtest/ angezeigt werden/ darauff
 ein jeder einfaltiger Mensch/ bey vnd von sich
 selbst lehren kan: welches rechte oder falsche
 Prediger/ welchs ein Catholische oder Bne-
 tholo

tholische Lehr vnd Glaub sene/ welchs gutes oder
thumbes Salk sene/auff das sich forthin hierin
nen ein jeder Christen mensch zu verhalten wiß.
Vnd das erst Püncelin soll den Lehrer/das an
der die Lehr betreffen.

Was den Prediger belangen thut/ so gibe
hierauff achtung : Ob er ein getauffter oder ein
geweyhter Priester sene. Spricht er: Alle Men-
schen seyen Priester/vnd nämlich im H. Sacra-
ment des Tauffs werde sie Priester/sonsten sene
er zu keinem Priester wed geweyhet noch geord-
net/ so haltu für gewiß / das ein solcher kein
Priester noch Prediger/sonder ein Vermeyn-
ter Predicant vnd Verfurer des Volcks ist.
Do aber jemandts so weit nit kommen noch
hierauff antwort von ihnen haben könt/sonder
ihme wurde etwann vom Predicanten zur ant-
wort : Ja/ er sene auch ein geordneter/ beruff-
ner vnd gesandter Priester vnd Prediger/ der
gebe volgendts hierauff achtung : Ob derselbig
Prediger oder Predicant/ordenlicher weiß ge-
weyhet/ geordnet/ beruffen vnd gesandt/ Ob er
auch volgendts bey seinem beruff gebliben/ vnd
noch. Do er von der Geistlichen Obrigkeit/wel-
che allein/ vnd nit die Weltliche/ solchen Ge-
walt von GOTT empfangen hat/geweyhet/ ge-
ordnet/ beruffen vnd gesandt/ auch bey solchem
beruff gebliben ist/wol vnd gut/so ist er ein Prie-
ster vñ rechter Prediger/deme du dein Seel ver-
trauwen magst. Dann also seynd alle Bischove
vnd Priester/ nemlich von anderen Bischoven/
geweyhet vnd geordiniert worden/ von der zeit

Getauffte
Predicant

Geistliche
Obrigkeit
hat gewalt
empfangen
Priester zu
weyhen.

Gen. 14.
Psal. 109.
Luc. 22.

Christi (in der Catholischen Kirchen) bis auf
vns. Christus war vnd ist ein Priester in Ewig-
keit/ seine Aposteln machet er zu Priestern im
letzten Abendmal/ dise Marthiam vnd andere
Paulus Titum vnd Timotheum/ Petrus Cle-
mentem vnd andere: also haben inder die Geis-
lichen andere Geistliche gemacht/ zu Bischouen
vnd Priestern geweyhet/ vnd diß auß beuelch
vnd gewalt Christi.

Do aber der Predicant antworten wurden
(wie dann alle Caluinischen/ Lutherischen/
Zwinglischen zc. Predicanten antworten wer-
den/ ja müssen) Sie seyen von der Weltlichen
Obrigkeit/ etwann von einem Fürsten/ Gro-
uen/ Freyherrn/ Edelmann/ von einem Su-
perintendenten oder Predicanten beruffen/ Ord-
nirt vnd gesandt/ so ist ein solcher vermeynter
Predicant eben so wenig ein Priester/ als die je-
nigen/ so ihne zum (Affen) Pfaffen gemacht ha-
ben/ sonder nur ein Key/ der auch so wenig als die
anderen weder das H. Sacrament des Altars
reichen noch machen kan/ sonder bleibt Brot
vnd Wein vnd sonst nichts mehr/ so wol als
bey den Caluinischen Predicanten. Dann sol-
che/ Priester zu Ordinieren/ von GOTT keinen
beuelch noch gewalt empfangen haben. Vnd
vor solchen Predicanten/ vnd vermeynten Prie-
stern/ soll sich ein jeder Christ/ so lieb ihne sein
leib/ Seel/ GOTT vnd die Seligkeit ist/ so vleis-
sig als vor dem Teufel selbstem/ hüten. Dann es
je ein mal vnd alle mal gewiß ist/ vnd seyn muß:
Daß ein solcher Predicant/ so nit auff Catho-
sche

Predicantē
seynd nit
Priester/
sonder nur
Keyen.

sche weiß wil/ oder nit kan Ordinirt werden/
auch die Catholische Lehr nit/ weder selbstn hat/
noch andere Lehren wirdt.

Vnd ist eben diß das ander Merckpunctlin/
darauff ein Catholischer Christ achtung geben
muß/ ehe daß er sein Seel disem oder jenem
Prediger vertrauwet: Ob nemlich sein Lehr
Catholisch/ oder nit Catholisch sey: Ob sie all-
gemein/ oder nur ein Winckelpredig sey: Ob
man dieselbige Lehr vnd Glauben/ lehre vñ glau-
be an allen enden vnd orten der ganken Chri-
stenheit/ oder nur an etlichen orten im Teutsch-
land: Ob sie jederzeit also gelehrt vnd glaube
sey worden/ oder nur ein zeitlang. Die Catholi-
sche Lehr vnd Glauben/ so jeder zeit vnd allent-
halben gelehrt/ glaubt ist worden/ mustu auch
annehmen/ vnd immer behalten. Den jenigen
Glauben/ ja Vnglauben/ so newlich auffkommen/
vnd nur von etlichen angenommen/ mustu/
wann du selig werden wilt/ meiden/ vnd als den
Teufel fliehen. Daß aber die Widertaufferische/
Zwinglische/ Caluinische vnd Lutherische Lehr/
ein newe Lehr/ ja erst vor fünffsig oder sechsig
Jaren ergerlich sey gewesen in der ganken
Welt/ bekennt/ ja muß Luther in seinen Schriff-
ten selbstn bekennen/ do er spricht: Aber well zu
der zeit (do man 1517 zellet) vnser Lehr new vnd
vber die massen ergerlich war in der ganken Welt/ mu-
ste ich seuberlich faren/ vnd vmb der schwachen willen
vñ nachlassen/ das ich hernach nit thet ic. Seitern
dann auß vngewungner bekantnuß Lutheri/
die Lutherisch Lehr vnd Glaub new vnd vber die

Den Catho-
lische Glau-
ben soll man
annehmen
vñ behalten.

Luther In
einer kurzen
Bekantnuß
vom h. Sa-
cramēt An-
no 1545 ge-
druckt in der
4. Blat L

massen ergerlich ist (wie wahr ist) der ganzen Welt/ soll vnd muß sich billich ein jeder Christ vor einer solchen neuen vnd ergerlichen Lehr vnd Glauben hüten/ dann sie nit Catholisch oder Allgemein/ sonder nur ein Winkel Glaub ist.

Von der
Straff der
falschẽ Pre-
dicanten.

Wo nit diser erste Theil vorhabender Predig zu lang wurde/ solten vnd wolten wir jehum auch das dritte Merck punctlin/ auß obangegonen wortẽ Christi nach notturfft erwegen: muß aber auff dis mal eyngestellt/ vnd alda kürzlich verantwortet werden. Das Saltz (spricht der Herr) do es thumb oder zu schanden wirdt/ ist es zu nichts nutz mehr/ dann daß es außgeschütt/ vñ von den leutẽ zertrettẽ werde. Von der belohnung der Catholischen Prediger vnd von der Straff der Keherischen Predicanten/ möchten wir alda/ do es die zeit vergönnet/füglich handeln. Niemand zweifelt/ dann es wahr vnd gewiß ist: Daß die Catholischen Prediger/ do sie Catholisch vnd frumb sterben/ gleich den andern frummen Catholischen das Ewig leben ererben werden. So ist auch dis gewiß/ Daß vil wohnungen im Himmelreich seynd/ vnd/ daß ob gleichwol die jenigen so darinnen seynd/ selig/ jimmer vnd Ewig selig seynd/ doch seynd sie einandern so vngleich/ als die Stern am Himmel/ vnd wie ein Stern den andern vbertrifft am Schein vnd klarheit/ also auch ein Heilig den andern im Himmel.

1. Cor. 15.
Dan. 12.

Derowegẽ/ do die Gelehrten/ die Geistlichen

die Prediger / darumb daß sie Catholisch vnd frumb seynd / nit allein (vermög des H. Verdiensts Christi am stamm des H. Creukes erlangt) das Ewig leben / sonder auch darinnen ein desto höhere kron von GOTT bekommen wölten) müssen sie nit allein für ihr Person Catholisch / frumb vñ gelehrt seyn / sonder müssen auch andere Christen / vnd beuor auß ihre ihnen von GOTT vnd der Geistlichen Obrigkeit vertraute vnd befolhne Schäflein / Catholisch / frumb vñ gelehrt machen: vnd diß wirdt geschehen / wann sie vleissig / ernstlich vnd mehrmaln / eintweder das Wort GOTTES / mündlich verkündigen / oder Schriftlich vnder die Catholischen Christen außbreiten werden. Dañ / gleich wie GOTT nichts böses / auch das geringste nit / (wo nit Puß eruolget) ohne gestrafft / also wil er auch nichts gutes ohn belohnet lassen: Also daß ein jeder Prediger / wie mehr er mit Predigen vnd Schreiben frucht vnd nutz schafft / desto ein grössere belohnung vnd höhere kron wirdt er droben im Himmel von GOTT empfahen / immer auch Ewig behalten.

Catholische
Prediger
künden ein
hohe kron im
Himmel be-
kommen.

Belohnung
der vleissige
Prediger.

Die Falschen Propheten / betrogne vnd Keherische Predicanten aber / welcher Salkthumb / Wozu die zu schanden / das ist / welcher Glaub vnd Lehr zur Keheren / irrthumb vnd falschen Glauben worden ist / die seynd nichts nutz / dann daß man sie auß der Catholischen Kirchen hinauß werffe / trette sie mit füßen / man verbiete ihnen ferners zu lehren / schreiben vnd Predigen / auff daß nit immer wie lenger je mehr leut

**Straff der
Keger.**

**Keger wer-
den billich
am leib vnd
leben ge-
strafft.**

durch ihr thumbes vnd schandloses Sath durch
ihre falsche Lehr vnd Kekerereyen vergiffet/ ver-
fürt/ immer vnd Ewig verdampft werden. Do
aber solche vermeynte Predicanten/ nach de-
me sie ein oder etlich mal ermanet/ gewarnt/
die Leut zu verführen nit ablassen wollen/ sollen
sie nit allein mit füssen getretten/ sonder gar zer-
treten/ als das Unkraut an ein büschelin ge-
bunden vñ in das Fewr geworffen werden/ mit
ihnen GOTT im Euangelio durch seine Eu-
gel zu volbringen gedreuwet hat/ Ja in das
Hellisch fewr werden sie nach der Seel/ so bald
sich Leib vnd Seel scheiden/ am Jüngsten tag
aber mit leib vnd Seel/ geworffen werden. Vnd
nit vnbillich: Dann/ do man billich vnd Rech-
lich einen Dieb/ Mörder vnd dergleichen Gott-
lose leut/ nit allein am leib/ sonder auch am le-
ben straffet vnd gar tödtet/ so doch nichts/ dann
nur zeitlichs/ als Gelt/ geltis werth/ oder ihrem
Nechsten das zeitlich leben gestolen haben: war-
umb solte man dann nit auch die Kekerischen
Predicanten/ so zu lehren/ verkeren/ verführen/
vnd verdammen nit ablassen wollen/ am leib
vnd leben billich straffen mögen/ seitemaln sie
vil hundert Christen die Seel vnd das Ewig
leben stelen/ ja leib vnd Seel immer vnd Ewig
verdammen/ welchs ja mehr vnd ein grösser-
re/ ja tausent mal ein grössere Sünd ist/ dann
die Dieb vnd Mörder immer volnbringen könn-
den.

Es mögen aber dise wort Christi den Keker
nit an Stegreiff greiffen/ als solte man sie nit
verja-

verjagen noch am leben straffen/ do er gesagt: *Vergebliche*
 Lasset sie beide wachsen (den Weizen vnd *Un-*
 kraut/die Catholischen vnd *Un-*
 catholischen) bis *aussucht*
 zur zeit der Ernde *der Keger.* 2c. Dañ der Herr sich domaln
 selbst erkleret/ do er die vrsach hinzu gesetzt:
 Auff das nit auch der Weize umbkome/vnder-
 getruckt/vertretten/oder auch außgeraufftwer-
 de in deme das man das Unkraut außgetten
 wil. Das ist: Do man die *Un-*
 catholischen nit erkennē/nit erforschen/
 oder doch ohne vndergang der Catholischen nit
 außgetten/ außreuten vnd vertreiben kan/ soll
 man sie/wegen der Catholischen vnd des guten
 Weizen/mitten vnder ihnen/ bis zur gelegnen
 zeit bleiben lassen. Do aber das Unkraut mag
 erkennt/ ohne vndergang des Weizen außgettet
 werden/hat Christus nit beuolhen/das man bei-
 de wachsen soll lassen/ sonder zur erhaltung des
 Weizen/soll man das Unkraut außrauffen/an
 ein büschle binden/ vnd für die vnuernünfftigen
 Thier/ oder in das feur werffen. Dann solchs
 je sonsten nichts nuß/ dann das es außgeschüttet
 vnd von den leuten zertretet werde. Vnd diß für
 den ersten Theil vorhabender Predig/ sonsten
 wurde er gar zu lang werden.

Wleich wie wir im ersten Theil von
 der Lehr eines rechtschaffnen Catholi-
 schen Predigers gehandelt haben/ also
 wollen wir im andern/ vom leben/handel vnd
 wandel desselbigen tractieren. Dann gewißlich
 nit wenig gelegen ist/ beuor auß diser zeit/am le-
 ben eines jeden Predigers/der da begert das me-
 m 5 niglich

nigklich sein Predig hören/ vnd sich darnach verhalten soll. Also spricht Christus zu seinen Jüngern vnd allen Predigern im heurigen Euange-

Wie sich alle Prediger vnd Geistlichen im Leben verhalten sollen.

lio: Also soll scheinen euwer Liecht vor den Menschē/ daß sie sehē euwere gute Werck/ vnd preisen euwern Vatter der im Himmel ist. Wir könden auch drey Lehren vnd Pünctlin auß disen Worten Christi mercken/ behalten/ vnsern Glauben vnd Leben (vnd beuort auß die Geistlichen/ vñ am aller meisten die Prediger) darnach richten.

In deme vns gutes zu thun gebottē/ vñ vns das böse verboten.

Daß vns der Herr lehret/ beuillt/ ja gebietet: Daß vnser liecht vor der Welt scheinen/ vnd gute Werck thun sollen/ ist einem ieden leichtlich darauß zeschliessen/ daß er vns alle böse Werck vnd Sünd zu volnbringen verbietet/ Dann guts vnd böses je einandern stracks zu wider seynd.

Prediger müssen zwofache rechnungschafft geben.

Wiewol das böse vnd die Sünd zu meiden/ von GOTT allen vnd jeden Christē gebotten ist/ vnd niemands in einiger Todtsünd/ wenn nit Puff geschicht/ selig mag werdē: so ist solchs doch gewislich vnd am aller meisten vns Predigern gebotten vnd von nöten/ seitemalt wir/ vor GOTT/ wañ sich leib vnd Seel scheiden/ erscheinen vnd zwofache antwort aebē müssen/ als für ein Priuat vñ gemeine Person. Für vnser Person müssen wir rechnungschafft geben/ wie wir gelebt/ frumb oder vnfrumb gewesen seyen/ als dann auch empfahen nach deme wir verdient oder verschuldet haben. Vnd ja ernstlicher werden

den wir zur rechnungschafft gehalten/ vñ grössere straff müssen wir leiden/dann die Einfaltigen leyen vnser Schästlin/ seitemaln wir besser als sie gewist/ oder ja gewist soltē haben: Daß Sünd Sünd/ vnd was Sünd oder nit Sünd / daß solche von GOTT ernstlich verbotten/ vnd die selbigen mit Ewiger Peyn zu straffen gedreuwet hat.

Wir müssen auch antwort geben/wie wir vnsern Pfarrkindern / vnsern Schästlin vnd allen Christen ein gutes oder böses Exempel/ zum guten oder bösen leben gewesen seyen. Ob wir nit etwan etliche frumme leut mit vnser Sünd vnd schandlichen leben geergert/ volgents auch zur Sünd eins theils verursacht haben. Wie dann mehrmaln geschicht: Daß ein zimlich guter gelehrter vnd menigklich angenehmer Prediger/so in öffentlichen Sünden/ Vnzucht/ oder andern laster ohne alle forcht/ scheube/ scham vnd straff lebet/ mit seinem bösen Exempel vnd ergerlichen leben mehr abbricht / dann er mit seiner Lehr vnd Predig auffbauwet. Dann also wirdt von etlichen vnd vilen Menschen (welches doch nit recht ist) nit allein sein Person/ sonder auch sein Lehr vnd Predig verachtet/ geflohen vnd gemitten/muß von menigklich hören: **Arket hilff dir selbstē: Wie wil oder kan er andere lehren vnd Regieren/ der sich selbstē weder lehren noch regierē kan? Er ziehe zu vor den stecken auß seinem auge/ als dann den Angel oder Splitter auß eines anderen aug: vnd was dergleichen nachreden mehr seynd. Do aber je solche**

Prediger
vnd alle
Geistliche
sollen dem
Volck ein
gutes Ex-
empel seyn.

Unfrumme
Prediger
müssen hören

Predi

**Straff der
vnzüchtigen
Prediger.** Prediger/ predigen/ vnd doch von der offentlich
bekanten Sünd nit abstehn wöllen/ sollen sie wis-
sen/ ja sie wissen auch wol/ daß sie ein zwofache
rechnungschafft geben müssen/ vnd etwann hie
zeitlich böse nachrede/ vnd dort immer vnd Ewig
die Hellische Peyn leiden müssen.

Matth. 23. Wie sich aber hierinnen die Pfarfinder vnd
alle Zuhörer eines solchen Predigers verhalten
müssen vnd sollen/ lehret sie Christus der Herr/
der wol gewist/ daß nit alle Prediger eines Gottes-
fürchtigen vnd frummen Lebens seyn werden/
mit disen Worten: Auff dem Stul Mosi sitzen die
Schriftgelehrten vnd Phariseer/ Alles was sie
euch sagen das haltet vnd thut: Aber nach ihren
Wercken solt ihr nit thun. Auß welchen wortē
Christi zu lernen/ Daß wir vns an die Lehr des
Predigers/ vnd nit an sein Leben halten sollen.
Glauben vnd halten sollen wir das jenig so er
vns lehret/ aber nit thun das jenig so er thut.
Dann er kan vns wol recht lehren/ vnd nicht de-
sto weniger für sein Person nit frumb seyn. Wir
wöllen für ihne nit rechnungschafft geben/ auch
weder in Himm̄el noch in die Hell für ihne faren.
Denen so ohren zu hören haben/ ist hieruon auff
diß mal gung gesagt.

**Gute werck
thun.**

Das ander Pünctlin ist: Daß vns der Herr
lehret vnd beuilcht gute Werck zu thun. Ja einen
solchen frummen handel vnd wandel sollen wir
füren/ vnsern Christlichen Catholischen Glauben
mit Christlichen tugenden vnd guten Wer-
cken sollen wir also zierē/ daß die leut vnser gute
Werck sehen/ vnd **GOTT** derowegen loben mö-
gen.

gen. Mit dergestalt/ als wolten oder solten wir darumb eigentlich gute Werck thun/das wir vñ unsere gute Werck von den leuten gesehen/ vnd wir also dadurch gelobt/ für barmhertzig/ frumb vnd gerecht gehalten würden. Nein/solche Pharisäische Gleißneren/ frumbkeit vñ Gerechtigkeit/ ist von Christo in disen Worten verbotten: Wann ihr fastet/solt ihr nit trawrig werdē/wie die Heuchler. Denn sie verstellen ihr Angesicht/auff das sie vor den leute scheinen mit ihrem Fasten. Warlich sage ich euch/sie haben ihren lohn schon empfangen ꝛc. Vnd noch außtruckentlicher lehret der Herr hieruon also: Sehet euch für das ihr ewer gerechtigkeit nit thut vor den Menschen/auff das ihr von ihnen geschē werdet/sonsten werdet ihr keinen lohn haben bey euwerm Vatter der im Himmel ist. Darumb/so du Almosen gibest ꝛc. Darumb sagt er auch im heutigen Euangelio nit / Auff das sie euch preisen: Auch nit/Auff das ihr von ihnen geprisen werdet:sonder/Auff das sie preisen euwern Vatter der in dem Himmel ist. Sollen vnd müssen derhalben wir Catholische Christen gute Werck thun/als Betten/Fasten/Almosen geben/vnd dergleichen/vnd dasselbig/so vil möglich/vnd wann es füglich geschehen kan/heimlich vnd in still/auch genzlich ohne eignen rhum vnd lob/auff das wir die belohnung nit von der Welt/sonder von GOTT empfahen mögen.

Do es aber sach were/wie dann gewislich mehrmaln geschicht/das die guten Werck/wie dann derselbigen vil vnd mancherley seynd/vnd
 allerley

Phariseerische frumbkeit ist verbotten.
 Matth. 6.

Don den gu-
ten Werckē
soll sich nie-
mandis las-
sen abwen-
dig machen.

Unwarheit
der Luthē-
rischen.

Gott zu lob
vnd vnserm
Nechsten zu
gutem/sollen
wir gute
werck thun.

allerley Christlichen tugenden/ heimlich vnd in
der still nit köndten volnbracht werden: Dert
daß vns die Vncatholischen von den gute Wer-
cken abhaltē wolten/ sollen wir die guten Werck
mit nichten vnderlassen/ vns auch danon nit las-
sen abwendig machen. Dann erst/ dem Teufel
vnd seinem Anhang zu trutz vnd leid/ sollen wir
die guten Werck auch offentlich vor der Welt
volnbringē/ doch jeder zeit nit vns/ sonder GOTT
dem Allmechtigen zu lob vnd ehren/ der vns sol-
che droben im Himmel hundertfaltig widergeb-
ten wil. Alda haben sich auch auß den worten
Christi zu erschen/ die jenigen feind der guten
Wercken/ so vnuerschambt fürgeben dörfen:
Die guten Werck seyen weder von nöten noch
nüglich zur Seligkeit/ sonder/ der Glaube thut
alles/ vñ seye das einig Mittel zur Seligkeit von
nöten vnd gnugsam.

Das dritte Werck pünctlin auß obgemelten
worten Christi/ haben wir albereit in disen zwey-
en vorgehenden gemerckt/ nämlich: Daß wir vñ
andere wegen vnser guten Wercken/ GOTT/
vnd nit vns/ das lob/ ehr vnd preiß geben sollen/
auff daß wir nit Phariseer werden/ vnd also al-
bereit vnsern lohn empfangē haben. Demnach/
weil dise Predig albereit ihr gebürliche leng er-
reicht/ wollen wir zum Beschluß derselbigen
greiffen/ vnd vnder andern auß diser Predig be-
halten: Daß wir vnser Seel nit einem jeden so
sich für einen Prediger außschreyet/ sonder den
Catholischen Predigern vertrauwen sollen: den
jenigen Predigern/ so von der Geistlichen Ob-
rtigkeit

rtigkeit gewenhet/Ordiniert/berufft vnd gesandt
 seynd/welche den alten Catholischē/vñ mit einem
 neuen vnd der ganken Welt ergerlichen Glau-
 ben predigen: Vnd/das die warhaffrigen Ca-
 tholischen Prediger von GOTT ein grosse be-
 soldung/die Kexer aber das Hellisch fewr ha-
 ben werden. Zum andern lernen wir: Das die
 Prediger nit allein den rechten wahren Glau-
 ben predigen/sonder auch meniglich ein gutes
 Exempel im Leben fürtragen sollen/auff das
 sie nit mehr mit dem ergerlichen Leben abbre-
 chen/dann sie mit ihrer Lehr vnd predigen auff-
 bauen. Vnd: Das darumb die Zuhörer nit
 dem Leben vnd wercken/sonder der Lehr vnd
 worten ihrer Pfarherrn vnd Prediger nachzu-
 folgen sollen. Endlich: Das wir gute Werck nach
 vnserm vermögen zu volnbringen nit vnderlas-
 sen/vnd die belohnung von GOTT gewarten
 sollen/der kan vñ wirdt/do wir Catholisch glau-
 ben/Gottsförchtig lebē/Christlich sterben/vns/
 nach disem zeitlichen Leben/das Ewig geben/
 Amen.

W Ir sagen dir danck/ O Herr IES^{Gebetlin}
 SV Christ/das du auff heut/nit^{zu Christo}
 allein deinen Jüngern/sonder<sup>vnserm He-
land.</sup>
 auch vnsern Predigern vorgesagt hast:
 Das sie ein rechtes gutes vñ nit ein thum-
 bes Salz/das ist/die Catholische vnd nit
 ein Kexerische Lehr vns fürhalten vñ Pres-
 digen sollen/neben einem guten Exempel
 des Lebens. Verleihe derhalbē Gnad/das
 wir

wir jeder zeit solche Prediger haben / sie hören / ihnen folgen mögen / auff daß wir sampt ihnen / vnd sie mit vns mögen selig werden / wie du dann auch dem H. Willibaldo ersten Bischoue zu Eychstat gnedig verlihen / vnd derowegen endtlich auch das Ewige leben mitgetheilt hast / zu welchem auch du vns / wañ sich leib vnd Seel scheiden / auffnehmen wöllest / Amen.

Am 8. tag
Zulij.

Am tag des heiligen Bischoues
vnd Martyrers Kiliani / zum theil
zu Wirzburg vnd Bamberg
feyerlich.

Kilianus der H. Martyrer vñ
erster Bischoue zu Wirzburg / ist
seines Vatterlands ein Hyberner
oder Schott gewesen / ist auß der
Schul in ein Kloster gangen / dar
innen Priester worden / frumb vnd Gottselig ge
lebt / also / daß er ein Regierer vber alle die jeni
gen / so im Kloster waren / verordnet wurde. Als
er aber immer bedacht / GOTT vnd der Welt
auch an anderen ortē dienen / name er für sich ein
Pilgerfart / kam auß Schotten in Britannien /
darnach in Gallien / vnd von dannen in Germanien
oder Teurschland / sonderlich nach schickung
GOTTES in Ostfranken / an ein ort Wirzburg
geheissen / mit dem H. Priester Colonano vnd
dem Diacon Tornano / fandte dasselbig Volck
in

in grober Abgötterey / darumb machet ihn der
Papst Conon zum Bischoue / gabe ihme aewalt
dasselbsten den Christlichen Catholischen Glau-
ben zu verkündigen / bekert den Fürsten sampt
seinem Volck zum Christlichen Glauben von der
Hendnischē Abgötterey. Da er aber auff ein zeit
den Fürsten / wegen seines Bruders Weib (wie
Joannes Herodem) straffet / vnd der Herzog sie
mitler zeit zu verlassen vorhabens war / aber dar-
über in ferre land zöge / stiftet dasselbig vnehr-
lich Weib an durch eiliche Mörder / daß der H.
Kilianus / auch Colonanus vnd Totnanus / zu
Mitternacht als sie zum Gebert auffgestanden /
jämmerlich ermordet worden / vnd also die kron der
ewigen Seligkeit empfangen zc. Anno 560.

Kilianus
wurde jäm-
merlich er-
mordet.

Euangelien vnd Predigen / wie Ge-
orgij / Marci / Bekerung Pauli /
Laurentij oder Stephani / vnd an-
derer heiligen Martyrer tag.

Am tag des heiligen Keyfers vnd
Beichtigers Henrici / im Keyserlichen
Stift Bamberg feyerlich / Euan-
gelium Matth. xxv.

Am 13. tag
July.



Un Mensch zohe vber
land / rieffet seinen knech-
ten / vñ vbergab ihnen sei-
ne Güter / vnd einem gab
er fünff centner / dem an-
dern zween / dem dritten

Marc. 13. d
Luc. 19. b

n ein



ein/einem jedē nach seinem vermögen/vñ
zog eilends hinweg. Do gieng der hin/der
fünff centner empfangen hette/vñ handle-
te mit denselben/vnd gewan andere fünf-
centner. Des gleichen auch der zween cent-
ner empfangē hett/gewan auch zweē ande-
re. Der aber ein empfangen hett/gieng hin
vnd macht ein grube in die erden/vnd ver-
barg seines Herren gelt. Nun vber ein lang
zeit kam der Herr diser knechten/vnd hielt
rechenschafft mit ihnen. Vñ da trat her zu
der da fünf centner empfangen hette/vnd
leget dar andere fünf centner/vnd sprach:
Herr/du hast mir fünf cētner zugestellet:
sihe da/ich habe damit andere fünf centner
gewonnen. Da sprach zu ihm sein Herr:

Matt. 24. d

En

Ey du frommer vnd getreuer knecht/ dar-
 umb dz du bist vber wenigem getrew gewes-
 sen/ wil ich dich setzen vber vil: Gehe eyn in
 die freude deines Herrē. Da trat auch her-
 zu/ der da zween centner empfangen hett/
 vnd sprach: Herr/ du hast mir zween cent-
 ner zugestellt: sihe da/ ich hat mit denselben
 zweyē/ andere zween gewoñen. Sein Herr
 sprach zu ihm: Ey du frommer vnd getreu-
 wer knecht/ darumb daß du vber wenigem
 trew gewesen bist/ wil ich dich vber vil setze:
 gehe eyn in die freude deines Herren. Da
 tratt auch herzu/ der ein centner empfangē
 hette/ vñ sprach: Herr/ ich wuste daß du ein
 harter Mann bist: du schneidest wo du nit
 geseet hast/ vñ samlest da du nicht gestraus-
 wet hast: vnd ich forchte mich/ vnd gieng
 hin/ vnd verbarg den centner in die erden.
 Sihe/ da hastu das deine. Sein Herr aber
 antwort/ vñ sprach zu ihm: Du böser vnd
 fauler knecht/ wustest du daß ich schneide da
 ich nicht geseet hab/ vnd samle da ich nicht
 gestreuwet hab/ so soltestu mein gelt zu den
 Wechßlern gethan haben / vnd wenn ich
 loñen were/ hette ich das meine zu mir ge-
 nommen mit genosse (oder gewinn) ? darumb Matth. 13. 6
 nemet von ihm den centner/ vnd gebt ihn Mar. 4. 6
 dem der zehen centner hatt. Dann wer da Luc. 13.
 hatt/ dem wirdt gegeben/ vñ er wirdt die fül- Lu. 8. 6 19. 6

Matth. 8. 6

13. f 9 22. 6

24. f

2. Thes. 1. 6

le haben: Wer aber nicht hat / von dem
wirdt auch genommen das / so er seins be-
dunckens hatt. Aber den vnnützen knecht
werfft in die eussersten finsternuß: da wirdt
seyn heulen vnd zeenflappern.

Gehe eyn in die frewd deines Her-
ren. Matth. xxv.

Siewol gehörtes Euangelium
am allermeisten vñ süglichsten ver-
standen wirdt / von den Prelaten
vnd Vorstehern der heiligē Chris-
tlichen Kyrchen / so ihren Schäftin
vnd vnderthonen mit Geistlichen vnd Leiblichen
Gnaden vnd Gaben / so sie von GOTT vnd der
Kyrchen empfangen / vorstehn / dieselbigen recht
gebrauchen / wol anlegen / vnd ordenlich außbräu-
len sollen: so wirdt es doch auch billich vnd süg-
lich allen vnd von allen Menschen außgeleat / sie
seyen Geistlich oder Weltlich / Edel oder Vne-
del / Frau oder Mann / Jung oder Alt / Reich
oder Arme / seitemaln wir alle vnd gar keinen
außgenommen / so bald sich leib vnd Seel schei-
den / vor dem Richterstul Christi erscheinen vnd
rechnungschafft geben müssen / wie ein jeder das
jenig Pfund / es seye groß oder klein / vil oder we-
nig gewesen / so ihme GOTT geben / wol oder
vbel angelegt / gebraucht / mißbraucht / oder gar
nit gebraucht habe / auff daß hieruon ein jeder
sein belohnung oder straff empfahe. Soll der-
halben auch von vns auff heut gehörtes Euang-
gelium /

gellum/in gemein/von allen Menschen verstan-
den vnd fürzlich außgelegt werden.

Vnd zwar im ersten Theil wölle wir von den Theilung
vnd Inhalt
dieser Pre-
dige.
jenigen handeln/ so ihr empfanges Pfund von
GOTT/wol angelegt/recht gebraucht/vñ geist-
lich damit gewuchert haben/vñ von derselbigen
belohnung / Auch wie sich der H. Keyser Hein-
rich/desse Feyertag wir auff heut alhie zu Bam-
berg herrlich begehn/ hierinnen verhalten habe ?
Im andern theil : Von denjenigen/ so ihr em-
pfanges Pfund/ eintweder gar nit gebraucht/
oder aber mißbraucht haben/vñ von ihrer Gött-
lichen vnd billichen straff.

Diß alles wölt ihr mit gedult vnd ernst anhö-
ren/so wil auch ich euch solchs willig vñ auff das
leichtest auch fürhest gern fürhalten/ vnd dann
euch GOTT beuelhen/ welcher mir vñ euch hier
zu sein Göttliche Gnad verleihen wölle/ Amen.

Der dem anfang diß heutigen Eu-
angelij (welchs der Herr zu seinen Jün-
gern vnd andern/ so domaln dabey wa-
ren/ an einem Dinstag oder Erichstag/ welcher
war der zwen vñ zwenzigst Martij/des drey vnd
dreißigsten Jars seines alters/ geredt hat) hat
der Herr ein schöne Gleichnuß gesagt von zehen
Juncffrauwen/ derē die fünff weise/ die andern
fünff aber torechtig waren/ dise hetten kein Del
in ihren Lampen/ wurden auch/ als der Dreuti-
gam kame / zur Hochzeit nit eyn gelassen/ die je-
nigen hatten Del/vnd wurden Selig. Mit wel-
cher Gleichnuß der Herr lehren wolt : Zum Tod
sollen wir
Das wir alle/ jeder zeit/ zum tod in wahrem Christlichem

Jeder zeit be-
reitet seyn.

Catholischen Glauben/Liebe GOTTES vñ des
Nechsten/verfasset vnd bereitet seyn sollen/auff
das wann die stund des tods/so vns vnbeuust
kompt/wir bereitet erfunden zur Hochzeit eynge-
lassen vnd selig werden.

Gleichnuß.

Diser
Mensch/ist
Christus
selbsten.

Christus ist
vber land
zogen.

Vnd dieweil er einem jeden Menschen/so hie
auff Erden vil oder wenig guts gethon/sein
Pfund wol oder vbel angelegt/dort wider gelt
will/hat er folgende Gleichnuß/nit vnfüglich
auff die vorgehende/seinen Jüngern/den Jüden
vnd vns fürhalten wollen: Ein Mensch zog
vber land/der rieffet seinen knechten/vnd
vbergabe ihnen seine Güter/vñ einem gab
er fünff centner/dem andern zween/dem
dritten drey/einem jeden nach seinem ver-
mögen/vnd zoge eilends hinweg. Diser
Mensch ist niemands anders dann er selbst
der diß Gleichnuß geredet hat/welcher nit allein
samt dem Vatter vnd H. Geist ein wahrer
Ewiger/gleichmächtiger GOTT/sonder auch
wie vnser einer (allein die Sünd außgenommen)
ein wahrer Mensch auß MARIA der H. Jung-
frauen/doch ohne einen leiblichen Vatter/
sonder auß Wirkung des H. Geists geporen ist:
hie auff Erden hat er biß in das drey vnd dreiß-
figest Jar gelebt/gestorben/widerumb lebendig
worden/von den todten auffstanden/hat auch
gessen vñ getruncken/vñ als ein anderer Mensch
sich verhalten.

Diser Mensch zoge vber land. Vnd diß ist
geschehen/als der Herr Christus leiblicher vnd
sicht-

sichtbarlicher gestalt/widerumb von vns auß diesem Jamerthal gescheiden/ vnd durch sein heilige Himmelfart hinauff zu seinem vnd vnserm Himmelschen Vatter gefaren ist / welches geschehen ist am vierzigsten tag nach seiner Auferstehung/ also er auff dem Delberg sichtbarlich für den augē der Apostel/ in einem Wolcken aufgenommen ist worden/ nach zeugnuß zweyer Engel / welche domaln zu den Aposteln also gesagt: Ihr Männer von Galilea / was stehet ihr hie/ vnd sehet in den Himmel hinauff? Dieser IESVS/ der von euch genommen ist/ wirdt also widerumb kommen etc. Vnd wiewol der Herr Christus / als ein wahrer GOTT/ mit seiner Göttlichen Gnaden/ Gaben vnd Segen/ domaln/ jekund/ vnd jederzeit biß an den Jüngsten tag/ bey seiner Kirche/ ja bey einem jeden Menschen bleibt auch als ein wahrer GOTT vnd Mensch im H. Sacrament des Altars/ geschichte doch solchs alles/ nit/ wie domaln/ sichtbarlich/ sonder unsichtbarlich vnd gleichsam verborgner weiß vnder gestalten Brot vnd Weins. Ist vnd wirdt derhalben er billich verstanden der jenig Mensch seyn/ so vber land gezogen/ ja vom land hinauff in den Himmel/ vns die wohnung vnd das ort zu bereiten.

Die knecht/ so diser Mensch zu sich beruffen / seynd nit allein die Apostel vnd ihre nachkömmling (in diesem fahl) gewesen/ zu welchen er im letzten Abendmal gesagt: Das thut zu meiner gedechnuß. Vnd am Delberg: Gehet hin in die ganze Welt / vnd prediget das

Act. 1.

Christus ist noch bey vns / doch unsichtbarlich.

Joan. 14. 15.

Die knecht Christi/ seynd alle Menschen.

Joan. 5.

Euangelium allen Creaturen : Sonder auch die jenigen/von welchen er gesagt: Vnd es werden herfür gehn die da guts gethon haben/zur aufferstehung des lebens/die aber vbels gethon haben/zur aufferstehung des Gerichts. Das ist alle Menschen auff diser Welt (wann vnd welche nur selbsten wollen) seynd knecht dieses Menschen vnd GOTTES Christi/welche er alle ihme leibeigen gemacht vnd erkaufft hat mit seinem thewren/köstlichē/Rosenfarben Blut am stammnen des heiligen Creuzes / auß der hand vnd gewalt des Teufels/darinnen wir alle/wegē der Sünd vnserer zweyen ersten Eltern/gesteckt vnd nun/GOTT lob/ledig gemacht seynd worden. Das aber die Jüden/Türcken vnd Keher/nit knecht/weder Diener noch kinder dieses Menschen seynd/ist nit Christus daran schuldig/dann er für alle Menschen auff diser Welt gelitten/alle Menschen hat er erkaufft / zu allen Menschen hat er gesagt: Kommet her alle die ihr beladen seydt/ich will euch erquicken. Er ist kommen nit nur etlichs/sonder alles zu suchen das verloren war. So wolt er ja (so vil an ihme) das niemands verloren/sonder alle Menschen selig würden. Sie aber/vnd sie selbsten/sonsten niemands/seynd schuldig daran/das sie nit seine knecht seynd/seitemaln sie nit kommen wollen/ob sie gleich in Weinberg des Herren beruffen seynd worden.

Warüb die
Vnglaubi-
gen/Keher/
vnd Gott-
lose Men-
schē nit Die-
ner Christi
seynd.
Matth 11.
Luc. 9.

Was durch
die Güter
verstanden
werde.

Disen seinen knechten allen hat diser Mensch vnd GOTT seine Güter aufgetheilt/nemlich seine Gnaden vnd Gaben/Segen vñ Benedic-
ung

ung/ Künst vnd Geschicklichkeit/ verstand vnd
 Weißheit/ eynsprechung vnd beystehung des H.
 Geists/ auch zeitliche Gaben vnd Güter/ so zur
 auffenthaltung des leibs vnd zeitlichen lebens
 von nöten seynd. Vnd diß nit nur am H. Pfing-
 stag den H. Aposteln vnd andern so domaln bey
 ihnen waren/ sonder auch vor derselbigen zeit
 allen seinen knechten im alten Testament/ auch
 hernach allen im newen Testament biß auff di-
 sen heutigen tag/ auch heut vnd von nun an biß
 an den Jüngsten tag. Vnd fürnemlich den je-
 nigen/ so seiner Güter/ der leiblichen vnd Geist-
 lichen nit allein würdig vnd fähig seynd/ sonder
 solche auch mehrmaln/ ernstlich/ von ihme bege-
 ren. Dieweil aber nit ein jeder Mensch oder
 knecht/ des Menschen vnd wahren GOTTES
 Christi/ diser oder jener/ vil weniger allerley/
 sonder etwan anderer vnd nur etlicher Güter
 vnd Gaben GOTTES/ fähig ist/ gibt GOTT
 nit allen einerley/ auch nit einem allerley Ga-
 ben vnd Güter/ sonder/ disem dise/ einem ande-
 ren andere. Wie dan auch der H. Paulus hier-
 von gar recht vnd wol gelehrt hat: Es seynd
 mancherley Genaden/ aber es ist ein Geist: vnd
 es seynd mancherley ämpter/ aber es ist ein
 Herr: vnd es seynd mancherley krefftten/ aber
 es ist ein GOTT der da wircket alles in jeder-
 mann. In einem jeglichen werden geoffenbaret
 die Gaben des Geists zum gemeinen nutz. Ei-
 nem wirdt geben durch den Geist zu reden von
 der Weißheit: dem andern wirdt gegeben zu re-
 den von der erkentnuß nach demselbigen Geist/

Allen Men-
 schen vnd je-
 der zeit thei-
 let Gott sei-
 ne Güter
 auß.

Einer ist di-
 ser/ ein an-
 derer einer
 anderẽ Ge-
 nad Gottes
 fähig.

1. Cor. 12.
 Lehr des
 H. Pauli.

n s einem

auch
 S wer
 n/ zur
 gethon
 as ist/
 id wol/
 Men
 e ihm
 einem
 stam-
 d vnd
 ge der
 steck/
 wor
 Reher/
 Men
 /dann
 tten/
 Men
 hr bo
 kom
 n das
 e) daß
 n selig
 en mo
 t seine
 len/ ob
 seynd
 Mensch
 emlich
 nedey
 ungs

einem anderen der Glaub nach demselbigen Geist/ einem anderen die Genad gesunde zu machen/einem anderen Wunder zethun zc. Dis aber alles wirckt derselbige einige Geist/ vnd theilet einem jeglichen auß/ nach dem er will. Eben hierauff gehn auch im heutigen Euangelio dise wort Christi: Vñ einem gab er fünf centner/dem andern zween/dem dritten einen/einem jeden nach seinem vermögen. Das ist/ Dem jenigen knecht/ der (wan er nur selbstn gewölt hat) einweder durch Predigen/ Schreiben/ lehren/ ermanen/ rath geben/ weisheit/ Vorstehung/ Regierung/ beschützung der Armen/ vil frucht vnd nutz hat nit allein schaffen könden/ sonder auch wöllē/deme hat GOTT hierzu desto mehr Gaben/ Gnaden/ Verstand vnd beystand verleihen wöllen. Einem andern aber/ so nit also vil verrichten/ nutz vnd frucht schaffen hat könden/hat GOTT auch so vil nit aufflegen wöllen/ sonder andere vnd weniger Güter vnd Gaben mittheilen wöllen/ dieselbigen solle er nach seinem vermögen wol anlegen vnd recht gebrauchen/so soll auch er seiner belohnung nit gerathen/seitemaln er gethon was er vermögt hat.

Nun ober ein lange zeit (dis heutig Euangelium kan nit von wort zu wort widerholet noch außgelegt werden/dann die zeit einer Predig hierzu vil zu kurz ist) kam der Herr diser knechten/nach deme die zween ihr Pfund wol angelegt / der dritte aber verborgen hett) vnd

hielte

Welcher vil
guts voln
bringen wil/
dem gibt
Gott vil
Gnad.

hielte rechnungschafft mit ihnen. Disß wirdt
 geschehen vnd erfüllet werden/ nit allein zur zeit
 wann sich leib vnd Seel scheiden/ sonder auch
 allen zu mal/ do auch leib vnd Seel widerumb
 bey einandern seyn werden am Jüngsten tag/
 als dann müssen/ wie Christus/ die Propheten/
 vnd Apostel lehren/ alle knecht/ ja alle Men-
 schen/ Bleubig vnd Bngleubig/ frumb vnd
 Vnfrumb/vor dem Richterstuß Christi erschei-
 nen/ vnd ein jeder empfahen nach deme er Ca-
 tholisch oder Vncatholisch/ frumb oder vnfrum
 gewesen ist/ nach deme er vil oder wenig gu-
 tes gethon/ nach deme er seinen Centner vnd
 Pfund/ so er von GOTT empfangen/ wol
 oder vbel angelegt/ vil oder wenig nutz damit
 geschafft hat.

Als nun der Herr also mit seinen knechten
 Rechnungschafft hielt/ kame ihme der erste für
 vnd sprach: Herr/du hast mir fünff centner
 zugestellt/ sihe da/ ich habe damit andere
 fünff centner gewonnen. Also saget auch
 der ander so zween centner empfangen/
 vnd zween andere damit gewonnen heft.

Dise beide knecht seynd vleissig gewesen/ ein jed
 nach seinem vermögen vnd Gaben. Die Kunst/
 Geschicklichkeit/ Weisheit/ Rath vñ That/ so ih-
 nen GOTT vergönt vnd mitgetheilt hat/ haben
 sie bey ihnen nit verligen lassen/ sonder solch
 gebraucht/ wol angelegt/ die Sünder gestrafft/
 die vnwissenden vnderrichtet/ die Bnglaubi-
 gen bekert/ die irrenden auff den rechten We-
 ge ge-

Wan Gott
 Rechnung-
 schafft mit
 uns halten
 werde.

Joan. 5.
 Matth. 23.
 Dan. 12.
 Job 19.
 Ezech. 37.
 1. Cor. 15.

Vleissig
 knecht/ so ge-
 thon was
 vnd wie vil
 sie gekönt
 haben.

ge ge-

ge gewisen/die francken vnd gefangnen getrost.
die Armen/hungerigen/durftigen/gespeiset vnd
getrenckt: Witwen vnd Waisen beschützet/ ihe
not haben sie ihnen lassen angelegē seyn. 2c. Vnd
in summa/ GOTT dem Allmechtigen zu lob vñ
zu Ehrē/ der Christlichen Catholischen Kirchen
zu wolfart/erhaltung vnd erweiterung dersel-
bigen/ihrem Nechsten zu gutem/ ihrer eignen
Seel zu trost vnd zu hilff/haben sie gethon (ein
jeder nach seinem Centner vnd vermögen) was
sie nur haben thun könnē/also/ daß auch GOTT
vnd die Welt haben bekennen müssen/ daß sie ihr
empfanges Pfund vnd Gaben GOTTES wol
angelegt haben.

Belohnung
der getrewen
knechten.

Frewdes
Herren.

Nun müssen wir jekund auch/ doch mit we-
nig worten/von ihrer belohnung handeln. Zu er-
nem jeden vnder disen beiden spricht der Herr:
Ey du frommer vnd getreuer knecht/
darumb/daß du bist ober wanigem getrew
gewesen/wil ich dich setzen ober vil. Gehe
eyn in die frewd deines Herrē. Dis wenig/
darüber dise knecht frumb vnd getrew gewesen
seynd/seynd obgemelte Gaben/ Gnaden/ vleiß/
mühe vnd arbeit so sie gehabt/ vnd vil nutz da-
durch geschafft: welchs alles wol nit wenig/son-
der vil ist/darumb aber wirdt solchs wenig ge-
nennt/ zu rechnen gegen der belohnung so sie
hierumb empfaben sollen: Nemlich die frewd
des Herren/ das ist/das Himmelreich/die Ewi-
ge frewd vnd Seligkeit/ dieselbige ist so groß/
daß kein auge niemaln gesehen/ kein ohr gehört/
ist

ist auch in keines Menschen Herzen nie gestigen/ dieselbige sollen sie iekund bekommen/ immer vnd Ewig besitzen. Vnd diß von den jeningen so ihr Pfund wol angelegt/ vnd von ihrer belohnung.

Wann wir alda solten vnd wolten vom heiligen Keyser Heinrich/ desse Feyertag wir auff heut halten/ handlen: Was vnd wie vil Centner er empfangen/ wie er dieselbigen gebraucht vnd so wol angelegt/ vnd von seiner belohnung/ wurde hierzu nit allein dise halbe sonder etlich ganze Predigen nit genug sey. Enug seye es auff diß mal zu wissen: Daß er vil gutes gethon hat sampt seinem H. Ehgemahel vnd doch Junckfrauen Künigundis/ anden Stiffren/ Hildesheim/ Magdeburg/ Straßburg/ Meissen vnd Merßburg/ welche zum theil von Unglaubigen Hungern vnd anderen Schlaunen elendiglich verheert vnd zerstöret waren. Fundiere Bamberg von neuwem/ bauwet daselbsten vil Kirchen/ wie an S. Künigundis tag gehört. Krieger wider Polen/ Behem vnd Mehrren/ vñ andere Unglaubigen/ Schlaunen/ bracht vil zum Christlichen Glauben zc. Hielte sich dermassen biß an das ende seines lebens/ sampt der H. Künigundis/ (dann er auch Christum vnd den Gottesdienst/ seines Guts einen Erben eyngesetzt hat) daß GOTT vnd die Welt bekennen musten/ daß er sein Pfund wol angelegt/ vnd derhalben auch in die fremd des Herren eyngegangen ist/ alda er auch iekund vnd jeder zeit GOTT für vns bitten wölle.

Keyser
Heinrich hat
vil guts
gethon/ vñ sein
Pfund wol
angelegt.

Lernen

Lernen wir derhalben auß diesem ersten Theil vorhabender Predig/ nit allein/ Das dieser Mensch Christus ist/ Das wir alle seine knechte seynd/ Das er widerumb zu seinem Himmelschen Vatter gereiset ist/ Das er seine Güter/ Gnaden vnd Gaben des H. Geists außgetheilt hat vnd noch teglich außtheilet: Sonder merken vnd behalten müssen wir auch/ Das wir das jenig Pfund oder Centner/ so vns Gott geben hat/ wol anlegen vnd recht gebrauchen/ frucht vnd nutz damit schaffen/ (hieruon im folgenden Theil weitläuffiger) auff das auch wir in die frewd des Herren eyngehen/ vnd Ewig selig werden mögen.

In den zweyen knechten / deren der eine fünff Centner/ der ander zweyen empfangen/ haben wir bißhero gehandelt/ wie sie sich verhalten/ vnd von ihrer belohnung gehört. Tzweyt wöillē wir auch vom dritten knecht lehren/ der nur einen Centner oder pfund empfangen/ dasselbig nit angelegt/ vnd von seiner straff.

Nach deme der Euāgelist auß dem H. Mund Christi erzelt hett/ wie sich die jenigen zweyen mit ihren Centnern verhalten/ das sie nemlich dieselbigen angelegt/ vñ fünff mit fünffen/ zweyen mit zweyen gewonnen haben/ spricht er vom dritten/ der einen Centner empfangen hett/ also: Der aber einn empfangen hett/ gieng hin/ vnd machet ein Grub in die Erden/ vnd verbarg seines Herren gelt. Durch dieses

Gelt des
Herren.

Gelt

Welt des Herren/ wirdt eben verstanden das je-
 nig/ was droben vom Centner geantwortet/
 nemlich allerley Gnaden vnd Gaben des H.
 Geists/welche alle des Herren seynd/dan er thei-
 let sie auß/ weme vnd wie er will. Nun hette
 der Herre GOTT disem Menschē oder knecht/
 gleichwol nit so vil Centner als den anderē zwey-
 en geben/dann er so vil nit fähig war: hat er ih-
 me doch so vil mitgetheilt/ daß zu seinem vermö-
 gen gnug gewesen were/ GOTT vñ ihme damit
 zu gewinnen/vnd etwas verdienen. Er aber hat/
 eintweder auß nit achtung/ auß hinleßigkeit/ auß
 faulkeit/ auß geizigkeit/ auß mißgunst/ die Gna-
 den vnd Gaben GOTTES vergraben/ in ihme
 lassen ersticken vnd verligen/ hat weder GOTT
 noch der Welt damit gedient/ vnd seynd solche
 Gnaden vnd Gaben/ weder GOTT/ der Welt/
 noch ihme nichts nutz/ sonder (ihme) nur sched-
 lich gewesen/ wie wir dann hernach von seiner
 straff lehren vnd hören wollen.

Warhafftig ist es wahr/ vnd ist (leider) nur Solcher vn-
 all zu wahr/ also/ daß keiner beweisung bedarff: getreuer
 Daß diser fauler/böser/vngetreuer/vnfleissi- knecht seynd
 ger knecht vil vil/ ja vnzalbarlich vil/ diser zeit diser zeit vn-
 auch vnder vns Christen/vnder beiderley Sten- zalbarlich
 den/ Geistlich vnd Weltlich/ zu finden seynd/ vil.
 welche warhafftig auch ihrer Straff nit gera-
 then werden.

Etlichen fürtreffentlichen Vorstehern der Vñ Geis-
 Christlichen Kirchen/ als Cardinalen vnd Bi- lichen Pre-
 schouen/ hat GOTT vil Pfund / herrliche vnd lichen gibe
 sonderliche Gnaden vñ Gaben/ Kunst/ geschick. Gott vil
 Centner.
 lig.

ligkeit/ verstand vnd weißheit für andern verll
 hen/also/das sie solten vnd wol könten/ wann sie
 nur wolten/ihren Vnderthonen/ allen Schäfflin
 ihres Stuffs vnd Bistumbs/ vleissig vorstehen
 vor den Weltlichen vnd Geistlichen feinden/ vor
 dem Teufel/ falschen Propheten/ Keker/ falscher
 Lehr vnd Kekerer behüte/ so eine enngewurkelt/
 außreuten/ vnd ihre Schäfflin bey der reinen
 Catholischen Lehr vnd weide der H. Sacramen
 ten erhalten. Was geschicht diser zeit? Wann
 ich die warheit soll sagen/ (wie ich dann jederzeit
 zu thun schuldig bin/ es betreffe Bischoue oder
 Burger) so muß ich bekennen: Das hierinnen
 schier ein meynung vnd gelegenheit/ als wie mit
 andern vnd allerley Stenden/ hat. Der eine ist
 fleissig/ der ander vnfleissig. Der eine gebraucht
 sein Pfund recht vnd wol/ der ander mittelmeß
 sig/ der dritte verbirget es gar: Der eine bleib/
 so vil möglich/ selbstem Personlich in seinem
 Bistumb/ hat seine hierzu taugenliche Catholische/
 Râth/ mit denen er alles was fürfelt/ wie diser
 oder jener sach zu thun/ diesem oder jenem fürzo
 kommen sey/ vleissig erwögt: wie die nit Catho
 lischen widerumb Catholisch/ vnd die Catholische
 bey dem Catholischen Glauben erhalten
 mögen werden/ ernstlich beherktigt. Sie schaffen
 die Vncatholischen, Pfaffen vnd vermennten
 Predicanten ab/ bestellen Catholische an die
 statt. Lassen sich mühe vnd Arbeit/ Gelt vnd
 Vncosten nit tawren gelegrte vnd gute Predi
 ger zu bestellen/ die nit allein vor mirtag das
 Euang

Ein Predi
 ger soll die
 Warheit
 sagen.

Ampt eines
 rechtschaff
 nen Bischo
 nes.

Euangelium/ sonder auch nach mittag den Ca-
tholischen Catechismum vnd Kinder lehr predi-
gen/ auff daß also die iunge Catholich gepflan-
get/ Catholisch auffgezogen/ Catholisch leben/
Catholisch sterben/ Catholisch selig werden/ auff
daß sie sampt ihren von GOTT vertrauten
Schäfflin in die fremd des Herren eyngehen mö-
gen. Vnd diß heisset das pfund recht gebraucht.

Anderer seynd/ so gleichwol wissen/ daß sie vor
GOTT rechnungschafft geben müssen wie sie ihr
Pfund angelegt/ vnd ihren Schäfflin in Geistli-
chen vnd Weltlichen sachen vorgestanden sey-
en/ vermeynen aber villsicht/ eintweder sie wer-
den Ewig leben/ oder es seye weder Seel/ Hell
noch Teufel/ oder aber sie müssen/ sie wollen oder
wollen nit/ in die fremd des Herren eyngehen:

Seitemaln sie nit allein zu zeiten für ihr Person
(welchs nit allwegen geschehen kan) ihr em-
pfanges vnd schuldigs pfund nit gebrauchen/
sonder erwann anderen/ vnd zwar solchen zu ge-
brauchen beuelhen/ alda zu zeiten nit mehr auß-
gerichtet wirdt/ als wann man eintweder ein
Esel zur Sackpfeiffen stellet/ einen Narren vber
Eyer setzet/ oder aber ein Kaken nach Schmeer
schicket/ einen Wolff zum Ganshüter/ vnd den
Teufel zum Kirchenpfleger machet zc. Was
hierauff Christlichs vnd Catholisch volgen müs-
se vnd täglich volge/ ist leider jedermann nur zu
wol bewust/ dann daß einer langen nachfor-
schung bedörffe. Beuorauff/ seitemaln auch der
anderen Geistlichen nit wenig seynd/ so auch
Pfarren vnd Seelsorg auff ihren halß laden/

o (dauon

Catechismū
soll man
predigen.

Hinleffige
Bischöue.

Nichts kön-
dige od halb
catholische/
ja erwann
gar Kezer-
sche leut/
werde diser
zeit von vil
gebraucht.

(dauon Keyser Heinrich vnd Königundin auch Lucas nichts geschriben) vnd nit allen selbstn Persönlich nit versehen wöllen/ noch daß solchs durch andere Geistliche vnd Catholische/ sonder etwann durch vermeynte Pfaffen/ durch Leyen vnd vermeynte Predicanten/ versehen werde/ sich weder vor GOTT noch vor der Welt/ nit/ weder fürchten noch schamen. Was aber solche leut für ein belohnung ja straff/ haben werden/ werden sie bald hernach anhören/ vnd/ wann sich leib vnd Seel schewden/ erfahren.

Die dritten vnder obgemelten vergraben vñ erstrecken ihr empfanges Pfund etwan ganz vñ gar: auß Geizigkeit der zeitlichen Güter/ auß Ehrgeizigkeit diser Welt/ auß lust vnd liebe zu wohnen in andern Ländern/ werden sie dahin gebracht/ daß sie weder ihres Pfunds noch ihrer Schästlin nit sonderlich vil achten/ kommen etwan in vier/ fünff/ oder zehē jaren kaum ein mal in ihr Bistumb/ ligen nur jimmer zu Rom auff der faulen seiten/ warten ihrem Teutschen brauch vnd Welschen brauch auß. Sollen dann diese auch vleissige Hirten ihrer Schästlin seyn? Sie lassen alles gut vnd krumbe Neun gerad seyn/ wann sie nur die Milch vnd Wollen haben/ es ergehe gleich den Schästlin wie GOTT oder der N. wölle. Welcher ohren zu hören hat/ der höre. Wann ich vbel geredt hab/ so bezeuge es daß vbel geredt sey.

Pfarherrn
vnd Predi-
ger müssen

Es werden aber auch wegen ihres empfangen Pfunds zur rechnungschafft gehalten die Pfar

Pfarhern (vñ beuor auß die jenigen/so Pfarren
 haben/ könden vnd wöllen selbstn nit predigen/
 noch Priester werdē/ vñ lassen doch solche durch
 gelehrte leut vnd Prediger nit versehen) vnd
 Prediger/ wie sie ihr Pfund anlegen/ gebrau-
 chen oder verbergen/ ihren vertrauten Schästlin
 mit lehren/ predigen vnd Sacrament reichen
 fleissig oder vnfleissig vorstehn. Die täglich erfa-
 rung bringt's mit sich: Daß GOTT manchem/
 kunst/geschickligkeit/wolredēheit/ Gnad zu Pre-
 digen vnd Schreiben/ das ist/ Schriftlich vnd
 Mündlich lehren/ für einem anderen mitge-
 theilt/also/daß er mit Schreiben vnd Predigen
 in der Catholischen Kyrchen mercklichen nutz
 schaffen könte/darüber GOTT vñ die Welt ein
 wolgefallen hett. Was geschicht? Die Pfründ
 ist zu groß/ oder derselbigen zu vil/ der Bauch ist
 zu feist/ der Beutel zu schwer/ die Hofsuppen zu
 gut/ der Hofbecher zu vol/ der Kopff zu toll/ also/
 daß man weder lehren/ Predigen/ noch schreiben
 kan noch wil/ nit angesehen auch/ daß Leibs
 schwachheit desse kein vrsach noch ver hinderung
 ist. Werden derhalben auch wir also vor dem
 gerechten Richter Christo nit bestehn mögen.

grosse rech-
 nungschafft
 geben.

Es habē aber auch die Weltlichen ihre Cent-
 ner vñ Pfund von GOTT empfangē/ sie müs-
 sen auch nit weniger als wir Geistlichen derowe-
 gen rechnungschafft geben. Etliche haben Ber-
 stand vñ Weißheit/ daß sie mit einem guten heil-
 samen Rath einer gāzen Gemein/ disem oder je-
 nem Menschē köndē nutz vñ hüfflich seyn/ Wit-
 wen vñ Waisen helfen beschützen vñ beschirmē.

Die Welt-
 lichen haben
 auch ihren
 Centner von
 Gott em-
 pfangen.

Andere haben Gewalt/vil leut vnd Vnderthe-
nen/das sie künden den Catholischen Glauben
helffen handthaben: Andere vil Gelt vnd Gut
das sie die Armen bedencken sollen/ ihnen auch
helffen künden/wann sie nur wöllen. Wegen die-
ser vnd anderer empfangnen pfunden/ müssen
Eustliche vnd Weltliche/ wann sich Leib vnd
Seel scheiden/ rechnungschafft geben: welcher
nun wol bestehn vnd ein reichliche belohnung
von GOTT empfahen vñ in die fremd des Her-
ren eyngehen wil/ der wisse sich in seinem Leben
darnach zu halten.

Straff der
vnnützen vñ
blasphigen
Knecht.

Die verdä-
pnen hilff
nichts mehr.

Nun wöllen wir auch/ zum Beschluß diser
Predig/ die Straff des vnsteissigen knechts/ in
sein Pfund verborgen/ anhören: Nemet von
ihme den Centner/ vnd gebt ihn deme der
zehen Centner hatt zc. Aber den vnnützen
knecht werfft in die eusserste finsternuß: da
wirdt seyn heulen vnd zeenklappern. Die
weil diser knecht nit/ wie die anderen zween/ in
des Herren fremd/ sonder in die Ewigen Ver-
damnuß eyngehen solt/ bedorfft er ferners nit
mehr des Centners/ Pfund/ Güter/ Gnaden
vnd Gaben GOTTES/ dann er albereit immer
vnd Ewig verdampt war/ dafür ihne sein Cent-
ner vñ Pfund nichts mehr helffen mocht. Weil
er sich dann desselbigen vnwürdig gemacht vnd
nit gebraucht hette/ must es von ihme genomen/
vnd einem anderen/der solchs anlegen vnd brau-
chen wurde/ geben werden. Vnd die fremd/ die er
wegen dises Centners/ do er ihn angelegt hett/ im

Im Himmel solt gehabt haben/ ist einem anderen
 geben worden zu seiner frewd/ seitemaln er sich
 wol gehalten/ vnd durch sein forge/ vleiß/ mühe
 vnd arbeit solchs wol verdienet hat. Also werden
 Gnaden vnd Gaben geben dem jenigen/ so der-
 selbigen zu vor vil hat/ vnd dieselbigen brauchet.
 Dem aber/ der wenig hat/ brauchet sie doch nit/
 werden auch dieselbigen genommen/ vnd einem
 anderen geben/der solche brauchen kan vnd wil.
 Die ander straff dises bösen vnd faulen knechts
 ist/ daß er soll in das Hellsch sewr geworffen/ im-
 mer vnd Ewig verdampt werden/ in Ewigkeit
 wohnē an einem solchen ort/ alda nichts ist/ dan
 heulen wegen der grossen Hiß so in der Hell ist/ Hellsche
 vnd zeenklappern wegen der grossen kette: al- Peyn
 da nichts ist/ dann angst vnd not/ Jamer vnd
 Tod/ Schwefel vnd Bech/ sewr vnd Wasser/
 Teufel vnd Hell/ohn ende in Ewigkeit.

Die ander
 straff.

Ich achte jekund vnnötig/ mit verlengerung
 diser Predig/ mir/ dir/ den Geistlichen vnd Welt-
 lichen/ so ihr Pfund nit anlegen noch gebrau-
 chen/ weitleunffig erweisen wollen/ was sie für
 ein Straff von GOTT empfahen werden/ sei-
 temaln GOTT kein anseher der Personen/ son-
 der ein Gerechter Richter ist/der vns gewißlich
 auch eben dise Straff diß heutigen knechts/ do
 wir auch wie er dieselbige verschulden/ mitthei-
 len wirdt: nemlich wirdt er von vns nemmen
 alle Gnaden vnd Gaben/ so er vns darumb ge-
 ben daß wir sie anlegen vnd gebrauchen sollen/
 vnd einem andern geben/der solche gern gebrau-
 chen wil. Fürs ander wirdt er seinen Engeln be-

uelhen/ vns zu werffen in die euffersten finsternuß. Derhalben so lasset vns/ ihr geliebten in GOTT/ vleiß ankeren/ vnser Pfund recht vnd vleißig zebrauchen/ GOTT vnd der Welt/ seiner Christlichen Catholischen Kyrchen auff waserley Mittel/ weiß vnd wege wir immer können dienen/ nit so faul vnd träg seyn/ nit so hinleßig vnd schläfferig seyn/ auff daß nit auch wir in die euffersten finsternuß mit diesem bösen knecht geworffen/ sonder mit den zwey ersten in die frewd des Herren IESV eyngehen/ vnd ewig selig werden mögen/ Amen.

Gebett zu
Christo vn-
serm Herrē.

Al Bermal sehē wir/ du gütiger GOTT Herr IESV Christ/ daß du gern woltest/ daß niemandts verdampft sonder jedermann selig würde/ darumb du einem jeden Menschen/ nit allein nach seinem vermögē vil oder wenig/ dise oder andere Pfund gibest dir damit zedienen vnd ihm verdienen/ sonder mit hellen worten zu vor gesagt hast/ daß der jenig Mensch/ so seine Pfund brauchet vnd wol anlegt/ in die Ewigen frewd eyngehn soll/ vnd der ander in die Ewigen finsternuß geworffen werden. Nun bitten wir dich ganz vnderthenig vmb beystand/ daß wir deine empfangne Gabē wol anlegen/ recht gebrauchē/ dir/ deiner Kyrchen/ vnserm Nächsten damit dienen vnd vil gewinnen können/ auff daß wir der Ewigen Finsternuß vber-

Am Feyertag der H. Margarethe. 213

uberhaben / vnd mit dem H. Keyser Heinrich / desse Feyertag wir auff heut halten / vnd allen außerwönten in dem frewd eyngehen mögen / Amen.

Am Feyertag der heiligen Junckfrauen vnd Martyrin Margarethe /
Euangelium Mar. xij.

Am 13. tag
Juli.

UND IESVS setet sich gegen dem Gotteskasten / vñ schawet wie das volck Gelt eynleget in den geltkasten / vnd vil Reichen legten vil eyn. Vnd es kam ein arme Witwe / vnd leget ein zwey Meitlin / die machen ein Heller. Vnd er rieß seine Jünger zu ihm / vnd sprach zu ihnen: Wahrlich sage ich euch / daß dise arme Witwe mehr hat in den Geltkasten gelegt / dann alle die eyngelegt haben. Dann sie habē alle von ihrem vbrigen eyngelegt / dise aber hat von ihrer armut vnd allem das sie hatt / ihr ganze narung eyngelegt.

Luc. 21. a
Reg. 12. 6

Wahrlich sage ich euch / daß dise arme Witwe mehr hat in den Geltkasten gelegt / dann alle die eyngelegt haben. Marci xij.

o 4

Dis

Am Feyertag des H.



Ih sekund gehörtes Euangelium wirdt sonst nit auff heutzonder auff den Feyertag der Witfrauen (so diser einer oder etlich im Teutschland feyerlich gehalten werden) gepredigt/ auff heut aber/ nemlich auff den Feyertag der H. Junckfrauen vnd Martyrin Margarethe/ einwedder das Euangelium von den Zehen Junckfrauen/ oder vom verborgnen Schatz im Acker. Seitmaln aber dise beide Euangelien/ das erst an S. Katharina/ das ander an S. Künigundis tag/ gehandelt seynd worden/ vnd wir in diser kleinen Postill keiner Witfrauen tag nit begreifen/ haben wir auff heut gehörtes Euangelium abhandlen wollen/ auff das nit ein Euangelium mehrmaln/ ein anders aber kein mal tractiert werde. Stehet doch nichts desto weniger einem jeden frey/ vnder disen dreyen Euangelien auff heut zu lesen vnd Predigen/ welches er wil/ soll auch in einem jeden Bistumb das jenig/ so in desselbigen Stiffes Missal vermerckt/ im heiligen Ampt der Mess gesungen werden.

Summa
dis heutgen
Euangeli.

Gehörtes Euangelium handelt fürnemlich hieruon: Wie die Reichen vnd Armen zu Jerusalem im Tempel Salomonis in Geltskasten ihr Gaab/ Schanckung vnd Almosen engelegt haben zur aufferbawung vnd auffenthaltung des Tempels/ der Priester vnd der Armen oder der Witwen. Hiernon wollen wir in vorhabender Predig dis handlen: Erstlich/ vom

Junctfrauen Margarethe.

215

vom Almusen oder eynlegung der Reichen in Gottes kasten/ vnd ihrer belohnung. Zum andern: Vom Almusen vnd eynlegung der Armen/ vnd ihrer belohnung. Hierzu wölle mir vnd euch GOTT seinen Segen gnediglich verleihen.

Thellig vnd
Inhalt diser
Predig.

WAs dann nun den anfang diß heu-
rigen Euangelij vnd ersten Theil di-
ser Predig belangen thut/ spricht der
h. Euangelist Marcus also: Vnd IESVS
setzet sich gegen dem Gotteskasten/ vnd
schauwet wie das Volck Gelt eynleget in
den Geldkasten/ vnd vil Reichen legten vil
eyn. Diß seynd die wort des ersten Theils vor-
habender Predig/ darauß wir etliche Punctlin
zu mercken haben.

Mar. 12.

Disen Gottes oder Geldkasten nennen wir
gemeinglich den Stock/ deren/ je in einer gro-
ßen kyrchen zween/ drey oder mehr seynd/ etliche
vnd an etlichen orten/ diser ursach: Daß die Rei-
chen vnd Armen ihr Almusen dareyn legen/ auff
daß das Gotteshaus dauon gebawen vnd in
seinem Gebew erhalten werde. An anderen or-
ten wirdt dasselbig Gelt den Armen außgespen-
det. Denselbigen Behalter nennten die Jü-
den einen Gotteskasten/ darumb/ daß dasselbig
Gelt/ so dareyn gelegt/ zum Gottesdienst ge-
braucht/ oder den jenigen geben ist worden/ wel-
che den Gottesdienst versehen haben/ Dann/
als auß Theophylacto vber diß Euangelium zu
lernen/ ist dasselbig Gelt bey den Jüden eins

Geldkasten
nennen wir
gemeinglich
den Stock in
der Kyrche.

o 5

theils

theils den Priestern des alten Testaments/ zum theil den Witwen/ zum dritten den Armen zur narung vnd leiblichen auffenthaltung außgetheilt worden.

Daß sich der Herr zum Gotteskasten oder gegen desselbigen hinüber gesetzt/ vñ/ was ein jeder hineyn gelegt/ geschauwet hat/ ist nit auß fürwilt geschehen/ Auch nit darumb/ als ob er (der doch wahrer GOTT vnd deme nichts verborgē war) nit zu vor gewist solt haben/ was vnd wie vil ein jeder/ auch dise Witwe hineyn wurde legen: sonder darumb/ daß er seine Jünger etwas zu lehren vrsach vnd gelegenheit hette/ wie er dann gethon hat/ do er gesagt: Daß diß Weib mehr dann die anderen alle eyngelegt habe/ seitemaln die anderen vil mehr noch behalten dan sie geben haben/ dise Witwe aber habe alles eyngelegt vnd nichts behalten.

Christen
müssen noch
von Jüden
lernen.

Was im
haus Got-
tes verrich-
tet soll wer-
den.

Alda sollen wir Christen von den Jüden ein Exempel nehmen vnd lernen: Unser Almosen nach vnserm vermögen in den Geldkasten legen/ auff daß die Gottesheuser dauon auffgebawet/ vnd die auffgebawte in ihrem wesen erhalten/ auff daß der Gottesdienst/ als singen/ bitten/ betten/ Messhalten/ Predigen/ lehren zc. darinnen verrichtet werden: welcher vrsach auch Christus selbst sein Haus ein Bethaus genennet hat/ darinnen selbst gelesen/ gelehrt/ geprediget/ die käuffer vnd verkäuffer darauff getriben.

Wie sehr ernstlich vñ hefftig GOTT der Allmechtig das Judenuolck zur aufferbawung seines

seines Tempels ermanet / solchs zu widergelten
 versprochen / vnd die jenigen so zu seinem hauß
 nichts thun noch geben werden / zu straffen ge-
 dreuwet hab / ist allein vnd gnugsam auß disen
 worten (vber welche ich vor zwenē Jaren / fünff
 Procession Predigen / Von der Thewrung vnd
 hungers not / gemacht / auch in öffentlichen
 Druck geben hab) des H. Propheten Aggei zu
 lernen : Fasset euwer Wesen zu herken (spricht Agg. i.
 GOTT) Ihr habt vil außgeseet / vnd wenig eyn-
 bracht : ihr habt gessen / vnd seydt nit satt wor-
 den : ihr habt getruncken / vnd seydt nit erset-
 tigt worden : ihr habt euch bekleidet / vnd seydt
 doch nit warm worden : vnd welcher einen lohn
 verdient hat / der hat ihne in einen löcherigen
 Beutel gelegt. Ziehet hin auff den Berg / vnd
 holet Holtz / vnd bauwet das hauß / das soll mir
 angemem seyn / vnd wil mein Ehr drinnen erzei-
 gen / sage der Herr. Sonst sehet ihr auff vil / vnd
 wirdt euch wenig / vnd so ihrs schon heim bringet /
 so versteube ichs doch. Warumb das / spricht der
 Herr Zebaoth ? Eben darumb : Daß mein Hauß
 so wüß ligt / vnd ein jeglicher laufft vnd eilt
 seinem Hauß zu : daher hat euch der Himmel
 den Tau verhalten / vnd das Erdrich sein ge-
 wechs ic.

Wie willig vnd fleissig aber die kinder Israel
 hierinnen / nämlich in aufferbauung des Hauß
 GOTTES / in eynlegung in den Gotteskasten
 gewesen seyen / ist nit allein auß heutigem Euan-
 gelio zu lernen / alda Christus der Herr selbst
 bezeugt / Daß die Reichen vil / auch die Armen
 nach

Exod. 35.

nach ihrem vermögen/ vnd ja schier alles was sie gehabt / eyngelegt haben : sonder auch auß dem andern Buch Mose. Dann do Moses das Volck ermanet ihr Opffer/ Stewr vnd Gaben zum Tempel GOTTES zu geben/ lesen wir hier auff daseibsten also : Da gieng die ganz Gemein der kinder Israël auß von Mose/ vnd ein jeglicher bracht mit ganz willigem vnd andechtigem Herzen/ dem Herren Heboffer zu machen das werck der heiligen Wohnung. Alles was zum dienst vnd zum heiligen kleidern not war/ das haben geben Mann vnd Fraw/ nämlich Armspangen/ Ohrenring/ Ring vnd Gürtel/ vnd allerley guldin Geschirr. Darzu bracht jedermann gold zur Weh dem Herren. Vnd wer bey ihm fand Gold/ gele Seiden/ scharlacken/ rosinrot/ weisse Seiden/ geissen har / rödlich Widderfel / vnd Dachsfel/ der brachts. Vnd wer Silber/ Gold/ vnd Erz hat/ der brachts zur Heb dem Herren. Vñ wer Sethim holz bey ihm fand/ der brachts zu allerley werck des Gottesdiensts. Vnd welche weisse Weiber waren von herzen/ die brachten ihr Spinwerck von gelber Seiden/ scharlacken/ rosinrot/ vnd weisser Seiden/ vnd geissen Har. Alle ding gaben sie mit freyem eignem willen. Die Fürsten aber brachten Dymch vnd edele eyngefaste Stein zum Schulterkleid vnd zum Brustlat/ vnd Speceren/ vnd öle zum liechtern/ vnd zu Salböle / vnd zu sehr gut Reichwerck zu machen. Also brachten alle Mann vnd Fraw mit andechtigem Herzen ihre Geschenck zu allerley werck / das der Herr gepotten hat
durch

durch Mosen/ daß mans machen solt. Alle kinder Israel brachten willige Dpffer dem Herren.

Vnd das noch mehr ist/ lesen wir im folgenden Capittel dise wort: Da verdros die Berckmeister genötiget zu kommen zu Mose/ vnd sprachen: Das Volck bringt zu vil/ mehr dann not ist. Da gepott Moses daß man öffentlich aufruffen ließ durchs Leger: Niemand bring zum Berck der heiligen Wohnung/es sey Man oder Weib. Da hörten sie auff ihre Gaben zu bringen.

Wie eifferig vnd ernstlich vnser Christliche Catholische Berckeltern Seligen im Neuen Testament/ so bald sie Christen worden seynd/ hierinnen den kindern Israel nachgeuolget seyn/ erweisen vns in allen Ländern die stattlichen Thumbkyrchen/ Stiffren/ Pfarrkyrchen vnd allerley Gotteshäuser/ deren schöne herrliche vnd in grosser anzahl auch im Teutschland noch heutig tags gnugsam vorhanden seynd/ als weniglich bekennen muß. Allerley Kyrchenzier/ Ornaten/ Konstranken/ Sarchen/ Kelch/ Paten/ Silber/ Gold vnd allerley Edelgestein/ geben vns auch zeugnuß/ so noch täglich in den Catholischen kyrchen in verrichtung des Gottesdiensts gebraucht werden. Vil Fürsten/ auch Keyser/ (dese vns vnser H. Keyser Heinrich/ sampt seinem Juncckfräwlichem Ehgemahel Künigundis/ ein Exempel seynd) König vnd andere Potentaten haben vor zeiten nit allein etlich vnd vil tausent Gulden zu den Kyrchen

Hieron hat
Leopoldus
Bebenbur-
gus Bischo-
ue zu am-
bergein schö-
nes Büch-
lin geschriben:
Vom Eifer der
Teutschen
Fürsten zum
Catholischen
Glauben.

vnd Gottesdienst vermacht/ bey lebzeitẽ gutwillig dareyn vmb GOTTES vnd seiner Ehr willen geschenckt/ sonder auch nach ihrer ableibung all ihr Haab vnd Gut / ganze Fürstenthumb vnd Graffschafften/Edelmanns Sit/ vnd was sie vermöge / verlassen/ hierzu verschafft/ wie noch an vilen enden vnd orten vor augen.

Diser zeit
legt man nit
vil in Got-
teskasten.

Jezund aber diser zeit muß Christus lang bey dem Gotteskasten sitzen/biß daß die Reichen kommen vnd vil eynlegen/ oder auch die Armen nach ihrem vermögen. Ich sihe jezund keine Thumbkyrchen / Stifften / Pfarrkyrchen/ oder sonsten Kyrchen auffbauwen/ noch die auffgebawten in ihrem wesen erhalten. Ist zu besorgen/do wir nit albereit Gottesheuser in zimlicher anzal von vnsern Catholischen Voreltern seligen empfangen hetten/ wir müßten den Gottesdienst in kleinen Capeln oder vnder dem hellen Himmel volnbringen. Wir sehen auch teglich/ do gleich ein Dorff oder Markt jezund von neuwem auffgericht vnd gebawet wirdt/ so ist die Tafeln oder Schenckhaus das erste/ so man auffrichtet/ das ander ist der Tanzboden/zuletzt erst das Gotteshaus/ wann es ja so wolgerath daß es nit gencklich vnderlassen wirdt.

Tanzheuser
bauwet
man jezund
für Gottes-
heuser.

Etliche andere vnd vil tausent diser zeit seynd/ welche sich selbstẽ doch auch für Christen halten vnd nennen dörfen/ so nit allein nichts in Gotteskasten legen/ zu den Gottsheusern vnd Dienst GOTTES nichts verschaffen/ sond seynd willig vnd geneigt/ hurtig vnd bereit/die Stifften

ten/Klöster/Pfarkirchen/vnd allerley Gottes-
 heuser sampt allem Eynkommen / Zins vnd
 Gült/ Kyrchenzier / Kelch vnd Monstranzen/
 Silber vnd Gold/ Edelgestein vnd allerley Ge-
 schmuck/ Samat vnd Seiden/ Mäntel/ Mess-
 gewand/ Leutenröck/ vnd was sie darinnen fin-
 den/ heraus zu nemmen / gleichsam als wann
 solchs alles von vnsern Catholischen Eltern
 seligen/ ihnen vnd nit GOTT noch dem Got-
 tesdienst gestift/ vermeynt vnd geschafft were.
 Welche vnd Wer dann nun solche leut vnd Kyr-
 chenrauber seyen/ wil ich niemandts genenne
 noch beschuldigt haben/ sonder einen fürnemen
 Predicanten bey den Lutherischen/ so noch heu-
 tigs tags im leben/ der sich auch/do er zu rede ge-
 stellt/ohne zweifel wurde wissen zu verantworte/
 wöllen wir hieruon Schrifftlich also vernem-
 men: Bey den Lutherischen (spricht der Lutherisch D. Jacob
 Predicant) reisset an vilen orten die Herrschafft das Schmidlin
 Geistlich Gut zu sich / nimpt der Kyrchen vnd den in der vler-
 Pfarren das Eynkommen / vnd was darzu gestift ten Predig-
 tet worden / vnd gibt dem Pfarrer dafür strow vnd wider die
 spreuwer. Daher geschicht auch / das Heilose leut Schwenc-
 (ist gewißlich wahr / welchs wir Catholischen feldianer.
 GOTT vnd euch Lutherischen gar sehr klagen/
 das ihr Predicanten Heilose leut sendt) aufge-
 stellt werden zu predigen / vnd seynd die besten Predi-
 ger/ die wenig besoldung zu ihrer auffenthaltung nem-
 men/ dadurch wurde die Jugend vom studieren abge-
 schreckt / vnd an statt gelehrter/ verstendiger Prediger/ Predicantē
 Esel vnd Narren gebraucht/ vnd zu besorgen / wo man bey den Lu-
 also fortfaren wirdt / die Pfarren ganz vnd gar ver-
 therischen/ lassen vnd leglich gar niemant mehr haben werden/ der Esel vnd
 das Volk in rechter erkantnuß Gottes lehre vnd vn-
 Narren.
 derweise.

derweise. Derhalben die Kirchenrauber Gott an
 jüngsten tag für disen Geistlichen Diebstal (grob
 gnug) vnd Kirchenraub ein schwere Rechnung ge-
 ben/ vnd aller deren Verdammuß auff ihrem Hals tra-
 gen müssen/ die durch mangel rechtschaffner Predi-
 ger an ihrer Seel seligkeit seynd versampt worden.
 Bissher Schmidlin. Bey diser hellen öffentli-
 chen in Druck gegebner Antwort gemeltes lu-
 therischen Predicanten (deren ein guter theil/
 nach seiner selbst eignen bekantnuß/ Heilose leut/
 Esel vnd Narren seynd) wollen wir Catholische
 Christen es auch gern bleiben lassen/ doch solches
 auch nit weniger/ sonder zweifels ohne mehr/
 von den Calvinischen vnd Geusischen glauben
 vnd wissen.

Caluinische
 seynd Kir-
 chenrauber.

Disen allen wirdt gewißlich Christus der
 Herr nit weniger als den heutigen Jüden zu-
 schauwen/nit wie vnd was sie in den Gotteska-
 sten legen/ dann sie nichts hineyn legen/ sonder
 wie vnd was sie heraus nehmen/ vnd nach ih-
 rem mutwilligen willen vnd willigen mutwillen
 mißbrauchen/derowegen sie/so bald sich leib vnd
 Seel scheiden/rechnungschafft geben/vnd ihr
 gebürliche straff empfangen müssen.

Lernen/ merken/ vnd behalten sollen derhal-
 ben auß disem ersten Theil vorhabender Predig/
 alle Catholische Christen/das sie auch nach dem
 Exempel dis heutigen Judenuöcklins/ nach
 ihrem vermögen in den Gotteskasten ihr Steuer
 vnd Almosen legen sollen/ auff das die Gottes-
 heuser in ihrem Gebew mögen erhalten/ auch
 die Armen leut dadurch ernehret werde/ so wer-
 den

den sie (dauon hernach) ihren lohn vnd reichliche
 besoldung bey GOTT nit verloren habē. Hütern
 aber sollen sie sich/so lieb ihnen GOTT/ ihr Seel
 vnd die Seligkeit ist/ fürchten sie anderst auch
 den Teufel/ die Hell vnd Ewige Verdammnis/
 daß sie nichts von den Geistlichen Gütern noch
 das geringste nit auß den Kirchen rauben/ auff
 daß nit der geistlich vnd gestolne Pfenning den
 Weltlichen vnd rechtmessig bekommen auffres-
 se/ vnd leib vnd Seel Ewig verdampt werden/
 dafür vns ja vnser gütiger GOTT gnedig bewa-
 ren wolle.

Auff daß aber die Armen weder zu
 gedencen noch zu klagen ursach hetten:
 Sie wolten gern vil in Gotteskasten le-
 gen/ vnd ihntn also von GOTT ein belohnung
 verdienen/ so haben sie selbstn nichts/ oder ja so
 vil kaum/ daß sie sich des hungers erwehren kön-
 den: sollen sie dann nur einen Heller oder Pfen-
 ning eynlegē/ so werden sie von GOTT vmb ein
 so geringe Gab einen schlechten danck vnd wider-
 geltung empfaben/ spricht der H. Euangelist im
 heutigen Euangelio weiter also: Vnd es kam
 ein arme Witwe/ vnd leget eyn/ zwey
 Meiln/ die machen einen Heller. Vnd
 er rieff seine Jünger zu ihm/ vnd sprach
 zu ihnen: Warlich sage ich euch/ daß dise
 arme Witwe mehr hat in den Gelickasten
 gelegt/ dan alle die eyngelegt haben. Dann
 sie habē alle von ihrem vbrigen eyngelegt.

p Dise

Dise aber hat von ihrer armut vnd allen dem das sie hat/ jr gäse narung eyngelegt.

Von Tobia
sollen wir
lernen.
Tob. 4.

Sie haben die Reichen vnd Armen dise Lehr des alten Tobie/ so er/ kurz vor seinem tod/ seinem Sohn dem Jungen Tobie geben hat/ sprechend: Nach deinem vermögen beweise Barmherzigkeit. Hastu vil/ so gebe reichlich: hastu wenig/ so befeiß dich dasselbig wenig auch gern mitzugeben. Die Reichen lernen: Seitemaln sie vil Gut/ Silber vnd Gold/ Städte/ Märckt/ Dörffer/ Schlösser/ Häuser/ Weinberg/ äcker vñ dergleichen von GOTT empfangen haben/ daß sie vil widerumb verrechnen müssen/ Dana sie die Herren/ sonder nur als Schaffner darüber gestellt seynd/ also/ daß gleich wie sie vil von ihm empfangen/ vil in seinem Namen widerumb außgeben müssen.

Reichē müssen mehr eynlegen dan die Armen.

Würde derhalben einem Reichen sehr spötlisch vnd vor GOTT nit vil verdienstlich noch belohnlich seyn/ wann er einem Armen gleich/ vnd nit mehr als er/ in Gotteskasten legen/ oder sonst den Armen leuten geben wolt: solchen würde GOTT nit mehr/ ja nit so vil/ als die heutigen Reichen Jüden/ so doch vil eyngelegt haben/ loben. Derhalben/ hastu von GOTT vil empfangen/ gebe vil widerumb. Was soll diß für ein Almosen oder Dpffer in Gotteskasten seyn/ do einer zehen tausent Gulden vermag/ vnd leget ein mal zehen Gulden in Kirchenstock oder in Gotteskasten? Diß heisset ja mit GOTT vngleich getheilt/ do einer 9990 Gulden behalt

ret/ vnd gibt GOTT 10 Gulden/ solchs Almu-
sen wirdt GOTT gar gering schehen/ vnd nit
reichlich belohnen/ sonder/ wie von den heu-
tigen Jüden/ sagen: Er hat vom vberfluß sei-
ner Reichthumb eyngelegt/ das Korn vnd
Melb hat er behalten/ mir aber die Spreuwer
vnd Kleyen geben. Dis heisset sich nit nach der
Regel vnd Lehr des H. Tobie verhalten/ alda
man nach vermögen Barmherzigkeit beweisen
soll.

Vnd was alda gesagt ist worden vom Almu-
sen so dem Haus GOTTES zu gutem kompt/
kan auch von allerley Almusen/ dadurch die Ar-
men/ Witwe vnd Waisen ernehrt/ gespeiset/ ge-
trenckt/ bekleidet vnd beherbergt/ geantwortet
werden. Es ist nit gnug/ wann ein Reicher ein
wochen ein mal/ ein tag ein mal/ einem Armen
ein Stücklin Brot/ ein Heller oder Pfening
mittheilt: mehr hat er von GOTT empfangen/
mehr soll vnd muß er widerumb verrechnen vnd
aufgeben/ wil er anderst nit mit gebundnen hen-
den vnd füßen in die eufferste finsternuß geworf-
fen werden.

Es ist aber der leidige Teufel selbst/ daß es di-
ser zeit mit den Reichen also geschaffen ist (wo
nit mit allen/ doch mit einer grossen anzal der-
selbigen) daß je reicher sie seynd/ je geistiger sie
seynd: je mehr sie haben/ je mehr sie noch bege-
ren/ vnd haben wollen: je mehr sie noch täglich
bekommen/ je weniger sie in Gotteskasten le-
gen. Ja zu zeiten seynd sie so vnbarmerzig/ daß
sie auch den Armen Lazarum vor ihrer Thür/
Dem Got-
te-kasten
vnd den Ar-
men muß
man geben.

ohne einize labung vnd Almusen tag vnd nach schreyen/zagen/klagen/rüffen/sterben vnd zeitlich verderben lassen. Begibt sichs auch bistwelen: Daß die jenigen selbst/so zu Kyrchen/Almusen vnd Heiligpfleger verordnet/ihnen selbst mehr als der Kyrchen vnd den Armen aus vergönnen/geben den Heiligen oder der Kyrchen/wan sie alle Monat ein mal/oder alle Jar ein mal/nach eines jeden orts gewonheit/den Stock eröffnen/das klein vñ weisses Gelt/ihnen selbst aber behalten sie das grobe vnd gelbe Gelt. Vnd/vermeynen sie/nit vnbillich/dann sie seynd mit dem Heilig/so der selbigen Kyrchen ein Patron ist/in die Welt zum zil geloffen/wel sie dann dem Heilig (das Bild vermeynen sie so auff dem Altar stehet/vnd weder sehen/hören/reden noch lauffen kan/wie auch zu zeiten die Mesner oder Kyrchner/ beuorauß wann sie Schneider seynd/vmb ein Wachskerzen lauffen) vorkommen/sollen sie ja billich gewonnen vnd redlich gefochten (meisterlich gestolen) haben. Also/sprich ich/wie mehr das Gelt vnd Reichthumb zunimpt/je grösser der Geiz wirdt/das die Reichen/oder doch vil vnder ihnen/weniger eynlegen in Gotteskasten/dan die Armen: es nemmen auch die Reichen mehr herauß/dan die Armen.

Mit dem Heilig vmb ein Wachskerzen lauffen.

Diß seye nun von den Reichen grug gesagt vnd angezeigt/Daß sie vor GOTT vñ der Welt schuldig seynd/nach ihrem vermögen zum Gottesdienst vnd den Armen verhilfflich zu seyn/vnd nit mit geringem vnd schlechtem Almusen/sonder

Sonder nach deme sie vil oder wenig von GOTT empfangen/ also sollē sie auch vil oder wenig widerumb GOTT geben. Dañ alles (wie Christus selbsten bezeugt/ vnd am Jüngsten tag bekennen wirdt) was sie den Armen geben (also ohne zweifel auch seiner Kirchen) das thund vnd geben sie ihme selbsten.

Matth. 25.
Was man den Armen gibe/ das gibe man Gott.

Was dann nun die Armen/ so nit vil weder in den Gotteskasten legen/ noch andern Armen geben könden/ belangen thut/ haben sie auß obgemelten Worten Christi einen sehr grossen trost zu schöpffen/ nämlich: Daß wann sie nach vermögen ihrer Armut/ in Gotteskasten legē/ oder andern/ so noch ärmer als sie seynd/ im Namen vnd Ehr GOTTES geben/bey GOTT ein grössere belohnung haben sollen/ dann die Reichen so mehr eyngelegt vnd geben/haben aber doch noch vil mehr behalten. Vnd nit vnbilllich: Dañ warum sollte oder wolte GOTT in der rechnungschafft vil vom jenigen fordern/ deme er wenig mitgetheilt hat? Wan ein jeder nach seinem vermögen Almusen gibt/ so ist vnd muß ja GOTT vnd die Welt mit ihme zu friden vñ genügt seyn. Es war ja gar wenig/ was dise heutige Witwe in Gotteskastē gelegt hatt/ nämlich nur ein Heller/ dennoch hat GOTT solche Gaab für andere alle gelobt/ vnd gesagt: Sie habe mehr eyngelegt dann die andern alle/ so Reich waren/ vnd doch vil eyngelegt hatten.

Wer nit vil hat/ kan nit vil geben.

Arme geben nit reiche Almusen.

Also/ lieber Christ/ geschichts noch gewislich auff den heutigen tag: Wan ein Armer Handwercks Mann/ so selbsten kaum souil vermag/

hat vnd weißt/ daß er sein Weib/ kind vñ Gesin
 ernehren/ vñ des betlens erwerben kan/dennoch
 Die Armen zum Hauß vnd Dienst GOTTES/oder den Armen
 werden vmb men einen Heller oder pfenning / ein stücklein
 ein kleins Brot oder dergleichen gibt/ soll vnd wirdt er
 Almusen warhafftig seiner belohnung vnd widergeltung
 grosse beloh- nit gerathen/ sonder von GOTT reichlich vnd
 nung emp- hundertfaltig widerumb empfahen.
 pfahen.

Daß aber alle Reichen vnd Armen / wegen
 ihres Almusen vnd Stewr/ so sie den Armē vnd
 der Kyrchen oder dem Gotteshausß geben/ von
 GOTT ein belohnung haben werden/ ist leicht-
 lich vnd gnugsam auß diesem heutigen Euange-
 lio zu lernen/ also der Herr nit allein zugeschan-
 wet was in Geldkasten gelegt sey worden/ sonder
 hat auch dieselbige Witwe gelobt / vnd gewiß-
 lich volgendts belohnet. So hat er auch mit auß-
 truckenlichen Worten bekennt/ Daß er am Jüng-
 sten tag richten vnd vrtheilen wolle alle Men-
 schen / nach deme sie die Armen gespeiset / ge-
 trenckt / bekleidet / beherbergt / getröst vnd heim-
 gesucht haben. Er selbst hat auch gesagt: Daß
 alles das jenig was wir hie auff Erden in sei-
 nem Namen geben werden / sollen wir im Him-
 mel an einem Schatz beysamen finden. Daniel
 bezeugt: Daß durch das Almusen geben / die
 Sünd außgelescht werde. Vnd wie Salomon
 sagt: Daß d jenig/so Almusen gibt/nit soll man
 gel leiden. Vnd welcher das geschrey der Ar-
 men nit höret/den werde GOTT auch nit hören.
 Vnd wie der H. Tobias lehret/ so lasset das Al-
 musen die Seel nit eyngehn in die Finsternuß/
 ent-

Dan. 4.

Prover. 21.

Tob. 4.

entlediget von der Sünd vnd vom Tod. Vnd:

Gut ist das Gebett mit fasten vnd Almusen geben/ Tob. 12.
 ben/ist besser dann Goldsches zusamen samlen.
 Dann Almusen geben erlöset vom tod / reini-
 get die Sünd/ vnd machet das Ewig leben fin-
 den. Dis seynd ja zeugnussen gnug/Christi vnd
 der h. Schrift / so vns klerlich erweisen / daß
 wir vmb alles das jenig so wir in Gelt oder Got-
 testkasten in den Stock der Gottesheuser legen/
 oder andern Armen leuten geben/ von GOTT
 hie vnd dort ein Reichliche besoldung haben
 sollen.

Lasset vns derhalbē/ ihr geliebten in GOTT/
 nit so geizig seyn/ GOTT mehr dann das Gelt
 lieb haben/ ihme/ seinem Tempel/ Gotteshaus/
 vnd den Armen verhilfflich seyn/ ein jeder nach
 deme ihme GOTT vil oder wenig mitgetheilt
 hat/auff daß wir vns einen Schatz im Himmel
 samlen/ den vns kein Dieb stelen kan/der vns in
 Ewigkeit nit mag genommen werden.

Die heilige Juncckfraw vñ Martyrin Mar. Von Sanct
 garetha / hat ihren Heller/ ja all ihr Haab vnd Margare-
 Gut/ ihren leib vnd leben rechtschaffen in Got- tha.
 testkasten gelegt / den bitteren tod hat sie vmb
 Christi Namens willen gern vnd gutwillig ge-
 litten. Dife heilige Margaretha/war ein Doch. Anno 300.
 ter des Heydnischen Burgers Theodosij zu
 Antiochia / vnd als bald einer Erbarn Frau-
 wen nahe bey der Stadt auffzuziehen vnd er-
 nehren gegeben. Da aber ihr Mutter starb/
 ward sie im fünffzehenden Jar ihres Alters ge-
 taufft/durch Sorg vnd vleiß ihrer Seugamen/

deren Schaf sie hütet. Do aber der Landvogt
 Olibrius fürüber reisete auß Asia/ vnd gen An-
 tiochiam kame/ daß er die Christen verfolgere/
 ließ er sie gefencklich cynziehen: vnd da sie den
 Abgöttern nit Dpffern wolt/ mit Ruten schla-
 gen/ an ein Ram auffspannen/ mit hacken so
 jämmerlich zerreißen / daß auch er sein Angesicht
 verdeckt/ damit er die gewolichen Blutuerge-
 sung nit sähe. Nachmals ward sie widerum
 herab genommen/ in ein finster gefencknuß ge-
 legt/ da ihr der Teufel in gestalt eines Tracten
 erschine/ den sie doch mit dem zeichen des heil-
 igen Creuzes vertriebe. Am nachuolgenden tag
 ward sie mit brinnenden sacklen an ihrem leib
 gebrennt/ vnd mit gebunden henden vnd füßen
 in ein faß mit Wasser gestossen: die hand aber
 giengen auff/ das faß zersprang/ vnd Sanct
 Margaretha gieng ledig heraus vor alle Volk/
 darumb auch etlich tausent Menschen an Chri-
 stü glaubtend. Margaretha aber ist endlich ent-
 hauptet worden/ vnd also ihren Heller/ Leib vnd
 Gut/redlich in fasten GOTTES gelegt/ vnd auff
 der Bekantnuß des Christlichen Catholischen
 Glaubens ritterlich gestorben. Welche auch je-
 kund/ vnd jeder zeit/ GOTT für vns bitten wol-
 le/ auff daß auch wir vns weder die Welt noch
 den Teufel/ weder Peyn/ Marter noch Tod/ von
 der Bekantnuß Christi vnd des Catholischen
 Glaubens/ nit lassen abwendig machen/ auff daß
 wir mit der heiligen Margaretha mögen selig
 werden/ Amen.

Margare-
 tha wirdt
 enthauptet.

¶ Allmecht

Junckfrauen Margarethe.

231

D Allmechtiger / Ewiger / gütiger Sebetltn zu
Gott dem
Vatter.
GOTT / Himmelscher Vatter /
der du nit allein den Jüden im al-
ten Testament ernstlich beuolhen vñ durch
Mosen gebotten hast / dein Haus zu bau-
wen / auff daß darinnen die Spffer vñ an-
dere Gottesdienst verrichtet würdē: Son-
der auch dein Sohn IESVS Christus vn-
ser einiger Trost vnd Heiland / als er auff
Erden kommen / hat achtung geben im
Tempel zu Jerusalem / was vnd wie vil /
beide / die Reichen vnd Armen in Gottes-
kasten gelegt haben / vnd ihme das Spffer
oder Gaab der armen Witwe / nit angese-
hen daß es gering gewesen / wol hat gefallē
lassen: Wir bitten dich ganz vnderthenig
vmb ein verstendigs vñ willigs Herz / daß
auch wir deinem Tempel vnd den Armen
vnsrer Gaab vnd Almusen geneigt / vnd
nach vnserm vermögen gern mittheilen /
auff daß wir vns einen Schatz im Hün-
del sammeln / der in Ewigkeit von vns nit mag
genommen werden / vnd also ohn ende bey
dir / bey der H. Margaretha / vnd bey
dem ganken Hün-
delischen Heer
wohnen mögen /
Amen.

p 5 Am

Am 23. tag
Jully.

Am Feyertag der H.
Am Feyertag Marie Magdale-
ne/ der sonderlichen Büsserin vnd liebe-
haberin Christi/ Euangeli-
um Luc. vij.



In der zeit hatt IESVM
einer vō den Pharisern/
das er mit ihm ässe. Vnd
er gieng hin in des Phari-
seers haus/ vnd setzt sich
zu Tisch. Vnd nēpt war/
ein Weib war in der Stadt/ ein Sündes-
rin: do die vernam/ das IESVS zu tisch
saz in des Pharisers hause/ bracht sie ein
alabaster büchß mit salben/ vnd stundt hin-
den bey seinen füßen/ vñ fieng an seine füß
zu necken mit threnen/ vnd mit den haren
ihres

Matt. 26. d
Mar. 14. a
Joan. 12. a

ihres hauptes zu trucknen/ vnd küffet seine
füsse/ vnd salbete sie mit salben. Do aber
der Phariseer das sahe / der ihn geladen
hett/ sprach er bey ihm selbs / vnd saget: **Luc. 15. 8**
Wen diser ein Prophet were/ so wuste er
je/ wer vnd welche diß für ein weib ist/ die
ihn anrüret: denn sie ist ein Sünderin.
Vnd IESVS antwortet/ vnd sprach zu
ihm: Simon/ ich hab dir etwas zu sagen.
Er aber sprach: Meister/ sags an. Es hat
einer/ der da gelt (od wahr) auff wucher auß
leihet/ zween schuldiger. Einer war schul
dig fünffhundert pfeñig/ der ander fünff
zig. Do sie aber nit hetten zu bezalen/
schenckts ers beiden. Sage an/ welcher vn
der denen wirdt ihn am meisten lieben? Si
mon antwortt/ vnd sprach: Ich achte der/
dem er am meisten geschenckts hat. Er aber
sprach zu ihm: Du hast recht gerichtt. Vñ
er wandt sich zu dem Weibe/ vñ sprach zu
Simon: Sihest du diß Weib? Ich binn
kommen in dein haus/ vnd du hast mir nit
wasser gebē zu meinen füßen: dise aber hat
meine füsse mit threnen genezt/ vnd mit
den haren ihres hauptes getrocknet. Du
hast mir keinen Kus gebē: dise aber/ nach
dem sie hereyn kōmen ist/ hat sie nit abge
lassen meine füsse zu küssen. Du hast mein
haupt nit mit ole gesalbet: dise aber hat
mein

Dale
lieb



SVM
seern/
Vnd
Pha
st sich
war/
ünde
tisch
sie ein
t hin
ne füß
haren
ihres

meine füsse mit salben gesalbet. Derhalben sage ich dir/ ihr werdē vergeben viel Sünde/ den sie hat vil geliebet. Welchem aber wenig vergeben wirdt/ der liebet auch wenig. Vnd er sprach zu ihr: Dir werdē deine Sünd vergeben. Da fiengen an die mit zu tusch sassen/ vnd sprachen bey ihnen selbs: Wer ist diser/ der auch die Sünd vergibt? Er aber sprach zu dem Weibe: Dein Glaub hat dir geholffen/ gehe hien im fridē.

Ihr werden vergeben vil Sünd/ dann sie hat vil geliebt. Luc. vii.

Auff disen heutigen Feyertag der heiligē Marie Magdalene/ haben wir gar ein schön/ herrlich/ lehrreiches/ vnd allen Menschen auff diser Welt ein sehr tröstlich Euāgelium. Daß wir alle Sünder seyen/ (doch einer ein grösser Sünder als der ander) Vnd daß/ welcher sagt er habe kein Sünd auff ihme/ sich selbs verführe/ vñ die warheit nit in ihme sey: Daß auch der Gerechte im tage erliche mal falle/ bezeugt vns an vilen ortē die heilige Schrift. Dann auch/ daß wann die Sünder nit werden Buß thun/ sonder also in der Sünd (in der Todtsünd) sterben/ müssen vnd werden sie auch immer vnd Ewig verderben. Auff daß aber solchs nit geschehe/ stellet vns auff heut die Christliche Catholische Kyrch für augen ein grosse Sünderin vnd Pufferin/ welcher wir (nit in

in der Sünd/ do wir aber erwann mit ihr auß
schwachheit des Fleischs/ vnd eyngebung des bö-
sen Geists/ gesündiget hetten) zur herrlichē Reu
vnd vollkommenlicher Pusz nachuolgen sollen/
so werde GOTT auch vns so wenig als sie ver-
werffen/sonder zur Pusz vñ Gnaden gern auff-
nehmen/alle Sünd vnd misserhat willig verzei-
hen/nit mehr gedenccken/ vnd alle straff wegen
der Sünden gern schencken.

Auff daß aber solchs von vns desto füglicher
ins werck möge gericht/ vnd verzeihung aller
Sünden desto ehe vnd vollkommenlicher erlange
werden/ müssen wir die History der heutigen
Püsserin etwas vleissigers erwegen/ was sie ge-
thon vnd erlangt habe/ ernstlicher betrachten/
als dann auch vnsern Glauben/ Leben/ Pusz/
Wort vnd Werck/ thun vnd lassen darnach
richten/ auff daß auch wir/ wie sie/ verzeihung
vnserer Sünd vnd das Ewig leben erlangen
mögen.

Auff daß aber solchs desto richtiger geschehen
möge/ soll auch dise Predig ordenlich in zween
Theil getheilt werden. Im ersten wollen wir
handlen vom jenigen/so Maria Magdalena im
Hauß Simonis volbracht/ vnd Simon bey sich
selbstē gedacht hat. Im andern: vom Gesprech/
so Christus vnd Simon miteinander gehal-
ten/ vnd wie Christus die Püsserin von ihren
Sündē Absoluirt hab. Derselbig Christus wöl-
le mir vnd euch hierzu sein Göttliche Gnad ver-
leihen ꝛc.

Thellung
vnd Inhalt
diser Pre-
dig.

Ohne

Wenn sich
heutigs Lu-
angellü ver-
lossen.

Phariseer
bey den Chri-
sten vnd
Schriftge-
lehrten/ hal-
ten den Ca-
tholischen
auch Mal-
zeiten.

Dhne einen langen Cyngang ist
dies der Anfang diß heutigen Euange-
lij: In der zeit/ nämlich an einem
Freytag/ welcher war der dreyzehend tag des
Christmonats/ (wie er jekund genennet wirdt)
im ein vnd dreissigsten Jar Christi/ als er im
Jüdischen land hin vnd her gezogen/ gepredigt
vnd wunderzeichen gethon hat/ **D**att IESVM
einer von den Phariseern daß er mit ihm
ässe. Vnd er gieng hin in des Phariseers
haus/ vnd setzt sich zu tisch. Gemeinlich
seynd die Phariseer bey den Jüden gegen Chri-
sto dem Herren domaln gesinnet gewesen/ wie
diser zeit die Phariseer vnd Schriftgelehrten
vnder den Christen/ gegen den Catholischen/ vñ
am allermeisten gegen den Geistlichen/ vnd be-
vor auß gegen den Predigern/ angemüet seynd.
Sie halten auch Malzeiten vñ Freßzettel/ laden
mich/ dich/ oder einen anderen Catholischen/ de-
me sie doch heimlich in ihrem Herzen feind/ neid-
dig/ heßig vnd auffseßig seynd/ zu Gast/ Tractie-
ren vns mit essen/ trincken/ freundlichen willen
vnd lieblichem Gespräch auff das aller beste/ al-
so/ daß (eusserlich anzusehen) nit ein einiger man-
gel/ abgang oder widerwill erscheint: Aber wann
man dem Phariseer vnd Hofstaken das Heublin
abziehet/ so lasset der Schalck seinen kopff sehen:
wann der Catholisch Gast der Malzeit ein ende
erwartet/ gibt vleissig achtung auff allerley re-
den vnd Wort/ merckt er wol warumb er be-
ruffen ist worden/ nemlich/ daß er in seinen
Reden/

Reden/wort oder wercken/ möchte gefangen/
griffen/ vnd folgendts verunglimpfft/ ver-
schweht/ verkaufft/ redlich betrogen/ verlogen/
vnd für Caiapham geführt werdē. Darumb auch
mehrmaln/ daß solchen Mundchriſtē wol iſt mit
zancf vnd hader/ heken bißweilen einen Catholi-
ſchen vnd Vncatholiſchen zuſamen/ erſtlich ſub-
til/mit ſcherkworten/ folgendts mit ernſtlichen/
darnach mit ſchmechworten / biß endlich zur
fauff vnd ſtraichen gerath.

Anderer/ ſo gleichwol auch des Glaubens hal-
ber Phariſeer/ Heuchler vnd Gleißner ſeynd/ ſo
ein feiſte Suppen vnd vollen Beuttel nehmen
vnd dienen dem Türcken/ laden vnd beruffen
zuzeiten auch zu ihrer Malzeit/ doch nit auß be-
trieglichem Herzen/ ſonder auß guter Freunds-
ſchafft/ (wann anderſt ein rechte freundsſchafft
zwiſchen einem Catholiſchen vnd Vncatholi-
ſchen vber drey tag ſeyn kan) ſonſten mit ih-
me ein freundtlichſ Besprech zu halten/ vnd ja
auch der meynung/ do er in diſem oder jenem
Artickel gründlich etwas beſſer/ dann er bißhe-
ro gewiſt/ berichtet würde/ ihme wolt gefallen
laſſen.

Ein ſolche meynung (ſpricht ich) hat es zur zeit
Chriſti mit den Phariſeern auch gehabt. Etlich
mal iſt er von ihnen zu Gaſt gebetten worden/
ohne zweiffel von etliche: Daß ſie von ihme ſein
Wort möchten hören/ ſeine Wunderzeichen ſe-
hen/ verzeihung ihrer Sünden vnd troſt ihrer
Seelen empfahen/ ihne loben/ ehren vnd preiſen
möchten. Anderer haben ihn auß betrieglichem
Her-

Rechte
freunde-
ſchafft zwol-
ſchen einem
Catholiſchen
vnd Vncatholiſchen/ iſt
gewiſſlich
ein ſeltzamer
Vogel.

Phariſeer
warumb ſie
Chriſtum zu
Gaſt gela-
den.

Herken beruffen: Daß sie ihme auff seine Wort
vnd Werck mercken vnd achtung geben wolten/
Ober nit erwann ihrem Befehl zu wider reden
oder handlen/ ob er nit den Sabbath brechen/
oder dergleichen sich vergreiffen würde.

Ob nun diser heutig Phariseer/ Christum/
auff einem guten oder bösen fürnehmen/ auff ei-
nem falschen oder frummen Herken zur Mal-
zeit beruffen habe/ ist nit eigentlich bewust/ noch
vom Euangelisten vermeldet: ist doch zu besor-
gen/ es seye ein list vnd betrug dahinder gestekt/
seitern er den Herren albereit für keinen Pro-
pheten gehalten/ weil er der Pufferin gestattet
daß sie ihne angerüret hat.

Es seye aber deme wie ihme sey/ so gehet
doch der Herr hin in des Phariseers hauß/
vnd setzet sich zu tisch. Dann ihme nicht un-
bewust/ was sich alda/ neben andern/ mit Ma-
ria Magdalena begeben wurde/ dauon hernach.

Don Chri-
sto lerne wir
ein zeitlang
mit de Sün-
dern gedult
tragen.

Sie will vns Christus der Herr lehren: Daß
man die jenigen leut/ so eintweder im Leben oder
Glauben einen Schiffbruch gelitten/ nit als
bald verwerffen/ verdammen vnd verjagen soll:
sonder gemeinschaft soll man mit ihnen ma-
chen/ freundlich mit ihnen reden/ sie Christlich
vnderweisen/ zur Buß vnd bekerung ermanen/
daß sie vom Sündigen Leben vnd Unglauben/
zum frummen Gottsförchtigem leben vnd Ca-
tholischen Glauben/ sich begeben wöllen/ anhal-
ten/ vnd diß nit nur ein sonder etlich maln/ dann
mächer das dritte oder vierte mal bekert wirdt/
deme

deme man doch drey maln umb sonsten vnd vergebens geprediget hat. Do sich aber je einer so hartneckig vnd halbstarrig erzeiget / daß weder lehren/ermanen/predigen noch bitten/weder gute noch böse Wort nit helfen wolten/ soll man nach der lehr des H. Pauli/ ein solchen Gottlosen Menschen vnd Halbstarrigem Reker/ an deme Chrisam vnd Tauff verloren/ als einen der auß eigenem vrtheil verdampft ist/ meiden/ vnd nach der lehr Christi als mit einem Heyden vnd Puplicanen kein Gemeinschaft mehr haben.

An den Re-
gern vñ
Dn
pufferigen
Sündern
ist Chrisam
vnd Tauff
verloren.

Was sich nun in des Phariseeers Haus/ als sich der Herr zu tisch gesetzt / verlossen habe/ wollen wir jekund auch lehren/ vnd anhören: Vnd nempt war/ ein Weib war in der Stadt ein Sünderin/ da die vernam daß IESVS zu tisch saß in des Phariseeers hause/ bracht sie ein Alabaster Büchß mit salben/ vnd stundt hinden bey den füßen/ vnd fieng an seine füß zu nesen mit threnē/ vnd mit den harē ihres hauptes zu trucknē/ vnd küßet seine füß/ vnd salbet sie mit salben. Was vnd welche diß für ein Weib gewesen sey/ hat der Euangelist nit meldung gethon: ist aber glaublich/ sie seye Maria Magdalena gewesen/ welcher Feyer tag wir auff heut halten/ die ein Schwester Lazari/ welchen der Herr widerumb von den todten aufferweckt/ vnd Marthe war. Vnd/ als auß den Euangelisten Luca/ Joanne/ vnd Mattheo zu ernemmen/ wurde diß Weib den Herren drey maln gesalbet / oder

Maria
Magda-
lena/ ein
Schwester
Lazari vñ
Marthe.

Luc 7.

Joan. 12.

Marta
Magdale-
na hat den
Herren drey
mal gesal-
bet.

Matth. 26.

Magdale-
na ein öffet-
liche Sün-
derin.

Magdale-
na ein öffet-
liche Püffe-
rin.

Key/ der
erste Theil

doch die Salbe auff sein Haupt gossen haben
Erstlich auff heut / welcher war der eilffte tag
Decembris / im Haus Simonis des Pharis-
ers. Das ander mal am Palmabend / welcher
war der neunzehnest tag des Merken / zu Be-
thania im hauß Lazari / dauon Joannes also:
Darumb kam IESVS sechs tag vor Ostern
gen Bethanien / do Lazarus war zc. Do nam
Maria ein pfund salben vnd vngeselschter kös-
licher Narden / vnd salbet seine füsse / vnd cruch-
net sie mit ihren haren zc. Das dritte mal an
einem Mittwoch vor Ostern / welcher war der
drey vnd zwenzigst des Merken / im Haus Si-
monis des außsetzigen / auch zu Bethania / da-
von Mattheus also: Da nun IESVS war zu
Bethanien im hauß Simonis des außsetzigen /
tratt zu ihme ein Weib / die hette ein Büchß von
Alabaßter mit köstlicher salb / vnd goß es auß
auff sein Haupt / do er zu tisch saß zc. Wiewol
mir nit vnbewußt / daß wegen diß Weibs nit we-
nig stritt vnd der dryfachen salbung / ort vnd zeit
derselbigen: do derhalben jemandts ein bessere
meynung hat / dann von mir vermeldet / soll die
ihme frey gelassen seyn.

Diß Weib war ein gemeine Sünderin / so
ohne schew vnd scham öffentliche schand vnd
vnzucht mit menigklich geübt hette / derowegen
sie iekund widerumb püssen / von der Sünd ab-
stehn vnd frumb werden solt. Fahet ihr Puß
wol vnd ordenlich an / nämlich mit dem ersten
Theil einer rechtschaffner Puß / welcher ist die
Key. Von vnd auß innigkeit ihres Herzens / hat

hat sie Kew vñ leid vber all ihr begangne Sünd/ rechtschaff-
ner Puf.
welchs ja leichtlich auß deme zu mercken/ weil sie
so ernstlich vnd bitterlich geweinet hat/ vnd ja so
reichlich vnd vberflüssig/ daß sie mit ihren zehern
dem Herren seine füß gewaschen hat/ getrucknet
mit ihrem haar/ seine füß gesalbet/ vnd derglei-
chen gute vbungen/ Christliche Werck/ Snug-
thuungen/ würdige frucht der Puf mehr erzeigt/
nit allein diß mal/ sonder volgendts auch die tag
ihres lebens/ vnd fürnemlich die dreißig Jar so
sie in der Wüste gelebt hat. Magdale-
na hat in der
Wüste ge-
lebt.

Dise Puf Marie Magdalene/ ist kein Lu-
therische/ sonder ein Catholische Puf gewesen.
Dann do sie auff Lutherisch gepuffet hett/ hette
sie weder den Fußfall/ Weinen/ Trucknen/ küß-
sen/ salben/ oder dergleichen nichts bedörfft: wañ
sie nur glaubt hette/ die Sünd weren ihr verzi-
gen/ so were es schon gnug gewesen/ die Sünd
 weren ihr albereit verziget gewesen/ ja wie die
Krebs gehen. Lutherische
Puf.

Weil sich dann die Neuwen Christen hierin
nen gefangen sehen/ kommen sie mit diser lamen
Eynrede auff die ban: Welchem Priester hat
Maria Magdalena gebeichtet/ oder Petrus/
oder der Schecher am Creuz? Darauff ist zu
antworten/ (neben diser antwort: Daß sie frei-
lich einem Priester/ vnd eben dem höchsten Prie-
ster Christo gebeichtet haben) Daß domaln
noch kein Priester des newen Testaments
war/ daß die Puf noch kein Sacrament war/
daß Christus seinen Jüngern/ vnd volgendts
ihren Nachkömlingen allen Priestern/ noch

den H. Geist die Sünden zu verzeihen (sonder erst am tag seiner Auferstehung) nit mit getheilt hett. Weil dann domaln noch kein Priester war/ (dann die Jüdischen Priester mussten nit zwischen Sünd vñ Sünd/ sonder zwischen dem leiblichen Aussatz vnd nit Aussatz/vrtheilen) die Puß war noch ein tugend vnd kein Sacrament/ hette auch domaln/ als Maria püßet/ ihr Wirkung vnd krafft nit als ein Sacrament/ seite

Sacramenten habe ihr Wirkung auß dem H. Verdienst Christi bekommen.

Nit die Jüden/ sonder die Christen seynd zur Priesterlichen Beicht verbunden.

maln alle Sacramenten ihr krafft vñ Wirkung haben auß dem Leiden vñ Kreuzuerdienst Christi/ Christus aber hette domaln noch nit gelitten/ war derhalben auch domaln/ weder Maria Magdalena/ wed Petrus noch der Mörder Gessmas zur Priesterlichen Beicht nit verbunden. Hernach aber/ nach deme solcher Gewalt vñ beuelch von Christo außgangen/ seynd alle vñ jede Christen/ nit allein zur Beicht so GOTT geschicht/ sonder auch zur Mündelichen Beicht so dem Diener GOTTES geschicht/ verbunden: sonsten wurden die Priester/ den Gewalt die Sünd zu binden vñ lösen/ von Christo vmb sonsten empfangen haben.

Wie sich hierinnen der Phariseer/ so Christum zu Gast gebetten/ vnd solchs alles von Maria gesehen/ verhalten habe/ spricht der Euangelist: Da aber der Phariseer das sahe der ihn geladen hett/ sprach er bey ihm selbst/ vnd saget: Wenn diser ein Prophet were/ so wuste er wer vnd welche diß für ein Weib die ihn anrühret/ dann sie ist ein Sünde

Sünderin. Leichtlich ist auß disen Worten zu merken/daß er/der Phariseer/ Christum nit allein nit für den Sohn GOTTES/ sonder auch nit für einen solchen gehalten hat/ der macht habe die Sünd zu verzeihen/ wie dann auch die andern/ so mit ihme zu tisch gefessen/ vndereinander gesagt haben: Wer ist diser/ der auch die Sünd verzeihet? Vermeynt hat diser Phariseer/ Christus wisse eintweder nit daß diß Weib ein solche grosse Sünderin seye/ do er aber solchs wisse/ solle er billich mit ihr nit weder reden noch sich von ihr anrühren lassen/ auff daß er nit mit ihr verdacht/ oder sonsten in argwon komme als lasse er ihme die Sünd vnd Sünder gefallen. Wann aber diser Phariseer/ die vrsach/ warumb Christus hieher auff Erden kommen/ gewist hett/ hett auch gewist/ Wer diser IESVS von Nazareth gewesen/ wurde er gewißlich solche gedancken in sein hertz nit haben kommen lassen. Diser Nazarener ist nit allein MARIAS sonder auch GOTTES Sohn gewesen. Darumb ist er auff Erden kommen/ daß er suchen wölle was verloren war/ daß er den tod wender der gangen Welt Sünd leiden wölle/ auff daß alle Menschen (so nur selbst wölle) nit verdampft sonder Selig werden. Diß hat der heutige Phariseer nit gewist. Daß ihme aber Christus der Herr beyleuffig auch auff solche weiß/ auff seinen gedancken/ geantwortet hab/ solickund im andern Theil diser Predig angehört werden.

Vnder andern sollen alle Sünder/ sie haben

4 3 gesün

Warumb
Christus
auff Erden
kommen.

gesündiget wie vil vnd hoch sie immer gewölet
 gekönt haben/auß disem ersten Theil lernē/ mer-
 cken vnd behalten: Daß sie in ihren Sünden
 vnd an GOTT/ nit/ wie Cain/ Saul vnd Ju-
 das/ verzweiffē/ sonder wie Maria Magdalena/
 Mattheus/ Zacheus/ Petrus/ David vnd ande-
 re/ von der Sünd abstechn/ vollkommenlich auß-
 thun/frumb werden/ zu GOTT vnd dem Prie-
 ster lauffen/ ihr Sünd beichten vnd bekennen/ so
 wirdt ihnen auch widerfahren was Maria Ma-
 gdalena auff heut erlangt hat/ wie wir jehund
 lehren vnd hören wollen.

WEs Simon der Phariseer Mariam
 Magdalenam gesehen/ vnd doch weder
 zum Herren/ zu Marie/ noch zu anderen
 Gästen nichts gesagt/ sonder bey sich selbst
 gemurret vñ geprummet hēt wider Christum/
 daß er sich dieses Weibs mag annemmen/ sel-
 temaln sie doch ein solche grosse Sünderin ist:
 Antwortet IESVS/ vnd sprach zu ihme:
 Simon/ ich habe dir etwas zu sagen. Er
 aber sprach: Meister/ sage an. Es hat ei-
 ner der da Gelt auff wucher außleihet
 zweē schuldiger. Einer war schuldig fünf-
 hundert Pfening/ der ander fünfzig. Do
 sie aber nit hetten zu bezalen/ schencket er
 beiden. Sage an/ welcher vnd denen wirdt
 ihne am meisten lieben? Simon antwor-
 tet/ vnd sprach: Ich achte/ dem er am
 meisten geschenckt hat. Er aber sprach zu
 ihm;

ihm: Du hast recht gerichtet. Anfänglich
 wil der Herr Christus mit diser Antwort lehrē: Christo ist
 Das er nit nur wie vnser einer ein wahrer alle ding be-
 Mensch/sonder auch ein wahrer Natürlicher wust/ dann
 GOTT seye/deme nichts/auch die gedancken der er nit nur
 Menschen nit verborgē/sonder durchaus bewusst ein mensch/
 seynd: deme nichts verganges/nichts zukünfft. wahrer Gote
 tigs/sonder alles gegewertig sey/was geschehen ist.
 von anfang der Welt bis auff heut/vnd von nun
 an bis zum Jüngsten tag gedacht/geredet vnd
 geschehen wirdt. Also auch/ob gleich diser Pha-
 riseer nichts gesagt/hat doch der Herr wol gewist
 was er in seinem herze gedacht hat. Gibt der hal-
 ben Christus ihme antwort/nit auff seine wort/
 sonder auff seine gedanckē. Hieraus lernen wir
 Christen fürs ander: Das GOTT ebenmessig
 nit allein vnserer Werck vnd Wort/thun vnd
 lassen/sonder auch vnserer Gedancken weist/sie
 seyen gut oder böß. Wir müssen auch am Jüng-
 sten tag/ja so bald wir sterben/vor Christo dem
 gerechten Richter erscheinen/vnd vmb alles ant-
 wort geben/vnd die belohnung oder straff em-
 pfahen/nach deme die Wort/Werck vñ Gedan-
 cken/gut oder böß gewesen seynd. Derhalben sol-
 len wir nichts/weder wider GOTT noch wider
 vnsern Nächsten/weder handeln noch fürnem-
 men/nit angesehen daß solchs mehrmaln vor
 der Welt verborgen vnd verschwigen bleibt/so
 ist doch GOTT alles offenbar.

Die Gleichnuß von den zweyen Schuldi-
 gern/deren der ein dem Bucherer fünffhundert/
 der ander fünffzig schuldig war/hat der Herr

Umb alles
 müssen wir
 Rechnung
 schafft gebē.

**Mißgunst
dies Phari-
seers.**

diesem Phariseer diser vrsach fürgehalten: Der Phariseer war zu friden vnd mocht wol leiden. Daß Christus mit ihme vnd seines gleichens Phariseer ässe vnd trencke/ welche (ihres bedurtens) nit so grosse Sünder waren als diß Weib/ nit angesehen daß sie doch auch nit gentslich ohne Sünd seyn sich berühmen dörrten. Diß Weib aber sey vberaus ein öffentliche vnd jedermann bekante Sünderin/ derhalben er sie nit weder an noch auffnehmen solt. Hierauff wil ihme der Herr antwortē: Daß/ je mehr d Mensch krank/ je hefftiger er verwundet ist/ je mehr vnd nötiger bedarff er eines Arztes. Vnd do ein solcher hefftig verwundter vnd dem tod naheter Mensch widerumb gesunde/ ihme vom Arzet geholffen wirdt/ je mehr er auch sich gegen dem Arzet danckbar erzeigen wirdt/ für jenen/ deme doch auch geholffen/ aber doch nit so sehr noch gefährlich krank gelegē ist: Also (wil der Herr zum Phariseer sagen) hats auch ein meynung mit diesem Weib. Seiternaln sie vil vnd grosse Sünd auff ihrem halß hat/ vnd der Verdammung nahet ist/ bedarff sie desto mehr vñ nötiger eines Geistlichen Arzet/ der sie der Sünden ledig vnd widerumb GOTT angemem/ ja ein kind d Ewiggen Seligkeit mache/ wie ich dann alda thun wil: So wirdt auch sie/ diße Maria/ mich volgendes mehr lieben dann wann sie nur wenig Sünd vnd geringer verzeihung derselbigen bedörfft hette. Weil ich dann ein Arzet binn/ vnd diser vrsach auff diße Welt kommen/ darffest du Simon dich nit verwundern/ daß ich nit nur die

**Alle Sün-
der/ so nur
selbstē wöl-**

die

die kleinen Sünder/sonder auch die grossen gern
vnd gutwillig auffnimme.

len/ntmpt
Christus
gern auff.

Diser vrsach wendet als bald der Herr sein
Angesicht vom Phariseer zum Weib/ vñ spricht
zu Simon: Sihestu diß Weib? Ich binn
kommen in dein Haus / vnd du hast mir
nit geben Wasser zu meinen füßen: dise
aber hat meine füße mit threnen genest ꝛc.
Als wolt der Herr zu ihme gesagt haben: Du hast
wol gesehen was diß Weib/ mir/ nit in ihrem
sonder in deinem hauß/erzeigt hat. Sie hat mit
ihren augen zehern meine füß gewaschen / mit
ihrem haar getruecknet / ohnableßlich geküßet/
mit salben gesalbet. Vnd diß alles hat sie gethon
aus höchster vnd gröster liebe so sie zu mir hat/
darumb/ daß ich ihr alle begangne Sünd ver-
zeihen soll. Auß rechtem Glauben/starcker Hoff-
nung vnd vester zuuersicht in mich/ kommen al-
le dise Merckzeichen einer rechten liebe vnd als
würdige Frücht rechtschaffner Puf: Dann/ do Puf Mag
sie nit glaubet daß ich ihr helfen vnd alle Sünd dalene.
verzeihen könte/ wurde sie zu mir weder könen/
vil weniger zu füßen gefallen seyn: do sie nit von
grund ihres Herzens Reu vnd leid vber ihre
Sünd hette/ wurde sie gewißlich nit so herzlich
vnd schmerzlich/ernstlich vnd kläglich geweinet
haben / vnd zwar so vberflüssig hat sie geweinet/
daß sie mit ihren threnen meine füß gewaschen
hat. Seiternaln dann deme also/ wie wahr ist/
warumb solte oder wolte ich dann dise Sünde-
rin/ seiternaln sie frumb werden will/zur Puf-
serin

serin vnd zu einem kind der Seligkeit nit widerumb auffnehmen? Derhalben sage ich dir/
 O Simon / ihr diser Marie werden vergeben vil Sünd / dann sie hat vil geliebet. Warumb werden Marie Magdalene vil Sünd vergeben? Darumb / wie die Lutherischen sagen / weil sie allein vil glaubt hat? O Nein: sonder / wie die Catholischen glauben vnd sagen: Darumb / weil sie neben dem wahren Glauben vil geliebt hat / weil sie ihren Glauben mit vilen eusserlichen wirklichen zeichen / mit vilen sonderlichen tugenden / mit guten Wercken / vnd wirdigen fruchten der Puff erzeigt hat. Es werden zwar die Lutherischen Christo dem Herren nit sonderlich dancken / daß er mit diser Papi-
 stischen Lehr herfür kompt: Nit allein der Glaub / sonder auch die Liebe seye zu vergebung der Sünden von nöten: Vnd / daß vil Sünd vergeben werden / nit dem jenigen so vil glaubt / sonder dem jenigen so sampt dem Glauben vil geliebt hat. Wo bleibt dann das Lutherisch jämmerlich zettergeschrey: Allein der Glaub / allein der Glaub ist gnug zur Rechtfertigung / allein der Glaub thut alles / allein der Glaub erlangt verzeihung der Sünden / allein der Glaub macht selig? Wann diß wahr were / so were die Liebe nit von nöten / die heilige Sacramenten weren nit nötig. Warzu weren vns die Zehen Geport gegeben? Warumb werden dann die jenen so doch glaubt / aber die Armen nit gespeiset noch getrencket / verdampft? Warumb wurden
 jene

Christus ist
 Bapstisch/
 vnd nit Lu-
 therisch.

Matth. 23.

jene fünf Juncckfrauwē/so doch glaubten/ aber kein Del in ihren Lampen hetten/ zur Hochzeit nit eyn gelassen? Warumb ist jener/ so doch glaubt/ vnd sampt andern Glaubigen zur Hochzeit kommen/ in die eufferste Finsternuß geworffen worden/ dann allein daß er kein Hochzeitlichs kleid angehabt hat? Bestehen derhalben die Lutherischen mit ihrem/ Sola fide/ wie Mutter an der Sonnen. Uns Catholischen seynd auch die jenigen wort Christi/ so er im Beschluß diß heutigen Euangelij zu Maria Magdalena gesagt hat/ gar nichts entgegen/ nämlich: Dein Glaub hat dir geholffen/ gehe hin im Friden. Dann/ do auß disen Worten könnte erwisen werden/ wie sich die Neuwen Christen fälschlich vnd berrieglich bereden: Daß allein der Glaub helffe/ seligmache/ verzeihung der Sünden vnd das Ewig leben erlange/ vnd vngedults dise wort den obgemelten (Ihr werden vil Sünd verziget/ dann sie hat viel geliebt) zu wider/ wurde ohn widersprechlich darauff volgen: Daß Christus ihme selbst zu wider were/ seitern er jene wort nit weniger als diese geredt hat. Ja volgen müste nach ihrer meynung/ (das doch kein Christ weder gedencken/ wil geschweigen glauben noch sagen soll) Daß Christus ka
Christus der Herr sich selbst lüg gestrafft nit/ weder
hett. O Nein/ an disem vnd solchen orten re-
det der Herr von einem lebendigen Glauben/ liegen/ noch
der durch die Liebe wircket/ der sich mit Christ-
lichen Tugenden vnd guten Wercken er-
zeigt: sonst ist der Glaub (als Jacobus der
H. Apo

Jacob. 2.

H. Apostel bezeugt) todt/ vnd zum Ewigen leben nit möglich. Ist derhalben nit allein der Glaub/ sonder auch die Liebe vnd gute Werck zur verzehung der Sünden vnd erlangung des Ewigen lebens/ von nöten. Vnd sie selbst/ die Lutherischen/ verrathen sich vnd seynd ihrer Lehr nit bestendig/ sonder stracks entgegen / in deme sie bekennen: Ja sie könden durch einen todten/ durch einen Lieb vnd Werck losen Glauben nit selig werden/ sonder er müsse lebendig/ fruchtbar vñ mit folgenden guten Wercken gezieret seyn. Welchs ja nichts anders ist/ dann bekennen: Das sie nit allein durch den Glauben/ sonder auch durch die Werck könden vnd müssen Selig werden/ also/ daß nit allein der Glaub alles thut/ sonder auch die Werck wirken mit. Das sie aber endlich/ wann sie nit weiter wissen/ für-

Ein andere
vermeinte
Lutherische
der 2. u. h.
rischen.

1. Cor. 13.

Aug. lib. 15. de
Trin. cap. 18.

werffen: Der Glaub könde nit ohne gute Werck seyn/ die Werck vnd die Liebe müssen dem Glauben notwendig mit vnd nachfolgen: ist auch nit wahr/ ist wider die H. Schrift/ vnd fürnemlich wider den H. Paulum / welcher mit außersentlichen Worten bezeugt / Das aller Glaub (vnd nit nur Fides Historica) ohne die Liebe seyn könde/ do er spricht: Vnd wann ich allen Glauben hette (so vollkommenen / bestendigen/ vnd mächtigen) also/ daß ich Berg versetzte/ vnd hette die Liebe nit/ so binn ich nichts. Hieraus erweise nit ich/ sonder der H. Augustinus/ Das der Glaub nit notwendiger weiß die Liebe vnd gute Werck müsse verknüpfft haben. Ja die wort Pauli seynd klar / daß der Glaub / vnd/ wie

wie er sagt/ aller Glaub/ ohne die Lieb seyn kan.
 Vnd/ das noch mehr vnd auch wider die New-
 wenchristen diser zeit ist/ sage ich/ vermög des
 Wort GOTTES/ daß einer in Christum glau-
 ben kan/ vnd nit allein nit gute Werck/ sonder
 böse Werck haben/ vnd in Sünden stecken: son-
 sten müsten alle Christen/ so offit sie sündigen/
 vom Christlichen Glauben abfallen/ vnd nit
 mehr Christen sonder Jüden oder Heyden seyn.
 Hieruon spricht der Herr Christus also: *Matth. 7.*
 vil werden zu mir sagē an jenem tag: Herr Herr/
 (so haben sie ja in Christum als in ihren Herren
 vnd GOTT glaubt) habē wir nit in deinem Na-
 men weißgesagt? haben wir nit in deinem Na-
 men Teufel außgetriben? haben wir nit in dei-
 nem Namen gewaltige thaten gethon? (können
 sie dann auch/ ohne den Glauben in Christum/
 im Namen Christi geschehen?) Dann werde ich
 zu ihnen sprechen: Ich habe euch nit erkant.
 Weichet all von mir ihr vbelthätter etc. Seynd
 dise Vbelthätter gewesen/ vnd haben doch in
 Christum als in ihren Herren vnd GOTT
 glaube/ so kan ja der Glaub nit allein ohne die
 liebe/sonder auch mit bösen Wercken vñ Sünd/
 in einem Menschen zu mal bestehn: nit angefe-
 hen/daß ein solcher Glaub/ seitemaln v Mensch
 wegē der Sünd die Gnad GOTTES verloren/
 nit selig machet. Wirdt derhalben noch ein mal/
 vnd alle mal/ verzeihung der Sünd vnd erlan-
 gung des Ewigen lebens/ nit allein dem Glau-
 ben/sonder auch der liebe vnd guten Wercken
 zugeschrieben. Ist also noch wahr/ vnd bleibe
 Ewig

Glaub vnd
 Sünd/ können
 zu mal in eto
 nem Men-
 schen woh-
 nen/ aber
 Gnad vnd
 Sünd/ nie.

n leben
 Glaub/
 verzet
 ewigen
 Luth
 hr nit
 me sie
 oben/
 en mit
 chbar
 t seyn.
 nnen:
 sonder
 n Ge
 b alles
 Daß
 n/ für
 Werck
 Glaub
 ch nit
 emlich
 hru
 Glaub
 liebe
 allen
 igen/
 / vnd
 erauß
 Daß
 e vnd
 ja die
 vnd/
 wie

Ewig wahr/daß Marie Magdalene vil sünd ver-
zigen seynd wordē/nit darnumb/daß sie vil glaubt/
sonder darumb/ daß sie neben dem Glauben vil
geliebt hat. Ist volgendts nit wahr: Daß allein
der Glaube selig mache/sonder beide seynd von
nöten/der Glaube vñ die liebe oder guten Werck.
Vñ dieweil dise Predig ihr gebürliche leng schier
yberschritten/wöllen wir/an statt des Epilogi
derselbigen/zu GOTT also betten:

Gebetlin
zu Christo
vnserm Hei-
land.

In sehen vnd bekennen wir / O
Herr I E S V Christ/wahr seyn/
(daran wir doch niemaln gezwei-
felt) das jenig/so du nit allein zu Zacheo/
sonder auch an vilen anderen orten vnd zu
anderen zeiten/ gesagt hast/nämlich: Du
seyest kommen zu suchen das jenig so ver-
loren war/vnd besonder die Schäflein des
hauses Israel: Vnd/daß du nit begereest
den tod des Sünders/sonder daß er sich
bekere/vnd habe das Ewig leben: Vnd/
daß du den Sünder auffnehmen wöllest
gar gern vnd willig/zu welcher stund er zu
dir kommen wirdt. Also hastu dich auff
heut Marie Magdalene erzeiget/so ein
grosse Sünderin gewesen: so bald sie aber
gepüffet/ ihr alle Sünd vergeben/vnd wi-
derumb zu Gnaden auffgenommen. Ver-
leihe vns O GOTT gnad/daß wir nit
sündigen: do wir aber gesündiget hetten/
daß wir auch mit Magdalena widerumb
püffen

Am Feyertag des H. Jacobi.
püssen vnd selig werden mögen/ Amen.

255

Am Feyertag des heiligen Apo-
stels Jacobi/ Euangelium
Matth. xx.

Am 25. tag
Julij.



In der zeit tratt zu dem Mar. 10. b
Herren IESV die Mut-
ter der kinder Zebedei mit
ihren Söhnen/ fiel vor
ihm nider/ vnd batt et-
was von ihm. Vnd er
sprach zu ihr: Was wiltu? Sie sprach zu
ihm: Schaff daß dise meine zween Söhne
sizen in deinem Reich/ einer zu der rechten/
vnd der ander zu der lincken. Aber IESVS
antwortt vnd sprach: Ihr wisset nit was
ihr

ihr bittet. Könnt ihr trincken den kelch/ den
 ich trincken werde? Sie sprachen zu ihm:
 Ja wir könnens. Vnd er sprach zu ihnen:
 Meinen Kelch werdet ihr zwar trincken.
 Aber das sitzen zu meiner rechten vnd links
 ist nit mein euch zu geben/ sonder des
 Matth. 25. c. nen es bereitt ist von meinem Vatter. Do
 das die zehen höreten/ wurden sie vnwillig
 vber die zween brüder. Aber IESVS rief
 Mar. 9. d. ihnen zu ihm/ vnd sprach: Ihr wisset/ daß
 10. c. die Fürsten der Heyden vber sie herrschen/
 Luc. 9. c. 21. b. vnd die obersten brauchē sich ihres gewalts
 vnder ihne: also soll es nit seyn vnder euch/
 sonder wer vnder euch wil der oberst seyn/
 der sey euwer diener. Vnd wer da wil der
 fürnemst seyn/ d̄ sey euwer knecht. Gleich
 wie des Menschen Sohn nit ist kommen/
 daß er ihm dienē lasse/ sonder daß er diene/
 vnd geb sein leben zu einer erlösung für vil.

Ihr wisset nit was ihr bittet.

Matth. xx.

Zween S.
Jacob.

Der kleiner
S. Jacob.

Seynd vnd den zwölff Apo-
 steln zween gewesen mit diesem Na-
 men/ Jacobus/ genennet: zum vn-
 derschied aber heisset d̄ ein der meh-
 rer oder der grösser/ der ander der
 minder oder der kleiner Sanct Jacob. Der klei-
 ner oder minder Sanct Jacob/ (dauon weit-
 leuffiget bald hernach) ist ein Sohn Alphei vnd
 Marie

Marie der Schwester der Mutter des Herren
gewesen/ welcher darumb der kleiner genennet
wirdt/ weil er nach dem andern S. Jacob zum
Apostolat kommen ist/ desse Feyertag haben wir
am ersten tag im Meyen gehalten.

Der ander S. Jacob/ so der grösser oder meh-
rer genennet wirdt/ darumb/ daß er ehe dann der
ander zum Apostolat kommen/ wiewol er den
Jaren nach jünger dan ehgemelter gewesen ist/
ein Sohn Zebedei vnd einer anderen Marie/ so
auch ein Schwester MARIAE der Mutter Chri-
sti gewesen ist/ der auch ein Bruder Joannis des
Euangelisten vñ Apostels war/ von welchen bei-
den diß heutig Euangelium meldung thut/ vnd
sie beide die Söhn Zebedei nennet.

Der gröf-
ser S. Ja-
cob.

Dieses S. Jacobi/ des grössern/ Feyertag hal-
ten wir auff heut/ welcher ist der fünff vñ zwen-
zigest tag Julij. Was dan nun heutig Eu-
gelium belangen thut/ haltet es in sich ein Ge-
spruch zwischen Christo vnd der Mutter Jaco-
bi/ vom sitzen zu der rechten vnd linken Christi
in seinem Reich/ dauon wir in vorhabender Pre-
dig weitleuffiger handeln wollen. Vnd im ersten
Theil/ Von der Bitt oder begeren diser Mutter
im Namen ihrer zwener Söhn von Christo. Im
andern/ Von der Antwort Christi zur Mutter
vnd ihren zweyen Söhren. Welches alles ihr
mit gedult vernemmen wölt/ so wil auch ich
euch solchs auff das kürzest vnd leichtest gern
fürhalten. GOTT wölle mir vñ euch sein Göt-
liche Gnad verleihen. Hierzu wölle der S. Apo-
stel Jacob/ desse Feyertag wir auff heut halten/
zu bei-

Was wie
auff heut
für einen
Feyertag
halten.

Thellig vnd
Inhalt diser
Predig.

zu beiden theilen vor GOTT ein Fürsprecher
seyn/ Amen.

Auff das wir desto mehr im heuti-
gen Euangelio auflegen vnd desto weiter
fortschreiten könden/ wollen wir albe-
reit/ ohne einen langen Eyn gang/ zum Anfang
desselbigen also greiffen: In der zeit/ nämlich
am vierzehnesten tag des Merckē/ an einem Mit-
woch des drey vnd dreissigsten Jars Christi.
Da tratt zu dem Herren IESV/ die Mut-
ter der kinder Zebedei mit ihren Söhnen/
fiel vor ihme nider/ vnd batt etwas von
ihme. Anfenglich wollen wir kurzen bericht
anhörē/ von diser Mutter/ ihren Eltern/ Schwes-
tern vnd kinder/ wer dise alle gewesen seyen.
Man helt gemeinglich/ das Anna die Mut-
ter MARIAE/ drey Männer gehabt habe. Erst-
lich den Joachim/ vnd mit disem zeuget sie
ein Tochter mit Namen MARIA: Dise war-
de vertrawet zum Weib dem Joseph/ hat emp-
fangen vom heiligen Geist/ vnd Christum
den Sohn GOTTES geporen. Der ander
Mann Anne hieß Cleophas/ der zeuget ein
Tochter mit ihr auch Maria genennt/ die war-
de einem Mann mit Namen Alpheus vermeh-
let/ mit welchem sie geporen hat Jacobum
den kleinern/ Joseph den gerechten/ Simo-
nem vnd Judam. Vnd diß Weib wirdt et-
wann genennet Maria Cleophe von ihrem
Vatter/ oder Maria Jacobi von ihrem Sohn.
Der dritte Mann der heiligen Anne hieß Sa-
lome/

Anna solet
dici tres con-
cepisse Ma-
rias,
Quas genuit
re viri, Ioa-
chim, Cleo-
phas, Salo-
meque.
Has duxere
viri Ioseph,
Alphaus, Ze-
bedeus.
Prima parit
Christum: Ia-
cohum Iccū
da minorem,
Et Ioseph iu-
stum peperit
cum Simone
Judam:
Tertia maio-
rem Iacobū,
volucrumque
Ioannem.

lome/zeugten auch ein Tochter gleichfals Maria genennet / welche einem Mann Zebedeus genant/vermehlet ist worden/ vnd haben Jacobum vnd Joannem die zween Apostel gezeuget. Vnd dise Maria wirdt etwann genennet Maria Salome vom Namen ihres Vatters/ oder die Mutter der Kinder Zebedei/ wie auch im heutigen Euangelio/ seitemaln sie mit Zebedeo ihrem Mann dise Kinder/ nämlich Jacobum vnd Joannem/ geporen hat. Vnd dise letzte Maria ist die jenig / dauon heutigs Euangelium meldung thut.

Dise kompt auff heut zu Christo dem Herren mit ihren zweyen Söhnen Joanne vnd Jacobo dem grössern/ des Feyertag wir auff heut halten/ vnd fiel vor ihm nieder. Die vrsach/darumb diß Weib Christo zu füssen gefallen/ volget hernach/ nämlich / sie hatt etwas von ihm. Wir Christen halten es auch dafür: Daß wir von GOTT vnd der Welt vil ehe erlangen das jenig so wir bitten vnd begeren/ je mehr wir vns vor demselbigen demütigen. Wir fallen auch vor GOTT/ vor den Christlichen vnd gewaltigen Potentaten auff vnsern knie/ etwann gar auff vnser Angesicht nieder/ küssen ihnen mit Maria Magdalena die füz oder kleider/ nit allein vnser höchste Demütigkeit/ sonder auch vnser grosse not/vnser hoffnung vnd vertrauwen in sie/ zu erzeigen/vnd also der hilff zu gewarten. Also vermeynet auch diß heutig Weib/ (wie dann/ do sie recht gebetten hett / geschehen were) sie wolte che von Christo gehört/ erhört/ vnd ihres bitts

Zm Gebets
vnd bitten
sollen wir
demütig
seyen.

Catholische
lernen wol
der die Ne-
wen Chri-
sten.

gewehret werden/wann sie ihme zu füssen fielen
dann wann sie gleichsam als truckig vor ihme
stündte vnd verimeynte er müste thun was sie
wolte. Alda mögen wir Catholische Christen wol-
der die Neuwen Christen vñ jenen stolzen Pha-
riseer im Tempel lernen: Daß es nit vnrecht ist
im Gebett zu GOTT auff die knie nider fallen/
das Angesicht gen Himmel auffheben/ die Ar-
me außbreiten/ an das Herz schlagen/ gar zur
Erden auff das Angesicht nider fallen/ welches
ja der Herr selbst/ do er zu seinem Himmel-
schen Vatter am Delberg gebetten/ gethon hat.
Daran ist nit gelegen/ daß wir derowegen von
den Neuwen Christen/ welche nit vil nach dem
Gebett noch anderen Gottesdiensten fragen/vñ
alles gutes mutwilliger weiß verwerffen/ Pape-
sten/ Gleißner oder Phariseer vmb vnschuld ge-
nennet werden. Also ist auch auff sein weise zu
antwortē/ do wir etwas von Keyserlicher May-
von einem König/ Fürsten/ oder andern gewal-
tigen Potentaten bitten wollen.

Mar. 10.

Was diß Weib von Christo mit ihren Söh-
nen begert habe/ hat erstlich weder sie noch der
Euangelist gemeldet/ sonder in gemein gesagt:
Vnd sie batt etwas von ihme. Oder/ wie
der H. Euangelist Marcus schreibet: Vnd es
tratten zu ihme Jacobus vñ Ioannes die Söhne
Zebedei/ vnd sprachen: (nämlich durch ihre
Mutter zum Herren) Meister/ wir wollen daß
du vns gewehrest/ was wir dich bitten werden.
Diß weib hat eben gehandelt/ als wie die Wei-
ber zu thun pflegen. So waren auch dise zween
Jün-

Jünger Joannes vnd Jacobus noch vngelehrte grobe leut/ waren vom H. Geist noch nit erleuchtet/ vermeyntē sie wolten also mit disem gemeinen bitt Christum fahen/ vñ gewislich erhalten was sie begerten. Dañ sie gedachten bey sich selbstē: Do wir als bald mit der groben sprach herauß faren/ vnd anzeigen was wir haben wöllen/ möchte er vns solchs abschlagen/ wöllen der haben ihn zuuor fahen vnd also greiffen/ daß er vns nit mehr entrinnen kan. Derhalben lieber Meister/ dieweil ich deiner Mutter Schwester binn/ vnd dise meine zween Söhn mit dir (dem fleisch nach) Geschwistrige kinder seynd/ setzen wir ein sonderlichs vertrauwen vñ hoffnung in dich/ du werdest vnser jeder zeit im besten gedencken/ vñ ihnen für andere deine Jünger verholff. **Torechtige** sen seyn. Nun hetten wir albereit ein sonderliche **bitt dises** bitte an dich zugelangē lassen/ doch verspriche **Welchs.** vnd verheisse vns zu vor/ daß du vns erhöre wölest/ vnd thun was wir bitten werden/ dasselbig seye volgendts was es wölle.

Also begibt es sich noch bißweilen bey denjenigen Weltkindern/ so einweder/ was vnbilllichs begeren wöllen/ oder sonstē verschmickte kerlin seynd/ vnd ihre Fürsten vnd Herren/ oder diejenigen von welchen sie etwas bitten/ also binden wöllen/ daß sie ihnen hernach nit mehr umbstehn könden/ vnd sprechen: Lieber Cunk oder Beng/ Ich hette ein sonderliche Bitt an dich/ vnd du **Vnbilllichs** kanst mich ohne deinen vñ deiner **bluten.** Vnderthonen schaden meines bitts wol gewehren: wiltu solchs thun/ so versprichs mir/ so wil ich solchs die tag
 r 3 meines

meines lebens/wo vnd wie mir jimmer möglich
vmb dich vnd die deinen verdienen ic. vnd was
der gleichen wolgeschmalzne/ betrogne vnd ver-
logne Wort mehr seynd.

Man soll
fragen: was
wiltu?

Darumb
der Herr
gefragt.

Reich Chri-
st nit von
dieser Welt.

Wie sich aber ein solcher Mensch/ so also be-
trieblicher weiß vmb hilff angesprochen wird/
verhalten soll/ ist ihme Christus der Herr ein
Exempel: Vñ er sprach zu ihr: Was wiltu?
Darumb fraget der Herr/ Was diß weib sampt
ihren Söhnen wolle? Ist er dann nit wahrer
GOTT/ dem alle ding bewust ist/ auch die ge-
danken aller herzen? Ja er ist wahrer GOTT/
deme nichts vnbewust ist/ hat nit darumb gefra-
get/ als ob er nit zu vor gewist habe/ was sie be-
geren wurde/ sonder auß etlichen anderen vnd
fürnemlich auß dreyen vrsachen. Erstlich: Daß
er sie/ die Mutter vnd ihre zween Söhn/ auß ih-
rer selbst eignen Antwort vnd worten zu straffen
desto ein bessere gelegenheit hette/ welchs nit ge-
schehen were/ do er als bald gesagt hette: Ich
weiß wol was ihr begeren wölt/ ich werde euch
nit erhören. Zum andern darumb: Daß er ver-
ursachet würde auch die andern Jünger/ so nit
weniger als Joannes vnd Jacobus Ehrgeizig
waren/ zu straffen/ vnd lehren/ daß sein Reich
nit von diser Welt/ sonder droben im Himmel
seye. Zum dritten: Daß er allen gewaltigen Po-
tentaten/ vñ in summa allen Menschen ein Ex-
empel seyn vnd Lehr geben wolt/ Daß sie zu geben
oder thun nit verwilligen sollen/ sie wissen dann
zu vor/ was sie thun oder bewilligen solten. Vnd
auch dasselbig nit als bald/ sonder sollen sich dar-
über

über bedencken/ vnd andere/ so diser sacht vñ handel erfahren seynd/ wie ihme zu thun seye/ raths fragen.

Dann gewislich dise zween nit weißlich handeln/ so einweder einem von sich selbst zu geben/ schencken/ vnd thun verwilligen/ was er an ihne begeren werde: Oder auff eines anderen bitt/ zu bewilligen versprechen/ es seye dasselbig was es wölle. Also versprach Herodes Antipas der tankenden Tochter Herodiadis zu geben was sie an ihne begeren wurde: sie begeret Joannis des Tauffers Haupt/ welches ihr Herodes nit gern gegeben/ aber doch seiner Wort/ wegen der ansehnlichen Gäst so bey ihme waren/ nit umbstehn wolt. Es hat zwar auch Salomon auff ein zeit so gar weißlich nit gehandelt/ do er seiner Mutter zu verwilligen versprochen/ was sie an ihne begeren wurde: do sie aber etwas für Adoniam/ welcher ihme heimlich nachstellet/ gebetten hette/ widerruffet er sein zusagen. Christus aber hat weißlicher dan Salomon gehandelt/ der wolte zu geben vnd thun nit bewilligen/ ehe daß mit außdrucklichen Worten angezeigt würde das jenig/ was er bewilligen/ geben/ oder thun solt.

Auff gemelte Frag Christi gibt diß Weib/ im Antwort namen vñ vnderrichtung ihrer Söhn/ also ant. diß Weibs. wort: Schaffe daß dise meine zween Söhne sitzen in deinem Reich/ einer zu der rechten/ der ander zu der lincken. Die vrsach/ darumb dise zween Jünger nit selbst Personlich oder mündlich angesucht / sonder

Ehrgeizig-
keit der Jün-
ger des Her-
ren.

ihre Mutter solche bitt bey dem Herren fürzu
bringē vnderrichtet haben/ist dise nit die gering-
ste: Sie haben wol gewist/das solches begeren
anderen Jüngern nit gefallen würde/welche eben
so gern als sie zur rechten vnd lincken/das ist/
hoch oben an der Tafel gefessen/vnd die fürnem-
sten gewesen weren: gedachten derhalben/Es
ist weniger daran gelegen das die anderen Jün-
ger auff vnser Mutter/dann auff vns vnwirsich
werden/dann wir vns/als solche/so selbst nit
angehalten/auch der Mutter ordnung zu geben
nit macht haben/entschuldigē können. Darumb
auch/seitemaln es nit gewis ist/das wir vnser
bitts gewehrt werden: Ist es nun sacht/das die
Mutter erhört wirdt/so wirdt nit sie/sonder wir/
das lob haben/dann Christus solchs bewilliget
nit wegen der Mutter/sonder vmb vnser wil-
len/die wir seine Jünger seynd: Wirdt aber die
Mutter nit erhört/so wirdt sie/vñ nit wir/schaal
angeloffen seyn/vnd den spott dauon tragen/als
die auß Mütterlichem Herzen vnd Weiblicher
fürwis so Narrisch oder Vnbillichs hat begeren
dörffen.

Ursach/
darumb die
Mutter mit
ihren Söh-
nen gemelte
bitt an den
Herren ge-
legt hat.

Was dann nun dise zween Jünger sampt ih-
rer Mutter dahin bewegt hab/ ein solche bitt bey
dem Herren Christo fürzubringen/das nämlich
sie zur rechten vnd lincken in seinem Reich sitzen
sollen/wollen wir jekund auch anhören. Dise
Jünger sampt ihrer Mutter waren auch ge-
porne Jüden/welche wol gewist haben/das sie
das außewölte Volck GOTTES seynd/vnd
jeder zeit (jekund wenig Jar außgenommen)
einen

einen Jüdischen König vnd eigne Obrigkeit gehabt haben: Nun aber waren sie vnder dem gewalt des Heydnischen vnd Ungleubigen Römischen Keyfers Tiberij/ verhofften aber immer auff einen auß ihrem Geschlecht/der Israhel erlösen vnd sie widerumb auß der hand des Keyfers erretten solt. Weil dan IESVS vom Engel MARIAE verkündiget / vnd vom H. Geist empfangen/ auch vom Engel selbst ein Erlöser Israhel genennet ist worden: weil er auch auff Erden so vil herrliche vñ grosse Wunderzeichen gethon hat/ so zu vor von jemandts nie weder gesehen noch gehört seynd worden: haben sie eben disen IESVM für einen solchen gehalten/ der das jrdisch Reich der Jüden/ dem Keyser widerumb abtringen/ volgendts wie Salomon vñ andere weltliche König hie auff Erden Regieren werde / ein Weltlichs Regiment anfangen/ grosse Herren vnd Råth am Hof haben/ vnd dergleichen. Wie dann Eleophas vnd Lucas (oder wie etlich vermeynen Nathanael) zu ihme Christo/ als zu einem vnbekanten/ am H. Ostertag gesagt haben: Wir haben vermeynt er solt Israhel erlösen. Vnd andere so bey ihme waren/ als er jekund bald gen Himmel aufffahren wolt/ fragten ihn: Herre/ wirstu auff dise zeit wider auffrichten das Haus Israhel? Wie ihne dann auff ein zeit das Volck mit gewalt zu einem König machen wolt.

Als derhalben der Herr auff heut (wie wir kurtz vor disem heutigen Euangelio lesen) mit seinen Jüngern/ vnd andern so ihme auß Galil-

Jude haben
einen eignen
König ge-
habt.

Luc. 1. 2.

Matth. 1.

Luc. 24.

Act. 1.

Joan. 6.

lea nachgeuolget/ gen Jerusalem hinauff gan-
gen/ vnd zu ihnen gesagt hat: Des Menschen
Sohn wirdt den Hohenpriestern vnd Schrifft-
gelehrten vberantwortet werden/ vnd sie werden
ihn verdammen zum tod/ vnd werden ihn vber-
antworten den Heyden zu verspotten/ vnd zu
geißlen/ vnd zu creuzigen/ vnd am dritten tag
wirdt er widerumb aufferstehn zc. Auff solche
Rede Christi wirdt diß Weib sampt ihren Söh-
nen vermeynt habē/ geschwind nach seiner Auf-
erstehung werde sein zeitlichs Reich angehn. Auff
daß aber nit etwann Petrus oder ein anderer
Jünger/ ihnen bey Christo vorkeme/ saumen sie
sich nit lang/ vnderrichten ohne verzug ihr Mut-
ter/ anzehalten/ daß sie die meisten vnd fürnem-
sten an seinem Hof seyn möchten.

Vergebenll-
cher wohn
dieses weibs.

Gemeines
laster diser
zeit.

Unwürdlige
vnd vnge-
schickte wer-
den diser zeit
promouirt.

Wolte GOTT/ daß ebē solchs/ nit auch noch
auff den heutigen tag/ von vilen Christen/ hauß-
echtig gesehen vnd gehört würde: Da einer sei-
nen Sohn/ diser den Vatter/ jener seinen Bru-
der/ ein anderer seinen Vetter/ der seinen ver-
wanten/ jener seinen bekanten/ etwann durch
bitt/ etwann durch list/ etwann durch Gaab vnd
geschenck/ zu zeiten auch durch gewalt/ eynge-
betten/ gezwungen vnd eyngetrungen würden/
zu Ehrlichen vnd herrlichen Stenden des Geiße-
lichen vnd Weltlichen Regiments/ darzu sie
doch nit mehr geschickter seynd dan ein Ku oder
Esel zur Sackpfeiffen. Darumb aber/ weil sie
Kinder vnd Vätter seynd/ werden sie angenom-
men/ es werde hinnach diser oder jener Stand
versehen oder nit versehen/ es geschehe oder wi-
der.

derfare den Vnderthonen wie es mag/ wo nit wie recht ist vnd GOTT will/ doch wie vnrecht ist vnd wie der Teufel wil. Wann solche eyngelbetne vnd eyngewungne nichtsköndige Efel nur die Milch vnd Wollen von Schästlin haben/ fragen sie nit vil darnach/ ob gleich das Schästlin/ nit/ weder gespeiset noch getrencket/ nit GOTT/ sonder dem Wolff/ vnd etwann (wie sie) dem Teufel zu theil werden.

Müssen derhalb hieruon/ vor GOTT/ grose Rechnungschafft geben/ alle drey. Erstlich diejenigen/ so das Blut/ freundschaft/ gunst oder schanckung ansehen/ bitten für einen zu diesem oder jenem Stand/ darzu sie doch nit taugentlich noch würdig seynd. Diejenigen auch/ so sich be- reden lassen/ verleihen solchen vngeschickten Efelstöpfen/ eintrweder Geistliche oder Weltliche Ständ vnd Ampter/ nit allein zur Erger- nuß/ sonder auch zum vndergang/ sterben vnd verderben etwann zeitlich vnd Ewig ihrer eignen Vnderthonen. Zum dritten auch diejenigen/ so solche Conditionen mit bösem Gewissen annemen/ vnd doch nit/ weder versehen könden noch wollen. Von disen allen dreyen/ wirdt GOTT nit allein ihres/ sonder auch ihrer Vnderthonen Blut fordern. Derhalb soll ein jeder Christ (beuorauß die Wehheischone/ ob sie würdige oder vnwürdige Personen zu Priester weihen) eben achtung hierauff geben: Daß er keinen Menschen/ er seye Vatter oder Mutter/ freund oder Kind/ Bruder oder Schwester/ zu keinem Stand/ weder Geistlich noch Weltlich promo- uere/

Vor Gote
müssen rech-
nungschaffe
geben.

uiere/furdere/ der ander aber nit leihe/ noch der dritte anneme/ es seye dann sach/ daß man wiße/ daß ein solcher desselbigen Standts würdig seye/ daß er ihne versehen/ vnd nützlich vorstehn künde.

Also haben wir im ersten Theil gehört: Was diß Weib sampt ihren kindern von Christo begeret habe. Nun wollen wir auch die Antwort Christi hierauff/ vnd was sie erlangt haben/ lehren vnd anhören.

Christus vnser lieber Herr verhältet sich ebenmessig/ wie jezund gelehrt ist worden/ nämlich: Er sihet nit an (dem fleisch nach) dise freundschaft/ daß diß Weib (wie man gemeinlich haltet) seiner Mutter Schwester ist/ daß dise zween vnd er zweyer Schwester kind seynd/ saget nit: Was ihr begeret/ das soll geschehen/ oder warüß solte ich euch der freundschaft nit genießen lassen? Nein/nit also: sonder/weil sie nit recht begeret/ gibt er ihne zur antwort: Ihr wisset nit was ihr bittet. Warumb gibt der Herr allen dreyen antwort/ der Mutter vnd den zweyen Söhnen/ so doch solchs nit die Söhn/ sonder die Mutter begeret hat? Darumb/daß ihnen der Herr gnugsam zu verstehn geben will/ daß ihme nit vnbeuust seye/ daß die zween Söhne die Mutter diß bey ihme anzehalten vnderrichtet haben/ vnd sich das Weib hierzu auß mütterlichem Herzen vnd Ehræizigkeit für ihre kinder habe bewegen lassen. Weil dan hierinnen die Brüder ein vrsach vnd

Antwort
des Herrē.

vñ meiste schuld haben/ redet er nit die Mutter/
sonder ihre zween Söhne Jacobum vnd Joa-
nem/an/vnd spricht: Ihr wisset nit was ihr bit-
tet. Als wolt er sagen: Seydt ihr nun ein so lan-
ge zeit bey mir gewesen/ vnd mich hieruon so offte
hören reden/ vnd wisset noch nit daß mein Reich
nit von diser Welt/ sonder droben im Himmel/
nit zeitlich/ sonder Ewig ist? Daß ich nit allein
Jsrael das Judenuolck/ sonder die ganze Welt/
nit auß der Hand Tiberij/ sonder auß dem strick
vnd Gewalt des Teufels/ am stammen des H.
Creuzes erlösen werde? Warumb begeret ihr
dann hie auff Erden in meinem Reich die für-
nemsten seyn? Wann ich wolte/ wie Tiberius/
Herodes/ oder ein anderer König/ hie zeitlich vnd
Weltlich regierē/ ich wolte euch solchs auch vor
langst gesagt haben. Darumb so wisset ihr nit
was ihr begeret/ derhalben ihr auch nit erhört
werdet.

Gewiß ist/ daß auch vns Christen auff den
heutigen tag/ mehrmaln/wañ wir von GOTT
etwas begeren/zur antwort wirdt: Ihr wisset
nit was ihr begeret. Also daß wir auch vilmaln
nit erhört werden/ ob wir gleich ernstlich vnd
ohnauffhörlich bitten/ darumb/weil wir nit wis-
sen was wir bitten: weil wir nit wissen/ ja et-
wann nit wissen wollen/ ob das jenig/ so wir be-
geren/ wider oder mit GOTT/ wider oder mit
vnserm Nechsten/ wider oder mit vnser Seelen
heil ist. Dann mancher Mensch diß oder jenes
von GOTT bittet/ vnd do ihme GOTT solchs
gebe/ were es ihme/ wo nit dem Leib/ doch der
Seel

Christus
ein Hime-
llscher vnd
Ewigger
König.

Warumb
Gott vns
nit jeder zeit
erhöret.

Seel ein grosser schad/ darüb erhört ihn GOTT
nit/sonder sagt ihm in sein herz: Du weißt nit
was du begerest. das ist: Du weißt nit/ oder wilt
doch nit wissen/ daß du deinen eignen schaden be-
gerest. Soll derhalben ein jeder Christ/ wann er
etwas von GOTT begeret/ vnd nit eigentlich
weiß ob solchs mit oder wider GOTT/ seinen
Nechsten vnd seiner Seelen heil ist/ zu ende sei-
nes Gebetts sagē zu GOTT: Doch/ O GOTT/
nit mein/ sonder dein Will der geschehe.

Alles sollen
wir Gott
heimstellen.

Kelch be-
deutet alda
den penit-
enzen tod.

Ferners hat der Herr zu seinen zweyen Jün-
gern gesagt: Könt ihr trincken den kelch/ den
ich trincken werde? Alhie verstehn wir durch
den kelch nichts anders/ dann dort der Herr
verstanden/ do er am Desberg zu seinem vñ vn-
serm Himelischen Vatter gesagt hat: Vatter/
ist es möglich/ so gehe diser kelch von mir: wiltu
aber daß ich ihn trincken soll/so geschehe nit mein
sonder dein Will. Domaln hat gewißlich der
Herr von seinem jekund anstehenden tod gere-
det. Also auch hie/ do der Herr zu seinen Jün-
gern vom kelch trincken redet/ verstehet vnd frä-
get er seine Jünger: Ob sie auch willig vnd be-
reit seyen/ zur zeit der not/ wegen seines H. Na-
mens vnd Christlichen Glaubens den tod zu lei-
den? So bald die Jünger diß gehört/ verment-
ten sie/ wann sie Ja saaten/ so were die sach
schon gericht vnd geschlicht/ vñ allem durch auß
schon geholffen/ der Herr wurde ihnen als bald
zur antwort geben: Nun so seye ihm also: Jo-
annes soll in meinem Reich zur rechten/ vnd
Jacobus zur lincken sitzen: oder/ Joannes soll/
Cangler

Cansler/ vnd Jacobus an meinem Hof Mar-
 schalck seyn. Bedencken sich derhalben nit lang/
 geben ohne verzug/ ohne alles bedencken/ dem
 Herren antwort: Ja wir könden deinen
 kelch trincken/ vnd wegen deines Namens den
 tod leiden. Alhie sehen wir/ was die Ehrgeitzig-
 keit auch bey disen Jüngern vermögt hat. Sie
 sagen Ja/ wissen aber nit/ wann es an ein treffen
 vnd beweisen gehn solt/ ob es Ja oder Nein seyn
 würde/ allein daß der Herr sie ihrer vergebenli-
 chen vnd vnbillichen Bitt gewehren soll. Wie
 vnbillich sie Ja gesagt haben/ (diser zeit/ ehe daß
 sie den H. Geist empfangen haben) ist leichtlich
 abzunehmen auß dem jenigen/ so sich bald her-
 nach / vber Neun tag/ am abend/ als er des vol-
 genden tags sterben must vnd wolt/ mit ihnen
 vnd allen anderen Jüngern verlossen hat: Sie
 alle verhießen ihme am letzten Abendmal/ vnd
 auff dem Wege zum Delberg/ sie wolten von ih-
 me nit weichen/ mit ihme in den tod gehn: so bald
 aber die Jüden in Garten kamen/ vnd hand an
 IESVM legten/ lieffen die Apostel all dauon/ vnd
 welcher besser lauffen mocht als der ander/ der
 vnderliesse es nit/ vnd ein jeder vnder ihnen war
 dem hindern fuß feind.

Unbedach-
 te antwort
 der Jünger
 Christi.

Ehrgeitzig-
 keit thut vil.

Unbesten-
 digkeit der
 Jünger des
 Herren.

Alda wir Christen lernen: Daß wir vns auff
 vnserere krefftten vnd vermögen nit verlassen sol-
 len/ sollen nichts für gewiß verheissen noch be-
 rühmen/ sonder alles in den Willen/ gewalt vnd
 macht GOTTES stellen/ als dann auch vnser
 vermögen vnd Willen gern darzu geben/ vnd/
 do es von nöten/ auch vns GOTT mitwircket/
 leib

Was wir
 alda zu ler-
 nen haben.

leib vnd leben/ Gut vnd Blut/ den kelch zertrennen darstrecken.

Das aber dise zween Apostel/ Jacobus vnd Joannes/ sampt den andern zehen (Mathias anstatt Jude des verrethers) hernach/ als sie den H. Geist empfangen/ den kelch Christi redlich getruncken haben/ ist der ganzen Christenheit/ auch den Jüden vnd Türcken/ do sie nur selbst wollen/wol bewust. Dann die eilff Apostel den tod gelitten haben. Joannes aber hat Gift getruncken/ ist in ein faß mit siedigem Del gesetzt/ vñ ins ellend verjagt worden/ also/ daß auch der will/ herß vnd gemüt gertzlich den tod zu leiden geneigt vnd bereit gewesen ist.

Die eilff
Apostel ha-
ben den tod
gelitten.

Von S.
Jacobo.

Diser Jacobus/ desse Feyertag wir heut halten/ ist ein Sohn Zebedei vnd Marie Salome/ vnd ein Bruder Joannis des Euangelisten gewesen/ so sonsten der mehrer oder grösser S. Jacob genennet wirdt/ weil er vor dem andern S. Jacob zum Apostolat kommen ist/ hat nach der Auffart Christi in Judea vñ Samaria das wort GOTTES geprediget: Kam endlich in Hispaniam/ von dannen widerumb in Judeam/ bekeret Hermogenem den Zauberer vñ seinen Jünger Philetum. Ist noch ein mal in Hispaniam gezogen/ vnd daseibsten das Euangelium geprediget/ vnd mit Wunderzeichen besteriget. Ist widerumb gen Jerusalem kommen/ da ward er von den Jüden gefangen/ vnd zu enthaupten außgeführt: machet auff dem wege einē Schlagfiechen gesundt/ dadurch Josias der Schriftgelehrte/ der Jacobum selbst füret/ bekeret/ darumb

umb auch als bald gefangen/mit feusten geschla-
gen/vnd mit S. Jacob enthauptet wurde. Dis
ist geschehen zu Jerusalem auß anstiftung des
Obersten Priesters Abiathars auß beuelch He-
rodis Agrippe/ ist also der H. Jacobus der erste
Martyrer vnder allen Aposteln. Sein heiliger
leib ist von Jerusalem in Hispanien gefürt/vnd
zu Galitia oder Compostell begraben worden/
daselbst er dann von vilen Bölckern auß allen
Landē besucht mit grosser ehr/ alda auch GOTT
vil Wunderwerck gewirekt zc. Also hat diser H.
Jacobus den kelch Christi/ redlich/ Ritterlich
vnd gutwillig getruncken/ die kron der Ewigen
Seligkeit erlangt/ der wölle GOTT für vns
bitten/ auff daß auch wir mit ihme auff dem
wahren Christlichen Catholischen Glauben/ bis
an das ende vnfers lebens verharren/vnd endt-
lich selig werden mögen.

Act. 12.

Jacobi Heil-
lichumb zu
Compostell.

Was hernach volget im heutigen Euange-
lio/ ist vom gezenck vnd Ehrgeizigkeit der Jün-
ger/ so disen zweyen mißgönt/ daß sie vmb die
Obersten Sit bey dem Herren angehalten/
Dann ein jeder vnder ihnen were gern der mei-
ste vnd fürnemste am Hof gewesen. Von wel-
chem Laster der Ehrgeizigkeit/ wir mitler zeit
weitleuffig in einer gansen oder zweyen Predi-
gen handeln/vnd jezund Euwer Andacht nit
lenger auffhalten wöllen.

Gehört habē wir/daß auff heut das Fest vnd Beschluß.
Feyertag des H. Apostels Jacobi des größern
gehalten wirdt. Vnd daß sein Mutter/weaen
sein vnd seines Bruders Joannis/ bey Christo

f umb

ymb die fürnemsten Sisz in seinem Reich angehaltē hat/ aber doch nichts erlangt/ seitemaln wir nit gewist was sie begeren. Derowegē sollen wir nichts/ weder von GOTT noch von der Welt/ weder für vns noch für vnser Freund begeren/ wir wissen dan/ daß vnser begeren billich/ nit wider GOTT/ nit wider vnsern Nechsten/ noch wider vnser Seelen Heil sey/ auff daß vns nit auch wie disem Weib vnd ihren zweyen Schwestern widerfare/ vnd hören müssen/ Ihr wißet nit was ihr begeret: sonder daß wir mögen gehört/ erhört/ vnd vnser bitts gewehrt/ vnd nach disem zeitlichen leben Ewig selig werden/ Amen.

Gebetlin
zu Christo
vnserm Heil-
land.

Barmherziger GOTT/ Herr IESV Christ/ desse Reich nit von diser Welt/ noch zeitlich/ sonder droben im Himmel vnd Ewig ist/ verleihe vns verstand/ daß wir nit mit Maria Salome/ weder für vns noch vnser kinder/ das zeitlich vnd zergenglich/ sonder das Ewig Reich begerē/ auff daß auch wir mit dir nit zeitlich/ sonder Ewig leben vnd Regiren mögen: Daß wir auch niemands/ weder fürdern noch auffneihen zu einem Stand/ desse er nit würdig ist/ auff daß wir nit an frembden Sünden vnd Blut schuldig werde. Verleihe auch Gnad/ daß wir zur zeit der not willig vnd bereit deinen kelch trincken/ vnd nach dem Exempel des
H. Jac

H. Jacobi/wegen deines H. Namens vnd
Catholischen Glaubens / den tod leiden/
vnd also mit ihme immer vnd Ewig selig
werden mögen. Hierzu wollestu / O H.
Apostel Jacobe / sekund vnd jeder zeit vn-
ser Fürsprech seyn bey GOTT / desse H.
Angesicht du ohne vnderlaß siehest / Amen.

Am tag des heiligen Martyrers
Panthaleonis / zum theil zu
Cöln feyerlich.

Am 28. tag
Julij.

DER heilig Panthaleon war
von einem Heydnischen Vatter
mit namen Eustoraius / vnd auß
einer Christlichen Mutter Eubula
geboren / ward auch vom Priester
Hermolao zum Christlichen Glauben bekert /
bekeret volgendis auch durch Wunderwerck
seinen Vatter Eustorgium. Nach deme sein
Vatter starb / theilet er all seine Güter vnder die
Armen / ward vom Tyrannischen Keyser Ma-
ximiano gefangen / an ein Ram auffgeheneckt /
mit hacken zerrissen / mit sacklen gebrennt / in
ein Pfannen vol heisses bley gelegt / mit einem
grossen stein ins Meer geworffen / den wilden
Thieren zu verschlucken dargeben : Dieweil er
aber durch Götlichen beystand solches alles
erlitten ohne verlesung / seynd tausent Män-
ner bekert / vnd vmb des Glaubens willen ent-
hauptet worden. Da Panthaleon aber an ei-
nen Delbaum gebunden vnd auch enthaup-

Panthaleon ist enthaup-
tet worden. tet werden solt/ ist das Schwerdt so weich wor-
den wie wachs/ dadurch alle Kriegsknecht be-
fert wurden. Ist doch endlich enthauptet wor-
den/ vnd vergoß Milch für Blut: der Delbaum
ist auch zu stund fruchtbar worden/ dadurch aber
mal'n vil volcks bekert/ vnd sein heiliger leib ver-
brennt ward. Welcher nun GOTT für vns hit-
ten wolle/ Amen.

Anno 300.

Evangeliu vnd Predigen/wie an
andern heiligen Martern Chris-
ti/ als an der Bekering Pauli/
Georgij/ Marci/ Laurentij/ Stephe-
ni/ 2c.

Am 1. tag
Augusti.

Am tag der Bänd oder Ketten
S. Petri/ zum theil zu Bamberg
vnd Eöln feyerlich.

Auff heut halten wir das Fest
vnd Feyertag des heiligen vnd für-
nemesten Apostels Petri/ zur ge-
dechnuß seiner Wunderbarlichen
erledigüß/durch einen Engel GOT-
TES geschehen auß der hand vnd Bänden He-
rodis Agrippe zu Jerusalem/ als er an zweyen
ketten (welche noch zu Rom auffbehalten wer-
den) gefangen lage/ dauon wir in den Geschich-
ten der Apostel also lesen: Zu derselbigen zeit legt
Herodes die hende an etliche von der Kirchen
zu peynigen. Er tödtet aber Jacoben Joannis
Bruder mit dem Schwerdt. Vnd do er sahe/
daß

Act. 12.

Matth 4.1
17. a 20. b
26. d

daß es den Jüden gefiel/ thet er dazu/ daß er
 Petrum auch fahen möchte/ vnd es war gleich
 an Osterlichen tagen. Do er ihn nun ergriffe/
 legt er ihn ins gefengniß/ vnd vberantwortet
 ihn vier quartiren Soldnern/ die ihn bewaren
 solten: dann er gedacht ihn nach den Ostern
 dem volck fur zu führen. Also ward Petrus im ge-
 fengniß gehalten. Aber das gebett geschach für **Actor. 4. 6**
 ihn zu GOTT ohn vnderlaß von der Kyrchen.
 Vnd do ihn Herodes wolt für führen/ in dersel-
 ben nacht schlieff Petrus zwischen zweyen Sold-
 nern/ gebunden mit zweyen fetten/ vnd die hüt-
 ter vor der thür/ hüteten des gefengniß. Vnd
 sihe/ der Engel des Herren kam daher/ vnd ein **Actor. 5. a**
 liecht schien in dem gemach/ vnd er schlug Pe- **16. d**
 trum an die seiten/ vnd weckt ihn auff/ vnd
 sprach: Stehe auff schnell vnd bald. Vnd die
 fetten fielen ihm von den henden. Vnd der En-
 gel sprach zu ihm: Gürtte dich/ vnd thue deine
 schnuch an. Vnd er thet also. Vnd er sprach zu
 ihm: Werff dein kleid vmb dich/ vnd folge mir
 nach. Vnd er gieng hinaus/ vnd folget ihm
 nach/ vnd wuste nit daß es warhafftig war/ das
 da geschach durch den Engel/ sonder dauchte
 ihn/ er sehe ein gesicht. Sie giengen aber durch
 die erste vnd andere hut/ vnd kamen zu der eh-
 fern thür/ welche zur Stadt füret/ die thet sich
 ihnen von ihr selber auff/ vnd tratten hinaus/
 vnd giengen hin ein gasse lang/ vnd also bald
 wieche der Engel von ihm. Vnd do Petrus zu
 ihm selber kam/ sprach er: Nun weiß ich war- **Gen. 28. d**
 hafftig/ daß der Herr seinen Engel gesandt/ vnd **Dan. 6. d**
 mich

Actor. 1. b

mich errettet hat auß der hand Herodis/ vnd von allem warden des Jüdischen volcks. Vnd als er sich besinnet/ kam er fur das hauß Marie der Mutter Joannis/ der mit dem zunamen Marcus hieß/ da viel versamlet waren/ vnd beteten. Als aber Petrus an die thür der porten klopffet/ trat herfur ein Magd zu sehen/ mit namen Rhode. Vnd als sie Petri stimme erkant/ thet sie die thür nit auff fur freuden/ sonder lieff hineyn/ vnd verkündet ihnen/ Petrus stündte vor der thür. Sie aber sprachen zu ihr: Du bist vnfinnig. Aber sie bestundt drauff/ es were also. Da sprachen sie: Es ist sein Engel. Petrus aber klopffet fur vnd fur. Do sie nit die thür auffthetten/ sahen sie ihn/ vnd entsaßten sich. Er aber wincket ihnen mit der hand zu schweigen/ vnd erzelet ihnen/ wie ihn der Herr hett auß dem gefengniß geführt/ vnd sprach: Verkündigt diß Jacobo vnd den Brüdern. Vnd gieng hinauß/ vnd zoh an ein ander ort. Do es aber tag ward/ war nit ein kleine bekümmernuß vnder den Söldnern/ wie es mit Petro ergangen were.

Actor. 13. b

Actor. 15. b
21. b

E Vangelium vnd Predig/ wie am Fest Petri vnd Pauli/ am neun vnd zwenzigsten tag Junij gehalten.

Am

Am tag der heiligen vnd fürne-
men Püfferin/ auch Marterin Af-
fre/ zum theil zu Augspurg
feyerlich.

Am 7. tag
Augusti.

Aff heut halten wir den feyer-
tag der heiligen Püfferin vñ Mar-
terin Affre/ welche in Cypren von
Königlichem stammen geporen.
Nachdem aber ihr Vatter von ei-
nem andern König in dem Krieg erschlagen/
vnd sie ihres Väterlichen Lands beraubt ward/
kam sie mit ihrer Mutter der Königin Hilaria
gen Rom/ vnd von dannen auß Göttlicher er-
manung/ so zum dritten mal zu ihr im schlaff
geschehen/ gen Augspurg/ lebten beide in der
Hendenschafft/ vnd in öffentlicher vnzucht. Als
der heilig Bischoff Marcissus auß seiner Spa-
nischen stadt Gerunda/ gen Augspurg kam/ vnd
samt seinem Diacon Felice/ auß GOTTES
schickung in Affre hauß eynkeret/ da ward Af-
fra durch S. Marcissi Predig vnd Exempel
wunderbarlich bekert/ vnd mit ihr die mutter
Hilaria samt ihren dreyen mägden/ nämlich/
Digna/ Eunomia vnd Eutropia/ welche alle
sich tauffen liessen/ vnd von dem vnzüchtigen
leben abstundten. S. Marcissus hat auch auß
ihrem hauß ein Teufel in eines schwarzen vn-
gehewren Moren gestalt vertriben. In dessel-
ben S. Marcissi abwesen worden dise Wei-
ber in dem Christlichen Glauben vnd fürne-
men gesterckt durch S. Dionysium den newge-

Am Feyertag des H.

ordneten Priester/ der S. Hilarie bruder war
 Nachdem aber Affra ihre Güter den armen ge-
 ben/ ward sie ihres Christlichen Glaubens hal-
 ben durch den heydnischen Richter Caium zum
 feur verdampft/ auff dem Lechfeld bey Augspurg
 an ein saul gebunden/ vñ lebendig verbrent. Ihr
 leib aber ist darnach gang befunden worden/ dar-
 bey GOTT grosse Wunderzeichen thut. Ist ein
 sonderliche Patron zu Augspurg/ welche sampt
 ihrem Heilthumb/ auch S. Ulrich/ in grossen
 ehren gehalten 2c.

Euangelium vnd Predigt von S.
 Katharina / Künigundis / Mar-
 garetha / oder auch Maria Ma-
 gdalena / weil dasselbig Euangelium fügen-
 lich auff die H. Affram kan gezogen vnd
 aufgelegt werden.

Am Feyertag des heiligen Mar-
 tyrers Laurentij / Euangelium
 Ioan. xij.

Am 10. tag
 Augusti.

1. Cor. 15. d

Matt. 10. c
 Mar. 8. c

In der zeit sprach IESVS
 zu seinen Jüngern: War-
 lich warlich sage ich euch/
 es sey dann daß das weis-
 sen korn in die erden falle
 le/ vnd erstirbe/ so bleibet
 allein. Wo es aber stirbt/ so bringts vil
 frucht. Wer sein Seel lieb hat/ der werde
 sie



sie verlieren. Vnd wer sein Seel auff diser Luc. 9 c
 welt hasset/der wirdt sie erhalten zum ewi- 17. d
 gen leben. Wer mir dienen wil/der volg
 mir nach: vnd wo ich binn/ da soll mein
 diener auch seyn. Vnd wer mir dienen
 wirdt/ den wirdt mein Vatter ehren/ der
 im Himmel ist.

Wer sein Seel lieb hat/ der wirdt sie
 verlieren. Ioan. xij.

Wiewol diß iekund gehörtes Eu-
 angelium (ihr geliebten in GOTT)
 den worten nach nit sehr lang ist/
 begreiffst es doch vnder andern für-
 nemlich zwo herrliche vnd schöne/
 auch diser zeit zu erörtern/ zwo notwendige Leh-
 ren in

f s ren in

Inhalt diß
heutigen
Euangelij.

ren in sich. Die erste betrifft Christum vnsern Herren: Die ander vns Christen alle/ so immer vnd Ewig bey Christo droben im Himmel wohnen wollen. Erstlich lehret der Herr die notwendigkeit vnd Nutzbarkeit seines Tods vnd Auferstehung. Zum andern/ wie sich ein jeder Mensch hie auff Erden gegen GOTT vnd sich selbst verhalten muß/ auff daß er ihme nit allein hiesonder auch dort/ nachuolgen möge. Wirdt derhalben gehörtes Euangelium billich/ nit allein auff disen heutigen heiligen Feyertag des heiligen Martyrers Laurentij/ sonder auch auff die Feyertag anderer H. Martyrer/ geprediget/ seittemaln sie auch ein rechtes Wetzen körnlin gewesen/ welches ihnen selbst vnd anderen nit wenig frucht gebracht/ auch ihren leib vnd Seel hie auff Erden also gehasset / daß sie solche in das Ewig leben erhalten haben.

Theilung
vnd Inhalt
diser Predigt.

Weil dann solchs Euangelium nit allein den heiligen Aposteln/ dem H. Laurentio/ vnd andern Martern/ sonder auch vns Christen allen gesagt ist worden/ wollen wir jezund von obgemelten beiden Punctlin/ nach den zweyen Theilen diser Predig / weitlenffiger handeln. Erstlich vom ersten/ dann auch vom andern. Welchs ihr mit gedult anhören wölt/ so wil auch ich euch solchs auff das leichtest vnd kürzest gutwillig fürhalten.

In dem Anfang diß heutigen Euangelij lesen wir in gemeltem Capittel: Daß etliche Vnglebige Griechen/ so gen Jerusalem kommen/ Christum begerten zu sehen

sehen / vnd derowegen Philippum angesprochen / er solte ihnen zu wegen bringen / daß sie den Herren sehen möchten: welches Philippus Andree / sie beide aber dem Herren angezeigt haben. Darauff der Herr geantwortet: Die zeit ist kommen / daß des Menschen Sohn verflert werde. Vnd als bald volget hierauff diß heutig Euangelium also: In der zeit / nämlich am Erichtrag oder Dienstag nach dem Palmsonntag / welcher war der zwey vnd zwentzigst Martij des drey vnd dreissigsten Jars Christi / als jekund die zeit seines leidens vnd Tods gar nahet gewesen / sprach I E S V S zu seinen Jüngern: Wahrlich wahrlich sage ich euch / es seye dann / daß das Weizen korn in die Erden falle vnd ersterbe / so bleibts allein. Wo es aber stirbt / so bringts vil frucht. Was alda vom Weizen kornlin gesagt ist / wirdt auch von allen vnd jeden kornlin allerley Treid vnd Früchten verstanden. Ein jedes kornlin / es seye Weizen / Roggen / Gersten / Habern zc. wie lang es lebendig bleibt / auff dem Boden / kisten / oder an einem anderen ort liget / so bleibt es also allein für sich ligend / wirdt vnd ist also nit taugenlich daß es auffgehe vnd frucht bringe / ziglet nit andere kornner / sonder bleibt also ohne frucht allein. Wann es aber in das Erdrich / in den Acker geworffen / vnd zur rechten zeit außgeseet wirdt / vnd stirbt in der Erden / wirdt es widerumb lebendig / broffet herfür / vnd wachset in einem Halma / Eher /

Wetzen-
korn bringe
auff dem
boden nit
frucht.

Eher/bringet zwenzig oder dreissig andere Körner
vnd vil frucht zur auffenthaltung des zeitlichen
lebens.

Warumb
der Herr die
se wort ge-
redet.

Christus ist
das rechte
Weizen
korn.

Was der Herr Christus seinen Jüngern mit
diesen Worten habe anzeigen wolle/ist die an-
wort: Es waren noch drey tag zur stund/das der
Herr Christus daselbsten/aida er diese wort ge-
redet/nämlich zu Jerusalem/leiden vnd sterben
muß vnd wolt. Auff das aber seine Jünger vber
seinen Tod nit geergert würden/Auff das sie
auch zu vor wissen/das er nit ohne sonderliche
ursachen vnd grosse frucht vnd nutzbarkeit der
ganken Welt leiden vnd sterben wurde/wolt er
ihnen zu vor anzeigen/vnd gar nit verhalten:
Das er das rechte Weizen korn sene/das vom
hohen Himmel hieher auff diese Welt kommen
ist: welches Weizen korn/ob es gleich wol leben-
dig ja das leben selbst sene/wurde es doch der
Welt/dem ganken Menschlichen Geschlecht
nit sonderlich vil nutzen noch frucht bringe (sei-
temaln im Göttlichen Rath von Ewigkeit be-
schlossen/das die Welt eben also/nämlich durch
das leiden/sterben/Tod/Aufferstehung/vnd
Auffart Christi des wahren Sohn GOTTES
vnd MARIAE/solte erlöset werden: sonsten/do
GOTT gewolt/hett er mit einigem Blutstropf-
fen oder durch andere Mittel die Welt erlösen
könden) wann es also lebendig gebliben/nit ge-
storben/vnd nit widerumb auffstanden were.
Derhalben sollen seine Jünger wissen/das nun
die zeit vorhanden sene/das er von den Jüden
gefangen/getödtet/begraben/vnd also wie ein
Weizen

Weizen korn in das Erdtrich geworffen werde. Dasselben aber werde er nit immer also todt bleiben/ sonder am dritten tag widerumb lebendig werden/ widerumb von den todten auffstehn/ frey lebendig zu beschloßnem Grab heraus gehn/ vnd dadurch der ganzen Welt vil frucht bringen.

Christus hat vñ frucht gebracht durch seinen tod.

Dasz diese beide geschehen / vnd völiglich in vnd durch Christum das rechte Weizen kornlin erfüllet seyen worden/ ist meniglich bewust/ ja allen Christen bekant/ wöllen doch solchs mit wenig worten erholen.

Alle vier Euangelisten/ Mattheus/ Marcus/ Lucas vnd Joannes/ (wil der andern Aposteln gern geschweigen) bezeugen weitläuffig: Dasz der Herr am dritten tag nach deme er heutigs Euangelium mit ihnen geredet/ nämlich am Grünen Donnerstag/ am Delberg im Garten/ in nacht gefangē/ des folgenden tags gezeißlet/ gekrönt: ihme ward ein Creuz auff seinen Ruckē gelegt/ das muste er selbstē für die Stadt Jerusalem hinaus an die Schedelstatt tragē/ daselbsten wurde er am H. Karfreitag/ welcher der fünff vnd zwenzigst Martij war/ gecreuziget/ getödt/ gestorben/ begraben/ vnd am dritten tag widerumb auffstanden. Welches alles weitläuffiger zu erweisen nit von nöten/ seitemaln keiner vnder vns allen ist/ der hierinnen einigen zweifel trüge/ wie wir dann teglich sein Leiden/ Tod/ Begrabnuß vnd Auffstehung im heiligen Apostolischen Glauben bekennen.

Mat. 26. 27.

Mar. 14. 15.

Luc. 22. 23.

Joan. 18. 19.

Dasz aber auch das ander wahr seye/ nämlich

lich

lich/das er Christus das rechte Weizen körntlin
vns / ja der ganken Welt / durch seinen Tod
vnd Auferstehung vil Frucht gebracht habe/soll
mit mehrern Worten vnd etwas weitleunfiger
erwisen werden.

Frucht oder
nugbarkeit
des leidens
vnd Auff-
erhebung
Christi.

Genes. 3.

Christus/
vnd sonsten
niemandts/
hat gnug
für vns ge-
thon.

Was für Frucht vnd nutzbarkeit der ganken
Welt auß dem sterben vnd Tod Christi eruo-
get/ist auch nit von nöten mit so gar vilen wo-
ten/ mit verlengerung diser Predig/weitleuffig
anzeigen wollen. Seiternaln ja (GOTT seyn
Ewigs lob Ehr vnd danck gesagt) allen Ca-
tholischen Christen ohne dise Predig bewußt ist/
das die ganze Welt wegen der Sünd Adams
vnd Eue in das zeitlich vnd Ewig sterben/ in die
Sünd vnd zorn GOTTES/dem Teufel in sei-
nen strick vnd Gewalt gerathen ist/ auch immer
vnd Ewig hette müssen verdampft seyn/wonit
Christus IESVS GOTTES vnd MARIAE
Sohn/welcher als bald von seinem Himmeli-
schen Vatter ein Schlangentretter genennet/
Abraham/ Ysaac/ Jacob/ David vnd anderen
Vätern des alten Testaments/das er auß ih-
rem Geschlecht geporen solt werden/ verheissen
ist worden/ am Stammen des heiligen Erew-
kes den Tod für vns vnd aller Welt Sünd ge-
litten/vnd gnug dafür gethon hett. Ja er/Chri-
stus GOTTES vnd MARIAE Sohn/er/vnd
allein er/sonsten niemandts weder im Himmel
noch auff Erden/hat gnug/gar gnug/vberflüssig
gnug/vnd mehr als gnug gethon/für die Sünd
der ganken Welt/hat alle Menschen dem Teu-
fel auß seinem Strick erlöset / hat allen Men-
schen

sehen das Ewig leben erlanget/(allein daß sich alle Menschen seines H. Leidens vnd Verdienstes jezund durch verordnete Mittel theilhaftig vnd fähig machen) den Teufel hat er vberwunden/ vnd das Himmelhör eröfnet. Diß seynd fruchten gnuß/ so vns diß Weizenkörnlin Christus/ durch seinen Tod zu wegen gebracht. Weil vns aber sein leiden / sterben vnd tod nichts genußet hett/ do er also in der Erden im Grab verwesen vnd nit widerumb auffgestanden were/ müssen wir von den fruchten seiner Auffstehung lehren vnd hören/ darauff auch diß heutige Euangelium gerichtet. Vnd ist erslich vns Christen/ ja der ganzen Welt/ aller Glaube vnd die Seligkeit an seiner Auffstehung gelegen. Dann do er schon geboren / gelehrt / Wunderzeichen gewirckt / gelitten / gestorben / aber nit widerumb von den todten auffgestanden were/ wurden seine Jünger in ihn / als in den wahren Sohn GOTTES nimmer mehr glaubt haben / wie leichtlich auß den Worten Thome Joan. 20. zu lernen/ der nit glauben wolt/ er sehe vnd griffe dann / nit angesehen daß ihme die anderen sehen Jünger gesagt/ sie haben den Herren gesehen. Do dann die Apostel in Christum nit glaubt herten / wurden weder sie noch andere in die ganze Welt nit außgangen seyn / noch vil weniger Christum als den wahren Sohn GOTTES verkündiget haben / vnd also wurden auch wir noch auff den heutigen tag / nit Christen / sonder Vngleubige Heyden oder Jüden seyn: derhalben auch dise Frucht/ so vns auß der

Auff

Ohne die
Aufferste-
hung Chri-
sti were nie-
mandis in
ihm gleubig
worden.

Aufferstehung dieses Weisē körnlins Christi her
kompt/nit klein/sonder sehr groß vnd vil ist.

Altuätter
seynd durch
dē tod Chri-
sti erlöset/
aber erst an
seiner Hm-
melfart in
die seligkeit
geführt wor-
den.

1. Cor. 15.
2. Pet. 1.
2. Tim. 2.
Actor. 2. 10.
13. 26.

Joan. 5.

Wo bleibet
Allein der
Glaub.

Die vierte
frucht.

Von solchen fruchte der Aufferstehung Chri-
sti/wisten auch die Altuätter in der Vorhell zu sa-
gen. Dann da der Herr im Grabe gebliben/vnd
nit widerumb aufferstanden were/vñ volgens
nit auff gefaren gen. Himmel/hette er das Himmel-
thor/weder eröffnet noch sie mit ihme in Himmel
genommen.

Weil dan nun Christus aufferstanden/seynd
wir (als auch auß dem H. Paulo zu lernen) ver-
sichert/ daß auch wir nit Ewig im Grab liegen/
sonder mit diesem vnserm leib widerumb auffer-
stehn werden/nämlich am Jüngsten tag/Wie
wir dann auch alle tag in vnserm Christlichen
Glauben bekennen: Ich glaube ein Aufferste-
hung des Fleisches. Wie auch Christus der Herr
vns selbst mit disen worten gelehrt hat. Wahr-
lich wahrlich sage ich euch/ es kompt die stund/
vnd ist schon jekund/ daß die todten werden hö-
ren die Stimm des Sohn GOTTES/ vnd die sie
hören werden/die werden leben. 2c. Vnd es wer-
den herfür gehen die da guts gethon haben/ zur
Aufferstehung des lebens/ die aber vbels gethon
haben/zur Aufferstehung des Gerichts. Welchs
ja vns Christen abermal ein sonderliche grosse
frucht vnd Trost ist/ daß wir nit allein nach der
Seel biß an den Jüngsten tag/ sonder darnach
mit leib vnd Seel immer vnd Ewig im Himmel
mit GOTT vnd allen seinen außervölten woh-
nen sollen.

So ist vns auch dise frucht hierauf eruolget/
Daß

Daß er vns droben im Himmel vnser ort vnd
wohnung bereitet hat/welchs nit geschehen/do er
im Grab gebliben/vñ nit widerumb auffestan-
den were/wie der Herr selbstē zu seinen Jüngern
gesagt: Ich gehe hin euch das ort zebereiten/auff
daß wo ich binn/auch ihr seyet. Vnd im heuti-
gen Euangelio: Wer mir dienen wil/der volge
mir nach/vnd wo ich binn/da soll mein Diener
auch seyn.

Joan. 12.

Luc. 9.

Mar. 8.

Matth. 10.

Hierzu auch/Daß er seinen Jünaern vñ vns
den H. Geist sendet/wie er auch zu seinen Jün-
gern kurz vor seinem tod gesagt hat: Es ist euch
nutz daß ich hingehē. Dann so ich nit hingehē/
so kompt der Tröster nit zu euch: so ich aber hingen-
he/so wil ich ihn euch senden.

Die fünffte

nutzbarkeit.

Joan. 16.

Galat. 4.

Auch dise frucht ist vns auß seiner Aufferste-
hung eruolget/daß er droben im Himmel (dann
do er nit aufferstandē/were er auch gen Him-
mel nit auff gefaren) vnser Mittler ist/der vns
bey GOTT (welcher er selbstē ist) vertrittet/wie
der H. Paulus lehret: Christus/der aufferweckt
vnd zur rechten GOTTES ist/der vertritt vns.

Sechste

frucht vnd

nutzbarkeit

des Tods

vnd Auffers-

tehüg Chri-

sti.

Rom. 8.

Vnd der H. Euangelist Joannes: Ob jemand
sündiget/so haben wir einen Fürsprechen bey
GOTT IESVM Christum/(nämlich nach sei-
ner Menschheit/sonsten ist er auch dem Vatter
vnd H. Geist ein gleicher GOTT) der Gerech-
t ist/vnd derselbig ist die versönung für vnser
Sünd.

1. Joan. 2.

Christus

vnser Für-

sprech/vnd

ein Ver-ö-

nung für vns

ere Sünd.

ere Sünd.

Diß seynd ja Früchten vnd Nutzbarkeiten
gnug/so vns diß recht Weisē körnlin Christus/
durch sein leiden/Tod/Begrebnuß vnd Auff-
erhebung

erhebung erlangt vnd zu wegen gebracht hat darumb wir auch ihme billich auff das höchste vnd ohne vnderlaß zu dancken haben/ ja nit gnugsam dancken könden.

Laurentius
ein Weizen
korn.

Das aber gehörtes Euangelii/ auff heutiges Fest vnd Feyertag des heiligen Martyrers Laurentij von der H. Christlichen Kirchen zu singen/ lesen vnd Predigen verordnet/ ist darumb geschehen: das auch er Laurentius ein Weizen korn gewesen/ so in das Erdreich geworffen/ vñ Frucht bracht hat. Er ist gemartert vnd getödtet worden wegen des Christlichen Namens vñ Catholischē Glaubens/ do er nämlich zu Rom auff einem Roß gebraten ist worden. Sein leiden hat auch vil frucht gebracht/ daß vil Jüden dadurch zum Christlichen Glauben bekert seynd worden. Ihme selbstē aber hat er desto ein höhere kron im Himmel erlangt. Vom H. Laurentio hernach weitlenffiger.

Wie wie
ein rechtes
Weizenkorn
seyn oder
werdē müß
sen.

Wir werden auch ein rechtes Weizen korn seyn/ wann wir jeder zeit von allen Sündē (gleich wie der Weiz vom Spreuwer) sauber vñ gereinigt seyn werden. Wann wir auch/ wie der H. Laurentius/ zur zeit der not/ vns/ wegen des Christlichen Catholischen Glaubens den tod zu leiden nit beschweren werden.

Beschluß
des ersten
Theils di-
ser Predig.

Behalten wir derhalbē auß diesem ersten Theil vorhabender Predigt: Das Christus/ welcher ist das beste Weizen korn/ wegen der Sünd der ganzen Welt den tod gern vnd gutwillig gelitten/ Vnd durch seinen Tod/ Auferstehung vnd Himmelfart/ der ganzen Welt vil Frucht gebracht

gebracht habe. Nun wollen wir auch anhören/
wie wir vns verhalten müssen / auff daß wir
auch ihme ins Himmelreich nachuolgen mö-
gen.

WEs der Herr Christus von ihme
selbsten geredet: Daß er das rechte Weizen
korn seye so in das Erdtrich müsse
geworffen / widerumb lebendig werden / auffer-
stehn / vnd vil Frucht bringen: wil er auch sei-
nen Jüngern vnd allen Christen ein Regel für-
schreiben / wie sie sich hie auff Erden verhalten
müssen / auff daß sie auch ein rechtes Weizen
korn seyen / frucht bringen / vnd ihme ins Him-
melreich nachuolgen mögen / vnd spricht: Wer
sein Seel lieb hat / der wirdt sie verlieren.
Vnd wer sein Seel auff diser Welt hasset /
der wirdt sie erhalten zum Ewigen leben.

Diß wil der Herr alhie sagen: Der jenig **Welche ihre**
Mensch / so alles thut was sein Seel / sein Will / **Seel nit lieb**
Bedancken / sein Leib / das Fleisch haben wol- **haben.**
len / der dienet seiner Seel vnd Leib hie zeit-
lich vnd hat sie lieb: diß aber ist kein rechte lie-
be / dann also wirdt er Leib vnd Seel immer
vnd Ewig verlieren. Wer aber sein Seel hie **Welche ihre**
auff Erden hasset / Das ist / der jenig / so seiner **Seel lieb**
Seel / Leib vnd Fleisch Gelüst nit statt gibt / **haben.**
hendet nit nach ihrem freyen Willen vnd mut-
willen / haltet sie im zaum / haltet sie abe von den
bösen begirden / gelüsten / fleischlichem wollust /
essen vnd trincken / bösen Gedancken / Vn-
zucht / von allerley Sünd / Schand vnd laster /
t 2 casteyet

castenet sie mit Fasten/Wetten/Wachen vnd anderen Christlichen vbungem/der wirdt sein Seel vnd Leib immer vnd Ewig in das Ewig leben erhalten.

Lue 12.
Von einem
Reichen
Mann.

Also hat hie auff Erden sein Seel lieb gehabt jener Reiche mann/ der zu ihme selbstem vnd zu seiner Seel also saget : Was soll ich thun? Ich habe nit/ do ich meine frucht hinsamle. Vnd er sprach: Das wil ich thun: ich will meine Scherren abbrechen/ vnd grössere bauen/ vnd wil dareyn samlen alles was mir gewachsen ist/ vnd meine Güter/ vnd wil sagen zu meiner Seelen: Liebe Seel/ du hast einen grossen vorrath auff vil Jar: habe nun ruhe/ is/ trinck/ vnd lebe wol. Siehe lieber Christ/ diser Reiche Mann hat sein Seel/ seinen leib (seines erachtens) so lieb gehabt/ daß ihme nit möglich gewesen were/ sie lieber zu haben. Erlaubt/ ja beuolhen hat er ihr zu essen/ trincken/ vnd in allem vnlustigen lust/ vnd lustigen vnlust/ in allerley Sünd/ schand vnd laster leben/ nichts vnderlassen/ sonder alles volnbringen/ was sie nur ansicht. Dis aber war kein rechte liebe/ dise liebe wehret nit lang/ so lang nur/ wie lang leib vnd Seel bey einandern bleiben/ darnach war vorhanden die Ewige Verdammnuß/ wie dann als bald am selbigen ort die antwort vnd straff also volget: Aber GOTT sprach zu ihm: Du Narr/ dise nacht wirdt man dein Seel von dir fordern/ vnd wes wirdt seyn/ das du bereitet hast? Also hat diser sein Seel zeitlich lieb gehabt/ aber immer vnd Ewig verloren.

Straff
Gottes der
Reichen.

Eben

Ebenmessig mögen wir antworten vom andern Reichen Mann / dauon vns auch Lucas **Luc. 16.** schreibet : Der sich in allerley köstlich Leinwath / Seiden vnd Samat bekleidet hat / der tag vnd nacht im wollust / in essen vñ trincken gelebt / vnd nur gethon was ihn gelustet / was ihn sein Seel / leib vnd fleisch angemutet hat / ihnen den geringsten mangel nirgents gelassen / vnd ja seines erachtens sein Seel nit lieber haben könden. Was ist geschehen ? Do er vermeynt sein sach stehe am aller besten / er habe sein Seel am aller liebsten / starb er / vnd die Teufel kamen / trugen sein Seel **Bisliche besohnung der Seligen.** in die Hell. Also hat auch diser sein Seel zeitlich lieb gehabt / vnd Ewig verloren.

Also ist's auch ergangen allen Menschen zur zeit Noe. Sie assen vnd trancken / heirathen / vnd **Genes. 7.** stundten auff zu spilen / vnd thaten nur was sie **Psal. 77.** gelustet vnd ihrem leib angeneh war. Was geschicht ? Als sie im besten mut waren / als sie vermennten sie seyen sicher vnd Selig / als sie das fleisch noch in ihrem Mund hatten / kompt der zorn GOTTES vñ Sündflusß vber sie / vnd ver-trenckt sie all.

Ihr Seel hetten auch also lieb etlich hundert Jar hernach die jenigen zu Sodoma vnd Gomorrha / mit fressen vnd sauffen / vnd allerley Sünd / Schand vnd laster / so lang / bis daß **Genes. 19.** GOTT Schwefel / Bech vnd das Himmelsch fiewr vom Himmel herab schicket / vnd verbrennet sie all.

Also haben auch ihr Seel hie auff Erden lieb gehabt / vnd dort verloren / Martinus Luther

Luther vnd
Kethe von
Boren/ ge-
läbdtbrüch-
ger Mönch
Meinendi-
ge Nonne.

ein Meinendiger Mönch/ vnd sein vermeyntes
Weib Kethe von Boren ein Gelübdtbrüchige
Nonne. Dise hatten GOTT vnd der Welt ge-
lobt vnd mit ihrem Eyd bestettiget/ sie wöllen die
tag ihres lebens in Klöstern bleiben/ willige Ar-
mut/ Keuscheit vnd Gehorsam halten vnd be-
halten. Solchs aber könte ihr Seel vnd stincken
der madensack in die lenge nit gedulden/ Ge-
lübdt/ Ehr vnd Eyd mussten gebrochen seyn.
Ihr Seel wolten sie hic auff diser Welt lieb ha-
ben/ wolten auch auff der Welt/ vnd nit im Klo-
ster/ wie andere Weltliche leben: Gelübdt/ Ehr
vnd Eyd hin oder her/ springen sie auß dem
Kloster/ hengen die Kutten an nagel/ werden
Weltlich/ fressen/ sauffen/ springen/ tanzen/
vnkeuschen so wol als der Gást nirgents keiner/
haben ihrem fleischlichen willen vnd mutwillen
nirgents keinen mangel gelassen. Wie sie aber
dorthin ihr Seel bewart haben/ weist GOTT:
mir ist nit geben jemandis zu richten vñ vrthei-
len. Vnd was alda vom Luther vnd Katharina
von Boren gesagt/ soll auch von allen meiney-
digen Mönchen vnd Ehrlosen Nonnen verstan-
den werden.

Also sollen ihnen auch alle Geistlichen vnd
Weltlichen lassen gesagt seyn: Daß sie ihr Seel
nit also wöllen lieb haben/ wie jekund von disen
gemeldet ist worden/ sonst werden sie auch ihr
Seel mit ihnen dort immer vnd Ewig verlie-
ren.

Do wir aber nit Ewig verdampt/ sonder Sel-
lig werden wöllen/ müssen wir vns der andern
Lehr

Lehr vnd Worten Christi gemess verhalten/ do er spricht: Wer sein Seel auff diser Welt hasset/ der wirdt sie erhaltē in das Ewig leben. Dise wort Christi seynd nit also zu verstehn/ als ob ein Mensch sein Seel vnd leib also hassen möge vnd müsse/ das er sich selbstē tödten/ vmb leib vñ leben bringen soll. Nein. Ein solcher Mensch wurde nit/ weder vor GOTT noch vor der Welt entschuldiget/ auch weder hie noch dort selig seyn. Gnug wirdt es seyn/ vnser Seel also hassen/ das wir ihre böse gelust nit gestatten/ vnd hergegen mit essen vnd trincken im zaum halten/ im dienst vnd liebe GOTTES durch vleissigs betten vnd embsigs fasten erhalten/ zu allen diensten GOTTES/ zur liebe des Nächstē/ zur vbung der guten Wercken/ gewöhnen. Vnd in summa werden wir vnser Seel hie auff Erden hassen/ wann wir vnserm fleisch seinen mutwillē nit gestatten/ sonder thund was ihme zu wider ist/ so werden wir sie dort lieben/ vñ bringen zur Ewigen freud vnd Seligkeit.

Wie wir
vnser Seel
hassen müs-
sen.

Also haben ihr Seel auff Erden gehasset vn- vil haben
salbarlich vil heiliger leut im alten vnd neuwen ihr Seel
Testament/ die sich ihren leib vñ Seel zu zāmen/ gehasset.
etwann in die Wüsteney/ etwann in die Klöster
begeben haben. Andere haben sonsten zu hauff
embsig gebettet/ vleissig gefastet/ offtermaln in
lob vnd dancksagung GOTTES vnd anderm
Gottesdienst gewachet/ deren Exempel alda et-
liche erzellen wollen/ ist vnnötig/ seiternaln solchs
allen Christen bewust.

Also müssen wir auch endlich vnser Seel vnd

vnsern leib hassen/ do es nemlich die not erfodert/ das wir vns den Tod zu leiden vmb Christi Namen vnd des Catholischen Glaubens wollen nit beschweren/ sonder willig/ geneigt vnd bereit seyn wollen/ auff das wir/ laut des Beschlusß disz heutigen Euangelij/ Christo vnserm Herren hie auff Erden nachuolgen/ vnd dort/ wo er ist/ Ewig bey ihme bleiben mögen. Also ist ihme auch der H. Martyrer Laurentius hie auff Erden vnd dort nachgeuolget. Diser heilige Laurentius war ein geporner Spanier/ kometen gen Rom/ ward ein Erzdiacon des H. Papsts vnd Martyrers Sixti. Als Sixtus der Papst zur Marter gefürt wurde/ wolte Laurentius mit ihme gemartert werden. Sixtus aber antwortet: Es were noch nit zeit/ so müste er Laurentius grössere Peyn/ Marter vnd tod leiden dann er. Hierauff ward auch Laurentius gefangen/ vnd als er dem Tyrannen Decio die Schatz der Kyrchen nit anzeigen wolt/ sonder auß benehch des H. Sixti dieselbigen vnder die Armen Christi trewlich auftheilet/ auch vielen blinden durch das zeichen des H. Creukes das Gesicht widerumb geben hett/ ward er in der Gefengnuß mit Scorpionen/ steinen vnd stecken geschlagen/ mit glüendem Blech gebrennet/ darnach an einer Ram außgestreckt/ widerumb mit Scorpionen auch mit steinen auff seinen Mund geschlagen/ vnd endlich in gegenwertigkeit Decij auff einem eysen Rost grewlich gebraten: vnd do er auff dem Rost so vast brennet/ sagt er zu Decio: Es ist nun auff einer Seiten wol

Vom H.
Laurentio.

wol gebraten/wende es vmb/ vnd is dauon. Ist
 also Christlich vnd Ritterlich gestorben. Von Anno 269.
 Hippolyto vnd dem Priester Justino begraben
 worden/auff die Hoffstat der würdigen Frauen
 Cyriace/ die von ihme bekert ist worden. Diser
 H. Laurentius wolle auch jekund vnd jeder zeit
 vor GOTT vnser Fürsprech seyn/ daß wir/ do
 es die not erfordern wurde/ auch ihme nachuol-
 gen mögen in allerley Peyn/ Marter vnd Tod/
 vnd endlich in das Ewig leben/ Amen.

W Ir danckē dir/ du gütiger GOTT Gebetlin zu
 Herr IESV Christ/ daß du vmb Christo vn-
 vnser willē hie auff erdē Mensch serm Helt-
land.

geboren/ vnd ein Weizen Korn so in das
 Erdrich solte geworffen/ hast werden vñ
 den tod wegen vnser Sünd leiden wöllen/
 auch vmb die grossen Gutthaten/ Früchte
 vnd nutzbarkeiten/ so vns auß deinem tod
 vnd aufferstehung eruolget seynd. Verlei-
 he vns Gnad/ daß wir vnser Seel/ leib vñ
 Leben hie auff Erden also hassen/ daß wir
 sie ins Ewig leben bringen vnd Ewig be-
 halten mögen. Daß wir auch/ do es die not
 erfordert/ mit dem H. Laurentio wegen
 deines heiligen Namens vnd Catholischen
 Glaubens/ allerley Peyn/ Marter vnd
 endlich den bittern tod leiden/ also dir/ hie
 vnd dorthin nachuolgen vnd Ewig
 bey dir wohnen mögen/
 Amen.

Am 12. tag
Augusti.Am tag der heilige Martyrin vnd
Königin Hilarie/ zum theil zu Augspurg
feyerlich.

In H. Hilaria ist ein Königin
in Extern gewesen / nach dem
aber ihr König von anderen Kö-
nigen im Krieg erschlagen vnd ih-
res Königreichs beraubet / kam sie
mit ihrer Tochter Affra gen Rom / vnd von
dannen gen Augspurg. Als sie daselbsten sampt
den ihren vom H. Marcisso bekert vnd geraufft
ward / vnd ihr selige Tochter Affra / so zu
Augspurg auff dem Lechfeld verbrant / begraben
hette / auch mit sampt den dreyen Mägden / Di-
gna / Eunomia vnd Eutropia / bey ihrem Grab
in einem häußlin wachet vnd bettet / ließ der
Heydnisch Richter Caius / dasselb häußlin mit
dürrem Holz vnd dörnen füllen / beschließen /
anzünden / vnd sie darinnen verbrennen. Dar-
bey auch S. Dionysius der erste Bischou zu
Augspurg verbrennt seyn soll zc. Vnd als
so hat auch die H. Hilaria ihr Marterkron er-
langt.

Evangeliën vñ Predigen / wiewol
ben am tag der heiligen Affra diser
Hilarie Tochter / vermeldet.

Am

Am heiligen vnd herrlichen Fest
der Himmelfart der aller seligsten
Mutter IESV Christi/ Euan-
gelium Luc. x.

Am 15. tag
Augusti.



In der zeit gieng IESVS
in ein Castell. Vnd ein
weib mit Namen Mar-
tha/ die nam ihn auff in Deut. 32. a
ihr hauß. Vnd sie het-
te ein Schwester die hieß
Maria/ die setz sich bey seine füß/ vnd hö-
ret sein Wort. Martha aber befließiget
sich mit embsigem dienste. Die stundt/ vñ
sprach: Herre/ fragest du nicht darnach/
daß mich mein Schwester läffet allein die-
nen? Darumb so sag ihr/ daß sie mir doch
helffe.

helffe. IESVS aber antwortet/ vnd sprach zu ihr: Martha Martha/ du bist sorgfältig/ vnd bekümmerst dich mit vil dingen. Nun eins ist not. Maria hat den besten theil erwölt/ der soll nit von ihr genommen werden.

Psal. 26. a

Maria setzet sich zu seinen füßen/ vnd höret sein Wort. Luc. x.

Als wir Catholische Christen allenthalben im ganken Catholischen Bapstumb auff heut für ein Fest vnd Feyertag halten/ wist ihr alle wol/ nämlich/ das Fest der Himmelfart oder Auffnehmung MARIAE der H. Junckfrauen von disem Jamerthal/ von ihrem Sohn/ nach deme sie hie auff Erden wie ein anderer Mensch natürlicher weiß gestorben. Die vrsach aber/ darüb die H. Christlich Kyrch auff heut nit ein solches Euangelium zu predigen verordnet/ darinnen der Himmelfart oder des Tods MARIAE meldung geschicht/ ist disse: Daß derselbigen keins in allen vier Euangelisten gefunden wirdt/ vnd diß auß diser vrsach: Die Euangelien/ als meniglich bewust vnd augenscheinlich ist/ erstrecken sich nit weiter dann biß zur Himmelfart Christi/ seitemaln aber MARIAE Auffnehmung erst vber etlich auff das wenigest zwölff Jar hernach begeben/ kan ja solche in den Euangelien nit begriffen seyn. Do wir aber heutigs Euangelium/ so von zweyen

Schwe

Maria ist wie ein anderer mensch wahrlich gestorben.

Schwestern handelt/ vleissig erwegen/ finden wir daß es füglich auff heut geprediget wirdt/ seitmaln alles/ was sich auff heut mit Martha vnd Maria Magdalena begeben/ vollkommenlicher mit MARIA der Mutter vnser Herr verlossen hat. Dañ sie Christum/nit/wie Martha/nur in ein steines oder hülkes Haus/ sonder in ihren leib zur Herberg auffgenommen hat. Hat sein Wort wie Maria Magdalena/nit nur erlich/ sonder vil maln vleissig vnd ernstlich bis in seinen tod gehört.

Hieruon/ auch von der Himmelfart MARIAE/ Thellung vnd Inhalt vnd Inhalt diser Predig. wollen wir auff diß mal (in diser kleinen Postill) nit handeln/ sonder bey dem heutigen Euangelio bleiben. Vnd dasselbig in zweyen Theilen abhandlen. Erstlich von Martha. Im andern/ von Maria Magdalena/ was ein jede gethon/ was wir auch von jeder zu lernen haben: welchs ihr mit gedult anhören vnd vernemen wolt.

Als wissen wir Christē auß Göttlicher H. Schrift gar wol/ Daß vnser Herr Christus/ nachdeme er das dreißigste Jar seines Alters erreicht/ nit lang an einem ort gebliben/ sonder immer gewandert/ auß Galilea in Judeam/ von dannen widerumb dort hin/ von disen beiden orten zu zeiten in Samariam/ vnd immer auß einer Stadt/ Markt vñ Flecken in einen andern/ darumb/ daß er sich mit Predigen/ Wunderzeichen thun/ den versprochenen Messiam vnd wahren Sohn GOTTES erkleret. Als er derhalben auch auff ein zeit/ nemlich an einem Erichtag oder Dienstag/ welcher

Wann sich
heilige Fu-
angeln ver-
lossen.

Joan. 11.

Matth. 26.

Die fremb-
den Herber-
gen/ ist ein
Werck der
Barmher-
zigkeit.

Matth. 25.

Luc. 10.

welcher der ander tag des Christmonats war
im ein vnd dreissigsten Jar seines Alters/ auß
Galilea in Judeam reiset/ Gieng er in ein
Castell. Vnd ein weib mit Namen Mar-
tha/ die nam ihne auff in ihr Haus. Diser
Castell ist Bethania gewesen/ alda Martha/
Lazarus/ vnd Maria Magdalena gewohnet ha-
ben. Daselbsten der Herr hernach den Lazarum
von den todten aufferweckt hat. Allda ist er auch
von Magdalena am Dinstag nach dem Palm-
tag in der Wochen seines leidens/ im hauß Si-
monis des außsezigen/ gesalbet worden. Dese
Martha ist gewesen ein Schwester Lazari vnd
Marie Magdalene. Dese hat den Herren sampt
seinen Jüngern zur Herberg als frembdlinge
auffgenommen/ vber nacht beherbergt/ dann
ihr nit vnbeuust gewesen: Daß die frembden
herbergen ein sonderlichs Werck der Barmher-
zigkeit ist/ welchs auch GOTT/ ihie vnd dort/ an
leib vnd Seel zu widergelten versprochen/ vnd
auch ihren vil tausent albereit widergolten hat/
noch widergiltet/ vnd fürnemlich am Jüngsten
tag widergelten wirdt: wann wir alle widerumb
von den todten aufferstande vnd vor seinem
Richterstul erscheinen/ wirdt er zu allen den je-
nigen so zur rechten stehn/ vnd ins Himmels-
reich eyngeln werden/ sagen: Kompt her ihr
Gebenedeyten meines Vatters/ besitzet das
ort das euch bereitet ist von anbegin der Welt.
Dann ich bin ein Frembdling gewesen/ vnd ihr
habt mich beherbergt ic. Vnd diß hat nit allein
Martha/ sonder auch andere frumme leut des
alten

alten vnd newen Testaments wol gewist/ der-
 halben sie auch diß Werck der Barmherzigkeit
 vleissig geübt haben. Also hat gern vnd gutwil-
 lig zur Herberg auffgenommen Abraham drey **Gen. 18.**
 Engel als drey frembdling/ theilet ihnen auch
 mit alles das/ so den frembden von nöten war.
 Der H. Loth hat auch die Engel zur Herberg **Gen. 19.**
 auffgenommen/ so er nit für Engel/ sonder für
 Menschen gehalten hette/ gabe ihnen auch zur
 Herberg alles so von nöten/ beschützet sie auch
 vor dem wüten vnd toben der Gottlosen Sodo-
 miter/ so des folgenden tages alle mit dem Him-
 melischen sewr verbrenndt seynd worden. Also **Gen. 24.**
 hat zur Herberg auffgenommen Rebecca **Ab. 24.**
 rahams knecht/ Jethro den Moysen / Rahab **Josu. 2.**
 die Erforscher von Josue gesandt/ Die Wit- **3. Reg. 17.**
 frau Eliam/ das Sunamitisch Weib Eliseum/ **4. Reg. 4.**
 Der H. Job alle frembdling/ so zu ihme kom- **Job 31.**
 men: Die Martha Christum/ Zacheus gleichs. **Joan. 12.**
 fals/ Simon ein Lederer Petrum/ Priscilla **Luc. 19.**
 Paulum/ Lydia Paulum sampt seinen gesellen/ **Act. 10.**
 Publius gemelten Paulum sampt seinen ge- **Act. 18.**
 sellen drey tage. Der H. Pabst Gregorius name **Act. 16.**
 nit allein gern alle frembde/ so zu ihme kommē/ **Act. 28.**
 zur Herberg auff/ sonder liesse nach solchen fra- **Marul. lib. 1.**
 gen/ also daß er auch offtermaln Christum als **cap. 3. Et Sa-**
 einen frembdling zu einem Gast gehabt hat. **bel. lib. 7. c. 6.**
 Dorotheus ein Egyptischer Mönch/ ob er gleich **Volat. lib. 21.**
 wol selbst arm war/ bauwet er doch jährlich ein **Anthropelo.**
 Hutten auß den zusammen gelesenen steinen/ für
 die frembdling/ so er dareyn zur Herberg auff-
 nam. Leo dises namens der neunte Pabst/ so
 gegen

Platina in Vi-
ta Leonis 9.
Pontif.

gegen den Armen gar barmherzig war/ als er
auff ein zeit einen Armen vnd auffseigen Men-
schen vor seiner thür fand/ ließ er ihn legen in
sein Beth/ zu morgens als die thür eröffnet
wurde/ war der Arme nit mehr vorhanden/
welcher/ oder in eines Armen gestalt/ wurde ge-
glaubt daß Christus gewesen sey/ 2c. Difen herr-

Wir Chri-
sten sollē ler-
nen von ge-
melte frum-
men leuten.

lichen Exempeln solten billich wir Christen auch
auff disen heutigen tag nachfolgen/ vnd die Ar-
men/ die Pilger/ die Bettler/ die frembden gern
zur herberg auffnemmē/ eine oder etliche nächst-
nach gelegenheit beherbergen/ vnd ihnen auch
die füß wäschen/ oder sonst nach notturfft/ mit
essen vñ trincken fürsorgung thun. Welchen aber
ja vnder vns/ gemelte Exempel/ solches zu thun
nit bewegen würden/ der vernemme daß ihme

Werk der
Barmher-
zigkeit/ seyn
vns gebot-
ten.

Matth. 25.

solches von GOTT/ von Aposteln/ znußsam/ nit
allein gerathen/ sonder auch gebotten vnd bevol-
hen ist worden/ welchem dann wir/ wann wir
anderst Christen seynd oder seyn wolten/ gehor-
sam zu leisten schuldig seynd. Gehet hin ihr ver-
maledeyten in das ewig sewr (spricht Christus)
darumb/ Dann ich binn ein frembdling gewe-
sen/ vñ ihr habt mich nit beherbergt/ 2c. Auß wel-
chen worten ja ein jeder lernen vnd von ihme er-
messen kan/ daß wann er der verdammuß vber-
haben vnd der Ewigen seligkeit theilhaftig
werden will/ daß er Christum oder die Armen in
seinem Namen/ nach vermögen/ herbergē muß.

Deut. 10.

GOTT vnser Herr (spricht Moyses) hat lieb ei-
nen frembden/ gibt ihme narung vnd kleider:
vnd ihr solt auch lieben die frembdling/ dann ihr
seyd

seydt auch frembding gewesen. Die Armen vnd frembding (spricht GOTT durch Esaiam) fü. Esa. 58. re eyn in dein Haus. Der H. Paulus/ der H. Rom. 12. Petrus/ der H. Joannes ermanen vns vleissig Heb. 13. zu disem drittē werck der Barmhertzigkeit/ Daß wir gern wöllen die Armen/ vnserē Brüder/ vnserē Nächsten zur herberg auffnehmen. Einer mit namen Onesiphorus hette den H. Paulum offtermaln zur Herberg auffgenommen/ vom selbigen vnd derwegen schreibt der H. Paulus zu seinē Timotheo also: Der Herr gebe Barm- 2. Tim. 1. 4. hertzigkeit dem Haus Onesiphori. Denn er hat mich offte erquicket/ vnd hat sich meiner ketten nit geschämt/ sonder/ da er gen Rom kam/ suchet er mich auffß vleissigest/ vnd fand mich. Der Herr gebe ihme daß er finde Barmhertzigkeit bey GOTT an jenem tag.

Der heilige Paulus ist danckbar wegen der empfangenē Gütthaten.

Wey vilen leuten an vilen orten werden diser zeit nit allein keine Christliche vnd gemeine Spittel/ Seelheuser od dergleichen auffgerichtet noch von neuem erbawen/ Darinnen die Armen/ die krumen vnd lamē/ die francken vñ frembding/ wie vorzeiten geschehen/ zur Herberg auffgenommen/ nach notturfft ein nacht oder zwo gespeiset vnd getrenckt würdē: Sonder vil mehr werden solche jekund/ so vorzeiten/ von vnsern Christlichen Catholischen Voreltern seligen/ gestift/ gebawet/ reichlich begabt/ vnd hierzu verordnet seynd worden/ wo nit gar abgebrochen/ doch nit mehr hierzu sonder anderswo zu gebraucht. Die Stiftung wirdt zerissen/ das Einkommen vnd bettel der Armen mutwillig geraubt/

Ungerech-
tigkeit vnd
vnbarmher-
zigkeit diser
zeit.

Die Reichē
diser zeit
oben nit
werck der
Barmher-
zigkeit.

zu eignem nutz/ oder sonsten vngbürllichen händeln gewendt: Das Eynkommen/ Stifftung/ bewohnung gehet alles mit einandern anlichen N. Die Armen werden nit mehr gespeist/ nit getrenckt/ dareyn zur Herberg nit auffgenomen/ wie es vor Jaren von den Catholischen gestift vnd gehalten ist worden/ vnd füret doch der Teufel alles hinweg/ daß man nit weißt wie oder wann.

Die Reichen diser Welt/ so gleichwol in ihren Schlössern/ Heusern/ Stadel vnd anderen wohnungen/ platz vnd raum genug hetten zuzeiten die Armen beherbergen/ thund es aber nit/ wollen ehe solche leer stehen lassen/ oder sonsten erwann verloffens vnd versoffens/ erwann vnzüchtigs vnd vntüchtigs Lumpengefind dareyn auffnehmen/ erhalten/ vnd also auch sich ihrer sünden/ so sie darinnen/ erwann mit vnzucht/ erwann mit spilen/ erwann mit fressen vnd sauffen begehen/ theilhaftig machen. Vnd dise achten auch mehr das zeitlich dann das Ewig/ den leib mehr dann die Seel: wissen auch noch nit/ ja mutwillig wollen sie nit wissen/ weder die belohnung noch die straff deren/ so diß dritte Werck der Barmherzigkeit warnemmen oder nit warnemmen. Ein jeder thu seine augen auff/ vnd lerne recht sehen. Was solte es dir oder einem jeden für ein beschwerde seyn/ einen armen Menschen/ wo nit zwo nacht/ doch nur eine/ in deinem Hause/ in deinem Stadel/ wo nit an einem Beth/ doch auff einem Banck/ im Hew oder stro liegen lassen/ damit daß er vor bösen leutē/ thieren/ Regen

gen vnd wind/ hiß vnd felte desto sicherer seyn möge? Nichts vberall bringts dir schaden/ sonder vil frommens/ vil nuß vnd frucht/ seitemaln du (als der Herr selbst bezeugt) nit einen Bettler/ sonder Christum selbst / auffnimpst/ seitemaln dir Christus solches hie zeitlich vnd dort an dem ort/ das sein Himmelscher Vatter von Ewigkeit bereitet hat/ immer vnd Ewig widergelten will. Vnd diß von der Herbergung Marthe vnd anderer frommer leut.

Wir nemen nit die Bettler sonder Christu auff.

Es hat aber dise heilige Martha den Herren Christum vnd seine Jünger nit allein zur Herberg auffgenommen/sonder auch andere Werck der Barmherzigkeit erzeigt: essen vnd trincken/ was vnd souil die Natur vnd notturfft erfordert/hat sie ihnen auch mitgetheilt/ so vil/ reichlich vñ gnugsam/ daß der Herr ihr hierumb enyredet vnd sprach: Martha Martha/ du bist zu vil sorgfellig. Also solten billich auch wir nit allein die Pilger/ frembdling vnd Bettler gern vnd willig herbergen/ sonder sie auch speisen vnd trincken/ vnd nach vnserm vermögen ihnen verhilfflich seyn/ auff daß wir ein reichliche besoldung von GOTT empfahen möchten.

Martha war zu vil sorgfellig.

Do dann jemandts vnder euch sagen oder gedencen wurde: Ja freilich wolte ich Christum den Herren vnd seine Jünger/ do sie zu mir kemen/ gern zur Herberg auffnehmen/ essen vnd trincken/ vnd andere notturfft/ was in meinem vermögen were/ gern vnd gutwillig mittheilen/ Ja/ ehe daß ich ihnen Herberg

Vergebenliche entschuldigung der Heiligen.

vnd anders versagen wolt/ che wolte ich gar auß
 meinem hauff ziehen/ vnd ihnen vbergeben zc.
 Die jenigen so solchs sagen oder gedencckē/ reden
 nur mit dem Mund/ das Herz aber weisť nichts
 hieruon/ oder aber sie glauben Christo vñ seinem
 Wort nit/ welcher vns gelehrt hat: Das wann
 wir die Armen in seinem Namen auffnehmen
 so nemen wir ihn selbstē auff: Vnd/ alles was
 wir den Armen beweisen/ das erzeiēen wir ihme
 selbstē/ do er also spricht zu den Armen: Der
 euch auffnimpt/ der nimpt mich auff: vnd wer
 mich auffnimpt/ der nimpt den auff der mich
 gesandt hat. Zu den Reichen vnd Seligen wirdt
 er am Jüngsten tag sagen: Kompt her ihr Ge-
 benedeyten meines Vatters/ besitzet das ort zc.
 Dan̄ mich hat gehungert/ vnd ihr habt mich ge-
 speiset: mich hat gedurst/ vnd ihr habt mich ge-
 trenckt zc. Dan̄ werden die Gerechten antwor-
 ten/ vnd sagen: Herr/ Wenn haben wir dich hun-
 gerig/ durstig gesehen/ vnd haben dich gespeiset
 vñ getrenckt zc. Vnd der König wirdt antwor-
 ten/ vnd sagen zu ihnen: Wahrlich sage ich euch:
 Was ihr einem gethon habt vnder disen mei-
 nen geringsten Brüdern/ das habt ihr mir ge-
 thon. Denn wirdt der König auch sagen zu den
 vnbarinherzigen Reichen: Gehet hin von mir
 ihr vermaledeyten in das Ewig fiewr/ das da be-
 reit ist dem Teufel vnd seinen Engeln. Dann
 ich bin hungerig vnd durstig gewesen/ vnd ihr
 habt mich nit gespeiset noch getrenckt zc. Denn
 werden auch die selben ihme antworten/ vnd
 sagen: Herr/ Wenn haben wir dich gesehen hun-

Matth. 10.

Jvan. 15.

Luc. 10.

Matth. 25.

Matth. 13.

hungerig/ durstig/ 2c. vnd haben dich nit gespeis-
fet noch getrenckt 2c. Denn wirdt er ihnen ant-
worten vnd sagen: Wahrlich sage ich euch/ was
ihr nit gethon habt einem vnder disen gerina-
sten/ das habt ihr auch mir nit gethon. Vnd dise
werden gehn in die Ewige Peynn/ die gerechten
aber in das Ewig leben.

Auß disen vnd dergleichen worten Christi/
kann vñ muß ja/ ein jeder Christ/ der anderst den
worten Christi glaubt/ lernen: Daß auch wir/
nit weniger als Martha/ Christum noch auff
den heutigen tag zur Herberg auffnehmen/ ihne
speisen vnd trencken/ bekleiden vnd guts thun
könden/ nemlich/ so oft wir die Armen vñ Bet-
ler auffnimmē. Vnd do schon der Arme/ Chri-
stus in der Person selbstenn nit ist/ wirdt doch al-
les das jenig/ so dem Armen geben vnd abge-
schlagen/ nit ihme/ sonder Christo/ mitgetheilt
vnd versagt. Vnd Christus will das jenig alles/
so den Armen durch seinen Namen geben wirdt/
am Jüngsten tag/ dergestalt vnd also widergel-
ten/ als wann es ihme selbstenn Personlich geben
wer worden: Vnd das jenig/ so den Armen ver-
sagt wirdt/ nit weniger straffen/ als wann es ih-
me selbstenn abgeschlagen worden.

Was wir
auß den
worten Chri-
sti zu lernen
haben.

Lernen derhalben wir auß dem ersten Theil
diser Predig von Martha/ Christum/ oder die
Armen in seinem Namen/ gern zur Herberg
auffnehmen/ essen vnd trincken sampt anderer
notturfft/ nach vnserm vermögen/ gern mitthei-
len/ auff daß wir desse hie vnd dort ein reichliche
belohnung von GOTT empfahen/ vnd nit mit

Lehren auß
ditem ersten
Theil.



den vnbarmerhigen in das Ewig feur geschafft werden.

In diser embsigen Martha spricht der Euangelist weiter: Vñ sie hett ein Schwester die hieß Maria/ die setzet sich bey seine fuß/ vñ höret sein Wort. Dise Maria/ ist Maria Magdalena gewesen von welcher siben böse Geister außgangen/ welche den Herren (dauon kurz hievor am Freitag Marie Magdalene) zu drey vnderschiedlichen zeiten gesalbet hat / welche ein grosse vnd gemeine Sünderin gewesen / hernach aber ein Pufferin vnd heilige bekennerin Christi/ vñ Selig worden ist.

Dieweil nun Maria Magdalena zur selbigen zeit / do der Herr zu Bethania in ihrem vnd des Lazari ihres Bruders hauß eynkeret / am andern tag des Christmonats im ein vnd dreissigsten Jar Christi / noch ein grosse Sünderin war / (dann sie eilff tag hernach / an einem Freitag im selbigen Jar vnd Monat hernach zu Jerusalem im hauß Simonis des Phariseers ein Pufferin worden / vnd von Christo verzeihung ihrer Sünden erlangt hat) liesse sie ihr am allermeisten ihr Seel angelegen seyn / suchet einen Geistlichen Arzet / der sie von allen Sünden ledig vnd endlich selig machen könnte. Weil sie dann vor diser zeit von disem IESV von Nazareth vil gehört / wie er so mechtig sene im Wort vnd Wercken / wie das er nit allein vil grosse vnd zu vor vnerhörte Wunderzeichen thue (wie er dann

Maria
Magda-
lena.

Luc. 7.

Sünd sollen
einen Geist-
lichen Arzet
suchen.

dann hernach auch ihren verstorbenen Bruder
Lazarum vom tod aufferweckt hat) an todten/ **Joan. ii.**
francen/ außsetzigen/ blinden/ Lammen vnd der-
gleich/ sonder daß er auch die Sünd verzeihe al-
len den jenigen/ so solchs von herzen begeren vñ
frumb werde/ gedacht sie derhalben: O daß auch
mir dise Gnad widerfahren möcht/ daß ich von
allen meinen Sünden/ deren nit wenig noch
klein seynd/ möchte ledig gesprochen werden/ so
wolte ich gewißlich mein leben bessern vñ frumb
werden/ auch die tag meines lebens frumb blei-
ben. Diser vrsach setzet sie sich/ so bald der Herr
in ihr hauß kam/ zu seinen füßen/ getröster hoff-
nung ein Predig von ihme zu hören/ darauff sie
solle bekert werden/ weiß vnd maß darauff ler-
nen wie sie sich soll bekeren vnd frumb werden/
vnd wie sie sich forthin gegen GOTT vnd der
Welt verhalten soll.

Diß alles ist geschehen: Christus hat sich zu
Predigen im Hauß Lazari nider gesetzt/ Maria
sitzet zu seinen füßen: Christus prediget/ Maria
mercket vleißig auff die Predigt: Christus vn-
derstehet sich mit seiner Predig Mariam zu be-
keren/ Maria (verstehe immer Magdalena/ auff
daß nit das jung vnuerstendig Vöcklin vermen-
nen möchte/ wir handeln von MARIA seiner
H. Mutter/ welcher Fest wir Catholische Chri-
sten auff heut halten: Nein/ dieselbig hat nie-
maln gesündigt/ vnd derhalben weder der
Puß noch verzeihung der Sünden nicht be-
dörfft) wirdt auß diser Predig also enkündet/
daß sie albereit vnd wie lenger je mehr Kew vnd

Rechtschaf-
ne Puff Ma-
rie Magda-
lene.

leid vber ihre begangne Sünd vnd vilfaltig
missethat hett/ biß daß sie vollkommenlich püffen
im hauß eines Phariseers/ alda sie zu ruck dem
Herren zu füßen gefallen/ wegen ihrer Sünden
so sehr geweinet/ daß sie ihme seine füß mit ihren
auaenzehern gewaschen/ mit ihrem har getru-
net/ seine füße geküßet/ gesalbet/ vnd gethon was
ihr nur möglich zethon gewesen ist. So herlich
che/ schmerzliche Kew vnd vollkommenliche
Puff hat sie gehabt vber ihre Sünden/ daß al-
bereit domaln der Herr zum Phariseer/ der ih-
ne zu Gast geladen/ gesagt hat: Ihr werden vil
Sünd verziget/ dann sie hat vil geliebt. Vnd
zu ihr hat er gesagt: Gehe hin/ dein Glaub hat
dir geholffen.

Gleich wie wir vns (ihr geliebten in GOTT)
im ersten Theil vorhabender Predig/ das Ex-
empel/ thun vnd lassen Marthe zu nus gemacht/
vnd darauff gelernet haben: Christum vnd die
Armen in seinem Namen zur Herberg auff-
nehmen/ vnd andere Berck der Barmherzig-
keit erzeigen/ auff daß wir nit mit den verdam-
pten in das Hellsch feur/ sonder mit den Selig-
en ins Himmelreich geschafft werden: Also
wollen vnd müssen wir vns auch das Exempel/
thun vnd lassen ihrer Schwester Magdalene zu
nus machen. Vnd sollen von ihr lernen alle bei-
de/ nämlich/ die Sünder/ vnd die jenigen so nit
Sünder seynd.

Sünder ler-
nen vß Ma-
ria Magda-
lene.

Die Sünder sollen wissen/ daß sie in vnd mit
der Sünd (Todsünd) nit mögen selig werden/
sonder/ do sie ohne Puff darinnen sterben/ müs-
sen

sen sie immer vnd Ewig verderben. Auff das sie
 aber Selig vnd nit verdampt werden/ auff das
 sie in der Sünd nit sterben sonder Puff thuen/
 wirdt ihnen sehr nützlich vnd notwendig seyn/
 das sie sich gebrauchen des jenigen Mittels/
 welchs auff heut Maria Magdalena die grosse
 Sünderin (hernach noch ein grössere Püsserin)
 für die hand genommen hat/ nämlich müssen sie
 sich mehrmaln zu den füssen des Herren setzen
 vnd sein Wort hören/ das ist/ Sie müssen alle
 Sonntag/ Fest vnd Feyertag/ vnd sonsten zu ge-
 legner zeit/ in die kyrchen kommen/ vom Catho-
 lischen Priester das Wort GOTTES anhören.
 Vnd diß (neben deme das sie den Catholischen
 Glauben lernen) auß zweyerley vrsach. Erstlich:
 Das sie vernemmen/ wie sie von ihrem sündigen
 leben abgewisen / zu GOTT vnd der frumbkeit
 geführt werden. Vnd do solchs nit einem jeden
 Sünder/ als bald in der erstē/ andern/ oder drit-
 ten Predig/ widerfaret/ das er bekert wirdt/ soll
 er darumb das vierte/ fünffte/ vnd andere mal
 nit auß der Predig bleiben. Dann es sich leicht-
 lich begeben kan / vnd begibt sich gewislich alle
 tag/ das einer auß hörung diser oder jener Pre-
 dig mehr lernet vnd nutz schafft/ dann zu vor
 in zwenzig Predigen nit beschehen ist: hergegen
 hat ein anderer auß einer anderen Predig mehr
 behalten vnd frucht gebracht / dann eben auß
 diser Predig. Dann man kan nit in jeden Pre-
 digen von allerley Materien reden / also das
 sichs zu zeitē begibt/ das einer kaum in der fünff-
 ten/ zehnesten oder zwenzigsten Predig das jenig
 v s hört/

Vrsach/
 darumb wolt
 das Wort
 Gottes hö-
 ren sollen.

Auß der
Predig les-
nē/ wie man
Puß thun
soll.

Es seynd
mehr stück/
dañ nur der
Glaub/ zur
Puß von
nöten.

Die frum-
men müssen
auch das
wort Got-
tes hören.

Liebe Got-
tes vnd des
Nechsten
von nöten.

höret/ davon er zu hören begert hat. Darumb
auch sollen die Sünder das Wort GOTTES
vleißig vnd embsig anhören/ auff daß sie darauß
lernen/ wie sie sollen vnd müssen Puß thun/ auff
daß GOTT ihr Puß angenehm/ ihnen aber ver-
dienstlich sey zu verzeihung der Sünden vnd er-
langung des Ewigen lebens.

Dann nit ein jeder/ der da vermeynt er Puß
se/ Püßet recht/ als da seynd die jenigen so da
fälschlich beredet: Zur Puß werde sonsten nichts
dann nur der Glaube erfordert: Wann sie nit
glauben die Sünd seye ihnen verziget/ so seye ih-
me albereit also. Nein/ es gehört mehr hierzu/ wie
dann die Catholischen Christen auß vnser Pre-
dig vnderrichtet werden.

Es sollen vnd müssen aber auch andere Chri-
sten/ so selig werden wollen/ ob sie gleich keine
sonderliche Sünder seynd/ nach dem Exempel
Marie das Wort GOTTES vleißig hören.
Darumb: Auff daß sie den Catholischen Glau-
ben lernen sampt seinen notwendigen Artickeln/
Stücken vñ Puncten. Vnd benorauß ist solchs
diser zeit not/ alda all Winckel vol neuwer vnd
falscher Glauben stecken. Darumb auch: Daß
sie die Gebott GOTTES lernen nit allein spre-
chen/ sonder auch halten vnd warnemmen:
Daß sie lernen/ wie sie sich gegen GOTT vnd
ihrem Nechsten verhalten müssen. Seitemaln
sie nit allein GOTT/ sonder auch ihren Nech-
sten als sich selbstē/ lieb haben müssen: Was
sie gern von einem anderen gewarten wolten/
das müssen auch sie selbstē ihrem Nechsten er-
zeigen.

zeigen: Vnd/was sie von jemandts nit gern haben/das sollen auch sie keinem erzeigen. Darumb auch: Das sie lernen/Wie sie GOTT vmb alles/so ihnen zu leib vnd Seel von nöten ist/vnderthenig bitten sollen/Wie sie ihme vmb alle empfangne Gutthaten dancken sollen. Dañ wir mehrmaln von GOTT das notwendig nit empfangen/seitemaln wir ihne nit recht darumb gebettē/oder doch vmb andere empfangne gutthaten nit/wie sichs gebürt/danck gesagt habē. Darumb auch: Das sie nit noch in die Sünd fallen vnd Sünder werden. Dann das ja ein mal gewiß/vñ alle mal wahr ist: Das die jenigen/so nit in die Predig gehn/vil baldter vnd leichtlicher in die Sünd fallen/dann die jenigen so vleissig in die Predig gehn. Darumb: Sie hören offtermaln von der grossen Peyn vñ Ewigen verdammuß der Sünder predigē/darumb wollen sie nit sündigen: Sie hören auch predigē von der frewd der Ewigen Seligkeit so den frummen bereitet ist/darumb wollen sie frumb bleiben/welches zuzeiten vnd bey ihren vilen nit geschehen wurde/do sie in die Predig nit kommen weren.

Wie nützlich/ ja notwendig es aber allen Menschen sene/ das Wort GOTTES hören/ist leichtlich auß den Worten des Herren vnd Beschluß diß heutigen Euangelij zu lernen/do er gesagt: Eins ist von nöten/Maria hat den besten theil außgewölt/der soll von ihr nit genommen werden. Diß eins ist die hörung des Wort GOTTES. Auß disem eins

Wort Gottes hören/ist von nöten.

kompt

kompt vnd wirdt gelernet alles was zu leib vnd
Seel/ zum zeitlichen vnd Ewigen leben von nö-
ten ist. Vnd in sonderheit war diß eins domaln
Marie Magdalene/ vnd jekund allen Vncatho-
lischen vnd Sündern/ von nöten.

Wie langsam vnd hinleßig aber vil leut diser
zeit vnder vns seyen zu disem eins/ das ist/ zur
hörung des Wort GOTTES/ auch von der
Göttlichen straff wegē vnser hinleßigkeit/ haben
wir vor diser zeit gehandelt / werden auch / ob
GOTT will/ forthin zu gelegner zeit widerumb
darvon tractiren. Jekund aber/ seitemaln dise
Predig ihr gebürliche leng erreicht hat/ wollen
wir/ an statt des Beschluß derselbigen/ zu Chri-
sto vnserm Heiland also betten:

Gebet zu
Christo vn-
serm Heil-
land.

Barmherziger GOTT Herr IESU
Christ/ der du noch teglich in den
Armen bey vns nit weniger als bey
der H. Martha eynferest/ der du auch vns
dein Wort durch die Catholischen Predi-
ger verkündigen lasset/ verleihe vns ver-
stand vnd vermögen/ daß wir sie/ die Ar-
men/ nach dem Exempel der heiligē Mar-
the/ nit allein zur Herberg auffnehmen/
sonder auch andere Werck der Barmher-
zigkeit erzeigen: Daß wir fürs ander auch
nach dem Exempel Marie Magdalene/
dein Wort embsig vnd vleißig hören/ vn-
sern Glauben vnd Leben darnach richten/
dasselbig bessern/ frumb vñ Selig werden
mögen.

mögen. Hierzu wollest du O heilige MA-
RIA ein Mutter GOTTES/welcher Fest
wir auff heut halten/bey deinem Kind jes-
der zeit vnser Fürsprecherin seyn/Amen.

Am Fest vnd Feyertag des heiligs
gen Apostels Bartholomei/ Euan-
gelium Ioan. xv.

Am 24. tag
Augusti.



In der zeit sprach IESVS Jo. n. 13. c
zu seinen Jüngern: Das 1. Ioan. 3. c
ist mein Gebott/ daß ihr
eu h vndereinander lie-
bet/ gleich wie ich euch ge-
liebet hab. Niemand hat
grossere liebe/ dann daß er sein Seel seze
für

für seine freunde. Ihr seyd meine freunde/
 Matth. 12. 9 so ihr thut was ich euch gebiet. Ich sage
 hinfurt nicht daß ihr knecht seyd/denn ein
 knecht weiß nicht was sein Herr thut.
 Euch aber hab ich genennet freunde. Denn
 Joan. 8. e alles was ich hab von meinem Vatter ge-
 höret/hab ich euch kund gethan. Ihr habt
 Ephes. 1. a mit mich erwölet/sonder ich hab euch erwö-
 Coloss. 1. a let/vnd gesetzt/ daß ihr hingehet/vñ frucht
 bringt/vnd euwer frucht bleibe/auff daß/
 so ihr den Vatter etwas bittet in meinem
 Namen/ daß ers euch gebe.

Das ist mein Gebott/ daß ihr euch vnder-
 einander liebet. Joan. xv.

In Jesund gehörtes Euange-
 lium (ihr geliebten in GOTT) so
 vns auff diß heutig heilig Fest oder
 Feyertag des H. Apostels Bar-
 tholomei im H. Ampt der Mess ge-
 sungen/gelesen/vnd öffentlich der Christlichen

Wann diß
 Euangellū
 geschehen.

Inhalt diß
 Euangellū.

Gemein ab der Cangel gepredigt wirdt/hat der
 Herr Christus seinen Jüngern am letzten Abēd-
 mal/als er des folgenden tags am stamm des
 H. Creuxs für vnser vnd der ganzen Welt sünd
 sterben solt vnd gutwillig wolt / also fürgehal-
 ten/vnd vnder anderm lehren wöllen: Erstlich/
 Daß sie vndereinander brüderliche Lieb halten
 sollen/ ohne welche sie weder seine Jünger mö-
 gen billich genennet / noch seines Reichs theil-
 hafftig

hafftig werden. Fürs ander eröffnet er ihnen/
auch vns Christen auff disen heutigen tag/ sein
väterlichs Herks vnd höchste lieb / so er gegen
dem Menschlichen geschlecht gehabt vnd noch/
seiternmaln er sein Seel/leib vnd leben für vns
gesetzt. Zum dritten: Daß wann wir kinder vnd
freund GOTTES seyn wollen/ so müssen wir
nit allein glauben/ sonder auch thun/ warnem-
men vnd halten das jenig so er vns gelehrt vnd
gebotten hat. Zum vierten: Daß die Apostel nit
selbst gewachsen/ nit selbst geloffne/ vngesandte
vnd nit beruffne Predicanten/sonder von Chri-
sto verordnete / erwölte/ vnd gesandte Priester
vnd Prediger seyen. Zum fünfften: Daß auch
vnder vns ein jeder Prediger vleiß fürwende/
auff daß er mit seinen Predigen nuz schaffe vnd
fruchte bringe. Zum sechsten vnd letzten lernen
wir hie/ Wo wir in allem vnserm anligen/ angst
vnd not/ fehl vnd mangel hin lauffen sollen. Wie
dann ein jeder/ so diß Euangelium mit vleiß liest
oder höret lesen/ gemelte Pünctlin leichtlich her-
aus mercken an.

Von disen Pünctlin aber allen auff diß mal
zu reden in sonderheit/ wil die zeit einer Predig
auch vnser auftheilung in diser kleinen Postill
nit gestatten: wollen derhalben auff diß mal nur
von zweyen/nämlich vom ersten vñ letzten/nach
notturfft reden vnd handeln. Im ersten Theil Theilung
diser Predig von der liebe vnserer Nechsten. Im diser Pro-
andern Theil aber/ Wo wir hin lauffen vnd hilff dig.
suchen sollen in allem vnserm anligen/es sey zum
leib oder Seel. Vnd diß alles auff das aller kür-
zest

hest vñ leichtest so möglich/auff das ihr solchs an-
zuhörē desto williger sehet/desto besser verstehen/
mercken/behalten/euwer thun vnd lassen/Glau-
ben vnd Leben darnach richtē könt. GOTT der
wölle mir vnd euch beywohnen mit seiner hüff/
Gnad vnd Segen.

Wes auff ein zeit ein Schrifftgelehrter
oder Gesatzfarner zu Christo dem Her-
ren getretten ihn zu versuchen/sprach er.

Matth. 22.
Mar. 12.

Meister/welchs ist das fürnemst gebott im Ge-
sez? IESVS aber sprach zu ihm: Du solt lieben
GOTT deinen Herrē auß gankem deinem Her-
zen/auß ganker deiner Seelen/vnd auß gankem
deinem Gemüt. Dises ist das grōste vñ fürnem-
ste gebott/das ander ist aber dem gleich: Du solt
deinen Nechsten lieben als dich selbst. In disen
zweyen Gebotten hanget das ganze Gesetz vnd
die Propheten.

Liebe Got-
tes.

Eben dise beide darinn das ganz Gesetz ja vn-
ser Seelen seligkeit hanget / nämlich die liebe
GOTTES vnd des Nechsten/hat Christus vn-
ser lieber Herr vnd Heiland seinen Jüngern vnd
vns Christen allen kurz vor seinem Tod/nem-
lich in der langen Predigt seines letzten Abend-
mals/bleißig zu halten ernstlich gelehrt vnd vä-
terlich ermant. Erstlich von der liebe GOTTES:
Das wir ihn/als vnsern wahrē GOTT/Schöpf-
fer / Heiland vnd Seligmacher lieben sollen/
Joan. 14. 15. spricht er: Wann mich einer lieb hat/so wirdt
er mein Wort halten/vnd mein Vatter wirdt
ihn lieben/vnd wir wöllen zu ihm kommen/vnd
wohnung bey ihm machen. Wer mich aber nit
lieb

lieb hat / der helt mein Wort nit. widerumb sagt
 der Herr in der selbigen Predigt : Welcher mich *Ibidem,*
 lieb hat / der wirdt auch von meinem Vatter ge-
 liebt / vnd ich wil ihn lieb haben / vnd wil mich
 ihme selbst offenbaren. Vnd bald hernach eben
 auch im selben letzten Abendmal : Bleibet in
 meiner lieb. Wann ihr meine Gebott haltet / so
 bleibet ihr in meiner lieb. Auß welchen allen vnd
 dergleichen sprüchen Christi noch anderen / nit
 allein domaln die Apostel / sonder auch noch auff
 disen heutigen tag wir Christen zu lernen haben:
 Dañ wañ wir wöllen daß GOTT vnser gnedi-
 ger vnd barmherziger Vatter sey / daß wir seine
 gehorsame kinder seyen. Solchs wirdt aber ge- *Wann wie*
 sehen / wann wir seine Gebott nach vermögen *die Gebote*
 halten / sonst werden wir nit seine kinder auch *Gottes hal-*
 er nit vnser Vatter seyn. *ten / so haben*
wir ihu lieb.

Das ander / daran auch vnser Seelen selig-
 keit gelegen / vnd das gank Befehl vnd Prophe-
 ten hangen / (danon wir alda in diser Predigt re- *Liebe des*
 den wöllen) ist die lieb vnser Nechsten / daß sich *Nechsten.*
 nemlich nit allein die Apostel domaln vnderein-
 ander / sonder auch zu diser vnd jeder zeit wir
 Christen hie auff Erden einandern lieb haben
 sollen / hat er ernstlich gebotten mit disen wor-
 ten : Ein neues Gebott gib ich euch / daß ihr *Joan 13.*
 euch vndereinander lieb habend / gleich wie ich
 euch geliebt hab. Dann in disem wirdt jederman
 erkennen / daß ihr meine Jünger seyd / wann ihr
 die lieb vndereinander haben werdt. Vnd im
 heutigen Euangelio : Das ist mein Gebott / daß *Joan. 15.*
 ihr euch vndereinander liebet / gleich wie ich
 euch

x euch

euch geliebt hab. Niemand hat grösser liebe
dann daß er sein Seel seze für seine freund. Auf
diesen heiligen worten Christi vnseres Herren
vns im heutigen Euangelio fürgehalten / wer-
den wir Christē neben andern fürnemlich zwey-
er schöner Punctlin erinnert: Erstlich/ Daß es
nit in vnserm freyen Willen stehe/sonder ein ge-
bott GOTTES sey/vnsern Nechsten lieb haben.
Fürs ander: Wie wir vnsern Nechsten müssen
lieb haben.

Die Liebe
des Nechs-
ten ist kein
rath/sonder
ein Gebott
Gottes.

Joan 15.

Daß die Lieb des Nechsten nit nur ein Rath
sey/ so vns frey gelassen vnd heim gestellet/ also/
daß wir vnsern Nechsten mögen oder nit mögen
lieb haben / wie wir wollen: sonder/ daß sie ein
außdrucklicher Beuelch/ ja ein öffentlichs Ge-
bott GOTTES seye / allen vnd jeden Christen
gegeben / vnd bey verlust vnserer Seelen selige-
keit hierzu verbunden/ ist allein genugsam auff
dem anfang vnd eyngang des heutigen Euan-
gelij zu lernen/ do der Herr mit außdrucklichen
worten zu den Aposteln vnd vns Christen allen
gesagt: Das ist mein gebott/ daß ihr euch vnder-
einander liebet. Darauf wirdt ja kein vernünft-
tiger schliessen können/ anderst lehren können/
dann allein daß die Lieb des Nechsten ein auß-
drucklichs gebott GOTTES sey: vnd / auff
daß die Apostel / auch wir alle / solchs gebott
Christi/ von der Liebe des Nechsten/ desto weni-
ger in wind schlagen/sonder warnemmen/ ih-
me/ so vil vns menschlich vnd möglich/ nachse-
hen / hat er seinen Jüngern eben in demselbi-
gen letzten Abendmal/ vnd eben in derselben lan-
gen

gen vnd letzten Predig/ kurz vor disen worten/
 noch ernstlicher fürgehalten: Ein neues gebott **Joan. 15.**
 gib ich euch/ daß ihr euch vndereinander lieb ha-
 bet. Als wolt er sagen zu seinen Jüngern: Weil
 nun morgen die zeit vnd stund meines tods vor-
 handen ist/ vñ die liebe vnder euch nach meinem
 abschied mehr von nöten seyn wirdt als bishero
 weil ich noch bey euch bin/ so gebietete ich euch die
 lieb vndereinander gleich als ein neues gebott/
 so euch bishero so außdruckentlich noch nie gege-
 ben/ so vil euch menschlich vnd möglichen warzu-
 nehmen vnd zehalten.

Nun wissen wir Christen gar wol/ daß das **Das gebott**
 jenig/ oder doch gewiß der meiste theil desselbi- **der lieb des**
 gen/ so der Herr zu seinen Jüngern am letzten **Nächsten/**
 Abendmal / in derselbigem langen Predig ge- **ist allen**
 sagt/ nit allein ihnen/ sonder auch vns/ gesagt ist **Menschen**
 worden. Ist derhalben auch dieses gebott nit al- **gegeben.**
 lein den Aposteln/ sonder auch vns Christen al-
 len/ gegeben worden/ nemlich: Das ist mein ge-
 bott/ daß ihr euch vndereinander liebet. Dann er
 selbst zu seinen Jüngern gesagt: Was ich **Mar. 13.**
 euch sage/ das sage ich auch allen. So wissen
 wir/ fürs ander/ das wol/ Daß das gebott Chri-
 sti das gebott **GOTTES** ist/ seitemaln er Chri- **Christus**
 stus sampt dem Vatter vnd H. Geist ein wah- **dem Vatter**
 rer / Ewiger / vnd durch auß in allen dingen **vnd H Geist**
 ein gleicher **GOTT** ist. Zum dritten wissen **ein gleicher**
 wir auch/ oder sollen ja wissen/ Daß wir/ wann **Gott.**
 wir anderst rechte Christen/ rechte kinder **GOT-**
TES/ auch der Ewigen seligkeit theilhaftig
 seyn wollen / schuldig seynd/ dem Beuelch vnd
 gebott

Liebe des
Nechsten
ist ein Ge-
bott Got-
tes.

Wer vnser
Nechster
sey.
Luc. 10.

Antwort.

Ein jeder
der vnser
hilff bedarff/
ist vnser
Nechster.

gebott Christi/ als des wahren GOTTES/ als
vnfers Vatters vnd Seligmachers/ so vil vns
menschlich vnd möglich/ nachkommen/ halten
vnd warnemmen/ vnd volgendts vnsern Nech-
sten lieb haben sollen. Wol denen Christen so sol-
ches thund: wehe aber den jenigen/ so solches ge-
bott vñ Christum verachten/ nit achten/ oder mit
für einen Rath/ oder für ein solches ding/ so zu
ihrem willen stehe/ haltē thund/ also daß sie ihren
Nechsten mögen lieben/ oder nit lieben/ nach ih-
rem willen vnd gefallen.

Wolte sich aber etwan jemandts vnder euch
alda/ mit jenem Schrifftgelehrten selbst rech-
fertigen/ vnd fragen: Wer ist dann mein Nech-
ster/ auff daß ich wisse welchen ich zu lieben
schuldig oder nit schuldig sey? Demselbigen/ so
also fraget/ gibe ich erstlich mit Christo/ wie je-
nem Schrifftgelehrten/ antwort: Ein jeder ist
dein Nechster/ er sey wer er wölle/ so deiner lieb-
hilff/ gaab/ gut vnd wolthat bedarff/ er sey
Vatter/ Mutter/ Kind oder Befind/ Schwes-
ter oder Bruder/ ja freund oder feind/ also/ daß
wir hierinnen kein vnderschied nit machen sol-
len/ noch könden/ weder vnder freund noch
feind/ sonder/ zu lieben seynd wir schuldig/ ver-
mög des gebotts des Herren im heutigen Euan-
gelto/ alle vnd jede/ freund vnd feind. Darumb
sagt er nit zu seinen Jüngern vnd vns: Das
ist mein gebott/ daß ihr nur etlich Menschen
lieben/ oder nur euwere freund/ oder nur die je-
nigen so euch lieben. Nein/ sonder sagt: Daß ihr
auch vndereinandern liebet. In welchem ort vnd
worten

worten er niemands auß/ sonder alle Apoffel/
 folgendts auch vns Christen / nit nur etliche/
 sonder alle/ eyngeschlossen hat. Vnd demnach
 seynd wir Christen (nach GOTT) am allermeist
 schuldig mit reinem Herzen lieben vnser Eite-
 ren/ Pfarherrn/ Seelforger/ Prediger vnd an-
 dere so vns mit dem Geistlichen Brot speisen/
 als mit dem Wort GOTTES/ mit den H. Sa-
 cramenten. Auch die weltlichen Obrigkeiten/ so
 vns vor vnsern feinden/ Mißgönnern vñ Gott-
 losen Menschen/ beschirmen/ mit der Gerechtig-
 keit handhaben. Auch alle andere Patronen/
 Schul vnd Zuchtmeister/ gute freund vñ nach-
 baren/ von welchen wir empfangen haben/ ne-
 ben teglicher vnd höchster lieb/ vil andere guttha-
 ten/ als Kunst/ Weißheit/ Geschickligkeit/ freudt-
 schafft/ gutthat/ wolthat/ Gelt/ gelts werth/ speiß
 vnd tranck/ kleider vnd herberg zc. Dise alle sol-
 len vnd müssen wir billich widerumb lieben/ vnd
 ja die höchste lieb/ so vil vns möglich ist/ erzeigen/
 wir wollen dann nit allein vnchristlich/ ja vn-
 menschlich/ sonder auch vnuerstendiger als die
 vnuernüfftigen Thier/ so da wol erkennen/ wo
 vnd wann / vnd von weme sie liebe vnd gutthat
 empfangen/ erfunden werden.

Nit genug ist es aber (wie gemeldt) nur wöl-
 len lieb haben die jenigen so vns lieb habē/ denen
 guts thun so vns zuvor guts gethon habē/ denen
 wollen geben die vns widerumb können geben.
 Nein. Vnsern Nechsten müssen wir lieb haben/
 das ist/ alle die Menschen/ so vnser lieb vnd gut-
 that bedörffen/ nit allein vnser freund/ sonder

Nach Gott
 sollen wir
 lieben vnser
 Eltern zc.

Weltliche
 Obrigkeit
 sollen wir
 auch lieben.

Vndanck-
 bare Men-
 schen seynd
 vnuernüff-
 tiger als die
 vnuernüff-
 tigen Thier.

Unsere
feind müs-
sen wir lieb
haben.

auch unsere feind. Ja/ wann wir rechte Chri-
sten/rechte nachfolger Christi vnd seiner Apo-
steln seyn wollen hie zeitlich vnd dort Ewig/so müssen
wir lieb haben (vermögt des gebotts Christi im
heutigen Euangelio/do er sagt: Dis ist mein ge-
bott/das ihr euch vndereinander lieb habt) nit
allein unsere feind/vnd die jenigen feind so uns
vorläggt vil vbelts gerhon/sonder auch dise feind
so vns noch auff disen heutigē tag verfolgē/ver-
liegen/verspotten/verkürhen/verhindern/wel-
wann/vnd wo sie nur könden/vns schaden zu
fügen. Vnd/das noch mehr ist/müssen wir lieb
haben auch dise feind / so vns zu verfolgen nit
wollen ablassen/sonder noch/so vil ihnen mög-
lich/vns alles leids zu thun eigentlich bedacht
seynd/vns auch solches öffentlich vnder augen
bekennen: dennoch müssen wir solche/wann wir
anderst vollkommen Christē seyn wollen/lieb ha-
ben/nit angesehen das vnser fleisch vñ der fleisch-
lich Mensch solches schwerlich begreifen/ noch
in seinen kopff bringen kan.

Zeugnuß
Christi.

Matth. 5.

Leut. 19.

Rom. 12.

Deut. 4.

Luc. 6.

Leut. 19.

Das aber deme also/ vnd nit anderst seye/be-
zeugen vns gnugsam die warhafftigen wort vnd
gründlich Exempel Christi vnser Herr: Ihr
habt gehört (spricht der Herr zu vns Christen
allen) das gesagt ist/ Du solt deinen Nechsten
lieben/ vnd hassen deinen feind. Ich aber sage
euch: Liebet euwere feind/ thut wol denen die
euch hassen/ vnd bittet für die so euch verfolgen
vnd beleidigen/ auff das ihr kinder seyet euwers
Vatters der im Himmel ist/welcher seine Sonne
lasset scheinen vber die guten vnd vber die bösen/
vnd

vnd lasset regnen vber die gerechten vnd vnge- Matth. 5.
 rechten. Dann so ihr lieber/die euch lieben/was Luc. 6.
 werdet ihr für ein lohn empfaben? Thun nit das Colos. 3.
 selbig auch die Publicanen? Vnd so ihr allein Rom. 12.
 grüßet euwere brüd/was thut ihr weiter? Thun Proter. 25.
 nit das auch die Heyden? Darumb so solt ihr
 vollkommen seyn/wie euwer Himmelscher Vat-
 ter auch vollkommen ist zc. Dise vnd dergleichen
 wort hat Christus/ auch der H. Paulus/ auch
 der weise König Salomon/ alda vnd an ande-
 ren orten vil geredet/ auß welchem allem wir ge-
 wislich verbunden werden/ nit allein vnser
 freund/ sender auch vnser höchste feind zu lie-
 ben. Für die Jüden/vnd eben jekund in der höch-
 sten verfolgung/ als sie ihn creuzigten vnd töd-
 teten/ hat Christus der Herr seinen Himmlichen Exempel
 Vater mit disen worten gebetten: Vater/ ver- Christi.
 zeihe ihnen/ dann sie wissen nit was sie thund. Luc. 23.
 In disem hat von ihme ein Exempel genommen Stephanus
 der H. Martyr Stephanus/ derselbig liebet nit bittet für
 allein seine freund/ sonder auch seine höchste seine feind.
 feind/ vnd nit allein die so ihme vorlangst vbel
 gethon/ sonder auch dise/ vnd eben jekund zu di-
 ser zeit/ als sie ihn tödten. Dann als er von den
 Jüde versteinigt wurde/ kniet er nider/ bittet für Act. 7.
 sie/ vnd spricht: Herr setze ihnen dis nit zur sünd.
 Also daß vnser Nechster eigentlich ein jeder
 Mensch ist/ so vnser hilff/raths vñ that bedarff/
 er sey freund oder feind/ vnd denselbigen sollen
 vnd müssen wir lieben.

Wie wir vnsern Nechsten sollen vnd müssen Wie wir
 lieben/ könden wir auch zum theil auß obge- vnsern nech-
 melten

sten lieben
sollen.

Joan. 13.

Matth. 12.

1. Joan. 3.

Matth. 27.

Mar. 16.

Luc. 23.

melten Worten Christi lernen/do er im heutigen
Evangelio sagt: Gleich wie ich euch geliebt
hab etc. Wie aber vnser Seligmacher seine
Apostel vnd vns geliebet habe/wil er mit diesen
Worten zu verstehn geben/do er als bald dar auff
sagt: Niemand hat grössere lieb/dann das
er sein Seel setze für seine freund. Als wolt
er sagen: So lieb hab ich euch meine Apostel vnd
die ganze Welt gehabt/das ich nit allein von
euwert wegen vom hohen Himmel herab gesen-
gen/vnd hie auff Erden in MARIA Mensch
worden/gepredigt/Wunderzeichen gethon/
sonder ich wil auch mein Seel/mein leib vnd
leben für euch am Creuz/für euwere Sünd/
vnd für alle sünd der ganzen Welt auffopfern:
wolt ihr nun euwern Nechsten recht lieb ha-
ben/so volget mir nach/setzet auch euwere See-
len/leib vnd leben/Gut vnd Blut/für euwe-
ren Nechsten/so werdet ihr kinder des aller
höchsten seyn. Wiewol wir Christen auß diesen
worten nit verbunden seynd/also vnd der ge-
stalt/wie Christus gethon/weder für vns noch
für vnsern Nechsten/vil weniger für die gan-
ze Welt/weder für vnser freund noch für vn-
ser feind/weder am Creuz noch anderstwo zu
sterben/dann die ganze Welt schon ein mal
vnd gnugsam/vnd nit durch vns (welchs un-
möglich were gewesen) sonder durch ihne Chri-
stum vnd seinen Tod erlöset ist worden: so wil
doch der Herr vns lehren/das wir auch zur
zeit der not/die höchsten gefahr wegen vnser
Nechsten

Nächsten zu bestehn vns nit beschweren sollen/ Merck jelo
 vñ ihne so lieb als vns selbstn haben. Vnd zwar chen rechter
 ist allein diß ein rechts vnd gnugsams merckzei- Liebe des
 chen/ wie du deinen Nächsten lieb haben solt/ Nächsten.
 nemlich: Als dich selbst. Wie vns dann Chri-
 stus der Herr selbstn fürgeschrieben hat. Wie Matth. 22.
 lieb aber du dich selbst hast/ weistu wol: So lieb
 hastu dich selbst/ daß du gern woltest daß dir je-
 dermanñ guts gönnet/ daß dir jedermanñ guts be-
 wisse/ daß dir in deinem anligen vñ not jedermanñ Wie lieb
 zu hilff keme: Daß man dich/ wann dich hun- sich selbstn
 gert/ speiset/ wann dich durstet/ trencket: Daß ein jeder
 man dir Gelt vñ gelts werth ohne Bucher für- Mensch
 streckt. So lieb hastu dich selbst/ daß du gern wol- habe.
 test daß dir jedermanñ verzeige vnd nachliesse alle
 schuld vnd missethat/ klein vnd groß/ Wort vnd
 Werck: so lieb hastu dich selbst/ daß du gern wol-
 test/ daß man dir nichts böß nachredet/ daß man
 dich nit verschweket/ nit verlüge/ nit verachtet/
 nit verhindert/ daß man dich nit betrüge noch
 vberneme weder mit kauffen noch verkauffen/
 weder mit maß oder meß/ Elen/ gewicht/ daß
 man dir das deine nit neme wes heimlich durch
 diebstal/ noch öffentlich durch Raub zc. Sihe al-
 so ist dir/ sihe also lieb hastu dich. Nun mustu je- Einem an-
 kund gedencen/ ja wissen/ gleich wie dir sene/ al- dern ist auch
 so sene einem anderen auch: gleich wie du gern also.
 hast daß man dir guts thue/ also ist einem ande-
 ren auch: gleich wie du nit gern hast daß man
 dir arges thue oder böses/ also ist einem anderen
 auch. Wiltu nun jesund deinen Nächsten recht
 lieb haben/ so erzeige vnd beweiß ihme/ das/ so du
 x 5 gern

Lehr Tobie
Tob. 4.

Lehr Christ
Matth. 7.
Luc. 6. 13.
Ecc. 31.

gern von ihm vnd anderen gewarten wöllest. Beweise ihm das nit/ was du von andern nit gern haben vnd leiden wöllest. Thustu das/ so hastu deinen Nechsten so lieb als dich selbst: wo nit/ so hastu ihn nit recht lieb. Vnd hieher gehört das jenig so der heilig Tobias kurz vor seinem Tod zu seinem Sohn gesagt hat: Das du nit wilt das dir von einem andern geschehe/ das thu auch du einem andern nit. Vnd Christus vnser Herr selbst: Alles das ihr wöllet das euch die leut thun sollen/ das thut ihnen auch: Dann das ist das Gesetz vnd die Propheten.

Was aber diß für leut/ für rohe Vnchristen seyen/ was auch sie mitler zeit für ein straff empfahen werden/ so ihren Nechsten/ weder feind noch freund/ nit allein nit lieb haben/ sonder immer geneigt auch ihren freunden nachzustellen vnd schaden beweisen: den feinden aber gleichs vmb gleichs/ Korn vmb Salk/ böses vmb böses zu geben/ vñ allen Menschen/ wo ihnen nur möglich/ für das glück/ heil stehen/ Ja auch/ wann sie nur könden/ erwan einen gar in einem löffel mit Wasser verrrenckē nit vnderliessen/ kan diß mal vorhabende Predig anzeigen nit gedulden. Vnd seye diß gnug für den erstē Theil diser Predigt: Das nämlich die Liebe des Nechsten ein gebott GOTTES sey/ Vnd das wir freund vnd feind als vns selbst zu lieben schuldig seyen.

Der ander Theil diser Predigt stehet in disen Worten heutigs Euangelij: So ihr den Vatter (spricht Christus

mus zu seinen Jüngern vnd vns Christen allen) etwas bitten werdet in meinem Namen/ daß ers euch gebe. Auch zwey ding lernen wir Christen auß disen worten vnsers Heilands vñ Seligmachers. Erstlich: Wo wir hilff/ rath vñ that suchen sollen in vnserer angst vnd not/ kummernuß vnd trübsal/ vnd allem anligen zu Leib vnd Seel. Zum andern: Wie vnd was gestalt wir an demselbigen ort vmb beystand vnd hilff suchen sollen.

Wir vnd einem jeden Menschen ist nit vnbe-
wust/ (dann wir erfarens gnugsam im werck) daß wir täglich vnd ohn vnderlaß vil mangel vñ gebrechen haben/ jekund am Leib/ jekund am Gut/ jekund an der Seel/ jekund am zeitlichen/ jekund am Ewigen. Wo vnd bey weme wir aber vmb abwendung desse so wir nit gern haben/ vnd vmb mittheilung desse so wir gern hetten vñ notwendig bedörffen/ bitten sollen/ wissen wir nit alle/ oder wollen doch solchs nit wissen.

Etliche Menschen/ eintweder auß faulkeit/ oder auß nit achten/ auß verachtung/ oder auß Unglauben/ suchen auch in ihrer höchsten not/ zu Leib oder zur Seelen/ nit hilff/ wie das vnuer-
nünfftig Vieh so ohn allen verstand lebt/ bleiben sie immer stecken in ihrer angst vnd not/ armut vnd trübseligkeit/ Sünd/ schand vnd laster: ver-
meynen etwann/ es sey niemands zu finden so ihnen helffen könde/ Oder so ja jemandts zu finden/ so wollen sie ihn doch auß hinleßig-
keit nit suchen/ Oder ob sie ihn schon suchen vnd finden/ wollen sie doch nit anhalten vmb hilff/

Wo wir in
vnsrem an-
ligen hilff
suchen sol-
len.

Etliche sin-
ckē auß faul-
keit/ oder
anderer lo-
sen ursach/
nirgents
hilff.

wie vnd wie lang es von nöten were nit bitten/ vnd diß auß Vnglauben/ eintweder/ daß sie nit vermeynen daß derselbig so mechtig sey daß er ihnen künde helffen vnd geben alles was von nöten ist/ oder daß er nit so barmherzig seye/ daß er ihnen helffen vnd geben werde was sie bedürffen zu Leib vnd Seel.

Bitte bey dem Teufel.

Anderer verzweifelte Menschen/ so nit würdig seynd daß sie Christen genennet sollen werden/ lauffen etwan zum Teufel/ suchen hilff/ rath vnd rhat von den bösen Geistern/ die sollen ihnen geben was sie zu Leib vnd Seel bedürffen: der doch ihr/ ihrs Leibs vñ ihrer Seelen höchster vnd tödtlicher feind ist/ so tag vnd nacht seinen möglichen vleiß ankert/ wie/ wo vnd wann er einen Menschen verführen/ mit Leib vnd Seel in abgrund der Hellen führen künde.

1. Pet. 5.

Hilff suchen eilich bey den Schwarzkünstlern.

Die dritte/ so sich gleichwol dem Teufel selbst nit ergeben noch verschreibē/ ihme zu dienen weder schriftlich noch mündlich nit bewilligen/ auch eigentlich in ihren nöten zu ihme selbst/ vmb hilff anzusprechen nit lauffen/ seynd sie doch nit vil besser als obgemelte/ Seitmaln sie auch nit zu dem rechten Nothhelffer/ sonder zu den Teufelbeschwerern/ Schwarzkünstlern/ Hexen vnd Unhulden in ihrer not lauffen/ suchen alda hilff vnd rath/ verachten vnd verlassen den jenigen bey welchem warhafftig hilff zu suchen/ hoffen vnd finden ist.

Auff daß aber solchs vnd dergleichen forthin nit geschehe/ hören wir im heutigen Euangelio/ vnd eben auß dem Mund Christi des wahren

GOTTES

GOTTES selbstem/wo/bey weme wir hilff/rath
 vnd that suchen sollen in allem deme so wir be-
 dörffen/es sey gleich zu leib oder Seel/nämlich
 spricht er: So ihr den Vatter etwas bittē wer-
 det 2c. Sihe lieber Christ/zu weme vns vnser lie-
 ber Herr Christus weist/welchen er vns neinet/
 wo vnd do wir bitten/vmb beystand vnd hilff su-
 chen sollen. Er sagt nit/Daß wir in allem vn-
 sermanligē/ auß faulkeit oder mißtrauwen nir-
 gents hilff vnd beystand suchen sollen: vil we-
 niger sagt er/ daß wir solche bey dem Teufel/
 Schwarzkünstler/ Hexen oder Vnhulden su-
 chen sollē: so weist er vns auch nit auff mensch-
 liche hilff/so hierinnen gar klein ist/sonder zu sei-
 nem Himmlichen Vatter der droben im Himmel
 ist/daselbsten/im Hünel/ist das ort/da vns kan
 vnd mag geholffen werden/vom selbigen ort kan
 vns zu beiden/zu leib vñ Seel/heil vnd hilff nach
 notturfft vnd reichlich widerfaren/an dasselbig
 ort werden wir nach vnser ableibung von dan-
 nen genömen. Derselbig/nemlich GOTT/sein
 vnd vnser Himmlicher Vatter/ist der jenig/zu
 welchem wir (samt dem Sohn vnd H. Geist)
 täglich bitten: Vatter vnser/der du bist im Him- Matth. 6.
 mel. Derselbig/so im Wesen einig/in der Per- Luc. 11.
 son aber dreyfaltig ist/der so Allmechtig ist/der
 vns allen wol helfen/vnd alles so wir in seinem
 Namen vnd recht bitten/wol geben kan/dersel-
 big ist der/so barmherzig/miltig vnd gütig ist/
 derhalben er vns alles so wir notwendig bedörf-
 fen gern vnd gutwillig geneigt vnd bereit geben
 wil: Derselbig ist der/so vns erschaffen/leib vnd
 Seel/

Seel/ vnd alles so wir seynd vnd haben/ geben hat/ der/ so vns am stammenden H. Creuzes erlöset hat/ derselbig ist der/ so vns geheiliger hat/ vnd Ewig selig machen wil.

Zu disem sollen wir in aller angst vñ not lauffen/ bey disem sollen wir zu Leib vnd Seel hilff suchen/ so frey selbst gutwillig zu vns allen gesagt hat: Alles das ihr den Vatter bitten werdet in meinem Namen/ das wil ich thun. Alles das ihr den Vatter bitten werdet in meinem Namen/ das wirdt er euch geben. Begert/ so wirdt euch geben werden. Dann ein jeder so da begert/ der empfahet: so da sucht/ der findet: so da anklopfft/ dem wirdt auffgethon. Vnd/ Bisshero habt ihr nichts begert in meinem Namen. Begert/ auff daß euwer fremd volkōmen werde. Vnd: Ruffe mich an in dem tag deiner trübsal/ ich wil dich erhören. Der Herr ist nahe allen denen/ so ihne anruffen in der warheit. Ehe daß sie schreyen/ wil ich sie erhören: weil sie noch reden/ wil ich sie hören. Welcher hat GOTT angeruffen/ den er verachtet hab? Siehe lieber Christ/ nun wissen wir jekund gar wol vnd vngewißelt/ wo wir in allem vnserm anligen hinlauffen/ vnd vns hilff schreyen sollen: Nemlich zu GOTT dem Vatter/ zu GOTT dem Sohn/ zu GOTT dem H. Geist/ welche nit drey Götter/ sonder nur ein GOTT/ doch drey vnder schidlich Personē seynd: zu disem/ vñ nit zu den Teufeln/ od Zaubern/ sollen wir lauffē: von demselbigē/ vñ nit von disen/ sollen wir hilff suchen: derselbigē/ vnd nit dise/ kan vns helfen: derselbigē/ gütige GOTT/ vñ nit des Teu-

Joan. 14.

Joan. 16.

Matth. 7.

Luc. 11.

Joan. 16.

Psal. 49.

Psal. 144.

Psa. 58. 65.

Eckl. 2.

Teufels gespenst/wil vns gern helffen/vñ geben
alles was zu leib vnd Seel von nöten ist. Vnd
war ist dises vns Christen allen ein sehr grosser
Trost/das wir nur wissen/wo wir in allem vn-
serm anligen/hilff/rath vnd that suchen vnd fin-
den müssen vnd könden: Nemlichen/nirgents
anderst dann im Himmel/bey niemands an-
ders (als bey einem Selbsthelffer/Dañ wie vnd
was gestalt wir zu den Heiligen im Himmel lauf-
fen mögen als zu vnsern Mithelffern vnd Für-
sprechen zu GOTT/haben wir zu seiner zeit vnd
ort gelehrt vnd gehört) als bey GOTT ꝛ.

Nöcht aber jekund jemand vnder euch sage
oder gedencen: Ich hab oft selbst vnd vilmaln
von GOTT/jekund dis/bald ein anders gebet-
ten/Ich sihe/höre/oder mercke doch nit/das ich
von ihme/weder gehört/vil weniger erhört sey
worden/dann ich/eintweder das anligen/ymb
welches abwendung ich gebetten/ noch hab vber
meinem halß/oder noch nit theilhafftig biñ wor-
den dessen so ich eintweder zum leib oder zur Seel
begert/ Derhalben ich nit sehen oder wissen kan/
warumb man in allen dingen nur zu GOTT
lauffen soll/seitemaln er doch mir nit geholffen
noch meiner bitt gewehrt ꝛ.

Es ist nit weniger/das nit alle vñ jede Men-
schen jeder zeit ihres bitts von GOTT gewehrt/
vnd desjenigen so sie begeren theilhafftig wer-
den: so ist auch das wahr/das GOTT war-
hafftig vnd Allmechtig ist/das er vns alles
geben kan/vnd nach seinem verheissen gern
will. Das aber wir nit allwegen vnd vmb alles
erhö-

Antwort/
warumb nit
ein jed von
Gott erhö-
ret wirdt.

erhöret werden/ist die schuld vnser/vñ nit GOTTES/darumb/das wir nit recht bitten. Wann wir recht bitten vñ von GOTT erhört werden wollen/ müssen wir in seinem namen/das ist/ im namen IESV Christi/bitten/wie er im heutigen Euangelio selbst bezeugt/ do er zu seinen Jüngern vnd vns gesagt: **So ihr den Vatter etwas bitten werdt in meinem namen/ auff das ers euch gebe** 2c.

Im Namen Christi bitte.
 Jacob. 1.
 Matth. 21.
 Luc. 11.
 Matth. 8.
 Luc. 18. 19.
 Gen. 34.
 Luc. 5. 6.
 Mar. 1.
 Tob. 4. 12.
 Esa. 1. 56.
 Hier. 8. 18.
 Joan. 9.
 Ezech. 18.

Im Namen Christi aber bitten vnd begeren/ ist nit allein bitten in einem warhafftigen Christlichen Catholischen Glauben/ in guter Hoffnung vnd vngewisselter zuversicht zu GOTT/ in höchster Demut/ vnableßlich/ in der Lieb vnd genad GOTTES/ das ist/ ohn Todtsünd: sonder auch/ nichts/ das einweder wider GOTT/ wider vnser Seelen seligkeit/ noch wider vnsern Nechsten ist. Welcher also vnd der gestalt bittet/ der wirdt ohn allen zweifel erhört vnd gewehrt/ darumb/ das er im Namen Christi begeret. 2c.

Luc. 18.
 Nit im Namen Christi bitten.

Diser Mensch aber/ so den wahren Glauben in GOTT nit hat/ verzweifelt/ einweder an der Allmechtigkeit GOTTES/ vnd vermennt er sey nit so mechtig das er ihme helfen könde/ oder an seiner Barmherzigkeit/ er sey nit so barmherzig das er ihm helfen werde/ Oder ist stoltz wie jener Phariseer in seiner bitt vnd gebett zu GOTT/ gleich als wann ihne GOTT erhören müste/ Oder lasset als bald ab vom Gebett/ wann ihne GOTT nit geschwind das erste oder ander mal auffwischet/ Oder steckt voller Todtsünden vnd

wil nit zuvor Puff thun/ Oder begert etwas so wider GOTT ist/ oder wider sein selbst eigne Seel/oder wider seinen Nechsten 2c. ein solcher Mensch (sprich ich) wirdt von GOTT nit erhört/ darumb/ daß er nit im Namen IESV begert hat/ sonder bekompt zur antwort/ wie dort die Mutter der kinder Zebedei sampt den kindern/ so Joannes vnd Jacobus gewesen seynd; Matth. 20. Ihr wisset nit was ihr begert. Vñ wie der Apostel Jacob sagt: Ihr begert/ ihr empfahe aber nit/ darumb daß ihr nit recht begert.

Genug werden wir auß diser Predig gemerckt/ gelernet vnd behalten haben/ wann wir wissen/ vnd volgentz/ so vil es möglich vnd wo von nöten/ ins werck richten/ Daß wir nach dem beuelch vnd gebott GOTTES/ vnsern Nechsten als vns selbst lieb habē/ ihme freundschaft vnd dienst/ mit rath vnd that/ Wort vnd Werck erzeigen. Nit allein aber disen so vns lieb haben vnd guts thund/ sonder auch vnsern feinden so vns böses thun vnd ohn vnderlaß verfolgē. Wir sollen sie aber also lieben/ als wie wir vns selbst lieben/ sollen ihnen beweisen das so wir gern von einem andern haben wolten. Zum andern/ Daß wir in all vnser angst vnd not/ mangel vnd fehl/ es sey den Leib oder Seel betreffend/ zu GOTT lauffen/ vnd vmb hilff schreyen sollen/ bey deme/ der Allmechtig/ Barmherzig/ vñ vns zu erhören geneigt ist. Derhalben lasset vns diesem allem/ so wir sekund gelernet/ mit vleiß vnd ernst nachsehen/ auff daß wir des jenigen so wir nit gern haben gerathen/ vnd desse so wir zum

y leib

Beschluß
diser Pree
dig.

36 Am Feyertag des H. Apostels Barthol.
leib oder zur Seel notwändig bedörffen/ vñ endt-
lich nach disem zeitlichen leben der Ewigen freud
vnd seligkeit/ theilhafftig werden/ Amen.

Gebetlin
zu Christo
vnserm Her-
zen.

Du sanfftmütiger Herr IESU
Christ/ du mein Erlöser vnd Heil-
land/ ich sag dir höchstes lob vnd
danck/ daß du mich so vätterlich vnderrich-
tet hast/ wie vnd was gestalt ich meinen
Nechsten lieben: Auch zu weme ich in all
meinem anligen lauffen vnd vmb hilff
schreyen soll. Nun bitte ich dich vmb bey-
stand vnd verstand/ auff daß ich solches/
wie ich gehört vnd gelernt/ in disen beiden
stückten ins Werck richten möge/ vnd mei-
nen Nechsten/ nit allein meinen freund/
sonder auch meinen feind/ nit allein die se-
nigen so mich lieben vnd mir guts gñnen/
sonder auch meinen feind vnd die jenigen
so mich verfolgen/ lieben möge. Daß ich
auch in meiner angst vñ not zu dir stehen/
zu leib vnd Seel hilff suchen vñ finden mö-
ge/ zu leib vnd Seel/ zeitlich vnd Ewig.
Hierzu wollestu/ O heiliger Apostel Bar-
tholomee/ desse Feyertag wir Catholische
Christen auff heut halten/ der du auch wes-
gen des Christlichē Catholischē Glaubens
hast wollen vnd sollen lebendig geschun-
den vnd endlich enthauptet werden/ bey
GOTT mein Fürsprech seyn/ Amen.

Am

Am tag des H. Bischoues Gebhardi. 337.

Am Tag des heiligen Gebhardi
Bischoues zu Costenk/ zum theil
zu Costenk feyerlich.

Am 27. tag
Augusti.

Auff heut haben wir den Feyers-
tag des heiligen Gebhardi/ so ein
Geborner Graue von Habsburg/
vnd volgens Bischoue zu Costenk
am Bodensee worden ist/ vñ näm-
lich an der zal (nach deme Dagobertus 8 Groß/
König Lotharij des andern sohn/ das Bistumb
Windisch/ alda fünff Bischoue gewesen/ als der
H. Paternus/ der Lando/ Maxentius/ Bulco
vnd Grammatius/ gen Costenk im 570 Jar
gelegt) der fünff vñ zwenzigst/ ein Gottsförch-
tiger/ vleissiger/ frummer Bischoue/ der seinem
Bistumb/ welchs gar groß vnd weitleuffig/ wol
vorgestanden/ den Christlichen Catholischen
Glauben erweitert/ vnd endlich in Christo se. Anno 887.
liglich vnd Christlich verschiden.

Evangelic n vnd Predigen/ wie am
tag Bilibaldi/ Henrici/ Martini/
Nicolai zc.

Am tag des heiligē Bischoues vñ
Beichtigers Augustini/ zum theil zu
Brixen vnd Regenspurg feyerlich.

Am 28. tag
Augusti.

Auff heut halten wir den Fey-
ertag des heiligen vnd fürtreffens-
lichen Kirchenlehrers vnd Bi-
schoues Augustini/ welcher im 30
y 2 Jar

Gar seines alters durch das Gebett seiner Mutter Monice/vñ durch die Predig des H. Ambrosij bekeret vnd getaufft ward. Hat selbst von seiner Bekerung grosse bücher geschriben/darinnen er sein altes vnglaubigs leben GOTT bekentet/ vnd öffentlich bekennet. Darnach machte man ihn zum Priester/hat ein Geistlich verfassung geordnet/vnd ein Geistliche Regel zu halten fürgeschriben. Nachdem er aber an statt des H. Valerij Bischoff zu Hippon ward/hat er einweder Göttlichen sachen außgewart/ oder gestudiret/ oder gelehret/ oder geschriben. Er war ein Hammer der Ketzer/denen er mit predigen vnd schreiben gar heffrig zugesetzt/ vnd ihrer irrthumb gewaltig vberzeugt/ in sonderheit die Manicheer/ Donatisten vnd Pelagianer: darumb hat er auch vil verfolgung von ihnen erlitten/ vnd grosse arbeit für die Kyrch zu seiner zeit vberstanden. Schrib vnzalbarliche Bücher vol Göttlicher weisheit. Er gieng zum essen als zu der Arzney/vnd hett einen täglichen kampff wider sein fleisch mit fasten. Kundt vñ wolt am tisch nit leiden/das man einem nachredet. Bey dem gesang der Kyrchen weinet er auß grosser andacht. Ließ bitten vnd Mess halten für seine abgestorbene Eltern/wie er selbst schreibet. Hat kein Testament gemacht/dieweil er so Arm war/das er nichts zeitlichs besasse. Dann es alles da gemein war/vnd seine brüder nach dem Apostolischen brauch/nichts eigens hetten. Ist endlich/ da die feindlichen Wandalen sein stadt Hippon belegeret hetten/am Fieber verschiedent/

Aug. Tom. 1.
lib 9. Contes.
c. 12. 13. fol. 37.

Anno 430.

Am tag der Enthauptung Joannis. 339

seines alters im 76/ seines Bistumbs im 40
Jar. Von ihm hat Possidius geschriben. Sein
leib ist erstlich von wegen der Barbarischen
feind/ von seiner stadt Hippon/ in Sardinien/
Vnd darnach von der Longobarden König Anno 713.
Leoprando gen Paphia gefürt/ vnd ehrlich be-
graben in S. Peters kyrchen/ Cælum aureum
genant. Welcher H. Augustinus GOTT für
vns bitten wölle/ auff daß auch wir Catholisch/
Christlich leben/ sterben vnd Ewig Selig wer-
den mögen/ Amen.

L Bangelien vnd Predigen/ wie hies
vor von Sanct Gebhardo vermeldet.

Am Tag der Enthauptung Joannis
des Vorläuffers vnd Täuflers
Christi vnsers Herren/ zum theil
zu Eöln feyerlich.

Am 29. tag
Augusti.

W On Joannis Leben/ sterben
vnd Tod/ wöllen wir alda ferners
nichts handeln/ dann allein was
vns kürzlich der Euangelist Mar-
cus also beschriben hat: Herodes Mar. 6.
hat außgesendt/ vnd Joannem greiffen vnd
ins gefengnuß legen lassen/ vmb Herodias sei-
nes Bruders Philipps weibs willen: denn er
hett sie zum weib genommen. Joannes aber
sprach zu Herode: Es zimpt dir nit/ daß du dei-

9 3 nes



Matt. 14. a
Gen. 40. c

Heft. 5. a 7. a

nes bruders weib habest. Herodias aber stellet ihm nach/ vnd wolt ihn tödten/ vnd kunds nit. Herodes aber forcht Joannem/ dann er wuste daß er ein frommer vnd heiliger mann war/ vnd behielt ihn/ vnd thet vil nach dem er ihn gehört hett. Vnd hörere ihn gern. Vnd da ein gelegener tag kam/ daß Herodes auff seinen Geburts tag ein abentmal gab den Obersten vnd Hauptleuten vnd fürnemesten in Galilea/ da trat hinein die dochter der Herodiadis/ vnd tanzte/ vnd gefiel dem Herode/ vnd denen die am tisch saßen/wol. Da sprach der König zum megdlin: Bitt von mir was du wilt/ ich wil dir geben. Vnd schwur ihr ein end/ was du wirst von mir bitten/ wil ich dir geben/ wenn es gleich were die helfft meines Königreichs. Sie aber gieng hinaus/ vnd sprach zu ihrer mutter: Was soll ich bitten? Die sprach/ Das haupt Joannis des

Am tag des H. Bischoues Paulini. 341

des Täuffers. Vnd sie gieng bald ellends hin-
eyn zum König/ batt vnd sprach: Ich will das
du mir gebest jetz so bald auff ein schüssel/ das
haupt Joannis des Täuffers. Vnd der König
ward betrübt. Von wegen des ends/ vnd vmb
deren willen/ die mit am tisch sassen/ wolt er sie
nit traurig machen/ sonder schicket ein hencfer/
vnd befalh sein haupt her zu bringen in einer
schüssel. Vnd enthäupten ihn im gefengnis.
Vnd er bracht her sein haupt auff einer schüs-
seln/ vnd gabs dem megdlin/ vnd das megdlin
gabs ihrer mutter. Vnd da das seine Jünger
höreten/ kamen sie/ vnd namen seinen leib/ vnd
legten ihn in ein grab.

E Vangelium vnd Predigt/ wie hies
vor an S. Laurenzen oder anderer
H. Mertler tag.

Am Tag des H. Bischoues vnd
Beichtigers Paulini/ zum theil zu
Regenspurg feyerlich.

Am 11. tag
Augusti.

Auff heut ist der Geburts tag
des H. vnd berümpften Bischo-
ues vnd Beichtigers Paulini/
welcher von wegen des Catho-
lischen Glaubens vom Arriani-
schen Keyser Constantio / ins ellend verschickt
ward/ ist also bis an sein ende im ellend vmb.

Am tag des H. Abts Egidij.

Anno 340.

gezogen/ vnd in Phrygia endlich in Christo seliglich verschiden. Welcher auch vnser vor dem H. Angesicht GOTTES nit vergessen wöll.

E Vangelien vnd Predigen/wie am tag des H. Wilibaldi/ Henric/ Martini/ Nicolai vnd anderer Beichtiger.

Am 1. tag
Septemb.

Am tag des H. Abts vnd Beichtigers Egidij/ zum theil zu Bamberg vnd Regenspurg feyerlich.

DER H. Egidius ist zu Athen von Königlichem stammen geboren: Kam/zur zeit Keyfers Leonis des dritten/gen Arta/ vnd blibe daselbsten zwey Jar bey dem H. Bischooue Cesario/ begeret darnach in die Wüste: fürchtet die gefahr Menschlichs lobs/ wich derhalb an ein ort Septimania genant/ do der flus Rodanus in das Meer laufft/ lebet drey Jar von Wurkeln der kreuter vnd Hirschnilch/ bauwet darnach ein Kloster/ vnd vnderwise vil Brüder die Welt zu verschmehen: ist endlich vol des Glaubens vnd guter Werck im frid verschiden.

Anno 713.

E Vangelien vnd Predigen/wie hievor am tag des heiligen Paulini vermeldet.

Am

Am Tag der H. Junckfrauen
Berene/ zum Theil zu Costenz
feyerlich.

Am 1. tag
Septemb.

Am tag des H. Egidij / welcher der erste Septembris ist / wirdt an etlichen orten auch der Feyer- tag der heilige Junckfrauen Berene gehalten / welche war von der Gesellschaft der heiligen Ehebeer / welche mit vil tugenden gelenchtet. Zoge in Welschland von wegen des Gebetts / suchte heim die orter vnd gesencknuß der betrübtten Christen vnd Marterer / thet ihnen auch grosse hilff / lebte darnach in einer hōlin eyngeschlossen / dieneete daselbsten GOTT mit fasten vnd betten / thet grosse Wunderzeichen. Durch sie wurden auch vil andere Junckfrauen versamlet vnd zum Geistlichen leben bekeret. Derhalben sie von einem Tyrannen gefangen ward / vñ vil leiden must. Ist endlich seligklich verschiden / vnd hat die kron der Ewigen Seligkeit erlangt / welche GOTT auch Anno 330. vns geben wolle / Amen.

Evangeliē vnd Predigen / wie am tag der H. Künigundis / Margarethe / oder Katharine der heiligen Junckfrauen.

v s

Am

344 Am heiligen Fest der Geburt

Am 8. tag
Septemb.

MARIAE der heiligen Mutter
GOTTES / Euangelium
Matth. j.



Die ersten
xiii. gelid.
Luc. 3. d

Gen. 21. a

Gen. 25. c

Gen. 29. f
Gen. 38. c

DAS Buch der geburt
IESU Christi des sohns
Dauid / des sohns Abra-
hams. Abraham hat ge-
zeuget Isaac. Isaac aber
hat gezeuget Jacob. Ja-
cob aber hat gezeuget Judam vñ seine brü-
der. Judas aber hat gezeuget Phares vñ
Zaram von d' Thamar. Phares aber hat
gezeuget Esrom. Esrom aber hat gezeu-
get Aram. Aram aber hat gezeuget Ami-
nadab. Aminadab aber hat gezeuget Naas-
son. Naason aber hat gezeuget Salmon.
Salmon

Salmon aber hat gezeuget Boos von der
 Rahab. Boos aber hat gezeuget Obed auß Ruth 4. d
 der Ruth. Obed aber hat gezeuget Jesse. 1. Par. 2. b
 Jesse aber hat gezeuget David den König. 1. Reg. 17. a
 David aber der König hat gezeuget Sa- Die ander
 lomon auß deren die Vrie gewest ist. Sa- rllij. gelid.
 lomon aber hat gezeuget Roboam. Robo- 2. Reg. 12. c
 am aber hat gezeuget Abia. Abia aber hat 3. Reg. 11. g
 gezeuget Asa. Asa aber hat gezeuget Josas- 1. Par. 3. b
 phat. Josaphat aber hat gezeuget Joram.
 Joram aber hat gezeuget Osiam. Osias 2. Par. 26. d
 aber hat gezeuget Joatham. Joatham 2. Par. 27. b
 aber hat gezeuget Achaz. Achaz aber hat 2. Par. 28. b
 gezeuget Ezechiam. Ezechias aber hat ge- 4. Reg. 20. e
 zeuget Manassen. Manasses aber hat ge- 4. Reg. 21. d
 zeuget Amon. Amon aber hat gezeuget 4. Reg. 21. e
 Josiam. Josias aber hat gezeuget Jecho- 4. Reg. 23.
 niam vnd seine brüder / in der Babyloni- 24. 25.
 schen gefengnis. Vñ nach der Babyloni- Die dritte
 schen gefengnis hat Jechonias gezeuget rllij. gelid.
 Salathiel. Salathiel aber hat gezeuget
 Zorobabel. Zorobabel aber hat gezeuget 1. Par. 3. e
 Abiud. Abiud aber hat gezeuget Eliachim. Hag. 1. a
 Eliachim aber hat gezeuget Azor. Azor a 1. Esd. 3. a
 ber hat gezeuget Sadoch. Sadoch aber
 hat gezeuget Achim. Achim aber hat gezeu-
 get Eliud. Eliud aber hat gezeuget Eleas-
 zar. Eleazar aber hat gezeuget Mathan.
 Mathan aber hat gezeuget Jacob. Jacob
 aber

Am heiligen Fest der
aber hat gezeuget Joseph den mann MAR
RIAE: von welcher geboren ist IESVS der
da genant wirdt Christus.

Von welcher geboren ist IESVS/ der
da genant wirdt Christus.

Matth. i.

In diesem jezund gehörten Ev
angelio handelt vnd vnderfahet
sich der heilig Euangelist nichts
sonderlichs / dann allein / daß er
gründtlich beschreiben / anzeigen/
vnd mit Namen nennen wil die jenigen Patri-
archen/ Propheten/ Königen/ Priester vnd an-
dere auß/ welchen Christus der Herr/ der wahre
Sohn GOTTES vñ MARIAE/ seiner Mensch-
heit nach/ geporen ist. Fahet an von Abraham/
zelle einandern nach bis auff Christum/ alle
Väter/ Söhne/ kindskinder vnd also fortan/ bis
auff MARIAM/ auß welcher Christus geporen
ist. Theilet alle Geschlechter oder Gepurten von
Abraham bis auff Christum fürnemlich/ in drey
mal vierzehen Glieder. In den ersten vierzehen
Geschlechtern oder Gepurten/ von Abraham bis
auff David/ seynd vierzehen Patriarchen vnd
Richter gewesen. Im andern Glid/ von David
bis auff die Babylonische Gefencknuß / seynd
auch vierzehen Geschlecht oder Gepurten gewe-
sen/ nemlich vierzehen König. Von der Baby-
lonischen Gefencknuß bis auff Christum auch
vierzehen/ deren etliche Herzogen/ etliche Prie-
ster gewesen seynd. Mit welcher beschreibung
vnd

und vleiffigen erzellung der Gepurtlini Christi nach seiner Menschheit/der H. Euangelist Mattheus fürnēlich diß erweisen will: Daß er Christus/der wahre vñ natürliche Sohn GOTTES/warhafftig Mensch geporen sey/ vnd eben auß diesem Geschlecht vnd Samen/auf welchem er/nach verheiffung seines Himmelschen Vatters/hat sollen geporen werden: Vnd eben diser vrsach seye er auch nit allein wahrer Mensch/sonder auch der versprochne Messias/das ist/der wahre Natürliche Sohn GOTTES/der hieher kommen vnd dise Welt erlösen muß.

Von disen beiden/nemlich/ daß der Herr **Thellung** Christus wahrer Mensch/ vnd wahrer GOTT **vnd Inhalt** seye/wölle wir in vorhabender Predig weitläufft **dieser Predige.** diger handeln. Vnd im ersten Theil von seiner wahren Menschheit. Im andern/von seiner wahren Gottheit. Der jenig so ein Person/doch wahrer GOTT vnd Mensch ist/wölle mir vnd euch/durch fürbitt seiner lieben Mutter/welcher Gepurts tag wir Catholische Christē auff heut halten/hierzu sein Göttliche Gnad verleihen/auff daß ich das jenig/so ich mir zu reden fürgenommen/mit warheit volnbringē/ihz aber solchs mit andacht/nus/zur sterckung euwers Glaubens vnd besserung des Lebens/anhören mögt/Amen.

Der erste Theil vorhabender Predigt handelt wider den jenigen irthūb/das solte Christus nit wahrer Mensch seyn. Dises irthumbs vnd Kegeren ist (so vil mir bewust) ein anfenger gewesen einer mit Namen **Aug. lib. de hære. cap. 26.** Serdon/welcher zur zeit des Papssts H. zinjij/so **der**

der neunte nach S. Petro gewesen ist / gelebt
 hat. Nach disen lehrten gemelte Keker auch
 die Keker Proclianite genant. Apelles hielt:
 Christus hette sein fleisch nit auß MARIA / sonder
 auß den Elementen genommen / vnd nach seiner
 Auferstehung habe er solches der Welt wider
 umb gelassen / vnd seye ohne das fleisch vnd leib in
 Himmel gefaren. Die Manicheer sagten auch /
 Christus hette keinen warhafftigen sonder nur
 einen phantastischen Leib gehabt / vñ seye nit auß
 MARIA kommen. Disen ist auch nachgefolget
 der Priscillianus / Valentinus / Apollinaris.
 Wiewol dise Keker alle nit auff einerley wege
 herenn treten / so kommen sie doch all endtlich
 hierinnē zusamē: Daß Christus nit solle ein rech-
 ter volkōmentlicher Mensch / wie vnser einer / ge-
 wesen seyn. Wirdt derhalben alda von nöth seyn /
 daß wider gemelte Keker alle vnd jede dises er-
 wisen werde / auß Göttlicher H. Schrifft: Daß
 Christus sein fleisch warhafftig auß MARIA /
 vnd sonsten nirgents her / gebracht habe / welches
 seiner Gottheit vereiniget / also / daß zwo Naturen
 in einer Person gebliben. Hierzu soll vns erstlich
 das erste Capittel des Euangelij Joannis dien-
 en / in welchem der H. Euāgelist mit außdruck-
 lichen Worten bezeugt: Daß das Wort / das ist /
 der Sohn GOTTES / seye Fleisch / das ist / auß
 MARIA Mensch worden. Der H. Paulus nen-
 net / zu den Galatern / Christum einen Samen
 Abrahe / zu den Römern / einen Samē Davids:
 Welches alles nit wurde wahr seyn / wann Chri-
 stus nit warhafftig ein Mensch were / oder wann
 er sein

Proclianitz.
 Apelles.

Manichei.

Priscillianus.
 Valentinus.
 Apollinaris.

Christus
 warhafft-
 ger Mensch.

Das Wort /
 das ist / Got-
 tes Sohn /
 ist Fleisch /
 das ist /
 Mensch
 worden.
 Galat. 3.
 Rom. 1.

er sein fleisch anderstwo her/dann auß MARIA/
 welche auß dem Samen Abrahe vnd Davids Christus
ein Same
Abrahe vnd
Davids.
 gewesen ist/gebracht hette. Als der H. Euange-
 list Mattheus/im anfang seiner Euangelischen
 Beschreibung alle Gepurten von Abraham bis
 auff den Joseph erzellet/vnd endlich auch MA-
 RIAM nennet/sezet er mit vndispurirlichen wor-
 ten hinzu: Von welcher gepore ist IESVS/ Matth. 1.
 der da geneuet wirdt Christus. Ist dan nun
 Christus/wie wahr ist/ auß MARIA geboren/
 so muß er ja wider etliche obgemelte Kezer wahr-
 rer Mensch seyn/Vnd wider etliche andere/
 sein Menschheit/sein fleisch auß MARIA vnd nit
 auß den Lüfften oder Elementen gebracht ha-
 ben. Der Engel Gabriel spricht zu MARIA der
 heiligē Junckfrauen: Sihe/du wirst empfa- Luc. 1.
 hen in deinem Leib vnd geben einen Sohn/
 desse Namen soltu IESVS heissen. Wann nun
 Christus/vermög der Göttliche Antwort durch
 den Engel/in MARIA empfangen/ auß MA-
 RIA geboren/ ist nun Christus/ als der En-
 gel bezeuget/ein Sohn MARIAE/ so muß er ja
 die Substanz seines fleisches warhafftig auß
 ihr genommen haben/vnd volgentz ein wahrer
 Mensch seyn/welches auch der H. Paulus
 teutsch gnug bezeugt/do er spricht: Christus Galat. 4.
 seye gemacht auß einem Weib/das ist/ auß
 der Junckfrauen MARIA/vñ nit in den Lüff-
 ten oder Elementen. Wann Christus nit war-
 hafftig ein Mensch were/hette nit so wol als
 vnser einer wahres fleisch vnd blut gehabt/
 Wie hette er fōnden am achteren tag be-
 schulten

schnitten werden? Wie hette er können gefangen/ geschleiffet/ gebunden/ gezeuget/ gekrönt/ gecreuzigt vnd getödt werden? Wann er nit fleisch noch blut gehabt hat/ Wie hat er dan blut geschwizet am Delberg/ wie ist dan Wasser vnd Blut auß seiner seiten geloffen? Wie seynd wir dann durch die vergießung seines bluts erlöset vnd von allen Sünden abgewaschen worden? Wie hat er dann/ als er nun solte gefangen vnd bald getödt werden/ gesagt: Der Geist ist zwar bereit/ aber das Fleisch ist schwach? Wie hat er dann auch hunger vnd durst gelitten/ gessen vnd getruncken/ wann er kein Mensch gewesen/ vnd kein fleisch gehabt hat? Wie hat er dan zu seinen Jüngern gesagt: Ein Geist hat nit fleisch vnd bein/ wie ihr sehet daß ichs habe? Wie hat er dan dem Thome sein seiten vnd hende nit allein gewiesen/ sonder auch anzutasten dargereicht? Warumb hat er sich dann selbstenn so offtermaln ein Sohn des Menschen genennet? Warumb nennet der H. Euangelist Joannes / alle die jenigen Antichristen/ so da leugnen/ daß Christus nit in das fleisch kommen sey? Wie hette sonst Christus geweinet &c.

Billich seynd dises Zeugnisse vñ Ursachen gnug/ mit welchen er wisen: Daß Christus warhafftig ein warhafftiger Mensch sey/ daß er habe so wol als vnser einer (jekund vnleidentlich vnd vnsterblich) fleisch vnd blut/ vnd daß er das selbig nit mit ihme auß dem Himmel/ Lüfften/ Elementen/ sonder auß MARIA der H. Junckfrauen/ seiner lieben Mutter/ vñ nit gleichsam als

Luc. 22.
Joan. 18.
Matth. 26.

Joan. 20.

2. Joan. 4.

Joan. 11.

als auß einem Canal/ sonder auß ihrem fleisch
vnd Blut gebracht habe: Vnd zu deme/ das er
wahrer GOTT vnd GOTTES Sohn ist/ sene
er auch ein wahrer Mensch/ vnd des Menschen
MARIAE Sohn / zwo Naturen / die Göttlich
vnd die Menschlich in einer Person/ welche ist
Christus.

S Seitmaln aber auch villeicht die Ehre vnd
Vnglaubigen Jüden / Heyden / Ma. Vngleubi-
hometisten vnd verlaugnete Christen/ gen.

Ja sagen möchten/ sie glauben auch vñ bestehen
nur gern/ Das Christus geboren sey/ vnd eben
auß MARIA/ vnd ja zu Bethlehem/ Dadurch
aber sene ihnen nichts benommen / seitmaln
auß allen den jenigen zeugnussen/ so bishero an-
gezogen/ nit mehr erwisen sey/ dann allein das
IESVS von Nazareth / zu Bethlehem geboren
sey/ Das aber diser IESVS nit allein MARIAE
sonder auch GOTTES Sohn sene / dasselbig
sene noch nit erwisen. Hierauff ist zu antworten:

Das diß nit weniger (man wölle dan die Gött-
lich heilig Schrift vnd das ganze alte vnd neu-
we Testament umbstossen) als das jenig / vnd
auch mit grund der warheit künde erwisen wer-
den. Der Euangelist Mattheus bezeugt/ Das
der Engel zum Joseph gesagt habe: Fürchte
dich nit zu nemmen MARIAM dein Gemahel.
Dann das so in ihr geboren ist/ ist vom H. Geist.
Vnd sie wirdt geberen einen Sohn/ des namen
soltu heissen IESVS/ dann er wirdt selig machen
sein Volck von ihren Sünden. Im Euangelio
Luce spricht der Engel: Er verkündige allem
Luc. 2.

Volck

Kein mensch
kan eigent-
lich ein Hei-
land genen-
net werden.
Esa. 43.

Luc. 7.
Joan. 8.

1. Joan. 5.

Ibidem.

Luc. 1.

Volck ein fröliche Botschafft / dann der Hei-
land sey geboren. Nun mögen mir die jenigen si-
gen / so Christum nit für den Sohn GOTTES
erkennen wollen / Ob auch ein Mensch / so nit zu
mal GOTT ist / sein Volck von der Sünd rei-
nigen könne? Ob auch ein Mensch alles Volcks
ein Heilad / das ist / ein Seligmacher seyn könne?
Nein spricht GOTT / Ich bin der so die Sünd
verzeihet. Derhalben weil Christus / nach zeug-
nuß des Engels / die Sünd verzeihet / ist alles
volcks ein Heiland / muß er nit nur ein Mensch /
sonder auch wahrer GOTT seyn. Vnd zu deme
bekennt er Christus selbst / daß er offtermaln die
Sünd hie auff Erden / auß eigener krafft vnd ge-
walt als der Sohn GOTTES / ihren vilen ver-
zigen hab / auch der vrsach den Tod gelitten nach
seiner Menschheit. Hieruon aber solle vns der H.
Euangelist vnd Apostel Joannes eigentlichen
vnd gründlichen ohndisputirlichen Bericht ge-
ben / Also sagt er: Wer ist aber der die Welt vber-
windet / ohne der do glaubet / daß IESVS GOT-
TES Sohn ist? Vñ: Drey seynd die da zeugnuß
geben im Himmel / nämlich der Vatter / das
Wort / (das ist der Sohn) vnd der H. Geist / vnd
dise drey seynd ein ding. Vnd: Er hat gezeuget
von seinem Sohn / wer da glaubt an den Sohn
GOTTES / der hat GOTTES zeugnuß bey ihm.
Vnd: Wir wissen / daß der Sohn GOTTES
kommen ist / vnd vns sein meynung entdeckt hat /
auff daß wir erkennen den warhaffrigen GOTT
vñ in seinem warhaffrigen Sohn bleiben. Mehr-
gemelter Euangelist Lucas bezeugt / daß der Engel

gel Gabriel zu der H. Junckfrauen MARIA/
 che das sie vom H. Geiſt empfangen/ auß beuelch
 GOTTES also geſagt habe: Der H. Geiſt kompt
 vber dich/ vnd die krafft des aller höchſten wirdt
 dich vmbſchatten. Darumb auch das Heilige/ **Chriſtus ein**
 das auß dir geboren wirdt/ wirdt GOTTES **Sohn des**
 Sohn genennet werden. Vnd kurz zu vor: **Di-** **aller höch-**
ſten.
 ſer wirdt groß vnd ein Sohn des aller höchſten
 genennet werden.

Als bald im eyngang der Euangelischen be-
 ſchreibung Joannis des heiligen Euangelisten/
 leſen wir also: Im anfang war das Wort/ vnd **Joan. 1.**
 das Wort war bey GOTT/ vñ GOTT war das
 Wort/ daſſelb war im anfang bey GOTT ic.
 Daß der heilig Euangelist Joannes durch das **Das Wort**
 Wort verſtehe/ den Sohn GOTTES/ weiſt nie- **iſt der Sohn**
 mandts dann nur jederman. Wann aber ja ſol- **Gottes.**
 ches jemandts nit wuſte oder mutwillig nit wiſ-
 ſen wolte/ der leſe gemeltes Euangelisten wort
 an einem anderen ort/ ſo also lauten/ vnd auch **1. Joan. 3.**
 erſt droben angezogen: Es ſeynd ihrer drey/ ſo
 zeugnuß gebē im Himmel/ der Vatter/ das Wort/
 (das iſt der Sohn) vnd der H. Geiſt. Auf wel-
 chem allem volgt/ Daß das Wort der Sohn
 GOTTES iſt/ vnd daß das Wort/ oder Sohn im
 anfang/ das iſt/ von Ewigkeit bey dem Vatter
 geweſen iſt. Was wollen wir für das dritte auß
 diſem allem ſchließen? Das nämlich: Daß das
 Wort/ das iſt/ der Sohn GOTTES/ hieher auff
 Erden kommen vnd Menſch geboren ſey/ vnd **Das Wort**
 diß auch auß zeugnuß Joannis/ der da ſpricht: **iſt Fleiſch**
worden.
 Vnd das Wort iſt Fleiſch worden/ das iſt/ der
 Sohn

- Sohn GOTTES ist Mensch worden / nemlich auß der H. reinen Juncckfrauen MARIA zu Bethlehem. Ist derhalben noch wahr / vnd bleibt wider den Teufel vnd seinen ganken Anhang in Ewigkeit wahr: Christus IESVS ist nit allein MARIAE / sonder auch GOTTES Natürlicher Sohn / vnd selbsten sampt ihme vñ dem H. G. ein gleicher / ewiger / Mechtiger GOTT. Von diesem Christo sagt der Apostel Andreas zu seinem Bruder Petro: Wir haben den Messiam gefunden / welches ist verdolmetschet der Gesalbte. Von ihme selbsten hat Christus zu den Jüden gesagt: Ich vnd der Vatter seynd eins. Welchen der Vatter geheiliget / vnd in dise Welt gesandt hat / vnd ihr sprecht: Du lästerst / daß ich gesagt hab / Ich bin der Sohn GOTTES / der Vatter ist in mir / vnd ich bin im Vatter. Als der Herr Christus seine Jünger auff ein zeit gefragt: Für wen sie ihn hielten? Antwortet Simon Petrus vnd sprach: Du bist Christus des lebendigen GOTTES Sohn. Thomas der Apostel saar zu ihme: Du mein GOTT vnd mein Herr. Die Engel Christus selbst / der H. Paulus / sampt anderen Aposteln bezeugen: Daß diser IESVS am Jüngsten tag widerumb komen werde / zu richten vnd vrtheilen lebendig vnd tod / gut vnd böß. Dis ist das Lamb GOTTES / (spricht Joannes v. Tauffer als er mit dem finger auff Christum zeigt) so da hinweg nimpt die Sünd der Welt. Unser fürnemē gründtlich zu erweisen / seynd auch sehr dienstlich folgende wort des H. Pauli: Den das solt ihr in euch fülen / das ihr auch in Christo
- Sörlliche Warheit.**
- Joan. 1.**
- Joan. 10.**
- Matth. 16.**
- Joan. 20.**
- Actor. 1.**
- Matth. 25.**
- Joan. 5.**
- 2. Cor. 5.**
- Joan. 1.**
- Philp. 2.**

IESV fület. Welcher/ ob er wol in Göttlicher
gestalt war/ hat ers nicht ein Raub geachtet
GOTT gleich seyn/ sonder hat sich selbst ver-
nichtet/ vnd die gestalt eines Knechts angenom-
men/ ist gleich worden wie ein anderer Mensch/
vnd im wandel als ein ander Mensch erfunden/
hat sich selbst genidriget/ vñ ist gehorsam worden
biß zum tod/ nemlich zum tod des Creuzes. Vnd
an einem anderē ort: Also auch Christus hat sich
nit selbst herrlich gemacht/ daß er Hoher priester
würde/ sonder der zu ihme gesagt hat: Du bist
mein Sohn/ heut hab ich dich geborē. Vnd bald
hernach: Vnd wiewol er GOTTES Sohn war/
hat er doch an dem/ daß er leide/ gehorsam ge-
lernet. Vnd widerumb der H. Paulus zu den
Ephesern: Gebenedeyet sey GOTT der Vat-
ter vnser Herr IESV Christi ꝛc. Ich höre nit
auff zu dancken für euch/ vnd gedencke enwerer
in meinem Gebett/ daß der GOTT vnser Herr
IESV Christi/ der Vatter der herrligkeit/ ꝛc. An
einem anderen ort der H. Paulus: Manigfal-
tig vnd vilerley weise/ hat GOTT vorzeiten ge-
redt mit vnsern Vätern durch die Propheten/
endlich aber in disen tagen hat er mit vns gere-
det durch den Sohn ꝛc. Vber diß alles hat
GOTT der Himmlisch Vatter mit mercklicher
stim vom Hünnel herab/ disen Christum IESVM
vor meniglich seinen Sohn/ ja seinen Beliebten
Sohn selbst genennet vnd bekennet/ auff daß ja
hieran zu zweiffen niemandis vrsach hett. Als
sich der Herr Christus auff dem Berg erkleret
vor etlichen seinen Jüngern/ kame ein stim auß

Heb. 5.

Ephes. 1.

Heb. 1.

Matth. 17. der Wolcken sprechend: Das ist mein Geliebter Sohn/ in welchem ich ein wolgefallen habenden solt ihr hören. Als der Herr Christus von Joanne am Jordan getaufft ward/ ließe sich der H. Geist in gestalt einer Taubē sehen/ vñ GOTT der Vatter sprach zu Christo also: Du bist mein Geliebter Sohn/ in dir hab ich ein wolgefallen. Aber warzu ist es so sehr von nöten/ dise oder dergleichen noch mehr zeugnussen auß heiliger Schrift/ auß dem Mund GOTTES/ der Euangelisten vnd Aposteln/ alda bey vns Christen anzuzeigen/ weitleuffig vnd gründtlich erweisen wollen: Daß Christus IESVS von Nazareth auch der wahre Natürliche Sohn GOTTES sey/ seitemaln (wie im eyngang gemeldet) solches wir Christen gewiß wissen/ festiglich glauben/ vnd hierinnen nit ein einigen zweifel tragen: weil auch die jenigen/ so Christum den wahren Sohn GOTTES seyn leugnen/ disen angezogenen zeugnussen/ ja dem ganzen Neuen Testament keinen glauben geben? Nichts/ sprich ich/ ist von nöten hierinnen lang wollen verharren/ seitemaln wir solches nicht bedörffen/ die jenigen aber nach solchen zeugnussen allen nichts fragē/ wirdt derhalben von nöten seyn/ daß wir andere zeugnussen/ wider die Jüden vnd dergleichen Ungleubige herfür bringen.

Vor der Geburt vnseres Herren IESV Christi des wahren GOTTES vnd MARIAE Sohn/ waren die Jüden das außewölte Volck GOTTES/ GOTT durch sich selbst/ durch Mosen vnd die Propheten redet mit ihnen/ schreibe ihnen ge-
setz

Luc. 3.
Matth. 1.
Mar. 1.
Joan. 1.


sey für/ nach welchen sie leben solten / füret sie
 auß dem Gewalt des Pharaonis in das gelobte
 Land/ verhiess ihnen auß ihrem Geschlecht vnd
 Samen solte mitler zeit Messias sein Sohn ge-
 boren werden/ wie dann vom Abraham/ Ysaac/
 Jacob/ David/ zu lesen ist. Diser verheissung
 GOTTES von seinem Sohn/ glaubten die Jü-
 den/ begerten auch mehrmaln mit höchster Bitt:
 Er wolte nun mehe seinen Sohn senden: namen
 auch gern an vnd auff die heiligen Propheten
 GOTTES/ wie sie dann noch auff den heutigen
 tag haben vnd lesen ihre Bücher/ Propheceyen
 vnd Weissagungen/ ja das ganz alte Testament/
 vermeynen auch noch Messias solle mit der zeit
 auff Erden kommen. Daß sie aber vmb sonst
 warten/ vnd daß er warhafftig schon vor 1575
 Jaren geboren sey/ kan ihnen auch leichtlich auß
 ihrem selbst eignem Alten Testament erweisen
 werden/ dergestalt/ wann ihnen gründlich dar-
 gethon / daß die Propheceyen vnd Weissagun-
 gen / im Alten Testament vom Messia vnd
 Sohn GOTTES/ warhafftig vnd eigentlich
 in vnserm Herren Christo / wie sie weißge-
 sagt/ erfüllet seyen worden : derhalben er/ vnd
 sonst kein anderer / der rechte Messias vnd
 wahre Sohn GOTTES sey / vnd seyn müsse/
 vnd die Jüden vergebens auff einen anderen
 warten.

Gen 3.12.19.
18.22.26.28.

Jüden ne-
men an das
alte Testa-
ment.

Nun sollen jekund derselbigen zeugnissen nit
 wenig/ doch auff das kürzest ohne weitleuffige
 auflegung einanderen nach/ alhie erzellet wer-
 den/ vnd als dann die vnglaubigen Jüden vnd
 Maho.

n Gelieb-
ten habe-
stus von
se sich der
GOTT
bist mein
volgefä-
dise oder
heiliger
der Eu-
Christen
erweisen
Nazareth
GTTES
det) sol-
ch glau-
tragen.
wahren
gezoge-
Testa-
ich ich/
arren/
ienigen
fragt/
andere
leichen
Chri-
Sohn/
GOTT
en vnd
nen ge-
setz



Mahometisten hierauf schliessen lassen: Ob der Sohn GOTTES der wahre Messias den Jüden von seinem Himmelfischen Vatter versprochen/ Mensch geboren sey/oder nit. Vnd bezeugts: Ob derselbig IESVS von Nazareth der versprochne Messias vñ Sohn GOTTES sey/oder nit.

Gen. 12. 15.

18. 22. 26. 28.

Psal. 131.

2. Reg. 7.

2. Reg. 1. 12.

4. Reg. 21.

Matth. 1.

Rom. 4.

Psal. 131.

Luc. 1.

Dem Abraham/ Isaac/ Jacob / David hat GOTT der Vatter/ mehrmals zu vnderschiedlichen Zeiten verheissen/ auch dem David mit einem Schwur bestetiget: Aus ihrem Geschlecht vnd Samen solle Messias geboren werden. Daß aber Christus vnser Herr auß Abraham/ Isaac/ Jacob/ David / nach der Weissagung vnd Verheissung/ geboren sey/ bezeugt vns der H. Euangelist Matthæus. Da er einanderem nach erzellet die Namen/ Stammen vnd Geschlecht/ auß welchen Christus geboren/ nennet er auch Abraham/ Isaac/ Jacob vnd David. Desgleichen auch der H. Paulus.

Im alten Testament (bezeugt David selbst) hat der Herr dem David die Wahrheit geschworen/ vnd wirdts ihm nit abschlagen: Ich wil dir auff deinen stul setzen die frucht deines leibs. Im neuen Testament bezeugt der Engel Gabriel/ Daß diese frucht niemands anders sey/ dan eben Christus IESVS/ do er zu MARIA gesagt: Du wirst einen Sohn geben/ vnd GOTT der Herr wirdt ihm geben den stul seines Vatters Davids.

Jacob der H. Patriarch hat kurz vor seinem tod von der zeit des Messie/ wann er kommen werde/

werde/also weißgesaget : Es wirdt das Scepter **Gen.49.**
 von Juda nit hingenommen werden/ noch ein
 einiger Herzog von seinen Lenden/ biß daß der/
 so gesandt soll werden/ komme/ vnd er wirdt
 seyn das die Hende erwarten werden. Vnd Da-
 niel hat zu den Jüden gesaget : Wann der heilig. **Dan.9.**
 ste aller heiligen kömen wirdt/ wirdt euwer Sal-
 bung (der König) auffhören. Daß dise beide zur
 zeit der Geburt Christi erfüllet seyen worden/
 bezeugt der Euangelist Mattheus/ do er sagt/
 Daß zur zeit/ als Christus zu Bethlehem gebo- **Matth.2.**
 ren/die Jüden ihr Scepter/Gewalt vnd Obrig-
 keit nit mehr gehabt haben/ sonder einen fremb-
 den König Herodem Ascalonitam/ welcher nit **Herodes**
 ein Jud/sonder ein Idumeer gewesen ist. Zu de- **Ascalonita**
 me mußten sie vnder dem Joch vnd Gebott/ **ein Idumeer.**
 Zins vnd Stewr des Keyfers Octauiani zu
 Rom leben. Zu deme hette gemelter Herodes
 auß hilff der Römer ihren König Antigonum/
 so von den Machabeern herkommen/ gekriegt/
 überwunden/ allen Königlichen Stämmen vmb-
 gebracht/ ihre Bücher von der Geburt Linien
 verbrennt/ alle Schriftgelehrten so da sagten/
 (Deut.17.) Mitten auß deinen Brüdern soltu
 dir einen König erwölen/hat er getödt. Also/daß
 gewißlich auch domaln/ als Christus geboren/
 ihr salbung der König vnd Priester auffgehört
 hat.

Durch den heiligen Propheten Esaiam hat
GOTT der Vatter gesaget: Sihe ein Junckfraw **Esa.7.**
 wirdt empfahen vnd geberen einen Sohn/ vnd
 sein Name wirdt genant Emanuel. Daß aber

3 5 Christi

Christus warhafftig von vnd auß einer reinen
Junctfrauen geboren sey/ bezeugē vns gnug-
sam beide Euangelisten Mattheus vnd Lucas.
Vnd das noch mehr ist/ bezeugt Mattheus selbst/
Das eben diese Weissagung Esate von MARIA
vnd Christo weißgesagt/ geredt/ verstanden vnd
erfüllet sey worden/ do er also spricht: Dis ist
nur alles geschehen/ damit erfüllet würde/ das
so gesagt ist von dem Herren durch den Prophe-
ten sprechend: Siehe ein Junckfraw wirdt im
Leib haben vnd geberen einen Sohn/ vnd sein
Name wirdt genant Emanuel/ das so vil gesagt
ist/ als GOTT mit vns.

Matth. 1.

Luc. 1. 2.

Esa. 61.

Diser Prophet redet in der Person des Sohn
GOTTES/ also: Ober mir ist der Geist des Her-
ren/ derhalben/ daß mich der Herr gesalbet hat.
Er hat mich gesandt den sanfftmütigen zu pre-
digen/ gesundt zu machen/ die eines zerknirscht-
ten Herzens seynd/ vnd den gefangnen entle-
digung verkündigen/ vnd den gefesselten öff-
nung 2c. Daß dieses alles in Christo erfüllet sey
worden/ hat er selbst auff ein zeit/ als er in der
Synagog diese wort gelesen/ vor den Jüden be-
zeugt/ vnd auff ein andere zeit/ vor den Jüngern
Joannis.

Luc. 4. 7.

Matth. 11.

Mar. 6.

Mich. 5.

Micheas der heilig Prophet hat durch en-
gebung des H. Geists/ oder ja GOTT durch ihn/
das ort zu vor gesagt/ wo Christus der Sohn
GOTTES solle geboren werdē/ nēlich zu Beth-
lehem/ do er gesagt: Vnd du Bethlehem Ephra-
ta/ du bist klein gegen den tausenten in Juda. Es
wirdt mir einer auß dir außgehen/ der ein Herr
scheit

schier vber Israel seyn soll/ welches außgäg von
 anbegin vnd von ewigen zeiten her ist. Daß aber
 Christus eben zu Bethlehem geboren sey/ bezeu- Luc. 2.
 gen vns gnugsam die H. Euangelisten Matthe- Matth. 2.
 us vnd Lucas.

Zacharias hat zu vor gesagt: Messias wer- Zach. 9.
 de zu Jerusalem demütig vnd auff einer Eselin
 einreiten. Daß diß von Christo weißgesagt/ vñ
 von ihme selbst auch erfüllet sey worden/ bezeugt
 vns der H. Euangelist Mattheus mit disen
 Worten: Dises aber alles ist darumb geschehen/ Matth. 21.
 auff daß erfüllet würde/ das jenig so durch den
 Propheten gesagt ist worden: Saget der Doch-
 ter Sion/ Sihe dein König kompt dir sanfft-
 mütig ic.

Daß Messias werde IESVS heissen/ vñ auch
 Christus genennet werden/ hat vor langer zeit
 der Prophet Abacuc verkündigt. Daß vnser Hei- Abac. 3.
 land in d Beschneidung IESVS geneñet vñ Chri- Luc. 1. 2.
 stus seye/ bezeugē alle Euangelisten vnd Apostel. Matth. 2.

Daß die König den Messiam anbetten/ ihme
 Gold vnd Gaaben schencken werden/ bezeugen Esa. 60.
 Esaias vnd David. Daß solches in Christo von Psal. 71.
 den heiligen drey Königen zu Bethlehem erfül-
 let sey worden/ bezeugt abermal der heilig Euan- Matth. 2.
 gelist Mattheus.

Daß Christus d Sohn GOTTES in Egyptē
 solt stiehē/ Daß er widerüb auß Egyptē solte ge-
 fordert werdē/ haben Esaias vnd Oseas verkün- Esa. 19.
 digt. Daß dise alle beide in vnserm Christo erfül- Osee 11.
 let seyen wordē/ bezeugt abermal Mattheus/ oder Num. 24.
 ia der Engel GOTTES/ do er zum Joseph sagt:
 Stehe

- Matth. 2.** Stehe auff / vnd nimb das Kindlin vnd sein Mutter / vnd fleuch in Egypten land / vnd bleibe alda bis daß ich dir sage zc. Vnd daß obgemelte wort der Propheten eben von Christo verstanden / vnd warhafftig in ihme erfüllt / bezeugt gemelter Euangelist selbst mit disen wortē: Auff daß erfüllet würde / das der Herr durch den Propheten gesagt hat / der da spricht: Aus Egypten habe ich beruffen meinen Sohn.
- Cap. 6.** Es ist vor verkündigt worden: Daß Messias die heimliche gedanken der Herzen erkennen werde. Daß Christus solche erkennt habe / bezeugen abermal alle Euangelisten.
- Luc. 7.** Der Teufel werde ihme widerstrebē zc. Christus ist vom Teufel versucht worden.
- Zach. 3.** Vom Messia ist weißgesagt wordē / Er solle auff Erden wohnen ohne ein eigens hauß oder herberg / do nemlich Jeremias der Prophet also gesagt hat: Warum wirstu werden wie ein frembding im Land / vnd als einer der vberfeldt gehet / vnd allein eynkeret vber nacht zu bleiben? Daß auch diß in vnserm Herren warhafftig erfüllt sey worden / bezeugt er selbst mit disen wortē: Die Füchs haben ihre hülen oder Gruben / vnd die Vögel des Luftts haben ihre nester: aber der Sohn des Menschen hat nicht / do er möge sein haupt hin neigen.
- Matth. 4.** In summa / wann ich alda nur erzellen solt das jenig / so im alten Testament vom Leiden vñ Tod Messie vorgesagt / vnd endlich in vnserm Christo / vnd sonsten in keinem / vnd eben vollkommenlich in ihme erfüllet ist worden / wurde ich allein
- Matth. 2.**
- Luc. 9.**
- Jerem. 14.**
- Matth. 2.**
- Luc. 9.**

allein hierzu ein eigne Predig bedörffen/nemlich:
 Wie er von seinen freunden verlassen/von sei-
 nen feinden gefangē/ fälschlich anlagt/ geschla-
 gen/ verspottet vnd verspēyet/ sein eigen Creuz
 getragen/ daran wie die Schlang in der Wüste
 erhöhet/ alles wie ein Schästlin gedultig gelitten/
 daß ihme kein Wein solte zerbrochen werden/ drey
 tag im Erdtrich wie Jonas im Bauch des Wal-
 fisch gelegen/ auffgestanden/ vñ gen Himmel ge-
 faren. Dises alles ist von Messia weißesagt/
 dises alles ist/ als allen vnd jeden Christen be-
 wußt/ in vnserm Herren Christo/ als er auff Er-
 den gangen/ erfüllt worden.

Ist also nit allein vns Christen/sonder were
 billich auch den Jüden vnd andern Vngleubi-
 gen gnugsam erweisen: Daß Christus IESVS
 der wahre Sohn GOTTES/ warhafftig Mensch
 geporen sey/ in vnd auß der H. Junckfrauen
 MARIA: Daß er wie vnser einer (allein die
 Sünd außgenommen) ein warhafftiger Mensch
 sey/ nach seiner Menschheit gelitten/ gestorben/
 begraben vnd widerumb auffgestanden/ als ein
 wahrer GOTT vnd Mensch gen Himmel auff-
 gefarē. Zum andern ist gnugsam erweisen: Daß
 diser Mensch-Christus/ der versprochne Messia
 as/ der wahre Natürliche Sohn GOTTES/
 vnd sampt dem Vatter vnd H. Geist ein alei-
 cher/ Ewiger/ wahrer GOTT sey/ wider alle Jü-
 den/ Türcken vnd andere Namelucken/ so ihne
 als den wahren Sohn GOTTES nit annem-
 men wollen. Wir Christē aber/ GOTT sey ewi-
 ges lob vnd danck gesagt/ wissen gar wol/ bekenn-
 en

nen auch gern/ wollen auch darauff sterben vnd selig werden: Daß Christus IESVS GOTTES vnd MARIAE Sohn/ wahrer GOTT vnd Mensch ist/ immer vnd Ewig bleibt. Auff diser bekantnuß/ Lehr vnd Glauben/ sollen vnd wollen wir leben/ sterben vnd Selig werden/ Amen.

Gebettlin
zu Christo
Jesu.

D' Ir dancken dir/ O Herr IESV Christ/ daß du vns den H. Euangelisten Mattheum so vleissig beschreiben hast lassen dein Geburt Lini nach delner Menschheit/ anzuzeigen/ daß du der versprochne Messias auß dem Samen Abraham/ Isaac/ Jacob/ Dauids/ nach Weissagung vñ verheissung deines Himmelschen Vatters/ geporen/ vnd also nit allein GOTTES/ sonder auch MARIAE/ vnd nit allein MARIAE/ sonder auch GOTTES Sohn/ vnd selbstem GOTT seyest. Sende vns den H. Geist/ d vns vnser Herz also erleuchte/ daß wir dich einen wahren Menschen vñ GOTT bis an das ende vnser lebens bekennen mögen. Hierzu wollest du O heilige Zuckfraw MARIA/ die du auff heut von deinen Eltern Joachim vñ Anna zu Nazareth geporen/ bey deinem Kind vnser Gnedige Fürsprecherin seyn/ auff daß wir sampt dir vnd deinem ganzen Himmelschen Heer/ immer vnd Ewig selig werden/ Amen.

Amen

Am tag der Erhebung Künigundis. 365

Am Tag der Erhebung der H.

Keyserin Künigundis/ zum theil
zu Bamberg feyerlich.

Am 9. tag
Septemb.

Auff heut ist alhie zu Bamberg
die heilige Junckfraw vñ Key-
serin Künigundis/ etliche Jar
nach ihrem tod erhaben wor-
den/ alda ihr Heilighumb noch ruhet zc.

Das Euangelium vñ Predigt mös-
gen auff heut gebraucht werden/
wie droben am dritten tag des
Merzens vermerckt.

Am Tag der Erhöhung des H.

Creuzes/ zum theil im Costenzer
Bistumb feyerlich.

Am 14. tag
Septemb.

Gut ist der tag der Erhöhung
des H. Creuzes/ als der Keyser
Heraclius dasselbig von Persia
gen Jerusalem wider bracht. Dañ
derselbig Keyser hett durch fasten
vnd Gebett einen grossen sig erlanget wider den
gewaltigen Persischen König Cosdroam/ hett
auch ihme widerumb genommen das heilig
Creuz/ so derselb Cosdroas vom Berg Cal-
uariae geführt hett. Als nun der Keyser Heracti-
us/ wie ein Sighafftiger Held zu Jerusale Tri-
umphierlich eynziehen wolt/ name er das Creuz
auff seine Schultern/ vnd truge es den wege/
wie

Anno 620.

Am Feyertag des H.

wie es Christus getragen hat/ kont aber nit fort
gehn/ biß daß er/ auß rath Zacharie des Hieroso-
lymischen Bischoues/ seine Sighafftige kleider
aufzoge/ auch barfuß vnd demütig daher gieng.
Richtet dasselbig am Berg Caluarix auff/ do
hin es von Helena zuuor gesetzt ward zc.

E Vangelium vnd Predigt/ wie an
der Erfindung des H. Creuzes/
nämlich am dritten tag Maij ge-
setzt.

Am Feyertag des H. Apostels
vnd Euangelisten Matthei/ Euan-
gelium Matth. ix.

Am 21. tag
Septemb.

Mar. 2. 6
Luc. 5. 15. a

In der zeit sahe IESVS
einen Menschen am Zol-
siken/ der hieß mit na-
men Mattheus/ vnd
sprach zu ihm: Folge
mir nach. Vnd er stundt
auff/ vnd volgete ihm. Vnd es begab sich/
do er zu tisch saß im hauß/ sihe/ da kamen
vil Publicanen vnd Sünder/ vnd sassen zu
tisch mit IESV vñ seinen Jüngern. Vnd
do das sahen die Phariseeer/ sprachen sie zu
seinen Jüngern: Warumb isset ewer Mei-
ster mit den Publicanen vnd Sündern?
Do das IESVS höret/ sprach er zu ihnen:
Die gesunden dürffen nit des Arkes/ son-
der



der die Krancken. Gehet aber hin/ vnd lernet was das sey/ Ich wil barmherzigkeit/ vnd nit Opffer. Dann ich binn nit kommen zu beruffen die Gerechten/ sonder die Sünder.

Ossee 6.6
Matth. 12.9
1. Tim. 1.6

Vnd er stundte auff/ vnd volgete ihm. Matth. ix.

Alle die jenigen Christen/ so jemaln wider GOTT gehandelt/ oder noch mitler zeit sündigen werden/ haben auff heut ein tröstlichs Euangelium der Sünden widerumb ledig vnd des Ewigen lebens theilhaftig zu werden. Mattheus der heilig Apostel vnd Euangelist bezeugt von sich selbst/ nennet sich auch selbst mit seinem eignen Namen/ vnd

a 2 spricht/

spricht/ daß er seye am Zoll gefessen. Damit er anzeigen vnd bekennen wil/ daß er ein großer Sünder gewesen seye/ seitemaln solche Ampeln ohne liegen vnd berriegen schwärlich abgehn. Lehret auch fürs ander/ daß er auß einem Zöllner ein Apostel/ auß einem Sünder ein Pfaffen/ auß einem vnfrummen frumb/ auß einem Weltkind ein kind GOTTES vnd der Ewigen Seligkeit wordē sey. Beschreibe auch mit vleys wie solchs geschehen sey.

Theilung
vnd Inhalt
diser Predig.

Auff daß nun auch wir Christen vns hierinnen zur zeit der not zu verhalten wissen/ wollen wir gehörtes Euangelium/ vñ was sich zwischen Christo vnd Mattheo verlossen/ etwas vleysigers erwegen. Auff daß aber solchs desto richtiger von mir verrichtet/ vnd desto ordentlicher von euch vernommen mög werden/ wollen wir dise Predig auch in zween Theil abtheilen: Vnd im ersten von der Person Christi/ Im andern von der Person Matthei handeln/ Vnd was wir von jedem zu lernen/ mercken vnd behalten haben/ fürzlich vnd auff das leichtest gern vnd gutwillig fürtragen/ welchs auch ihr gedultig anhören wölt.

Matth. 9.
Mar. 2.
Luc. 5.

Der heilig Euangelist vnd Apostel Christi Mattheus/ desse Fest oder Feyertag wir Catholische Christen auff heut halten/ hat vns gehörtes Euangelium neben den Euangelisten Marco vnd Luca selbst beschriben/ vnd vor dem anfang desselbigen lehret: Wie daß der Herr Christus vom lād der Gerasener herüber gefaren/ vnd in sein Stadt/
nemlich

nemlich gen Capharnaum/kömen sey/ alda vnd
 als bald haben sie einen Sichtbrüchigen/ so im
 Beth gelegen/ für ihne gebracht/ welchen er an
 leib vnd Seel mit einem wort gesundt gemacht/
 auch auff das murmeln der Schriftgelehrten
 ihne sterck vnd krafft geben/ das Beth auff sei-
 nen rucken nehmen vñ heim zetrage. Vñ hierauff
 volget diß heutig Euangelium also: In der zeit/
 nemlich an einem Montag/ welcher der neunte
 tag Julij im ein vñ dreissigsten Jar Christi war/
 als d' Herr von dannen auß dem Haus dar-
 innen er den Sichtbrüchigen/ so oben zum dach
 hinab gelassen ist worden/ gesundt gemacht hett/
 fürbaß gieng/ widerumb gegen dem Galilei-
 schē Meer/sahē IESVS einen Menschē am
 Zol sitzen/der hieß mit Namen Mattheus.
 Diser Mattheus ist der jenig/ daruon wir auff
 heut handeln/ desse Fest wir auff heut halten/
 der diß Euangelium selbst geschriben/ der ein
 Apostel vnd H. Euangelist worden ist. Als
 Marcus vnd Lucas diß heutig Euangelium
 vnd Euangelische Histori beschriben haben/ Mattheus
 nenneten sie disen Zolner mit seinem andern wirdt auch
 Namen/ Leui: Seiternaln er ein grosser Sün- genennet
 der vnd Schinder gewesen ist/ wöllen sie seines Leui.
 Namens/ mit welchem er immer/ als ein Jün-
 ger des Herren worden/ genennet/ verscho-
 nen. Er aber/ Mattheus/ thut wie einem rech-
 ten Puffer von nöten/ als der sich weder vor Der sentg
 GOTT noch vor der Welt zu sündigen nit ge- so sich nit
 forchten/der soll vnd will sich auch zu Puffen/sein fürchtet zu
 Sünd sündigē/ soll

sich auch zu
Püssen nit
schämen.

Ein schlech-
tes ämptlin
kan einen
Dieb erneh-
ren.

Sünd bekennen/ vnd seinen Namen öffentlich
nennen nit schämen. Diser Mattheus/ wurde
von allen Jüden/ ja von allen Menschen/ vnd
fürnemlich von den Phariseern/ verdecklich
vnd verechtlich/ vnd ja als ein solcher Mensch
samt allen andern Zöllnern/ gehalten/ der ihnen
nit früb vñ gut genug seyn solt/ daß sie mit ihm
sonderliche gemeinschaft haben/ mit ihm weder
essen noch trincken/ weder handlen noch wan-
deln solten/ darumb/ er war ein Zöllner/ vnd ein
solcher Mensch/ so dem vngleubigē Heydnischen
Römischen Keyser/ einer frembden Obrigkeit/
vom volck GOTTES den Zol eyngebracht hat.
Darumb auch/ daß solche Gesellen (vil vnder
ihne) nit weniger sonder nur mehr Zol fordern/
begeren vnd eynnemen/ dann ihnen beuolhen/
dann Göttlich/billich vñ recht ist/ auff daß/ wann
sie vom Zoll abgeschafft werden/ eigne Heuser
kauffen vnd noch grössere Bucherer vñ Schin-
der werden könden/ Davon mehrmaln die Ob-
rizkeit nit vil weißt/ aber die armen Brüdertö-
nen/ so zu fuß/ Ross oder gefaren für solche Zöl-
heuser reisen müssen/ erfarens mehrmaln nit
zu vil/ wie man dann in gemeinem Sprichwort
sagt: Es muß ein schlechtes ämptlin seyn/ (do
man solchs mißbrauchen wil) das nit heckens
werth ist/ wie dann zu zeiten/ wann die Herren
ihre augen ein mal recht auffthund/ vnd die
Schinderen ihrer Zöllner vnd anderer derglei-
chen Gesellen merken/ ihnen ein anders Zöl-
haus gebawet wirdt/ alda der Wind die glocken
jekund hin/ bald hieher wehet.

Als der Herr Mattheum gesehen/ vnd gewist
 daß er auch nach gemeiner art der Zölner (doch
 findet man wol zu zeiten auch frumme Zölner)
 ein Sünder vnd Schinder sey/ künde vnd möge
 doch also in disen Sünden vnd Schinderey nit
 Selig werdē/ sprach er zu ihme: Folge mir
 nach/ vnd stehe ab von diser Schinderey/
 Dann also kanstu nit selig werden. Wie mu-
 ste dann Mattheus Christo dem Herren nach-
 uolgē? Erstlich must er vom Zol auffstehn/ das
 selbig Ampt vbergeben/ nit mehr am Zol sitzen/
 keinen Zol mehr weder eynnehmen noch verrech-
 nen/ niemands mehr mit dem Zol vbernehmen/
 nichts vnbillichs mehr weder durch liegen noch
 betriegen eynnehmen. Zum andern must er/ wie
 Zacheus/ alles vnbillichs bekommen Gelt auff
 dem Zol vnd sonsten widerumb erstatten den je-
 nigē welchen er solchs wider billigkeit abgenom-
 men hat/ oder sonsten Armen leuten geben/ vnd
 kein frembdes Gut behalten. Zum dritten solte
 er ihme mit den füßen vnd ganken leib hin vnd
 wider im Jüdischen vnd Galileischen land nach-
 volgen/ sein Jünger vnd Apostel werden. Wie
 sich nun gemelter Mattheus hierinnen verhal-
 ten/ wöllen wir im andern Theil diser Predig
 lehren vnd hören.

Auß diser berufung Matthei lernē wir Chri-
 sten die grossen ja höchstē Barmherzigkeit Chri-
 sti IESU vnseres Heilands/ so er zu Mattheo ge-
 habt/ auff daß er nit verdampft sonder Selig
 würde. Der gute Mattheus stecket albereit so
 tieff/ ja bis vber die ohren/ in der Sünd/ hieltē

Der Herr
 Christus zu
 allen Sün-
 dern.

Wie Mat-
 theus Chri-
 sto nachvol-
 gen must.

Grosse
 Barmher-
 zigkeit Chri-
 sti gegen al-
 len Sün-
 dern.

a A 3 Sünd

Ezech. 18. 33.

Sünd nit mehr für Sünd/vermeynt nit daß er ein Sünder were noch also verdampft würde/ sündiget vnd schindet derhalben immer wie lang er je mehr/ wie mehr je hefftiger/ were auch also in seiner Sünd vnd Wucher gestorben vnd verdorben. Christus aber vnser lieber Herr/welcher nit begert den tod des Sünders/sonder daß er sich bekere vnd habe das Ewig leben/der ruffet ihne zu sich/ er solle Puff thun/ frumb vnd volgends selig werden/ welchs ja die höchste gütigkeit vnd Barmherzigkeit Christi seyn muß.

Alle Sünd
will Chri-
stus gern
auffnehmen.

Es soll aber euwer andacht nit vermeynen/ daß er Christus/nur Mattheum also von seiner Sünd zur frumbkeit/vom Zol zur Puff/von der Verdammuß zur Seligkeit beruffen habe/ Daß er allein Mattheum so lieb gehabt vnd so willig zur Puff vnd zu einem Erben der Seligkeit auffgenommen habe. Nein. Wie er sich auff heutt Mattheo erzeigt hat/ also wirdt er sich auch gegen allen Sündern auff der gansen Welt/ so vor vnd nach Mattheo gelebt haben/ verhalten/ so ferr sie auch ihme mit Mattheo nachvolgen. Welchs ja einem jeden leichtlich auß disen worten Christi zu lernen ist/ do er im heuttigen Euangelio zu den Phariseern also sagt: Dann ich bin nit kommen zu beruffen die Gerechten/ sonder die Sünder zur Puff. Darauff ja zu lernen/ sprich ich/ daß er Christus nit kommen nur wegen eines Sünders/als des Matthei/ sonder wegen aller Sünder/ so je gelebt/ noch leben/ vnd bis zum Jüngsten tag leben werden.

werden. Alle Sünder hat er beruffen/berufft sie
 noch/wirdt sie biß zum Jüngsten tag beruffen:
 alle Sünder will er gern an vnd auffnehmen/
 allen Sündern will er gern (wann sie nur selb-
 sten wollen) alle ihre Sünd verzeihen/nit mehr
 gedencen/vnd das Ewig leben schencken. Zu al-
 len Sündern/ ja zu allen Menschen auff Er-
 den/spricht Christus der Herr: Kompt her zu Matth. 11.
 mir alle die ihr beladen vnd (mit sünden auch
 anderer trübseligkeit) beschweret sendt/ ich wil
 euch erquickten. Keret euch zu mir/ so würde ich Malach. 3.
 zu euch gekert werden. Des Menschen Sohn Luc. 19.
 ist kommen zu suchen vnd selig machen/ das/ so
 verloren war. Wo sich der vngerecht von allen Ezech. 18.
 seinen sünden bekert vnd thut Puff die er began-
 gen hat/ so will ich aller seiner vngerechtigkeit
 nit mehr gedencen. So wahr ich lebe/spricht der Ezech. 33.
 Herre GOTT/ so wahr habe ich keinen wolge-
 fallen an des Gottlosen tod/ sonder daß sich der
 Gottlose von seinem wege bekere/thue Puff/ vñ
 lebe. Wann sich/spricht GOTT der Allmechtig/ Jere. 18.
 diß Volck bekeret von seiner Bosheit vnd thut
 Puff/ so will ich auch New haben vber das Un-
 glück das ich ihnen gedacht zu thun. Waschet Esa. 1.
 euch/reiniget euch/ thut euwere böse gedancken
 von meinen augen/ lasset abe vbels zu thun/ ler-
 net gutes thun ic. Wann euwere Sünd gleich
 blutrot weren/ sollen sie doch Schneeweiß wer-
 den: vnd wann sie gleich Rosinfarb weren/sollen
 sie doch wie wille weiß werden ic.

Diser vnd dergleichen Götliche vñ herrliche
 verheissungen GOTTES/habē wir gar vil im alten

a 4 vnd

vnd neuwen Testament/ darinnen er allen vnd jeden Sündern mit außdrucklichen Worten versprochen/ sie/ nit weniger als Mattheum/ zu welcher zeit vnd stund sie wollen/ zur Puff vnd Seligkeit auffzunehmen/ welchs ja ein vnaußsprechliche Liebe vnd höchste Barmherzigkeit GOTTES gegen vns armen Sündern seyn muß. Dann da GOTT nit nach seiner Barmherzigkeit/ sonder iñner/ wie wir dann verschulden/ nach seiner Gerechtigkeit/ nach erforschung vnser Sünden/ sich gegen vns verhalten wolt/ hilff lieber GOTT hilff/ wie wurden wir Menschen alle also vbel bestehn/ kaum der zehende Mensch wurde Selig werden/ ja vnder hundert nit zween oder drey/ vnd beuor auß jegund zu diser zeit/ alda der Teufel gar ledig/ vnd sich niemands mehr zu sündigen schamet noch fürchtet/ wie leider vor augen vnd der ganken Welt bewust/ in was/ wie vil vnd welcherley Sündschand vñ laster die Geistlichen vnd Weltlichen/ Obrigkeit vnd Vnderthonen/ Edel vnd Vnedel/ Fraw vnd Mann/ jung vnd alte diser zeit biß vber die ohren stecken/ mehrmalt darinnen sterben vnd verderbē. Diser ist mit Mattheo ein Zolner. Ein anderer mit Zacheo ein Bucherer. Der dritte mit Juda ein Dieb/ mit Gesma ein Mörder/ mit Dauid ein Ehbrecher vnd Todtschleger/ mit Petro ein verleugner Christi/ mit Magdalena ein vnkeuscher/ mit andern ein anderer Sünder: vnd als nit zu zweifeln/ seynd diser zeit vil vil leut/ so doch gute Christen vnd zwar etwan Catholische Christen seyn

Gott hand-
let mit vns
nach seiner
Barmher-
zigkeit.

Sündige
Welt diser
zeit.

Nächerley
Sünd vnd
Sünder.

seyen wollen/zu finden/so etwann grössere vnd zehen mal grössere Sünder seyend/ dan eben Mattheus/ Zacheus/vñ andere obgemelte/derhalben ihnē auch nit weniger als den jenigē ein Barmherziger GOTT vnd Gnediger Vatter von nöten ist.

Allen ist ein Barmherziger Gott von nöten.

Nun ist es aber zur verzeihung der Sünden vnd erlangung des Ewigen lebens nit gnug/ das wir wissen/ Das wir Sünder seyend: ist auch nit gnug/ das wir wissen/ Das GOTT vns allen zur Pusz ruffet/ das er vns gern an vnd auffnehmen/ vnser Sünd verzeihen/ vnd selig machen wil: Sonder wir müssen auch von Mattheo lernen/ wie wir vns in der Sünd vnd solcher beruffung GOTTEs verhalte sollen. Wöllen derhalben jekund von der Person Matthei handeln/vnd sehen/was wir von ihme zu lernen haben.

Wie sich Mattheus der Zölner auff die beruffung Christi/ so zu ihme geschehen/ verhalten habe/ bezeugt er von sich selbst also: Vnd er stundte auff/ vnd volgete ihme. Gleich wie diser Mattheus erstlich ein grosser Sünder/vñ im stand des zeitlichen ja vil mehr des Ewigen verderbens gewesen ist/also ist er bald hernach ein fürtreffentlicher Puffer vnd ein kind der Ewigen Seligkeit worden/Darumb/Er ist dem Herren auff sein begeren nachgeuolget/ vnd zwar also/ wie recht vnd von nöten gewesen ist.

Er ist ihme nachgeuolget mit dem Leib/ Gut/
a A s Gemüt/

Wie Mat-
theus Chri-
sto nachge-
volget.

Mar. 2.
Luc. 5.

Sich fröh-
der Sünd
theilhaftig
machen.

Von S.
Mattheo.

Gemüt/ Mund/ Herzen/ Worten vnd Wer-
cken. Erstlich ist er auffgestanden/ nemlich vom
Zol/ von der Sünd/ hat das Zolampt vbergebē/
zu Sündigen vnd Schinden auffgehört/ die leut
nit mehr weder betrogē noch vbernommen/ sich
als einen Sünder vnd betrieglichen Zolner er-
kennt/ von der Sünd abgestanden/ Rew vñ leid
darüber gehabt so vil von nöten vnd ihme mög-
lich war/ welchs leichtlich auß deme zu lernen:
Das er domaln/ als Marcus vnd Lucas bezeugen/
in seinem hauß dem Herren ein Malzeit hat
bereiten lassen/ dazu er auch andere Sünder vnd
Zolner geladen/ ohne zweifel darumb/ daß auch
sie nach seinem Exempel von der Sünd abstehn
vnd frumb werden solten.

Es ist auch nit zu zweifeln/ sonder zu glauben:
Das Mattheus/ wie Zacheus/ das vnbillich be-
kommen Gelt vnd Gut alles widerumb geben/
vnd nichts behalten/ dann nur was billich sein
gewesen ist: sonsten were ihme die Sünd nit al-
lein nit verziehen worden/ sonder Christus der
Herr hette auch mit ihme die Malzeit vom fröh-
den Gut nit eyngenommen/ Dann wer sich wis-
siglich frembdes vnd vnbillichs Guts theilhaff-
tig machet/ der wirdt auch derselbigen Sünd
theilhafftig. So ist solchs auch hierauf leicht-
lich abzunehmen/ daß er (fürs dritte) alles/
hauß vnd hof vnd was er gehabt/ verlassen/ vnd
Christo nachgevolget ist im land Galilea/ Ju-
dea/ vnd nach seiner/ nemlich Christi Himmel-
fart in Echiopiam/ alda er das Euangelium
Christi drey vnd dreissig Jar geprediget/ den
König

König Egyptum/auch die Königin sampt dem ganken Land/zu Christo bekeret: bauwet vil kyrchen/ordiniert vil Priester vnd Diacon/weyhet auch des Königs Tochter Iphigeniam Christo zu einer Junckfrawen. Da aber der König starb/regiret Hirtacus an seiner statt/vnd begeret Iphigeniam zum Weib/zu welchem der H. Apostel öffentlich sprach: Er künde ihme ein Braut die Christo vermehlet were/nit vereblichen. Darumb/als er Mess gehalten/vñ am Altar mit außgestreckten Armen bettet/ließ ihn derselbig König hinderwerts erstechen/vnd ist der H. Mattheus also ritterlich vñ Christlich gestorben vnd Selig worden.

Wollen wir Christē vns nun den erstē Theil diser Predig zu nutz machen vnd geniessen/Daß GOTT noch auff den heutigen tag/vns vnd allen Sündern ihre Sünd zu verzeihen/nit weniger als dem heutigen Mattheo geneigt seye/so müssen wir auch in disem andern Theil mercken/ behalten vnd in das werck richten/das jenig/so er Mattheus auff die beruffung für die hand genommen/gern vnd gutwillig/vnd so vil von nöten/ins werck gerichtet hat.

Erstlich müssen alle Sünder Christo volgen/Sünder sol-
 seitmaln alle/wie droben gehört/von vnd zu ih-len Christo
 me beruffen seynd/vnd noch täglich berufft wer-folgen.
 den durch inwendige eyngebung des H. Geistes/
 durch die H. Schrift / durch die Catholischen
 Prediger. Müssen aber anfenglich also nach-Von der
 volgen: Daß sie auch/wie Mattheus/von der Sünd ab-
 Sünd auffstehn vñ dieselben gantzlich verlassen/stehn.
 nit

nit heut/morgen/einen andern tag oder Jar
eben dieselbige oder ein andere Sünd widerumb
begehn wollen/wie man zu zeiten leut findet/die
auch Püssen/Beichten vnd zum heiligen Sa-
crament des Altars gehn/wollen aber doch von
ihren Sünden so sie geübt/vnd auch (ihres er-
achtens) gebeicht haben/nit abstehn/sonder als
bald nach der Beicht vnd niessung des H. Sa-
craments widerumb in die altē fußstapffen tret-
ten/vnd nit weniger als zu vor sündigen. Dises
nachuolgen ist nichts nutz/dise Pusz ist vmb son-
sten/dise Beicht ist vergebens/also wirdt das H.
Sacrament vnwürdig vnd zur verderbung emp-
fangen. Ein solcher Mensch/oder Mundchriß/
betriegt nit weder GOTT noch den Priester/
wie er fälschlich vermeynt/sonder sich selbst.
Der Priester kan ihme in sein falsches vnd be-
trüglichs Herz nit sehen/er vrtheilet ihne nach
seinen worten/vermeynt vnd weißt nit anderst
dann ihme seye also wie er gebeichtet hat. Dann
der Priester ist nit GOTT/sonder ein Mensch/
vnd erkennet nit das Herz vnd gedanken der
Menschen: wie ihme der Sünder Beichtet/also
spricht er ihme die Absolution. GOTT aber der
höret nit allein die Beicht/sonder weißt auch
das Herz vnd fürnemen des Sünders/der
wirdt ihme widergelten nach deme er würdig ist.
Es were ja Mattheo sein nachuolung Chri-
sto dem Herren nichts nutz gewesen/wann er
von seinem Zolampt/Finantz/liegen/betriegem
vnd Wucher nit hett wollen abstehn. Nichts
hette Petrum vnd Magdalenam ihr bitterlichs
weinen

Vergebens-
lichs nach-
uolgen.

Priester
seynd nit
Gott.

Gott ist alle
ding bewusst.

weinen geholfen noch zur Seligkeit genuket/
wann sie noch forthin Christum verleugnē vnd
vnzucht hetten treiben wöllen. Warumb wolt
man einem Dieb sein leben fristen vnd des Gal-
gens entlassen/ der mit dem Mund bekennet er
habe rew vnd leid vber seine Sünd/ aber doch
wölle er forthin zu stelen nit ablassen? Ein solche
Obrikeit wurd nit Barmherzig sonder ein vr-
sach ferners Diebstals vñ verderbens viler leut
seyn. Vnd gründlich dauon zu reden/ so ist ein
solche Puff/ do jemāds von der Sünd abgestehn
nit bedacht ist/ kein Puff/ ein solche Rew vnd
Beicht ist kein Rew noch Beicht. Der halben so
muß erstlich vnd vor allendingen der Sünder
auffstehn von der Sünd/ dieselbige verlassen/ wi-
derumb zu begehn nit bedacht seyn/ alle Sünde
meiden vnd als den Teufel selbstē fliehē: frumb
werden/ vnd/ so vil menschlich vnd möglich ist/
frumb/ Gottsförchtig/ andechtig bleibē: GOTT
forthin mit allerley Gottesdienst/ guten vban-
gen/ guten Wercken/ würdigen Früchten der
Puff gern vnd willig dienen.

Fürs ander/ Wann nun der Sünder von al-
len Sünden abgestehn eigentlich entschlossen/ Matt. 16. 18.
solche GOTT vnd dem Priester/ welchem Chri- Joan. 20.
stus die Sünden zu binden vnd lösen gewalt ge-
ben/ mündlich vnd außtruckentlich/ vnd so vil
möglich vollkommenlich gebeichtet hat/ muß er Dabillichs
bedacht seyn vnd ohne verzug ins werck richten/ Gut muß
nemlich/ widerumb zu geben alles das jenig Gelt man wider-
vnd Gut (so vil in seinem vermögen) so er mit lie- um geben.
gen/ betriegen/ Bucher/ Stelen/ rauben/ vnbil-
lich

lich kauffen/ verkauffen/ böse erbschafft/ oder
sonsten nit mit GOTT noch mit ehren bekommen
hat: vnd wie lang solchs nit geschicht/ noch zu
geschehen eigentlich entschlossen ist/ vnd doch
noch dasselbig oder so vil vorhanden/ist die nach-
uolgun/ die Pusz/ Reu vnd Beicht vmb son-
sten vnd vergebens. Es ist nit gnug/ nit mehr ste-
len wollen/ wo man den Diebstal/ so noch vor-
handen/ nit widerumb geben will. Dis hat auch
der Iud Zacheus wol gewist/ welcher nit ein ge-
ringer Bucherer vnd Betrieger gewesen ist/
derhalben saget er zu Christo: Sihe Herr/ den
halben theil meiner Güter gibe ich den Armen/
vñ so ich jemand betrogen hab/ das gebe ich vier-
feltig wider. Derhalbē sprach IESVS zu ihme:
Heut ist diesem Haus heil widerfahren zc. Wann
von der Obrigkeit nit gestraffet/ vñ von GOTT
gut geheissen vnd also verziehen wurde/ nemlich
nit mehr Stelen/ aber doch den Diebstal behal-
ten/ hilff lieber GOTT hilff/ wie wurde den Ar-
men so vbel gehn. Die starcken vñ Reichen wur-
den in einem Monat oder Jar so vil stelen/ rau-
ben/ vnd sonsten durch list vnd gewalt zu wegen
bringen/ das sie die tag ihres lebens gnug betten/
wolten nun dasselbig behalten/ vnd nit mehr ste-
len noch rauben. Nein/ dis ist nit weder billich/
Rechtlich noch Göttlich. Es soll auch kein Bu-
cherer/ noch ein anderer so frembdes vnd vnbil-
lich bekommens Gut hat/ nit Absolutert werden/
ob er gleich dieselbige Sünd beichtet/ so lang/
wie lang er nit verspricht/ dasselbig alles/ oder
so vil in seinem vermögen/ widerumb erstatten
den

Luc. 19.

Zacheus ein
rechter Pusz-
ser.

Welche nit
sollen Absol-
utert werde.

Rechtlich noch Göttlich. Es soll auch kein Bu-
cherer/ noch ein anderer so frembdes vnd vnbil-
lich bekommens Gut hat/ nit Absolutert werden/
ob er gleich dieselbige Sünd beichtet/ so lang/
wie lang er nit verspricht/ dasselbig alles/ oder
so vil in seinem vermögen/ widerumb erstatten
den

den jenigen/ eintweder welchen er solchs vnbillich abgenommen/ oder ihren freunden/ oder/ do solchs nit geschehen könnte/ den Armen/ dem Gottesdienst/ oder dergleichen wol angelegten Personen oder örter dem Gottesdienst zu gutem vermennt. Vnd do jemandts seiner Seel gerathen vñ den sichersten wege gehn wil/ der gebe selbster in seinem leben solchs vnbillich Gut widerumb/ schiebe es nit auff seine Erben. Dann wir sehen wol wie die Erben mehrmaln solchem beuelch nachkommen/ wann sie nur vil Erbtheil bekommen möchten/ es hette die Seel gleich GOTT oder der Teufel/ darnach fragen sie gar wenig. Vnd diß fürs ander Pünctlin.

Ob aber/ fürs dritte/ ein Sünder/ vnd vol. **Frag.**
 gentz alle Menschen/ so mit Mattheo begeren Selig zu werden/ auch mit ihme alles was sie haben/ hauß vnd hof/ Vatter vnd Mutter/ Brüder vnd Schwester/ Belt vnd Gut/ Wissen vnd äcker verlassen/ Christo nachfolgen/ sich eintweder in einen Geistlichen Stand/ in ein Kloster/ in ein Wüste begeben/ oder sonsten seinen Namen zu bekennen im land hin vnd her ziehen müssen/ oder ob sie alles was sie billich haben behalten/ bey hauß vnd hof/ Weib vnd Kind bleiben/ vnd dennocht selig werden mögen/ ist diß die antwort: Sich in ein Kloster begeben/ der gestalt **Antwort.**
 alles verlassen/ ein Mönch oder Klosterfray werden/ die tag seines lebens wollen in der Wü. **Klosterlebe**
 ste hinbringen/ ist von GOTT/ niemandts we. **jedermann**
 der gebotten noch verbotten: einem jeden ste. **(vor dem**
 het es frey/ solchs anzenemmen oder zelassen. **Gelübde)**
 frey.
 Doch

Klosterleut
haben weni-
ger vrsach
zu sündigen/
aber mehr
gelegenheit
Gott zu die-
nen.

1. Cor. 7.

Die Luthere-
rischen be-
sen dem H.
Paulo diß
nächst auff.

Doch ist diß ein mal vnd alle mal gewiß: Daß die jenigen so also der Welt das Gelt/ vnd alles Gut lassen/ sich in ein Kloster begeben/ weniger gelegenheit vnd vrsach haben zu sündigen/ dann die jenigen so in der Welt leben: Sie haben auch zeit vnd weil/ gelegenheit vñ vrsach/ GOTT/ mit betten/ fasten/ wachen vnd dergleichen Christlichen vñbungen/ zu dienen/ vnd ihnen desto ein höhere kron droben im Himmel zu verdienen/ dann die jenigen so in der Welt leben/ mit zeitlichen vnd Weltlichen geschafften/ mit Weib/ Kind vnd gesind/ mühe/ arbeit/ geiß vñ Sorge beladen seynd. Wie dann der H. Paulus hieruon auch also gelehrt hat: Ich wolte gern daß ihr ohne sorg weret. Wer ohn Ehe ist/ der sorget was dem Herren angehört/ wie er dem Herren gefalle. Wer aber freyet/ der sorget was die Welt angehört/ wie er dem Weibe gefalle/ vnd ist zertheilet. Ein ledig Weib vnd ein Junckfraw/ die sorget was dem Herren angehört/ daß sie seye heilig am Leib vñ auch am Geißt: Die aber freyet/ die sorget was die Welt angehört/ vnd wie sie dem Mann gefalle. Bissher Paulus/ vnd am selbigen ort dergleichen noch mehr.

Nit/ daß jederman alles verlassen vnd sich in ein Kloster begeben müsse/ vnd sonst nit könne weder GOTT dienen noch selig werden. Nem. Man kan alles billichs behalten/ bey hauß vnd hof bleiben/ vnd dennoch GOTT dienen vnd Selig werden: aber doch/ wie gemeldet/ nit so füglich/ wie dann alle die jenigen so in der Welt seynd/ selbst bekennen müssen. Zu deme allem müssen

müssen sich die jenigen/ so alles behalten vnd behauß vnd hof bleiben wollen/ sich diser Regel des H. Pauli gemess verhalten: Weiter ist diß die Ibdem. meynung/ daß die so da Weiber haben/ seyen als hetten sie keine: vnd die da weinen/ als weinen sie nit: vnd die sich freuwen/ als freuwend. H. Pauli/ alle Menschen betreffend. ten sie sich nit: vnd die da kauffen/ als besitzen sie es nit: vnd die diser Welt brauchen/ als brauchen sie ihr nit. 2c. Daß ist: Ein jeder soll sein haab vnd Gut/ so ihme GOTT geben/recht gebrauchen/nit mißbrauchen/vil weniger das Gelt lassen seinen Herren werden/auff daß er nit das Gelt vnd Gut lieber habe dann GOTT/vnd also das Gelt/ vnd was er hat/ seiner verdammung ein vrsach seye. Vnd diß seye auch vom dritten Punctlin gnug gesagt/Wie man alles verlassen/ oder nit verlassen soll.

Behalten wir derhalben auß diser Predig: **Beschluß.**
 Erstlich/ Daß Christus der Herr nit allein Mattheum den Zolner oder Publicanen beruffen/ sonder auch alle andere Sünder auff den heiligen tag vnd jeder zeit. Daß er nit allein Mattheum zum Püßer gern auffgenommen/ sonder auch alle Sünder jeder zeit. Daß er nit allein Mattheo alle Sünd gern verzeihen/ sonder auch allen püßenden Sündern jeder zeit. Zum andern: Daß auch wir Sünder mit ihme/ Mattheo/ Christo dem Herren nachuolgen/ von allen Sünden abstehn/ die Sünden bekennen/ alles vnbillichs bekommen Gut widerumb geben/ alles im Werck verlassen/ oder doch also besitzen/ als besessen wir nichts/ auff daß wir vom zeitlichen
 b B chen

chen zum Ewigen nit verhindert vnd also selig
werden/ Amen.

Gebetlin
zu Christo.

Al Bermal sehen vnd bekennen wir/ O
Herr IES V Christ/ wahr seyn das
jenig so du durch den Propheten vom
Vatter/ dir/ vnd dem heiligen Geiſt hast
verkündigen lassen: So wahr ich lebe/ so
wahr hab ich kein wolgefallē an des Gott-
losen tod/ sonder das sich der Gottlose von
seinem wege bekere / thue Puff/ vnd lebe.
Dann du je nit hast sehen noch leiden mö-
gen/ das Mattheus ein Zolner solle sterbe/
vñ also immer auch Ewig verderben/ son-
der gesagt hast zu ihme: Folge mir nach.
O Herr vñ Heiland/ der du auch noch auff
den heutigen tag vñ jeder zeit alle Sünder
zu dir rießest/ vnd gern/ wann sie nur selbst
wollen/ selig machen wilt/ verleihe vns
armen Sündern verstand vñ Gnad/ das
wir dir mit Mattheo nachuolgen/ von al-
len Sünden abstehn/ alles vnbillichs Gut
widerumb geben/ vnd das ander alles also
verlassen oder gebrauchen mögen/ das vns
in die Ewige Seligkeit zu kommen nichts
verhindere/ sonder/ so bald sich Leib vnd
Seel scheiden/ wir mit Mat-
theo Selig werden mö-
gen/ Amen.

Am

Am tag des H. Martyrers Mau-
ricij/ zum Theil im Costenser Bi-
stumb feyerlich.

Am 22. tag
Septemb.

Auff heut ist der Geyurts oder
Marter tag der heiligen berümp-
ten Thebayschen Ritter vnd Mar-
tyrer Mauricij/ Exuperij/ Candi-
di/ Constantij/ Victoris/ Inno-
centij/ vnd Vitalis/ sampt ihren gesellen vnd
Kriegsheer/ deren ein ganze Legion/ das ist/ bey
6666/ waren. S. Mauricius der Oberste/ zoge
mit obgenanten Hauptleuten vnd dem ganken
Kriegsheer zu den Römischen Keysern Dio-
cleriano vnd Maximiano/ die sie auffgefördert
hatten/ vnd gebrauchen wolten wider die Fran-
kosen/ als des Römischen Reichs widerwertig-
en. Do aber das gank Keyserlich Heer vber
das Geyrig gen Octodurum kame/ wolt Maxi-
mianus/ daß all sein Kriegsuoelck den Abgöt-
tern opfferte: des widerten sich die Christlichen
Thebeer/ ruckten darumb von dem Römischen
Heer biß an den fluß Rhodan/ auff einen lu-
stigen plak/ Auganum genant/ empoten dem
Keyser: Sie weren wol des Römischen
Reichs vnderthonen/ wolten sich auch zu des-
selben Defention vnd beschükung gern gebrau-
chen lassen/ wann sie mit dem Teufeldienst
nichts zu schaffen dörrften haben/ Dann sie
seynd alle sampt Christen. Maximianus ward
erzürnet/ ließ zum andern mal allweg den zehen-
den Mann auß ihnen tödten/ zum schrecken der
b 2 andern.

Anno Do-
mini 288.

386 Am tag des H. Martyrers Mauricii.

andern. Die waren von S. Mauricio ihrem
Obersten zur Marter gestreckt / vnd dem Keyser
wider zu emporen: Sie wolten lieber getödt wer-
den / dan tödten / auch lieber vnschuldiglich ster-
ben / dann schuldiglich leben zc. Warffen dar-
über die Waffen hinweg / knieten allenthalben
vnd bitteten / welche der Hauptmann Exuperi-
us mit einer herrlichen red zu leiden ermann. Da
wurden sie mit dem Keyserischen Heer vmbge-
ben / von demselben jämmerlich ermordt / vnd von
den Pferden zertrept. Auß disen seynd etlich ent-
rinnen / die an andern orten gepredigt haben /
vnd gemartert seynd worden / als nemlich So-
lutor / Auentor vnd Decianus zu Turin in Ita-
liend / Alexander zu Bergamo / Secundus zu
Viminilio / Constantius / Victor / vnd Ve-
sus zc. Die Christen haben obgemelte Marti-
rer daselbst begraben / vñ nach vilen Jaren seynd
sie dem Bischoff Theodoro geoffenbaret / vnd
ist ein Kirch in ihrem Namen darben gebawet.
Der leib aber des obgemelte Innocentij ist dar-
nach / sampt dem haupt S. Vitalis / durch den
H. Bischoff Annonem gen Siberg in Colner
Bistumb geführt worden.

E Vangelium vñ Predig wie Geor-
gi / Marci / Laurentij / Stephani /
Bekering Pauli / oder anderer H.
Marterer.

Am

Am tag des H. Bischoues vnd 387

Martyrers Emerami/ zum theil zu
Regenspurg feyerlich.

Am 22. tag
Septemb.

Auff heut haltet mā auch Fey-
ertag zu Regenspurg des H. Bi-
schoues vñ Martyrers Emeram-
mi/ (den man S. Hanmerā neñt)
von Aquitania geporē. Wandelte
von Jugend auff dem wege des Herren/ hasset
die Welt mit ihrer lustbarkeit/ vbet sich in der
H. Schrift vnd guten Künsten/ prediget in
Francreich das Euangelium Christi/ zoge dar-
nach ins Teutschland/ kam gen Regenspurg/
(zur zeit da Herkog Theoto das Beyerland vnd
die stadt Regēspurg regiret) vnderwise die Neu-
wen Christen/ zoge im land herumb/ vnd predi-
get. Was er von den Glaubigen empfieng/ das
gab er den Armen. Wolt darnach gen Rom zie-
hen/ der H. Apostel Petri vnd Pauli Gräber zu
besuchen: legert sich bey dem Flecken Helffen-
dorff zu einem Brunnen/ vñ bettet: da eylet ihm
der Herkog Lambertus nach/ (dessen Schwe-
ster auff disen Heiligen bekennet hett/ als solt er
sie geschwengert haben) ließ ihm alle seine glider
abhaunen: verschid auff einem grünen wasen
mit einem klaren glanz vmbgeben/ ward zu
Aheim in S. Peters kyrchen begraben/ vnd
darnach gen Regenspurg in S. Georgē kyrchen
geführt/ ruhet noch heutigis tags in dem Kloster/
zu S. Hanmeran genant.

Euangelium vñ Predig wie hievor
von S. Mauritio vermeldet.

b B 3

Am

388 Am Feiertag des H. Erhengels
Michaelis / Euangelium
Matth. xviii.

Am 29. tag
Septemb.



Mar. 9. d
Luc. 9. c

In der zeit trattē die Jün-
ger zu IESV/ vñ sprachē:
Wer ist doch der grössēst
im Himmelreich? Vnd
IESVS rieff einem kind
zu ihm/ vñ stellet das mit-
ten vnder sie/ vñ sprach: Wahrlich sag ich
euch/ es sey dan̄ das̄ ihr euch vmbkeret/ vnd
werdet wie die kinder/ so werdet ihr nit ins
Himmelreich kommen. Wer sich nun selbs
nidriget/ wie diß kind/ der ist der grössēst im
Himmelreich. Vnd wer ein solch kind auff-
nimpt in meinem namen/ der nimpt mich
auff. Wer aber einen ergert auß disen klei-
nen/

1. Pet. 2. a
Mar. 9. f
Luc. 17. a

nen/die an mich glauben/ dem were besser/
daß ihm ein mühlstein an seinen halß gehan-
gen würde/ vnd daß er ertrenck et würde im
Meer/da es am tieffsten ist. Wee der Welt Luc. 17. b
der ergernuß halben. Dann es muß ja er- 1. Cor. 11. b
gernuß kommen / doch wee dem Men-
schen/durch welchen ergernuß kompt. So
aber dein hand oder dein fuß dich ergert/so Matth. 5. d
hawe ihn ab/ vnd wirff ihn von dir. Es ist Mar. 9. c
dir besser/ daß du zum leben lam oder krü-
pel eynghehest/ dann daß du zwo hend oder
zween füß habest/ vnd werdest in das ewig
fewr geworffen. Vnd so dich dein aug er-
gert/ reiß es auß/ vnd wirffs von dir. Es ist
dir besser/ daß du einäugig zum leben eyn-
gehest/ dann daß du zwey augē habest/ vnd
werdest in das Helligsch fewr geworffen.
Sehet zu/ daß ihr nit verachtet jemād von
disen kleinen. Dann ich sag euch/ ihre En- Luc. 19. b
gel sehē allzeit das angesicht meines Vat-
ters/ der in den Himmeln ist.

Wer sich nun selbst nidriget wie diß kind/
der ist der grössert im Himmelreich.

Matth. xviii.

Jeweil wir Catholische Chris-
ten (ihr geliebten in GOTT)
durch das ganze Jar / vnd eben
auff disen heutigen tag / ein vnd
nur ein Fest vnd Feyertag halten

b 4 von

vonden heiligen Engeln GOTTES/möchte auff
 heut in vorhabender Predig nit vnfüglich von
 denselbigen/von ihrer Erschaffung/Ampt/thun
 vnd lassen/ Ob sie auch vns dienen/für vns dro-
 ben im Himmel GOTT den Allmechtigen bit-
 ten/ Ob wir auch sie zu GOTT als vnserer Für-
 sprech bitten vnd anruffen mögen/ vnd vnder-
 gleichen Puncten vnd Stücken handeln: weil
 wir aber bishero (in diser kleinen Postill) solche
 vnd dergleichen Materien/ immer bis zu seiner
 zeit auffgeschoben/ vnd etwas näheters bey dem
 Text jeder Euangelien gebliben/wollen wir auch
 auff heut vnser weiß vnd fürnehmen nit vber-
 schreiten/sonder jekund auch/wie bishero besche-
 hen/verhalten.

Inhalt diß
 heutigen
 Euangellij.

Diß jekund verlesens Euangelium auff diß
 heilig Fest des Erzengels Michaelis vnd aller
 Engel GOTTES/haltet in sich ein Gespräch
 zwischen den Jüngern vnd Christo ihrem Her-
 ren. Die Frag der Jünger ist: Welcher der größte
 seyn werde in seinem Reich? Die antwort des
 Herren ist: Die jenigen/ so sich am allermeisten
 demütigen vñ niemands kein Ergernuß geben.

Inhalt vnd
 Theilung
 diser Pre-
 digt.

Von disen beiden wölle wir heut etwas weit-
 leuffigers handeln nach den zweyen Theilen vor-
 habender Predig. Im ersten: Von der Demü-
 tigkeit/ die wir haben müssen/ wann wir wollen
 Selig werden. Im andern: Von der Ergern-
 nuß/welche wir meiden müssen/ auff daß wir nit
 zeitlich vnd Ewig gestrafft werden. Welches al-
 les ihr mit gedult anhören wölt/ so wil auch ich
 euch solchs gutwillig auff das leichtest vnd für-
 best

fürkest fürhalten. GOTT wölle mir vnd euch
hierzü seinen Göttlichen Segen verleihen zc.

Das die Jünger des Herren/ ehe
das sie den heiligen Geist empfangen/
noch vnuerstendig/ gleich andern Men-
schen mißgünstig vnd Ehrgeizig gewesen seyen/
haben wir diß Jar abe der Cankel mehrmaln
gehört/ vnd fürnemlich am Fest oder Feyertag
des heiligen Apostels Jacobi/ aldo gehört: Das
die zehen Jünger gezürnt haben vber die zween
Brüder/ Jacobum vnd Joannem den Euan-
gelisten/ darumb/ das sie ihr Mutter vnderrich-
tet/ für sie bey Christo anhalten/ das der eine
zu seiner rechten/ der ander zur lincken in seinem
Reich sitzen möchte. Darnach an Sanct Bar-
tholomei tag: Das sich die Jünger am letzten
Abendmal vndereinander gezanckt haben/ wel-
cher vnder ihnen der größte seyn solt. Also auch
auff heut/ als Christus den Zol für sich vnd für
Perrum den obersten vnder den Aposteln bezalt
hette/ besorgete abermal die anderen Jünger/ Pe-
trus wurde der fürnemste Apostel vnd der größ-
est vnder ihnen im Reich Christi seyn. Auff das
sie derhalben doch (als sie vermeynten) ein mal
gewiß erfahren möchte/ wer der fürnemste vnder
ihnen seye/ Tratten sie zu IESV/ vnd spra-
chen: Wer ist doch der größte im Himmel-
reich? Vnd IESVS rieß ein kind zu sich/
vnd stellet das mitten vnder sie/ vñ sprach:
Warlich sage ich euch/ Es seye dann das
Ihr euch umbkeret/ vnd werdet wie die

Matth. 20.

Ehrgeizig-
keit vñ miß-
günst der
Jünger
Christi.
Luc. 22.

Welche ins
Himmelreich
kommen.

Junge Kin-
der seynd nit
Ehrgeizig.

Kinder/so werdet ihr nit ins Himmelreich kommen. Daß diese Frag der Jünger vil mehr auß Ehrgeizigkeit vnd fürwitz/ dann auß rechtmessigen Ursachen herkommen vnd entsprungen seye/ ist nit zu zweiffen. Dann (wie gemeldet) ein jeder vnder den Jüngern des Herren were gern/ erstlich hie auff Erden/ dann auch droben im Himmel/ der oberste vnd fürnemste vnder ihnen gewesen. Auff daß aber der Herr ihnen solche Ehrgeizigkeit außredē möchte/ lehret er sie/ daß man nit durch Ehrgeizigkeit/ sonder durch Demütigkeit hiez zu kommen müsse: Vnd/ daß die stolzen/ vbermütigen/ hoffertigen/ Ehrgeizigen/ mißgünstigen leut/ nit allein den obersten ort im Himmel/ sonder das Himmelreich gar nit besitzen werden: Demütigkeit vñ nit hoffertigkeit/ vil weniger Ehrgeiz/ seye hiez zu von nöten: Derhalben müssen sie ein Exempel von den jungen Kindern nehmen/ vñ von ihnen lernen Demütig seyn. Dann die jungen Kinder achten sich nit vil weder hoffart noch Ehrgeizigkeit/ was man mit ihnen handelt vnd machet/ man setze sie hinden oder fornen an Tisch/ so seynd sie wol zu friden/ mißgönnen keinem was ihme GOTT vergönt/ verdreust sie auch nit wann jemandes vor ihnen gehet oder stehet/ so zu grösseren Ehren gebraucht wirdt als sie: Also müst ihr auch meine Apostel/ do ihr begert das Himmelreich zu besitzen/ Demütig werden/ vnd forthin nit/ wie bishero geschehen/ nach Hoffart vnd Ehrgeiz/ nach grossen Ehren vnd hohen Sitten streben.

Diß

Diß ist (ihr geliebtē in GOTT) nit allein den Lehr an alle
Aposteln/sonder auch vns Christen allen gesagt. Christen.

Ja allen den jenigen/ so nach disem zergenglich-
chen leben das Ewig zu besitzen begeren/ ist ge-
sagt: Daß sie sich als die kinder demütigen sollen
vor GOTT vnd der Welt/ mit Worten vnd
Wercken/ thun vnd lassen/ stehn vnd gehn/ han-
del vnd wandel/ in Kleidung/ Sitten vnd geber-
den: sich nit lassen mehr geduncken dann wir
seynd/ nit mehr versprechen noch vnderfangen
dañ wir verrichten könden: vnd do vns GOTT
etwas für einem andern geben/ es seye zu Leib
oder zur Seel/ am verstand/ geschickligkeit/ oder
am zeitlichen Gut/ sollen wir dasselbig mit höch-
ster dancksagung annehmen/ vnserm Nechsten/
der solche Gnaden vnd Gaben von GOTT nit
hat/ desto mehr dienen/ vnd nit verachten oder
vndertrucken/ dann GOTT solche Sünd nit
ohne gestrafft lassen wil. Vnd gewislich seynd
der vrsachen/ darumb wir Christen Demütig
seyh sollen/ so vil vns möglich ist/ vor GOTT
vnd der Welt/ nit wenig noch geringe/ sonder
gar vil vnd wichtige/ deren etliche wir jekund
lehren vnd hören wollen/ auff daß wir desto ehe
zu rechter Demut/ vnd volgents zu desto hö-
herm Sitz in der Ewigen Seligkeit kommen
mögen.

Vrsachen
wahrer De-
mütigkeit.

Wan wir erstlich vnd vleissig bedencken vnd
ernstlich nachgedencken wurden/ Daß wir al-
les/das wir seynd vnd haben/ nichts seynd noch
haben von vns selbst/ weder Leib noch Seel/
weder Haab noch Gut/ weder Reichthumb
noch

Die erste
vrsach/dar-
umb wir bil-
lich demütig
seyh sollen.

noch Gesundheit/ weder Kunst noch Geschick-
 ligkeit/ weder Kind noch Gesund/ weder Essen
 noch Trinken/ vnd in summa nichts auff diser
 Welt/ es sey auch so wichtig oder gering als es
 immer wölle oder seyn kan/ haben wir von vnd
 auß vns selbst: Sonder/ alles/ so wir seynd/
 alles so wir gewesen seynd/ alles so wir noch wer-
 den/ alles so wir gehabt haben/ alles so wir ha-
 ben/ alles so wir bekommen werden/ es sey zu
 Leib oder Seel/ zum Weltlichen oder Geistlichen/
 zum zeitlichen oder Ewigen/ das seynd vnd ha-
 ben wir von deme/ so in der Person dreyfaltig/
 im Wesen aber einig ist/ nemlich von GOTT vn-
 serm Himmlichen Vatter/ Sohn/ vnd H. Geist/
 so vns erschaffen/ gemacht/ erlöset/ vnd geheilt-
 get/ Leib vnd Seel/ Haab vnd Gut/ vnd alles so
 wir seynd vnd haben/ geben hat/ gibt/ vnd noch
 forihin geben wirdt. Alle gute Gab/ (spricht der
 H. Apostel Jacob) alle vollkommene Gaben/
 kommen von oben herab vom Vatter der Liech-
 ter. Was hastu/ (spricht der H. Paulus) das du
 nit empfangen habest? Hastu es dann empfan-
 gen/ was berümbst dich dann/ als ob du es nit
 empfangen hettest? Dieweil dann deme allem
 also wie wahr ist: Daß wir alle/ es sey Papst/
 Bischoff oder K. yser/ König/ Fürst oder Herr/
 Burger oder Bauwer/ nichts von vns selbst
 seynd noch haben/ sonder anderstwoher/ nem-
 lich/ von GOTT: Weil wir so arme/ ellende/
 schwache/ geringe Creaturen seynd/ daß wir von
 vnd auß vns selbst nichts vermögen/ vns selb-
 sten weder Leib noch Seel/ weder gesundheit
 noch

Jacob. 1.

1. Cor. 4.

Alles haben
 wir von
 Gott.

noch sterck/weder Jugend noch Alter/weder ein
langes leben noch die Seliqkeit/weder zeitlichs
Gut noch Ewigs/weder Kunst noch geschick-
ligkeit/weder schöne des Leibs/der Seel/ noch
des Gemüts nit geben könden/sonder müssen al-
les von einem andern aewarten/bitten vnd em-
pfahen: Warumb wöllen oder solten wir vns
dann vast hoffertig/stolz/vbermütig/brechtig
vor GOTT vnd der Welt/von welchem wir al-
les/was wir seynd vnd haben/empfabē müssen/
erzeigen? Ja warumb (sprich ich) solten wir vns
nit billich vor GOTT vnd der Welt sehr vnd
hoch demütigen/wann wir disen vnsern gebre-
chen/mangel/schwachheit vnd vnuermögenli-
cheit ansehen/betrachten/vnd nur wol beher-
sigen?

Warumb seynd vil Christen vnder vns/so
wann nit wenig mangel am Leib/Haab vnd
Gut/am zeitlichen vnd Ewigen haben? Dann
allein darumb/das sie erstlich nit wöllen wissen/
Das ihnen solches alles von GOTT herkömen
muß/vnd das sie stolckiren/in höchster demut nit
darumb bitten/sich weder vor der Welt noch
vor GOTT demütigen wöllen: auß vbermut
vermeynen sie/sie haben alles/was sie haben/
von ihren Eltern/ auß ihrer Kunst/ geschicklig-
keit oder handarbeit. Vnd wissen nit/ oder wöl-
len ja nit wissen/das wann GOTT ihren Eltern
nichts geben hett/wann er ihnen Kunst vnd ge-
schickligkeit nit mitgetheilt hett/wann er ihnen
gesunden Leib vnd sterck nit verlihen hette/ so
hätten sie solches weder von ihren Eltern erer-
ben/

Warumb
dise zete
ihren vil
grossen mā-
gel leiden.

ben/ noch sie selbst gewinnen könden. Du aber lieber Christ/ seitemaln du nun jekund weißt/ daß alles was du bist vnd hast/ nit von dir/ sonder von GOTT hast/ weil du nun/ sprich ich/ weiß dein vnuermögenlichkeit/ so nimme vrsach/ dich vor GOTT vnd der Welt/ so sehr als dir immer möglich ist/ demütigen. Vnd zwar muß ein jeder Mensch/ so dise sein eigne schwachheit mit vleiß erwegen thut/ eintweder Gottlos/ oder ja seiner fünff Sün beraubt seyn/ der sich noch nit demütigen sonder stolzkiren vñ grossen bracht treiben will.

Die ander
Vrsach.

Vnd wann ja jemandts so Gottlos/ rohlos/ seiner Seelen vnd seiner Seelen Heil selbst so feind wolt seyn/ vnd bochen/ Hoffart vnd vbermut treiben wolt/ vor GOTT vñ der Welt/ wegen seines Gelds vñ Guts/ so er eintweder Erbllich/ oder sonsten billich oder vnbillich bekommen hat/ so wirdt ihme doch dise Hoffart nit lang gut thun. Dann alles Geld vnd Gut ist zeitlich/ ist zergänglich/ wehret nit lang/ gehet hin wie es herkompt/ ist bald verthon/ wirdt schwärlich bekommen/ sorglich behalten/ gefahrlich verthon. Heut hastu vil Haab vnd Gut/ morgen wirdt es mit feur verbrent/ vom Wasser verschwembt/ vom Feind genommē/ vom Dieb gestolen/ vom Vngewitter/ Donner/ Schauer/ Hagel/ Erbidmen vmbgebracht. Heut bistu Reich/ morgen Arm: heut ein Edelman/ morgen ein Bettelmañ: heut ein Burger/ morgē ein Bauer/ vbermorgen ein Köbler oder Söldner/ darnach ein Landjager. Reichthumb machet selten frumb/

Zeitlichs
Gut ist zergänglich.

frumb/das Gelt erlöft nit vom Tod/weder vom
 zeitlichen noch Ewigen. Gebiете den Reichen/
 (spricht der H. Paulus zu seinem Timotheo) 1. Tim. 6.
 daß sie nit hoch oder hoffertig gesinnet seyen. Ist
 derhalben auch die Reichthumb/ vil Gelt/ Haab Gelt ist offte
 vnd Gut/ vil mehr ein vrsach/ darumb wir De. (do mans
 mütig dann hoffertig seyn sollen/ seitemaln sie mißbrau-
 vbernechtig/ vnd vns mehr ein vrsach zum ver- chet) ein vrsach
 derben vnd sterben dann zum leben ist/ wie dann des e-
 die teglich erfahrung mehrmaln mit sich bring- wigen tods.
 get.

Wann wir/ fürs dritte/ mit vleiß erweget Die dritte
 wurden/ vnsern Leib vnd leben/ den Anfang/ Ursach.
 das Mittel vnd Ende desselbigen/ so achte ich
 vnmöglich seyn/ wir müsten vns/ wir wolten
 oder wolten nit/ sehr vnd hoch vor GOTT vnd
 der Welt demütigen. Wann du erstlich den Anfang des
 Anfang deines Leibs vnd lebens beherkigest/ Menschen.
 wie vnd woher du kommest/ so findest/ Wie du
 auß einer so verwerfflichen vnd scheuslichen
 Matern Mensch worden/ wie du in Mutter Leib
 mit einer so abscheuhlichen Speiß etlich Mo-
 nat ernehrt: Wie du mit einem so seltsamen
 Kleid auff dise Welt geboren/ mit einem so
 kläglichen geschrey oder weinen/ auch in der
 Sünd: Wie schwach vnd ellend/ wie krafftlos
 vnd vnuermöglich du gewesen seyest/ also/ daß
 du weder dich selbst speisen noch trencken/
 weder Ja noch Nein sagen könntest: deme/ der
 dir guts gethon/ hastu nit gedancket/ deme/
 so dir leides gethon/ könntest du nit widerstehen:
 an der Speiß vnd tranck so dir gereicht wur-
 de/

**Menschliche
gebreden.**

de/musstest du zu friden seyn/auff allen vierē mu-
stest du erstlich lernen gehn/dein narung köntest du
in etlich Jaren nit gewinnen zc. Betrachte das
Mittel/so findest ohn alle mühe/ja bald er als die
lieb ist/wie vil trübseligkeit/widerwertigkeit/
angst vnd not/Armut/Hunger vñ Durst/Hitz/
Kelte vnd Frost/Kranckheit/Kummer/Zitter
vnd forcht/Sünd/schand vnd laster du täglich
schier ohne vnderlaß vnderworffen bist: Jekund
kompt der Teufel/jekund dein eigen Fleisch/jekund
die Welt/jekund das Welt/jekund dein
Nechster/wenden ihren möglichen vleiß an/las-
sen nit nach so lang/biß daß sie dich (wo du nit
redlich mit dem Schwerde GOTTES wider-
stand thust) versüren/vnd bringen jekund zu die-
ser/bald zu jener Sünd/jekund in ein heimliches
Laster/bald in öffentliche Schand/jekund zur
vñ zweiflung/bald in die Ewige Verdammung.
Betrachte nur die böse vnd schändliche Welt/dar-
innen du lebst/von welcher du täglich jekund
verfolget/jekund wirst verspottet/verlachtet/
verlogen/verunglimpfft/verschweket/vorhin-
dert/vbernommen/mit allerley Handel/liegen/
betriegen/kauffen/verkauffen/mit Maß/Mech/
Gewicht/Eln/zc. Vnd in Summa/jekund/
mußt du diß von disem/jenes von jenem/ein an-
ders von einem andern leiden/vnd also ansich-
tung vnd trübsal nimmer mehr ledig werden.
Betrachte auch dein Ende/so wirst du nit wenig
Trübsal/zitter vnd forcht finden. Daß du nit
jmer vnd Ewig hie auff Erden leben wirst/das
weist du wol. Daß sich/vnd nit ohne sonderlich

**Sündige
Welt.**

**Das Ende
des Men-
schen.**

chen schmercken vnd grosse peyn/ Leib vnd Seel
 widerumb scheiden müssen/ weistu auch wol: so
 bald diß geschehen/ als dann wirdt dein Leib den
 Würmē gebē zu einer speiß/ deine Nuzē/ Mund/
 Hand vnd Fuß/ Angesicht vnd gancker Leib/ dar-
 innen vñ damit du hie auff Erdē vil Vbermut/
 Hoffart vnd bracht getrieben hast/ werdē jekund
 vom Erdtrich/ von Würmen vnd anderm vn-
 gezifer gefressen/ du wirst gang vñ gar zu Rath
 vñ äschen: do ist auch weder Schöne noch eini-
 ge Gestalt/ nichts dann Todten beiner vnd gros-
 ser gestanck: meniglich fleucht von dir/ jeder-
 man hat ein abscheuen von dir: Allda muß der
 Leib/ die Beiner/ äschen/ staub vnd Rath biß an
 den Jüngsten tag bleiben/ darnach widerumb
 aufferstehn/ vnd vor dem Richterful Christi sei-
 nen Lohn/ die Seligkeit oder Verdammuß em-
 pfahen. Dein Seel aber/ als bald sie vom Leib
 geschiden/ kompt/ nach deme sie geglaubt vnd ge-
 wircket/ eintweder in die Hell/ vnd da bleibt sie
 Ewig: oder in den Himmel/ vnd da bleibt sie
 auch Ewig: oder in das Fegfeuer/ vnd da
 bleibt sie ein zeitlang. Siehe lieber Christ/ wol wir
 Menschen so gar nichts seynd hie auff Erden/
 wie ellende/ arme Creaturen wir seynd/ im An-
 fang/ Mittel vnd Ende vnser lebens. War-
 umb solten dann wir abermal vil vnd lang stol-
 ziren/ hoffertig seyn/ vnd vns brächtig machen?
 Ja gewislich soll auch eben dises alles ein vr-
 sach/ vnd nur ein wichtige vrsach seyn vnser gut-
 willigen Demütigkeit vor GOTT vnd der
 Welt/ seitemaln wir nichts gewesen seynd noch
 c E werden/

werden/ dann Rath vnd äschen. Was wil sich
aber Rath vñ äschen vil erbrechen? Gar nichts.
Sonder demütigen sollen wir vns/auff das wir
erhöhet vnd Selig werden.

Die vierte
Ursach.

Wann wir betrachten allerley oder vil Men-
schen diser Welt sampt ihrem anligen/ mangel
vnd gebrechen/ als/ einen sehen wir der ist Auf-
fertig/ der ander Blind/ diser Einäugig/ jener
Krumb/ diser Lam/ jener Bethrisig/ diser Was-
fersüchtig: jener hat das Podagram/ diser das
Zipperlin/ jener dise/ diser jene Sucht ic. So ha-
ben wir billich abermal ursach gnug/ vns vor
GOTT vnd der Welt zu demütigen/ Darumb/
das wir eben so wol nur Menschen seynd als sie/
Das wir auch bald/ vñleicht heut oder morgen/
mit eben einer solchen oder noch schedlichem
vnd vergifftern Sucht mögen behafft werden/
darumb/ seitemaln wir eben so wol in der Straff
vnd hand GOTTES stehn als sie/ seitemaln vns
auch GOTT/ wann vnd wie er wil/ weaen vn-
ser Sünd/ mit disen oder dergleichen Kranck-
heiten vnd Sucht heimsuchen vnd straffen
mag.

Die fünffte
Ursach.

Die vier
Elementen
seynd vns
nötig zur
auffenthal-
tung vnser
zeitlichen
Lebens.
Gen. 3.

Wann wir auch betrachten die vier Ele-
menten/ das Erdtrich/ Wasser/ Luft vnd
Feuwer/ werden wir billich abermal zu wahrer
Demut bewegt. Sehen vnd betrachten wir
das Erdtrich/ als bald gedenccken vnd finden
wir bey vns selbstem/ Das wir auß dem Erdr-
trich genommen/ widerumb werden wir dareyn
kommen. Betrachten wir den Luft/ so finden
wir vnser Schwachheit/ Das wir ohne den
selbi

selbigen nit leben könden/ Das er vns auch
 offtermaln/ wann er vergifft ist/ tödtlich ver-
 wundet. Das Wasser erweicht die Erden das
 sie vns fruchte bringe/ ohne welche wir auch
 leiblich vnd zeitlich sterben müsten. Wann das
 Fewr nit were/ so müsten wir auch des Hun-
 gers vnd vor grosser Kälte sterben. Also/ das
 wir aller vier Elementen so notwendig bedörf-
 fen/ das wir nit leben können/ wo wir nur eins
 vnder disen nit hetten. Darauß dann aber-
 mal vnser Schwachheit folget / derhalben wir
 vns abermal billich sehr vñ hefftig vor GOTT
 vnd der Welt/ ja vor den vier Elementē/ Erdt-
 rich/ Fewr/ Wasser vnd Luft/ demütigen sol-
 len.

Hierzu wirdt auch nit wenig dienstlich seyn Die sechste
 die Betrachtung vnfers Todes vñ der stund des Desach.
 selbigen. Das wir Menschen alle ein mal ge- Betracht-
 boren / endlich auch ein mal widerumb sterben tüg vnfers
 müssen/ wissen wir alle wol/ vnd nit ein einiger Todes.
 Mensch vnder vns allen ist welcher des Todes Tod ist ge-
 möge vberhaben seyn. Wann aber/ wie/ wo/ wiß.
 vnd wie bald wir sterben müssen/ wissen wir nit/
 vnd keiner ist/ der mit warheit sagen möge: Er Die stund
 wiß/ das er noch ein Jar/ noch einen Monat/ des Todes
 noch einen tag/ ja nur noch ein stund leben ist ungewiß.
 werde. Unmöglich ist es/ das du deinem Le-
 ben (wider den willen GOTTES) nur einen
 tag/ nur ein stund/ nur einen Augenblich hin-
 zu thun köndest. Was wollen dann wir vil
 auß vns selbst machen? Warumb wollen oder
 sollen dann wir vns nit gern vnd willig vor

GOTT vnd der Welt demütigen? Warumb woltē wir nit in wahrer Demut/ auff den Tod/ auff die Stund des Todes/ auff die Ankufft des Herren warten/ auff daß/ wann er kompt/ vns demütig vnd bereitet finde/ vnd eynneime mit den fünff weisen Junckfrauen in das Ewig Vatterland?

Die sibend
Ursach.

Vnser wahren Demütigkeit ist auch dis mit die geringste vrsach: Daß wir auß Götlicher heiliger Schrift berichtet werden/ Daß GOTT in ihrem Gebett vnd Bitt erhöret die Demütigen/ die hoffertigen aber vnd stolzen laffet er leer gehn. Der Herr/ spricht der Königlliche Prophet David/ hat angesehen das Gebett der Demütigen/ vnd hat ihr Bitt nit verachtet. Vnd: Mein Demut hastu angesehen. Vnd die frumme Judith spricht: Das Gebet (D GOTT) der Demütigen vnd sanftmütigen hat dir allwegen gefallen. Vnd Jesus Syrach: Das Gebett desse der sich demütiget/ dringet durch die Wolcken biß es hinzu komme/ vnd wirdt auch nit getröstet vnd weicher nit biß der höchst GOTT ein auffsehen hab. Er hat (spricht MARIA) angesehen die Demut seiner Magd/ &c.

Die achte
Ursach.

Darumb auch/ seiternaln Christus vnser Herr selbst vns Demütigkeit nit allein gelehrt/ sonder auch selbst im werck erzeiget: Welchem wir billich gehorsam zu leisten vnd seinem Exempel nachfolgen schuldig seynd/ wann wir anderst hie seine Kinder/ vnd dort jimmer vnd Ewig mit ihme wöllē Selig seyn. Wer vnder euch (spricht der Herr zu seinen Jüngern vnd vns Christen allen)

Matth. 20.

allen) will der oberst seyn/der seye euwer Die-
 ner: vnd wer da will der fürnerste seyn/der seye
 euwer knecht. Vnd: Ihr nennet mich Meister **Joan. 13.**
 vnd Herr/ vnd ihr saget recht/ dann ich binns.
 So ich dann euwer füß gewaschen hab/ der ich
 euwer Herr vnd Meister binn/ solt auch ihr euch
 vndereinander die füß waschen. Dann ich hab
 euch ein Exempel geben/ auff daß auch ihr ein-
 andern thüet/ wie ich euch gethon hab. Vnd:
 Wann du geladen wirst zur Hochzeit/ setze dich **Luc. 14.**
 nit oben an. Vnd der H. Paulus: Das solt ihr **Phillip. 4.**
 in euch fülen/ das ihr auch in Christo IESV fü-
 let. Welcher/ ob er wol in Göttlicher gestalt war/
 hat ers nit ein raub geachtet **GOTT** gleich seyn/
 sonder hat sich selber vernichtet/ vnd die gestalt
 eines knechts angenommen/ ist gleich worden
 wie ein ander Mensch/ vnd im wandel als ein
 Mensch erfunden/ hat sich selbst genidriget **2c.**
 Der Herr Christus/ wann er Wunderzeichen **Matth. 8.**
 gethon hat/ hat er verbotten man soll es nit sa- **15. 17.**
 gen/ auff daß er vns ein Exempel gebe Demut **Mar. 7.**
 zu lernen. Er gienge auch selbst hin zu Joanni **Matth. 3.**
 dem Tauffer/ daß er von ihme getaufft würde.
 lernet von mir/ spricht er/ dann ich binn **De. Matth. 11.**
 mütig vnd eines sanfftmütigen herkens. Disem
 seynd wir nachzecommen billich schuldig/ do wir
 anderst seine kinder/ rechte Christen/ vnd endt-
 lich selig seyn wollen.

Andere vrsachen/ warumb wir Christen vns
 billich vnd gern/ vor **GOTT** vñ der Welt demü- **3. Reg. 21.**
 tigen sollen/ seynd noch vil/ als: Daß die Demut **2. Par. 12.**
 verhütet die straff **GOTTES**/ Daß dise so sich **Matth. 24.**

Matt. 18. 19. hie erhöhen/ hie vnd dort ernidriget werden/
 Jud. 9. Das solche GOTT vnd der Welt angenehmem
 Eccl. 35. 23. seynd/ vnd dergleichen vrsach mehr/ so zeit hal-
 Luc. 7. ben jekund nit mögen angezeigt werden. Ge-
 Jacob. 4. nug wirdt es vns seyn/ wann wir jekund ge-
 1. Pet. 5. melte Vrsachen erwegen/ behalten/ vnser thun
 Esa. 37. 66. vnd lassen/ Leib vnd Leben darnach richten
 Job 5. werden.
 Psal. 112.
 114.
 Prouer. 15.
 18. 29.

Vnd diß ist billich genug geredet vom ersten
 Theil vorhabender Predig/ nämlich von der De-
 mütigkeit/ vnd Vrsachen darumb wir billich
 gern vnd willig Demütig seyn sollen/ am aller-
 meisten aber diser vrsach/ so der Herr auff heu-
 ten selbstem vermeldet: Das wir ohne dieselbigen
 nit mögen selig werden.

Lasset vns derhalbē/ (ihr geliebten in GOTT)
 wo wir nit von GOTT vñ auß heiliger Schrift
 wöllen/ doch von den jungen Kindern wahre
 Demut lernen/ auff das wir mit ihnen/ vnd sie
 sampt vns/ vnd wir alle zu mal/ selig werden.

DEr vbrige vnd ander Theil heu-
 tigs Euangelij vnd Predig/ handelt
 von der Ergernuß/ so ein Mensch dem
 andern wissigklich gibt/ oder doch ein vrsach ist
 das sich ein anderer Mensch vber seinen Wortē
 vnd Wercken/ thun vnd lassen ergert. Die wort
 Christi lauten also: Wer einen ergert auß
 disen kleinen die an mich glauben/ dem we-
 re besser ein Mülstein an seinem hals ge-
 hägen/ vñ das er erseufft würde im Meer/
 do es am tieffsten ist &c. Wiewol alda von der
 Erg.

Ergernuß/ Was die selbige sey/ Wie man Er-
 gernuß gibt oder nit gibt/ billich oder vnbillich
 nimpt/ füglich weitleuffig gehandelt möcht wer-
 den: will doch solchs die lenge diser Predig (dañ
 sich der erste Theil zu weit erstreckt hat) nit ge-
 statten/ mag auch darumb vnderlassen werden/
 seitern solche vnd dergleichen Materien/ bis
 zur anderen zeit vñ ort (in die grosse Postill) auff-
 geschoben werden. Gung seye vns auff diß mal
 mit wenig worten vnd einigem Exempel anzu-
 zeigen: Daß mehrmaln auß einer Sünd ein
 zwofache Sünd wirdt/ vnd diß wegen der Er-
 gernuß. Der jenig Mensch/ so wissentlich vnd
 williglich das Gebott GOTTES/ oder seiner
 heiligen Christlichen Kyrchen/ bricht/ der sün-
 diget ohne allen zweifel nit wenig/ ist billich auch
 darumb zu straffen/ hie oder dort. Der jenig
 aber/ so nit allein für sein Person vnd heimlich
 sündigtet/ sonder vor augen vnd angesicht ander
 leuten/ vnd etwan zu truck ander leuten/ der gibt
 andern vrsach/ wo nit auch zu sündigen/ doch zur
 Ergernuß/ erwann zu tadlen/ schamrot zu wer-
 den/ oder doch dieselbige Sünd nit mehr für
 sünd/ oder doch nit mehr für ein so grosse Sünd/
 halten.

Obertret-
 ter des Ge-
 bott Gottes
 seynd zu
 straffen.

Fleisch essen/ ist für sich selbst vñ auß seiner Ein Exem-
 art nit Sünd noch vnrecht/ Dann ein jede Cre. pel.
 atur GOTTES gut erschaffen ist worden. Wan
 aber ein gebott GOTTES/ oder seiner Kyrchen
 hierzwischen kompt/ darinnen das fleisch essen/
 zu diser oder jener zeit verbotten wirdt/ vñ solchs
 jemandts/ vber solchs gebott isset/ der sündigtet/

Ein anders
Exempel.

Gen. 3.

Sünd ist
es/das Ge-
bott d' Christ-
liche Kyrche
brechen.

Halb Chri-
sten.

Rom. 14.

Darumb/ daß er wider das Gebott GOTTES
oder seiner Kyrchen willkürlich vnd williglich
gehandlet hat. Der Apffel so auff dem jenigen
Baum/ der mitten im Paradis gestanden/ ge-
wachsen ist/ war auß seiner art vnd erschaffung
nit weniger gut zu essen als die anderen so auff
andern Bäumen im Paradis gewachsen seynd.
Dieweil aber ein Gebott GOTTES hertz zu kom-
men/ Adam vnd Eva sollen vom selbigen Ap-
felbaum nit essen/ haben sie gesündigt/ so bald sie
dauon gessen/ Darumb/ weil sie wider das Ge-
bott GOTTES gehandelt haben.

Welcher in der vierzigtagigen Fasten/ sonsten
auch am Freytag/ Sampstag/ oder zur anderen
verbottnen zeit/ ohne sonderliche vnd wichtige
vrsachen/ fleisch isset/ der sündigt/ Darumb/
daß er das Gebott der H. Christlichen Kyr-
chen/ so solchs ohne sonderliche vrsachen nit ge-
botten/ auß verachtung oder mutwillen gebro-
chen hat. Der jenig aber/ so das fleisch öffentlich/
vor menigklich/ andern nur zu troß frisset/ der
sündigt noch mehr/ wegen der Ergernuß/ so er
den frumen Catholischen Christen gibt/ so das
Gebott der H. Christlichen Kyrchen zu bre-
chen nit bedacht seynd/ aber doch wegen eines
Halb Christen fleisch fressen sehr geergert wer-
den. Hieruon hat der H. Paulus vor fünffze-
hen hundert Jahren also gelehrt: So aber dein
Bruder vber deiner Speiß berrübt wirdt/ so
wanderstu schon nit nach der liebe. Lieber/ ver-
derb den nit mit deiner Speiß/ vmb welches
willen Christus gestorben ist. Darumb soll
vns

vnser gutes nit gelästert werden. Dañ das Reich
 GOTTES ist nit essen vnd trincken/sonder Ge-
 rechtigkeit/frid/vñ freude in dem H. Geist. Wer
 darinnen Christo dienet/der ist GOTT vnd den
 Menschen wolgefellig. Darumb lasset vns dem
 nachstreben das zum frid dienet/vnd das hal-
 ten/das vns allen zur besserung reicher. Du solt
 nit vmb der Speiß willen zerstören GOTTES
 werck. Es ist zwar alles rein. Aber es ist nit gut
 dem Menschen der es also isset/das er Ergernuß
 dadurch gebe. Es ist besser/du essest kein Fleisch/
 vnd du trinckest kein Wein/oder das/daran sich
 dein Bruder stoffet oder ergert/oder schwach
 wirdt. Diser zeit findet man vil leut/vnd ge-
 meinglich die jenigen all/so sich Euangelisch
 nennen/so nit vil nach disen wortē des H. Pau-
 li fragen/fressen fleisch wider vnd vber das Ge-
 bott der H. Christlichen Kyrchen/am Freytag/
 Samstag/in der Fasten/vnd zu andern ver-
 bottnen zeiten/nit angesehen/das sie gar wol wis-
 sen/das sie ihren Nechsten sehr ergern/zu zeiten
 auch zur sünde reizen/vnd mit ihnen vngehör-
 same Fleischfresser zu werden vrsach geben.
 Könnte derhalben nit schaden/das ihnen/nach
 dem billichen vrtheil Christi/ein Müllstein am
 haß hienge/vnd ersöffen im Meer do es am
 tieffsten ist/ neben diser straff/das sie mehrmaln
 am heiligen Ostertag kein fleisch zu essen haben/
 weil sie dasselbig in der heiligen Fasten auffge-
 fressen habē. Wider solche leut sagt der H. Pau-
 lus noch ein mal: Ehe das ich meinen Nech-
 sten mit fleisch essen ergern wolt/ehe wolte ich

Merck ih-
 newe Chri-
 sten.

Fleischfres-
 ser lernen
 vom heilige
 Paulo.

nimmer mehr kein fleisch essen.

Also ist auch von andern Sünden vnd Ergernussen zu antworten. Dann GOTT nit allein die Sünd für sich selbst/sonder auch die Ergernuß/ ja die Sünd so erwann auß der Ergernuß eruolget/ an dem jenigen so sündiger vnd Ergernuß geben hat/ erwann hie zeitlich/ erwann dort Ewig/ erwann zeitlich vnd Ewig/ straffen will. Hieruon zu seiner zeit weitlenffig vnd außfürlich.

Nun haben wir gehört/ Wie wir vns verhalten müssen/ wann wir nach disem zeitlichen leben das Ewig erlangen wollen: Wir müssen nit Ehrgeizig/ nit Stoltz/ nit vbermütig noch Hoffertig/sonder Demütig/ Einfaltig/ Schlecht/ gerecht/ frumb/ als wie die Kinder seyn/ bey welchen weder neid noch haß/ weder zorn noch Ehrgeizigkeit ist. Wir haben auch etliche vnd zwar wichtige Ursachen gelehrt vnd gehört/ darumb wir billich Demütig seyn sollen. Zu lest auch: Daß wir nit allein nit sündigen/sonder auch nit Worten oder Wercken/ thun oder lassen/ niemandts kein Ergernuß geben sollen/ auff daß wir nit im Meer oder in der Hell/ do sie am tieffsten ist/ ersauffen/sonder mit den Demütigen vnd frummen kindlin/ Ewig mögen selig werden/ Amen.

Gebettlin zu
Gott dem
Himmels-
chen Vater.

Wir bekennen/ O GOTT Him-
melischer Vater/ daß wir vñ ju-
gend auff zur Sünd der Ehrgeiz-
igkeit/ Hoffart vnd vbermut/ zur begirde
hoch

hoch oben an sitzen / vber andere herrschen
 vnd regieren wollen / geneigt seynd: be-
 kennen auch / daß wir hierinnen sündi-
 gen vnd vnrecht thund. Derhalben sa-
 gen wir dir / **D GOTT** / möglichsten
 danck / daß du vns durch deinen gelieb-
 ten Sohn vnsern Heiland **IESVM** Chri-
 stum / von der Ehrgeizigkeit abgeschreckt /
 vnd nach dem Exempel der kleinen kin-
 der zur wahren Demütigkeit ermanet /
 vnd ja außdrucklich verkündigen hast
 lassen: Daß wann wir Selig werden wol-
 len / müssen wir wie die kinder Demü-
 tig seyn. Verleihe vns auch Gnad / daß
 wir vns vor allen Sünden vnd Erger-
 nuß geben / sekund vnd jeder zeit hüten mö-
 gen / auff daß wir nit verdampt / sonder
 mit den kleinen kindern mögen selig wer-
 den / Amen.

Am Tag der Erhebung des heiligi-
 gen Bischoues Dithonis / zum theil
 zu Bamberg feyerlich.

Am 30. tag
 Septemb.

M Vff heut halten wir die Erhes-
 bung des heiligen Bischoues D-
 thonis zu Bamberg vnd Reichtri-
 gers / von Erbar vnd gewaltigen
 Eitern / nämlich Bartholdo vnd
 Sophia geboren. Ward des Bischoffs Ruber-
 ti nach

ti nachkömmling/ vnd vom Keyser Heinrich denen
 von Bamberg zum Bischoff geben/ auch vom
 Papsst Paschali confirmirt vñ bestetigt. Brach
 seinem eignen mund ab/ vnd gabs den Armen.
 Als ihm auff ein zeit ein thewr gekauffter Fisch
 fürkam/ sprach er: Solt ich so thewr gekauffte
 speiß allein essen? Weg mit dem köstlichen fisch/
 vnd bringet ihn meinem Christo zc. Ward von
 Boleslao dem Herzog in Polen berufft/ daß er
 das Pomerland/ welches er vnder sein hand ge-
 zwungen/ zu Christo bekeren solt/ welches er mit
 GOTTES gnaden thet/ vnd endlich zu Christli-
 chem Glauben bracht. Darnach zohe er wider
 gen Bamberg/ bauwet daselbst Sanct Michels
 berg/ oder den Mönchsberg/ vnd als er siben vnd
 dreissig Jar dasselb Bistumb löblich regiret/ starb
 er im Herren. Ward darnach vnder Papsst Ele-
 mente dem dritten erhaben. Welcher jehund
 GOTT für vns bittet.

E Vangelien vnd Predigen/ wie an
 der Beichtiger Wilibaldi/ Martia-
 ni/ Nicolai/ Henrici/ zc.

Am Tag des heiligen fürtreffentli-
 chen Lehrers Hieronymi.

Am 30. tag
 Septemb.

Auff heut ist der tag der begräb-
 niß des H. Priesters vnd fürtreff-
 lichen Lehrers Hieronymi/ in der
 stadt Stridon/ in Dalmatia ge-
 legen/ geboren. Hat zur zeit des Key-
 sers

fers Constantini Magni zu Rom studirt/ da er auch getaufft ward/ in Hebräischer/ Chaldaischer/ Griechischer vnd Lateinischer sprach trefflich wol erfaren. Zog in Franckreich/ vnd darnach von Rom in Syriam/ begab sich in die eufferst Wüsten/ alda er die Sünd seiner Jugend mit zehern büffet/ auch mit fasten/ wachen/ betten/ vñ vngleublicher harter strengigkeit/ die geilheit des fleisches züchtiget/ vnd dem geist vnderworffen machet. Theilet all sein zeit in studiren/ vñ betten: Der weniger theil ward dem Schlaf/ noch weniger der Speiß/ vñ gar keiner dem Müßiggang geben. Die H. Schrift lernet er bey einem buchstaben außwendig/ vnd vermischet das studiren des schreibens mit dem lesen. Kam darnach wider gen Rom/ vnd ward Priester/ aber von wegen seiner Mißgönnner/ deren Sünd er straffet/ zog er von Rom wider in Syriam/ vnd kam endlich gen Bethlehem/ erlanget von S. Cyrillo/ dem Bischoff zu Jerusalem/ den ort der Krippen des Herren zu seiner wohnung: bauwet daselbst ein Kloster von der heiligen witwen Paule kosten/ vnd lebte mit den seinen nach der Apostelischen Regel: war aller Ketzer feind/ vnd aller boßheit widersacher. Nachdem er nun gar vil gewaltige vñ heilsame Bücher zu grossen nutz der Christenheit geschriben/ verschid er zu Bethlehem im friden/ im 98 Jar seines Alters/ vnder Keyser Honorio.

Euangelium vñ Predigen/ wie hievor von S. Sithone vermerckt.

Am

Am 9. tag
Octob.vnd Martyrers Dionysij/ zum theil
zu Bamberg vnd Regenspurg
feyerlich.

Auff heut ist der Geburts tag
des heiligen / trefflichen vnd be-
rühmten Bischoffs vnd Marty-
rers Dionysij Areopagite/ auch
seiner gesellen/ der heiligen Mar-
terer Rustici des Priesters/ vnd Eleutherij des
Diacons. Diser Dionysius hat sich von wegen
guter Künst in Egypten begeben/ da er die vnna-
türlich Finsterniß an dem tag des Leides Christi
gesehen/ hat er mit seinem Preceptorn/ dem So-
phisten Apolophane/ gesaget: Entweder GOTT
der Natur leidet/ oder die Welt wirdt vergehn.
Ward darnach ein Richter zu Athen/ hat auß
den Atheniensischen Philosophen allein die Lehr
des Heils von dem heiligen Apostel Paulo ange-
nommen/ Act. 17. Ward hernach von S. Pau-
lo zum Bischoff vber die glaubigen Athenienser
gemacht/ bekeret vil Volcks zu Christo. Da er
aber höret/ daß die Fürsten der Apostel zu Rom
gefangen lagen/ setzet er einn verwalter an sein
statt/ zoge gen Rom: Ward darnach/ sampt
dem obgemeldten Rustico vnd Eleutherio/ von
dem heiligen Pappst Elemente in Franckreich
geschickt/ das Euangelium Christi zu predi-
gen. Kam also gen Paris/ vnd verrichtet sein
befolhen Ampt etlich Jar daselbst trewlich vnd
fleissig/ also daß er billich Apollolus Gallia ge-
nennt vnd gehalten wirdt. Ward sampt seinen
gesellen

gesellen von dem Pfleger Fescennino gefangen. Nachdem sie nun mit feusten geschlagen/ verspenet/ gezeißet/ auch ein eyßen Kost/ wilde Thier/ ein ferofen/ das Creuz vnd vil andere Marter vberwunden/ seynd sie alle drey entaupt worden/ haben also ihr herrliche Marter vollendet. S. Dionysij leib richtet sich bald auff/ nam sein Haupt in die hend/ vnd trug es zu meil/ zu dem ort da er ruhet/ biß daß derselbig leib heimlich gen Regenspurg geführt/ vnd von Keyser Arnulpho in dem Kloster zu S. Haimeran begraben ward. Der andern leiber aber ruhen in Franckreich in S. Dionysij Kloster. Diser Dionysius hat vil hochsinnreiche Bücher geschriben/ vnd gibt zeugnuß/ daß er bey der begräbnuß MARIAE der Mutter GOTTES gewesen sey/ welcher jekund GOTT für vns bittet.

E Vangelien vnd Predigen/ wie an der Befegung Pauli/ Georgij/ Marci/ Stephani/ Laurentij/ &c.

Am Tag des heiligen Bischoues
vnd Martyrers Maximiliani/ zum
theil zu Passaw vnd Wien
feyerlich.

Am 12. tag
Octob.

E ist heut der tag des heiligen Laureacensischen Bischoffs vnd Martyrers Maximiliani/ der vil vnglaubigen zu Christo bekert. Hat
zur

zur zeit des Keyfers Cari vnd Numeriani/ zu
Seila in seinem vatterland/ die kron der Mar-
ter erlangt. Ist darnach von dem Herkog von
Beyern gen Passaw gefürt/ alda er in grossen
ehren gehalten wirdt.

E Bangelium vnd Predigen/ wie/
hieuor von Sanct Dionysio ver-
merckt.

Am Tag des H. Bischoues Sim-
perti/ zum theil im Augspurgischen
Bistumb feyerlich.

Am 13. tag
Octob.

S Gut ist der Geburts tag des heil-
ligen vñ berümpften Bischoffs vnd
Beichtigers Simperti. Der von
Edlen Eltern geboren/ sein Vate-
ter war ein geborner Herkog in
Lothringen/ Ampertus genant/ sein Mutter
aber des Keyfers Caroli Magni Schwester/
Symphoriana genant. Ward von jugent auff
in allen Tugenten auffgezogē/ auch in dem Klo-
ster Morbach S. Benedicts Ordēs ein Mönch/
vnd darnach ein Abt/ regiret dasselbig Kloster
vil Jar gar löblich. Ist darnach von Carolo
Magno zum Bischoff gen Augspurg gesetzt/ vnd
von Papst Leone bestetigt worden. Hett grossen
fleiß die Laster außzurentē/ Tugent zu pflanzen/
die Gottsheuser zu fürsehen/ den Armen in nö-
ten beyzustehen/ Witwen vnd Waisen zu be-
schützen. Bauwet/ bessert/ erweitert vnd mehret
vil

Am tag des H. Burchardi.

415

vil Kirchen/ erneuert auch wider das zerstört
Kloster/ welches S. Mang zu Füssen gebawen.
Verschid endlich im Friden/ vnd ward in S.
Aphre Kirchen begraben.

Euangelien vñ Predigen/ wie dro-
ben von S. Hieronymo vñ Tho-
ne vermerckt.

Am Tag des heiligen Bischoues

vnd Beichtigers Burchardi /
zum Theil zu Wirzburg
feyerlich.

Am 14. tag
Octob.

Ir haben heut den tag des heili-
gen Burchardi/ derselben Kirchen
zu Wirzburg ersten Bischoffs vnd
Beichtigers. Diser war ein Engel-
lender/ vnd ein blutsverwanter des
heiligen Bonifacij Bischoffs zu Mens/ vnd
Marterers. Ward von gemeltem Bonifacio
an S. Kiliani statt zum Bischoff verordnet. Als
er nun lange zeit die Kirche Christi mit wachen/
Visitiren/ Wenden/ Ordiniren/ auff's fleissigst
versehen/ hat er auß begird des einsidlichen le-
bens/ ein andern an sein statt verordnen lassen/
dienet darnach GOTT vnd ihm selber/ vnd ist
im Frid entschlaffen/ seines Priesterthumbs im
40 Jar.

Euangelien vnd Predigen / wie
kurs hievor von Simperto ver-
merckt.

DD

Am

416 Am Tag des heiligen Abbtz vnd

Am 16. tag
Octob.

Beichtigers Galli/ zum theil im Co-
stenser Bistumb feyerlich.

Diff heut ist d tag der begrä-
nuß des heiligen Abts Galli. Dieser
war ein geborner Schott/ vnd ein
Jünger S. Columbani/ hat zur zeit
des Keyfers Heraclij bey den Fran-
kosen vnd Schweizern/ die heydnischen Abgöt-
ter zerstöret vil Menschen zu Christo bekeret/ vil
Klöster gebauwen/ vñ daselbst heiliglich gelebt.
Da er solt Bischoff zu Constanz werden/ hat er
seinen Jünger Joannem an sein statt zum Bi-
schoff gemacht. Er aber versamlet vnd regiret
bey vier hundert Brüder in der Bistum/ dienet
daselbst GOTT trewlich. Hat abwesend seines
Meisters tod erkennet/ vnd das seinen Brüdern
angezeiget. Verschied endlich im fridē/ im 95 Jar
seines Alters/ bey der burg Arbona: in seiner sel-
ten ward ein eysern Ketten mit blut besprenget
funden/ damit er seinen Leib zu casteyen pfieget.

Euangelien vnd Predigen/ wie von
Beichtigern vermerckt.

Am Tag des heiligen Euangelis-
ten Luce/ zum theil zu Costens
feyerlich.

Am 18. tag
Octob.

Sent ist der Geburts tag des
heiligen/ hochwürdigen Euangeli-
sten vnd Eanklers IESV Christi/
Luce/ welcher ein Arzt von Antio-
chia

thia/ auß Syrien geboren/ vnd der Apostel Jün-
ger war/ ist ein Junckfraw mit dem leib vnd ge-
mit bliben. Hat sein Euangelium in Achaia ge-
schriben/ nach dem ihm von den Aposteln vñ der
heiligen Junckfrawen MARIA auffgelegt
ward. Er ward auch ein nachfolger Pauli/ der
seiner trewlich meldet. Hat der Apostel Acten/
mit seinen eignen augen gesehen/ welches Buch
er zu Rom gemacht. Als er 83 Jar alt war/ ist
er vol des H. Geists in Bithynia gestorben/ wel-
ches heilige beiner im 20 Jar Constantij gen
Constantinopel gefürt worden seynd/ sollen jetz
zu Padua seyn.

Euangelien vnd Predigen/ wie von
den Aposteln.

Am Tag der H. Martyrin vnd
Junckfrawen Ursule/ zum theil
zu Cöln feyerlich.

Am 21. tag
Octob.

Auff heut ist der tag des leidens
der heiligen/ Edlen vnd weitbe-
rümpten Königin/ Junckfrawē
vñ Marterin Ursule/ vñ ihrer hei-
ligen Gesellschaft der Eilffrausent
Junckfrawē. S. Ursula war ein einige Tocht-
ter des Christlichen Königs in Schottland De-
onoti/ vnd Darie/ schön von leib/ vnd noch schö-
ner von Christlichen tugenten. Welche in ihren
jungen tagē GOTT ihr Junckfrawschafft auff-
geopffert/ vnd darumb den angebotnen Ehe-
mahl

DD 2 mahl

mabel Ehereum/ des Engellendischen Königs
 Conam sohn/ nit anderst zu nemmen bewilligt/
 datin das man in dreyen Jaren auff beiden sei-
 ten eilff tausent Junckfrauen zusamē bringen
 solt/ verhoffende darzwischen auch Ehereum/
 den zukünfftigen Breutigam/ zu Christo zu befe-
 ren/ wie auch geschehen. In diser schar nun al-
 lerley Junckfrauen/ so sich zu S. Brsula the-
 ten/ seynd auch nach ihr die fürnemsten gewe-
 sen/ Pinosa/ Cordula/ Eleutheria vnd Floren-
 tia. Nach disen waren eilff verordnet/ deren je-
 de ein tausent vnder ihr hett/ nemlich Joha/
 Benigna/ Elementia/ Sapientia/ Carpophora/
 Columba/ Benedicta/ Odilia/ Selindris/ Sibi-
 lia vnd Lucia. Da sure S. Brsula mit ihnen al-
 len zu schiff von Schottland in Frankreich/ von
 dannen auff Cöln/ von Cöln den Rhein hinauff
 nach Basel. Hat sie auff dem weg Christlich
 vnderwisen/ vnd im Glauben vereinigt. Seynd
 mit dem Baslischen Bischoff zu fuß gen Rom
 gereiset/ daselbst rheren sie ihr Gebett/ vnd wat-
 den ihr vil von dem heiligen Pappst Cyriaco ge-
 taufft/ der mit ihnen darnach von Rom gen
 Basel gezogen/ sampt andern vilen Bischof-
 fen/ vnter welchen war / Vincentius der Car-
 dinal/ Jacobus der Bischoff von Antiochia/
 Macrinus der Bischoff von Leuican/ Gallari-
 us der Bischoff von Luca/ Martialis der Bi-
 schoff auß Griechenland / sampt seiner schwe-
 ster Constantia / die ein Tochter war des Con-
 stantinopolischen Keyfers Dorothei. Auch hat
 die Sicilische Königin Gerasina (welche S.
 Brsula

Ursula Mutter Schwester war) ihr Königreich verlassen / vnd ist mit vier Töchtern / nämlich Babilia / Julia / Victoria vnd Aurea / auch ihrem kleinen kind Hadriano / diser heiligen schar gezogen. Jeglich hat sich auch auffgemacht S. Ursule Breutigam Ethereus / sampt seiner Florentina / auch S. Ursule Mutter Daria / vnd Clemens der Bischoff / vnd seynd zu der obgemelten heiligen schar gezogen. Ward also dise heilige Gesellschaft sehr gemehrt mit mancherley Stende der Menschen / Geistlichen vnd Weltlichen / Bischoffen vnd Königen / Edel vnd Vnedlen / vnd vilen andern Weibs vnd Manns personen. Nach dem sie nun von Basel wider gen Cöln kommen / worden sie daselbst von den Hunen / des blutigrigen Königs Attila Kriegsuoelck / jämertlich zererschossen / zerhauwen vnd erstochen. Haben also ihr Junckfrewlich Christlich blut / vmb des Herren Christi Namen vergossen. Der ort / da sie am Rhein gemartert seynd worden / wirdt noch heutiges tags die Blutstrass genant. Es wirdt vnd mag auch niemand in S. Ursule Kyrchen begraben werden / von wegen der grossen heiligkeit solcher ehrwürdigen Gesellschaft.

Euangelien vnd Predig / wie an S. Kunigundis / Margarethe / oder Katharine tag.

DD 3. Am

Am 18. tag
Octob.Am Feiertag der H. zwener Apo-
stel vnd Gebrüder Simonis vnd Jude
Thaddei/ Euangelium Joan. xv.

L. Joan. 3. 5

In der zeit sprach IESVS
zu seinen Jüngern: Diß
gebietet ich euch / daß ihr
euch vndereinander lies-
bet. So euch die Welt
hasset / so wissent daß sie
mich vor euch gehasset hat. Weret ihr von
der Welt / so het die Welt das ihr lieb.
Weil ihr aber nit sendt von der Welt / son-
der ich hab euch von der Welt erwölet / dar-
umb hasset euch die Welt. Gedenekt an
meine wort / die ich euch gesagt hab / Der
knecht ist nit grösser dann sein Herr. Has-
ben

Matth. 10. 6
Luc. 6. 9
Joan. 13. 6

ben sie mich verfolget/ so werden sie euch
 auch verfolgen: haben sie meine wort ge-
 halten/ so werden sie euwere auch halten.
 Aber das alles werden sie euch thun vmb
 meines Namens willen. dann sie kennen
 den nicht/ der mich gesandt hat. Wenn ich Joan. 16. d
 nicht kommen were / vnd hetts ihnen ge-
 sagt/ so hetten sie kein Sünde. Nun aber
 können sie nichts fürwenden/ ihr Sünd zu
 entschuldigen. Wer mich hasset/ der has-
 set auch meinen Vatter. Hett ich nit die Joan. 9. d
 Werck gethan vnder ihnen/ die kein ander 10. d
 gethan hat/ so hette sie keine Sünde. Nun
 aber haben sie es gesehen/ vnd doch beide
 mich vnd meinen Vatter gehasset. Doch
 daß erfüllet würd der Spruch in ihrem
 Gesez geschriben: Sie haben mich ohn Psal. 34. e
 ursach gehasset. 68. a

So euch die Welt hasset/ so wisset daß sie
 mich vor euch gehasset hat.

Joan. xv.

Ar billich / füglich vnd recht/ füglich
 hat die heilig Christlich Kyrch/ wirdt ge-
 jekund verlesens Euangelium/ hörtes Eu-
 auff disen heutigen Feyertag der angelium
 zweyen Aposteln Simonis vnd auff heut
 gepredigt.

Jude zu lesen vnd predigen verordnet: Dann
 alles so darinnen gehandelt wirdt/ ist gewislich
 in ihnen erfüllet worden. Gebotten hat ihnen

DD 4 Chri

Apo
 Jude



SVS
 Dis
 als ihr
 r lie
 Welt
 daß sie
 r von
 e lieb.
 son
 dar
 Et an
 Der
 Has
 ben

Christus der Herre/ (dann eben domaln auch dise zween Jünger / nämlich im letzten Abendmal/ als der Herr dise Predig gehalten/ dabey gefessen) daß sie einandern sollen lieb haben: wie lieb aber alle Jünger/ auch diser Simon vñ sein bruder Judas/ nach der Himmelfart Christi einandern gehabt haben/ ist der ganken Welt bewußt. Er hat ihnen auch vorgesagt: Wie vnd waserley vil verfolgung sie von der Welt leiden müssen. Daß aber auch dise zween Brüder/ Simon vnd Judas/ nit allein vil verfolgung/ Peyn vnd Marter/ sonder endlich auch den bittern tod/ vnd eben vmb Christi Namen willen/ von der Welt/ von den Gottlosen Jüden oder Heyden gelitten haben/ ist vns auch nit vnberußt. Also/ daß/ wie gemeldet/ gehörtes Euangelium billich vnd füglich auff heut geprediget wirdt.

Dieweil dann einem jeden so selig werden wil/ vil/ gar vil an disen beiden Stücken gelegen ist/ nämlich/ Wie er seinen Nächsten lieben soll/ Wie er auch die verfolgung von der Welt gegulzig leiden muß: Weil auch der Herr diß Euangelium vnd Predig nit nur zu seinen Jüngern/ sonder auch zu vns Christen allen geredet/ wil von nöten vnd müglich seyn/ auff diß mal etwas weitleunffigers von disen beiden zehandlen. Vnd im ersten Theil: Von der liebe gegen vnserm Nächsten. Im andern: Daß wir in verfolgung von der Welt/ gedultig seyn sollen. Dise beide Pünctlin wil ich auff das leichtest vnd kürzest abhandlen. Ihr wölt mit gedult

Theilung vnd
Inhalt diser
Predig.

gedult auffmercken. GOTT aber wolle vns hierzu sein Göttliche Gnad verleihen/Amen.

Ainem Donnerstag (welcher diser zeit der Gründonnerstag genennet wirdt)

welcher war der vier vñ zwenzigest Mar- tij/ im drey vnd dreissigsten Jar Christi/ hat er mit seinen Jüngern allen zwölffen/ zu Jerusa- lem ein Abendmal vnd ja das letzte Abendmal (vor seinem tod) gehalten/ vnd vnder oder zwi- schen dem essen ein lange Predig zu ihñe gerhon/ welche vns der H. Euangelist Joannes/ so auch domaln selbst am Tisch vnd Predig gefessen/ in fünff gangen Capitteln beschriben. Vnd vn- der andern hat er auch zu ihnen also geredet:

Dis gebietete ich euch/ daß ihr euch vnder- einander liebet. Was Christus der Herr in vnd mit disen wenig worten gebotten hab/ vñ zu welchen er solche wort geredet/ ist einem jeden/ so disen worten vleissig nachgedencken wil/ leicht- lich zu ernemmen: Die Liebe des Nechsten wirdt alda gebotten. Vnd wiewol dise wort allein zu den Aposteln geredt/ so ist doch dis gebott nit al- lein den Aposteln/ sonder auch allen den jentigē/ so ihre nachkömlinge/ das ist/ Jünger Christi/ Christen/ vnd endlich selig werden wollen/ ge- ben worden/ also/ daß auch wir Christen zu di- sem Gebott von der Liebe des Nechsten/ nit we- niger als die Apostel bey ihren lebzeiten verbun- den seynd.

Wer dann vnser Nechster seye so wir zu lie- ben schuldig/ bedarff zu antwortē nit viler wort.

DD S Di

An welche tag das let- ste Abend- mal gehaltē sey worden.

Joan. 13. 14. 15. 16. 17.

Inhalt diser wort/ vñ zu wem sie ge- redt seyen worden.

Wer vnser Nechster sey.

Feind/ feynd
auch vnser
Nechsten.

Diser nämlich ist vnser Nechster/ so vnser lie-
be/ rath/ that/ gutthat vnd wolthat bedarff/ der-
selbige seye volgentz wer er wölle/ freund oder
feind/ Bruder oder Vatter/ Kind oder Gefind/
verwanter oder nit bekant. Darumb sage
der Herr: Das gebietze ich euch/ daß ihr euch
vndereinander liebet. Er sage nit / ein jeder
seinen Bruder/ Vatter oder Sohn/ verwanten
oder bekanten/ oder disen vnd jenen nit: sonder/
vndereinandern/ das ist/ ein jeder den andern/
ein jeder alle/ vnd alle einen jeden.

Halbchristz.

Matth. 5.
Leutt. 19.

Disem Gebott Christi handeln zu wider die
jenigen Halbchristen/ so nur ihre freund vnd die
jenigen lieben wölken/ von welchen sie widerumb
geliebt vnd gutthat empfahen könden. Ihre
feind aber/ oder die jenigen von welchen sie ein-
mal erzürnet / oder doch nit widergeltung ver-
hoffen/ die wölken sie auch nit lieben/ weder
freundschaft noch guten willen/ sonder feind-
schaftt erzeugen. Von solchen Halbchristen re-
det Christus im N. Euangelio also: Ihr habt
gehört daß gesagt ist/ Du solt deinen Nechsten
liebē/ vñ hassen deinen feind. Ich aber sage euch:
Liebet euwere feind/ thut wol denen die euch haf-
sen/ vnd bittet für die/ so euch verfolgen vnd be-
leidigen zc. Dann so ihr liebet/ die euch lieben/
was werdet ihr für lohn haben? Thun nicht das
selb auch die Publicanē? Vnd so ihr allein grüß-
set euwere Brüder/ was thut ihr weiter? Thun
nit das auch die Heyden? Darumb so solt ihr
volkommen seyn/ wie euwer Himmelscher Vate-
ter auch vollkommen ist. Daraus vernennen
wir:

wir: Welche wir lieben müssen/ wann wir rech-
te Jünger Christi vnd vollkomne Christen seyn
wollen: nemlich/ einer den andern/ vnd ein je-
der den andern/ nit angesehē feind oder freundt-
schafft. Lieben müssen wir nit allein die jenigen
so vns lieben/ vnd guts thun denen so vns guts
gethon haben/ sonder auch die jenigen so vnse-
re feind seynd/ so vns vbelts gethon vnd noch teg-
lich nit nachlassen/ vnd vns jimmer wie lenger je
mehr verfolgen.

Liebē müs-
sen wir vn-
sere feind.

Dise Lehr hat Christus der Herr seinen Jün-
gern vnd vns im letzten Abendmal/ nit allein
mündtlich geben/ sonder sich selbst als bald
vnd eben domaln/ zum vnfehlbarn Exempel ge-
stellt/ seiner Lehr vnd that nachzuolgen. Eben
jekund/ als der Herr im letzten Abendmal sei-
nen Jüngern dise Lehr geben/ vnd einandern zu
lieben gebotten hat/ ist sein höchster vnd grō-
ster feind am Tisch gefessen/ hat auch solche wort
vnd Predig von ihme angehört. Diser war Ju-
das Iscarioth sein eigener Jünger vnd Berrä-
ther/ diser hette seinen eignen Herren vnd Mei-
ster/ GOTTES vnd MARIAE Sohn/ am vor-
gehenden tag/ am Mitwoch/ den Jüden daselb-
sten zu Jerusalem vmb ein schönes Gelt/ nur
vmb dreissig Silberling verkauft/ hette auch
bey sich selbst albereit beschlossen/ ihne noch
dise nacht mit einem kusz zu verrathen: Dises
alles hat Christus der Herr/ deme als dem
wahren GOTT nichts unbewust/ jekund gar
wol gewist/ wie er selbst domaln gesagt: Ei-
ner vnder euch wirdt mich verrathen/ vnd eben
diser

Judas ein
verkauffer
vnd verrä-
ther Gottes
vnd des
Menschen.

**Liebe Chri-
sti zu seinem
höchsten
feind.**

**Christus ist
uns ein Ex-
empel.**

**Act. 7.
Luc. 23.**

**Wie vnser
Nechster
zu lieben.**

Matth. 22.

**Wie lieb
sich selbst
ein jeder
hab.**

diser/ welchem ich den eyngetauchten bitten ge-
ben wird/ vnd er gabe ihne dem Judas: nichts
desto weniger hat er ihme alles liebs vnd Väter-
terlichen willen erzeigt/ hat ihme nit weniger als
andern Aposteln seine füß gewaschen/ hat ihme
auch/ gleich wie andern Jüngern/ sich selbst
mit Gottheit vnd Menschheit/ Fleisch vnd Blut/
Leib vnd Seel/ zur speiß vnd tranck gereicht/ vnd
alles was nur von nöten war/ gethon. Gewiß-
lich andern Jüngern vñ vns zum Exempel/ daß
wir von ihme lernen/ vnd auch wie er/ vnser
freund nit allein/ sonder auch vnser feind lieben
sollen. Wie er dan auch hernach am folgenden
tag/ als er iekund bald sterben solt vñ wolt/ (wie
auch der H. Stephanus) für seine höchste feind/
so ihne gecreuziget/ seinen vnd vnsern Himme-
lischen Vatter gebetten hat.

Das ander/ so alhie zu wissen/ warzenernen
vnd im werck zu volnbringen von nöten/ ist diß:
Wie wir vnsern Nechsten/ das ist/ einen jeden
Menschen/ er seye freund oder feind/ lieb haben
müssen? Hierauff hat vns Christus der Herr/
zur andern zeit vnd ort/ mit disen worten geant-
wortet: Du solt deinen Nechsten lieben als dich
selbst. Wie lieb aber ein jeder vnder vns sich selb-
sten hab/ wirdt ein jeder leichtlich/ wann er nur
wil/ bey vnd von sich selbst lernen.

Bekennen mustu/ daß du dich selbst so lieb
hast/ daß du nit allein dir selbst kein vbel bewe-
sen/ keinen schaden noch leids thun wilt/ sonder
hast auch nit gern/ daß dir ein anderer vbel
füge. Du hast nit gern/ daß dich jemandts ver-
spotte/

spotte/ verachte/ verlache/ verhindere/ verun-
glimpffe/ betriege/ mit kauffen oder verkauffen/
mit maß/mess/Gewicht oder Eln vberneme/das
man dir das dein heimlich stele oder mit gewalt
neme/vnd was dergleichen mehr ist. Gern aber
hastu/das dich jederman lieb habe/das man dir
gutes nachrede/das man dich lobe/das man dir
gutes thue/ das man dir in deiner not zu hilff
komme/das man dir ohne Bucher leihe/das man
dich allenthalben fürdere/ vnd nit hindere. Je-
kund wende das Bletlin vmb/so wirstu finden/
wie du einen andern lieb solt haben: nemlich/
wie dich selbst. Wie lieb du dich selbst habest/
weistu jekund wol/also gedencf seye einem ande-
ren auch. Wan du einem anderen nit erzeigest/
was du von ihme nit gern gewarten woltest/ vn-
hergegen ihme beweifest/ was du gern gewarten
vnd haben woltest/es seye dasselbig was es wolle/
so hastu ihne so lieb als dich selbst: wo nit/so ha-
st du dich selbst lieber als ihne/ vnd erfüllest also
nit den Willen vnd Wort GOTTES.

Darumb wir aber vnsern Nechsten/ das ist/
alle Menschen/ so lieb als vns selbst haben
sollen vnd müssen/ ist diß die erste vrsach: Seite
maln solchs ein außtruckentlichs Gebott GOT-
TES ist/ wie im heutigen Euangelio von ihme
Christo selbst/ gehört ist wordē/ do er nit allein
zu seinē Jüngern/sonder auch zu vns Christē al-
len gesagt hat: Diß gebietre ich euch/das jr euch
vndereinander lieb habt. Vnd vor disen wortē/
eben in disem letzten Abendmal/hat er/der Herr
Christus/hieruon also gesagt/ vnd mit außtru-
cken.

Vrsachen/
darumb wir
vnsern nech-
sten lieben
müssen.

- Joan. 13.** klenlichen worten gebottē: Vnd jekund sage ich euch/ (meinen Aposteln vnd allen Christen) Ein new Gebott gibe ich euch/ das ihr euch vnder ein andern liebet. Vnd hiernon lehret auch der h. Paulus also: Von der liebe des Nächstē ist nit von nöten/ das ich euch vil schreibe/ dann ihr selbsten habt von GOTT gelernet/ das ihr euch vnder ein andern solt lieb habē. Anderstwo: Seyt nachfolger GOTTES als die geliebten kinder/ vnd wandelt in der liebe. Weil dan die liebe des Nächstē ein außdrucklichs Gebott GOTTES ist/ vnd wir/ als seine kinder/ ihme gehorsam zu leisten (do wir anderst wollen selig werdē) schuldig seynd/ sollen vnd müssen wir billich ein andern lieb habē. Darumb auch: Weil wir alle geschwisterig/ Brüder vñ Schwestern/ nit allein GOTTES kinder/ sonder auch alle von Adam vñ Eva herkommen seynd. Nun hat ein Glied am leib das ander so lieb als sich selbsten. Wann der fuß schlüpffert/ so kompt ihme die hand zu hilff/ auff das der leib nit falle/ noch der fuß verletzet werde. Wann die ein hand verletzt oder schwach ist/ so hat die ander hand ein mitleiden vnd trawret mit ihr. Ist der leib gesund vnd wol auff/ so freuen sich alle glider mit ihme/ vnd ein jedes Glied mit dem andern. Liebet also ein jedes Glied an seinem leib/ das ander/ so vil ihme möglich ist. Also sollen/ ja müssen billich auch wir Christen alle/ die wir alle nit allein brüder vñ Schwester/ sonder auch Glieder eines Hauptes IESV Christi seynd/ ein andern lieb haben: die gesunden mit den francken/ die frumen mit den bösen ein mitleiden
- Die 2. Vr-
sach.**
- Ein Glied
liebet das
ander.**
- 1. Cor. 13.**
- Ein jeder
soll ein mit.**

leiden haben: einandern gern verzeihen vnd ver-
 geben/alles vbelß vergessen/vnd nit mehr geden-
 ken/so werden wir rechte Jünger Christi/ rech-
 te Brüder vnd Schwestern seyn.

leiden mit
 dem andern
 haben.

Zu disem allem wissen wir auch diß wol/ daß
 ein jeder Mensch/ er seye wer er wölle/ so seinen

Die 3. Br.
 sach.

Nächsten nit lieb hat/ auch nit in der liebe/ huld
 vnd Gnade/ sonder im zorn GOTTES ist/ hie
 vñ (wo nit vor dem tod Puff geschicht) dort/ zeit-
 lich/ jüner vnd Ewig. Vnd diß bezeugt vns eben
 der H. Euangelist vnd Apostel Christi/ Joānes/

mit disen Worten: Wir wissen/ daß wir vom tod
 zum leben kommen seynd/ darumb/ daß wir die

1. Joan. 3.

Brüder lieben. Wer den Bruder nit liebet/der
 bleibt im tod. Wer seinen Bruder hasset/der ist
 ein Todtschleger. Vnd ihr wisset daß ein Todt-
 schleger hat nit das Ewig leben bey ihme blei-
 bend. Vnd an einem andern ort schreibet gemel-
 ter Apostel hiernon also: Ihr liebē/lasset vns vn-

1. Joan. 4.

derinandn lieb habē/dañ die liebe ist von GOTT.
 Vnd wer seinen Nächsten lieb hat/ der ist von
 GOTT geporen/vnd erkennet GOTT. Wer nit
 lieb hat/der kennet GOTT nit: daß GOTT ist die
 liebe ꝛc. Vnd bald hernach: Hat nū GOTT vns
 geliebet/ so sollē auch wir vns vndereinander lie-
 ben. Niemand hat GOTT jemaln gesehen. So
 wir vns vndereinander lieben/ so bleibt GOTT
 in vns/vnd sein liebe ist völlig in vns ꝛc. So je-
 mand spricht/ich liebe GOTT/vnd hasset seinen
 Nächsten/der ist ein lügner. Denn wer seinen
 Bruder nit liebet/den er sihet/wie kan er GOTT
 lieben/den er nit sihet? Vnd das Gebott haben
 wir

Gebott
Gottes.

1. Cor. 13.

Glaub ohne
die Liebe ist
nichts nutz.

wir von GOTT/ daß der/ der do GOTT liebet/
auch seinen Bruder lieben soll zc. Mit dem H.
Euangelisten Joanne/ stimmt auch vber ein der
H. Apostel Paulus/ do er also gelehrt vñ schrift-
lich hinder ihme verlassen hat: Wenn ich mit
Menschen vnd mit Engel zungen redet/ vnd die
Lieb nit hab/ so bin ich wie ein thönend Erz oder
klingende schell. Vnd wenn ich weissagen könnte/
vnd wuste alle geheimnuß vnd alle erkennuß/
vnd hette allen Glauben/ also/ daß ich die Berg
versetzte/ wo ich die Lieb nit hab/ so bin ich nichts.
Vnd wenn ich alle mein Haab den Armen ge-
be/ vnd liesse meinen leib brennen/ wo ich die Lie-
be nit hab/ so hilfft es mich gar nichts zc.

Auß welchen vnd dergleichen Sprüchen vnd
zeugnussen Christi vnd seiner H. Apostel leicht-
lich zu ernennen/ wie ein ernstlichs Gebott die
Liebe des Nächsten sey. Daß ein jeder Christ/ sei-
nen Nächsten als sich selbst zu lieben verbun-
den/ Daß vnser Nächster seye/ ein jeder/ so vn-
ser liebe/ hilff/ rath vnd gutthat bedarff. Vnd/
daß solchs Gebott von Christo nit nur den Apo-
steln/ sonder auch vns vnd allen Christen geben
sey worden/ deme wir auch/ do wir selig werden
wollen/ so vil vns möglich/ nachkommen müs-
sen. Vnd diß vom ersten Theil vorhabender
Predig.

In dem ersten Theil vorhabender Pres-
dig/ hat vns Christus vnser lieber Herr
gelehrt/ wie sich rechtschaffne Christen
gegen ihren Nächsten verhalten sollen/ nämlich/
alle Menschen als sich selbst lieb haben/ mit
Wor

Worten vnd Wercken/thun vnd lassen/handel
vnd wandel. In disem andern Theil aber/ ver-
meldet vns der Herr: Wie sich hergegē die Gott-
lose Welt/ die Tyrannen vnd vermeynte Chri-
sten gegen den rechten Christen verhalten wer-
den/ nämlich werden dise von jenen verfolget
werden/ geschmecht/ geschlagen/ verjaget/ ge-
martert vñ getödt. Also spricht der Herr ferners
im letzten Abendmal zu seinen Jüngern vnd zu
allen Christen: **So euch die Welt hasset/ so
wissent daß sie mich vor euch gehasset hat.**
Gar recht volgen dise wort Christi auff die vor-
gehende. In den vorgehenden Worten hat der
Herr seine Jünger ermanet/ ja ihnen gebotten/
sie sollen sich selbst vndereinandern/ vnd auch
ihren Nächsten/ als sich selbst/ lieb haben. Nun
hat Christus der Herr/ der nit nur wie vnser ei-
ner ein wahrer Mensch/ sonder auch wahrer
GOTT ist/ gar wol gewist/ daß seine Jünger vñ
andere frumme Christen/ nit angesehen daß sie
ihren Nächsten als sich selbst lieben wurden/
dennoch grosse verfolgung/nachstellung/ Peyn/
Marter/ vnd ihren vil auch den bitteren tod lei-
den müssen. Diser vrsach spricht er zu ihñe: **So
euch die Welt hasset/ so wisset daß sie mich vor
euch gehasset hat.** Als wolt der Herr zu seinen
Jüngern vnd allen frummen Christen gesagt
haben: Dis solt ihr wissen/ daß wann ihr gleich
thut wie vnd was ihr thun solt/ wann ihr gleich
lieb vnd ja so lieb als euch selbst habt/ nit allein
euwere freünd/ sonder auch euwere feind/ so wer-
den sie doch euch nit allein nit widerumb lieb ha-
ben/

Gleubige
vnd frumme
werden von
Vngleubi-
gen vnd vn-
frummen
verfolget.

ben/sonder mit Worten vñ Wercken verfolgē/
auß einer Stadt in die andern/ auß einem Land
in das ander verjagen/ fahen/ binden/ in ihren
Schulen werdē sie euch geißlen/ peynigen/ mar-
tern/ vñ endlich gar tödten vñ vmbbringen:
böses werden sie euch vmb guts geben/ vñ alles
leids thun/ was ihnen nur zu thun möglich ist:
vñ diß wil ich euch hiemit/ ehe dan es geschicht/
zu vor gesagt haben.

Christi welf-
sagung ist
erfült wor-
den.

Daß diese ernstliche vorsagung Christi/an sei-
nen lieben Jüngern/ vñ nit allein an ihnen/
sonder auch biß auff den heutigen tag/ an vnzal-
barlich vil tausent frummer Christen erfüllter sey
worden/ist der ganken Welt bewust. Sie all/die
H. Apostel/seynd bald nach der Himmelfart Christi
verfolget worden von den Gottlosen Jüden
vñ Vngleubigen Heyden/ einer also/ der an-
der anderst/ doch entlich alle biß in den bitteren
tod. Dann alle Apostel haben vmb Christi wil-
len den tod gelitten: Petrus/ Andreas vñ Phi-
lippus am Creutz/ diser mit dem Schwerdt/je-
ner also/diser anderst/aufgenommen Joannem
den Euangelisten/der eines Natürlichen tods
gestorben/ wiewol er auch grosse Marter im sie-
digen öl gelitten hat.

Alle Apo-
stel haben
den Tod ge-
litten.

Anderer heilige Lehrer vñ frumme Christen
haben nit weniger als eben die Apostel gelitten/
vñ etwann an einem tag ihren etlich tausent/
vñ diß alles wegē der warheit vñ Christlichen
Glaubens/ wie allen Catholischen Christen nit
kan vnbeuust seyn/vñ derhalben desse einer er-
weisung vnnötig.

Wil Christē
seynd ge-
martert
worden.

Es

Es erfahren zwar solchs noch auff den heutigentag vberflüssig genug/ alle frumme Catholische Christen/ welche auch jekund von den Gottlosen/ vnfrummen/ jekund von den Vngleubigen vnd Tyrannen/ jekund von den Kerkern vnd Mundchristen verfolgung/ nachstellung/ verjaagung/ Peyn/ Marter vnd Tod leiden müssen. Wie vil das Schifflein Petri/ die rechte wahre Christliche Catholische Kyrch/ diser zeit/ vñ eben auff disen heutigentag/ verfolger/ Todtschleger vnd Mörder habe/ achte ich auch vnnötig anzuzeigen/ oder weitleufftig/ daß ihme also seye/ erweisen wollen/ seitemaln (leider) solchs auch die geringuerstendigen vnder vns Catholischen wol wissen/ vnd mehrmaln dermassen selbst erfahren/ daß wir es nit allein mit Haab vnd Gut/ sonder auch mit Leib vnd Blut/ bezalen müssen. GOTT der wölle der zeit einest einende daran machen.

Verfolgung
der Catho-
lische Chri-
sten diser
zeit.

Auff daß aber die Jünger des Herren/ auch andere Catholische Christen/ in solcher verfolgung nit zu kleinmützig/ schwachgleubig/ sonder fest vnd bestendig würdē/ tröstet sie der Herr als bald darauff mit disen Worten: So wissent daß sie mich vor euch gehasset haben. Als wolt der Herr gesagt haben: Ihr solt euch gar nit verwundern/wañ es anfahet daß ihr verfolgü/ nachstellung/ vil Peyn/ Marter vnd auch den Tod leiden müßet. Dañ ihr wisset daß ich mehr als ihr/ ja euwer Herr vñ Meister bin/ habē oder werden dennocht meinen nit verschonen/ sonder ehe vnd vor euch verfolgen/ martern vñ tödten.

Christus
tröstet seine
Jünger vñ
Christen.

Mar. 26. 27

Mar. 14. 15.

Luc. 22. 23.

Joan. 18. 19.

Christus
hat ehe daß
die Apostel
gelitten.

Trost der
Catholische
Christen.

Daß diese weiffagung von vnd in Christo dem Herren wahrlich/ vnd eben zu Jerusalem alda er diese wort geredt/ erfüllt sey worden/ wissen wir alle wol. Ja täglich bekennen wir in vnserm Christlichen Apostolischen Glauben: Daß er Christus/ vnder Pontio Pilato gelitten/gecreu-
higet/ gestorben/ begraben vnd widerumb auff-
erstanden sey. Alle vier Euangelisten/ Matthe-
us/Marcus/Lucas vnd Ioannes bezeugen vns
gnugsam/ wie er noch heut diese nacht/ als er diese
wort geredet/ gefangen/ gebunden/ gerissen/ ge-
schleipff/ geschlagen/ gestossen/ verspottet/ ver-
spenet/ zu morgens am H. Karfreitag hin vnd
her geführt/ jehund zu diesem/ bald zu einem an-
dern falschen Richter/ daß er gebunden/ gegeiß-
let/ gekrönt/ seye worden: sein Creuz hat er selb-
sten auff seinem rucken durch die Stadt Jeru-
salem bis zur Schedelstatt getragen/ daran ist
er mit dreyen negeln gehefft/ also auffgerichtet
vnd getödt worden. Vnd dieses alles ist gesche-
hen nach seinen worten/ ehe daß die Apostel
verfolget/ gepeyniget/ vnd gemartert seynd
worden.

Bewislich schöpffen auß diesen worten Chri-
sti vnser Herr/ alle Christglaubige Menschē/
so auch hie auff Erden vmb Christi vnd des Ca-
tholischen Glaubens willen verfolgung leiden/
einen grossen/ ja einen zwysfachen trost. Erstlich
gedencken sie: Wolan/ ob ich gleich hie auff Er-
den von der Welt/ von den weltlichen/ Gottlo-
sen vnd vncatholischen Menschen/ vil nachrede/
nachstellüg/ verfolgung/ verjagung/ beraubung
meiner

meiner Güter/vnd endlich auch etwan meines
 leibs vñ lebens/leidē miß/ so hat mir doch mein
 lieber GOTT/Herr vnd Heiland IESVS Chri-
 stus/im letzten Abendmal zu vor gesagt/ daß mir
 also ergehn werde: weil es dann nit auß meiner
 schuld/sonder wegen des Namens Christi/ge-
 schicht/weil GOTT/deme nichts verborgen/
 solchs zu vor gewist/vñ mir gesagt hat/warumb
 wolte ich dann in solcher verfolgung nit willig
 seyn? Gern vnd gutwillig wil ich diß alles leidē/
 so lang es der will GOTTES meines Herrē ist/
 der würde vnd kan solche verfolgung/wann es
 sein Göttlicher will ist/gar wol von mir nehmen/
 vnd mich vor meinen vnd seinen feinden sicher
 machen. Do es dann sein Göttlicher will were/
 daß ich ihme also vnder dem Creuz biß an das
 ende meines lebens/ja auch biß in den tod/nach-
 folgen solt/im Namen GOTTES/so wil ich
 dennoch willig seyn: Dann mir nit vnberuust/
 daß das leiden hie auff Erden kurz/die Ewige
 frewd aber vnd Seligkeit ewig ist. Zweifelst mir
 auch nit/sonder biñ vergwissert/daß/wann ich al-
 le Verfolgung wegen der Wahrheit/vnd vmb
 des Catholischen Glaubens willen gedultig lei-
 de/daß mir GOTT/nit allein die Ewigen Se-
 ligkeit/sonder auch desto ein höhere kron jummer
 vnd Ewig geben wirdt.

Darumb soll ich billich/fürs ander/auch ge-
 tröst/in Peyn/Marter vnd tod gesterckt wer-
 den/weil ich weiß: Daß mein Heiland selbst
 auch gern vnd gutwillig/nit vmb schuld/sonder
 von meiner Sünd wegen/allerley verfolung/

Der 2. trost
 der Christen
 in ihrer ver-
 folgung.

Peyn/Marter vnd Tod gelitten hat. Do dann
mein Herr vnd GOTT der verfolgung/Peyn
vnd Tod nit hat sollen/ ja nit hat (das Mensch-
lich Geschlecht zu erlösen) wöllen vberhaben
seyn/ warumb solte ich mich dann/ der ich sein
knecht/ Jünger vnd diener bin/ solchs oder der-
gleichen zu leiden beschweren? beuorauß/ weil
mir der Herr im heutigen Euangelio selbst ge-
sagt hat: Der Knecht ist nit grösser dann
sein Herr. Haben sie mich verfolget/ so
werden sie euch auch verfolgē. Ja selig ach-
te ich mich/ daß ich neben meinem Herrē GOTT/
würdig binn/ von seines heiligen Namens vnd
Catholischen Glaubens willen/ verfolgung lei-
den. Er/ mein GOTT vnd Herr/ wölle mir
Gnad verleihen/ daß ich solchs alles willig vnd
gedultig leiden/ vnd volgens desto ein höhere
kron im Himmel bekommen möge. Also sollen
billich alle Catholische frumme Christen geden-
cken/ so vmb vnschuld verfolgung leiden. Also
sollen sich alle Christen nach dem Exempel der
zweyen Apostel Simonis vnd Jude/ den zweyen
Theilen diser Predig gemess verhalten/ auff daß
sie mit ihnen selig werden.

Was die
Christen zur
zeit ihrer
verfolgung
gedencken
sollen.

Simon vnd
Judas sein
der Lehr dis-
heutige Eu-
angelij nach
kommen.

Dann gewißlich dise beide Brüder/ sich un-
dereinandern/ auch andere Apostel/ sampt al-
len Menschen/ feinden vnd freunden/ so lieb ge-
habt haben als sich selbst/ vnd derhalben völ-
liaklich nachkommen disem heutigen Gebott
Christi: Dis gebierte ich euch/ daß ihr euch un-
dereinander lieb habt. So haben sie auch/ fürs
ander/

ander/ von den Jüden vnd Heyden nit wenig
verfolgung/ Peyn/ Marter/ endlich auch den
zeitlichen Tod gelitten.

Dise zween Apostel/ welcher Feyertag wir
auff heut halten/nämlich/ Simon der auch Ze-
lotes genant/vnd Thadens welcher auch Judas
genant wirdt/ waren zween Brüder/ vnd Ma-
rie Cleophe Sohn. Nach der Apostel Theilung
prediget Judas Christum in Mesopotamia vnd
Ponto. Simon aber prediget das Euangelium
in Egypten/ kamen darnach beide in Persien/
bekerten vnd taufften innerhalb eines Jars den
König Xerxen/ vnd vber sechs tausent vnd sech-
zig Man/ ohne Weib vnd Kinder. kamen end-
lich gen Sanir/ kerten eyn bey einem Christen
mit Namen Sennen/ warden sampt ihrem
Wirth/ auß anstiftung der Zauberer Zaroe
vnd Arphaxat/ von den Abgöttischen Pfaffen
umbgebracht/ vnd von dem König Xerxe gen
Babyloniam geführt/ der ihnen ein herrliche
schöne Kyrchen bauwen ließ/ alda ihre Heilig-
thumb geruhet. Welche beide Apostel/

Vom leben
Simons
vnd Jude.

Du Gütiger GOTT Herr
IESV Christ/ der du einen tag zu
vor ehe deinen tod gelitten/ im let-
sten Abendmal/ nit allein deinen Jün-
gern/

Gebetlin
zu Christo
vnserm Heil-
land.

gern/ sonder auch vns Christen allen/ ein
 neues gebott geben hast/ nämlich vnsern
 Nechsten als vns selbst zu lieben: hast
 vns auch vor gesagt/ Daß wir/ do wir
 frumb vnd Catholisch seyn wöllē/ wie wir
 dann billich sollen/ vil verfolgung/ nach-
 stellung von der Welt/ von den Vngleu-
 bigen/ von den Gottlosen Menschen/ vnd
 von den Halb vnd Mundchristen leiden
 müssen. Du seyest/ **GOTT**/ ganz vnder-
 thenig von vns gebetten/ vmb Gnedige
 verleihung eines verstendigen Herrkens/
 daß wir/ wie wir sollen/ vnsern Nechsten
 lieb haben/ vnd alle verfolgung gedultig/
 willig vnd gern/ auch/ do es von nöten/
 vmb deines H. Namens vnd Catholischen
 Glaubens willen/ den bitteren tod leiden/
 vnd also desto ein höhere kron im Himmel
 bekommen mögen/ Amen.

Am Tag des heiligen Bischoues
 vnd Martyrers Narcissi/ zum theil
 zu Augspurg feyerlich.

Am 29. Tag
 Decob.



Er H. Narcissus war zur zeit
 Diocletiani vnd Maximiani zu
 Gerunda in Hispania Bischoe.
 Zoge mit seinem Diacon Felice/
 auß Göttlicher Offenbarung auß
 Hispanien ins Teuschläd/ machet zu Augspurg
 auß

auff der Sünderin Afra/ ein heilige Püfferin ja
Marterin/bekeret sie/sampt ihrer Mutter Hila-
ria vnd drey Dienstmägden/wie oben auch am
7 Augustmonats gemeldet ist. Nach deme er nun
im selbigē land ein groß liecht des Glaubens hett
scheinen lassen/kam er widerumb gen Gerunda/
vnd ward daselbsten mit seinem obgemelten Di-
acon gemartert/welcher jekund GOTT für vns
bitten wölle.

E Vangelien vñ Predigē/wie mehr,
maln von den H. Martyrern ver-
meldet.

Am Tag des heiligen Bischoues
vnd Beichtigers Wolfgangi / zum
theil zu Regenspurg feyerlich.


Am 31. tag
Octob.

Dieser H. Wolfgangus ist von
Eodem stammen auß Schwaben
geporen/ vnd zu Trier geistlich ge-
wenhet/ist darnach von S. Ulrich
dem Augspurgischen Bischoff zum
Priester gemacht worden. Da er wolt in Polen
ziehen das Euangelium zu Predigē/ ward er vom
Passauwischen Bischoue auffgehalten/ welcher
sein wesen vñ geschickligkeit ersure/ vñ verschaf-
fet/ daß er/ auch ohne sein wissen / Bischoue zu
Regenspurg ward/zur zeit Keyseris Dithonis des
andern/im Leben/lehr vnd Wunderzeichen für-
treffentlich / verschiede endlich am Fieber / wel-
cher jekund auch GOTT für vns bittet.

e E s Euan

Evangeliē vñ Predigē/wie mehr-
maln von heiligen Beichtigern ver-
merckte.

Am Fest oder Feyertag aller
Heiligen GOTTES/Euan-
gelium Matth. v.



Luc. 6. 6

In der zeit/da nū IESVS
sahē das groß volck/stieg
er auff ein berg. Vnd als
er sich heit nider geset-
tatten zu ihm seine Jün-
ger. Vnd er thet auff sei-
nen müd/leret sie/vñ sprach:
Selig seynd/
die da arm seynd des Geists halber/
dann
das Himmelreich ihr ist. Selig seynd/
die
da

da weinen vnd leid tragen/ dann sie sollen
getröst werden. Selig seynd die sensstmu-
tigen/ dan sie werden besitzen das erdreich.

Isa. 61. a
66. e

Selig seynd/ die da hungerent vñ dürstent
nach der gerechtigkeit/ dann sie sollen geset-
tigt werden. Selig seynd die barmherzi-
gen/ dan sie werden barmherzigkeit erlan-
gen. Selig seynd die da seynd eines reinen

Jere. 13. d

Herzens/ dan sie werde GOTT anschau-
wen. Selig seynd die fridsamen/ dann sie
werden GOTTES kinder heissen. Selig
seynd die da verfolgung leiden/ vmb der
gerechtigkeit willen/ dann das Himmereich
ist ihr. Selig seydt ihr/ weñ euch die Men-
schen schelten/ vnd verfolgen/ vnd alles ar-
ge von euch sagen werden (vnd doch daran
liegen) vmb meinet willen. Freuwet euch
vnd seyt frölich/ dann euwer belohnung ist
sehr groß in den Himmeln.

1. Pet. 2. c 3. e

Act. 5. e

Selig seynd/ die da arm seynd im Geist/
dann das Himmereich ist ihr.

Matth. v.

Alle Catholische Christen im
aanken Christlichen Catholischen
Bapstumb / wissen wol / was die
Christliche Catholische Kyrch / auff
heut für ein Fest vnd Feyertag hal-
tet : wirdt gemeinglich genennet aller Heiligen
tag. das ist : Auff heut halten wir Feyertag/
erstlich

Am 1. No-
uemb.

erstlich GOTT/welcher der aller heiligest vnd der Heilig aller Heiligen ist/ zu lob vnd zu Ehren vnd zu Gnedigem gefallen: wir halten auff heut auch feyer zur gedechtnuß aller der jenigen/so ie auff Erden gelebt/ nun aber nach der Seel droben bey GOTT im Himmel seynd/vnd von vns Heilige (wie sie dann seynd) genennet werden/ als da ist MARIA die aller heiligste vnd Seligste Mutter GOTTES vnd des Menschen Christi/ alle Patriarchen/alle Prophetē/Apostel/Euangelisten/Marterer/Beichtiger/Lehrer/Jungfrauen/Witfrauen/Ehfrauen/Auch der Engel vnd Erengel/ Vnd in summa aller der jenigen gedechtnuß halten wir auff heut/ so bey GOTT der H. Dreyfaltigkeit im Himmel wohnen/vnd noch vnserer Glider seynd vnd bleiben/ vnd diß nit allein GOTT zur danck sagung/das er den Heiligen so vil Gnad/ verstand vnd vermögen verlihen hat/ daß sie hie auff Erden/ neben Christlichem leben vnd grossen Wunderzeichen/seinen heiligen Namen vnd Catholischen Glauben biß an das ende ihres lebens haben bekennen mögen/sonder vns auch zum Exempel/ ihnen/ so vil vns möglich/ nachzuolagen: ihnen auch zur danck sagung/ daß sie noch ohne vnderlaß droben im Himmel GOTT für vns bitten/ auff daß auch wir hie Christlich leben vnd dort mit ihnen mögen selig werden. Von disem aber zu seiner zeit.

Vorhabende Predig wollen wir kürzlich in zween Theil theilen. Im ersten wollen wir gar kürzlich anzeigen: Wie sich die Prediger nach dem

dem Exempel Christi/ vñ die Zuhörer nach dem Exempel dises heurigen Judenuöcklings verhalten sollen/ in ihrem predigen vnd zuhören. Im andern wollen wir kürzlich die erste Seligkeit auflegen/ vnd anzeigen: wie wir vns verhalten müssen/ auff daß wir arm im Geist seyen. Hierzu wollen die Heiligen GOTTES/ welcher Fest wir auff heut halten/ vor GOTT vnser Fürsprecher seyn.

Das zu allen zeiten des neuen vñ alten Testaments/ auch bey jeden leuten/ den Jüden vnd Christen/ die verkündigung des Wort GOTTES/ sampt den ernstlichen/ vleissigen/ embsigen Predigern des selbigen/ sehr vnd hoch von nöten gewesen seyen/ ist menigklich/ so nur ein wenig in H. Schrifft vnd gemeinem lauff jesiger Welt erfahren/ wol bewust/ welchs auch Christus IESVS vnser lieber Herr vnd Heiland ernstlich behersiget/ vnd derhalben / als er hieher auff Erden kommen/ selbsten Personlich ein zeitlang geprediget/ vnd diß nit nur an einem ort/ sonder jekund in Judea/ jekund in Galilea/ jekund in Samaria/ bald alda/ dann dort/ jekund zu land/ dann zu wasser/ jekund den Jüden/ dann auch etlichen Samaritanern/ erwann auch den Heyden/ neben Wirkung vñ volnbringung seiner Göttlichē Wunderzeichen/ Darumb/ daß er menigklich von der Abgötterey vñ Vnglauben/ vom Gottlosen vnd sündigen leben/ zum wahren Christlichen Glauben/ zu rechtschaffnem Gottsförchtigem handel vnd wandel/ bringen möchte. Eben solchs bezeugt

Prediger
des Wort
Gottes von
nöten.

Predig wo
zu von nöte.

Matth. 4.

zeugt auch von ihme/ kurz vor disem heutigen Evangelio/ der H. Euangelist Mattheus/ do er spricht: Vnd IESVS gieng vmbher im ganzen Galileischen land/ vnd lehret in ihren Schulen/ vnd prediget das Euangelium von dem Reich/ machet gesundt vnd heilet allerley feuchte vnd franckheit im Volck/ vnd sein gerücht erschall in das ganze Syrier land. Vnd sie brachten ihm alle francken/ so mit mancherley feuchten vnd quelungen behafft waren/ vnd die so Teufel bey ihnen hetten/ vnd die Mänsüchtigen/ vnd Gichtbrüchigen/ vnd er machet sie gesundt. Vnd es volget ihme nach vil Volcks von Galilea/ von den zehen Stedten/ von Jerusalem/ vom Jüdischen land/ vnd von jenseit des Jordans. Vnd hierauff volget diß heutige Euangelium also: Da nun IESVS das groß Volck sahe/ stiege er auff einen Berg. Vnd als er sich hette nider gesetzt/ tratten zu ihme seine Jünger. Vnd er thet auff seinen Mund/ vnd lehret sie. Beide/ die Prediger vnd Zuhörer/ die Hirten vnd die Schäflein/ haben alda nit geringe Lehren wol zu mercken/ die semigen von Christo/ dise vom heutigen Judennöcklin.

Prediger
vñ Zuhörer
haben alda
zu lernen.

Wie embsig/ vleissig/ ernstlich vnd eiferig Christus vnser lieber Herr/ das Wort GOTTES/ welchs sein Wort ist/ geprediget habe/ haben wir nit allein auß zeugnuß Matthei gehört/ sonder ist leichtlich auch auß jekund gemelten Worten zu lernen/ do er gesagt: Das ihme vil Volcks

Volcks nachgeuolget seye/ohne allen zweifel nit
 allein darumb/ daß sie wunderzeichen von ihme
 sehen vnd gesundt werden möchten/ sonder dar-
 umb auch/ vnd am allermeisten/ daß sie sein Pre-
 dig von ihme hören möchten. Darauß leichtlich Christus ein
 zu ernennen/ daß er Christus/ vleissig vnd vn-
 ableßlich geprediget habe: dann diß Judenvolck/ embsiger
 Prediger.
 so ihme auff heut nachgeuolget/ genßlich nit ge-
 zweifelt/ sonder wol gewiß hat/ er wurde auch
 jekund/ so bald er auff den Berg kömet/ zu Pre-
 digen anfahren. Also lernen wir Prediger erstlich/ Prediger
 wie wir ihme thun müssen/ auff daß auch wir/ sollen offter-
 maln predi-
 gen.
 wie Christus/ in vnser Predig vil Zuhörer ha-
 ben mögen/ nämlich müssen wir fürs erste/ off-
 termaln/ alle Sontag/ Fest vnd Feyertage/ auch
 sonst zu gelegner zeit/ vnd do es von nöten vnd
 möglich alle tag/ predigen. Dan ja diß gewiß ist/
 daß das gemeine Vöcklin/ zu einem solchē Pre-
 digen so offtermaln Prediget/ ein mehrere an-
 mutung hat/ dann zu einem anderen/ so etwann
 in vier wochē/ oder in einem halben Jar/ nur ein
 mal prediget. Werden bey vnd von vilen Predi-
 gern auch zu zeiten etliche Predigē erfordert/ ehe
 daß man ihne recht verstehet/ besond do die Pre-
 digen einer anderen lands art seynd/ wie dann
 mehrmaln das gemein Vöcklin pflegt zu sagen: Klag des
 gem. liden
 Vöcklins.
 Ein zimlich lange zeit haben wir vnsern Predi-
 ger nit recht verstehn könden/ jekund/ do wir sei-
 nen gewohnt/ ist er hinleßig worden/ wil nit mehr
 predigen/ oder wil sich gar von vns hinweg bege-
 ben: nun haben wir abermal ein halbes Jar zu
 schaffen/ bis wir eines anderē gewöhnē ic. So ist
 auch

auch diß wahr/ do man einen Prediger gern höret/ der auch mit seinem Predigen vil nutz schaffet/ prediget aber den einen Sontag/ den andern nit/ den drittē auch nit/ so bleibt man den vierten vnd fünfften Sontag auch aussen. Derhalben ein jeder Prediger vleiß ankeren soll/ daß er embfig vñ offtermaln/ so oft er schuldig vnd sonstn füglich geschehen kan/ predige/ auff daß ihme auch das Volck/ wie auff heut Christo dem Herren/ in grosser anzal nachlauffe.

An deme ist vil gelegen/ was man prediget.

Es ist aber nit alles an deme gelegen/ daß ein Prediger offtermaln predige/ sonder vnd noch mehr an disem/ was er predige. Als Christus auff heut predigē wolt/ stiege er auff einen Berg/ anzuzeigen (sprechē die Lehrer) daß er nit von geringen/ schlechten vnd nidertrechtigen/ vil weniger von vergebentlichen/ vnnützen/ leichtfertigen/ sonder von wichtigen dingen reden vñ predigen wölle/ nemlich/ von den acht Seligkeiten/ von achterley Mittel/ weiß vnd wege/ wie man fōnde vnd müsse Selig werden/ vnd von dergleichen wichtigen sachen mehr.

Der Glaub ist alleyn nit gnug.

Disem Exempel Christi können gar nit nach die jenigen Prediger/ ja die jenigen vermeyneten Predicanten/ so nichts von disen acht Seligkeiten/ sonder nur inmer vom Glauben sagen/ do man nur glaube/ so seye schon alles geschlicht/ gericht vnd eben gnug zur Seligkeit. Auch die jenigen Predicanten nit/ so nichts thund noch fōnden in ihren predigen/ dann nur den Papp/ Cardinal/ Bischoue/ Pfaffen/ Mōnch vñ Nonnen schenden/ schreien/ verspotten/ verachten/ verlachen

verlachen vnd gänglich verdammen. Auch die je-
nigen Prediger nit/so anstatt des Wort GOT-
TES/nur Fabeln/Narrenwerck/Meerlin vnd
sonsten vnnützen tandt/oder Ostermeerlin auff
die baan bringen. Ernstliche vnd wichtige hen- Was man
del/Artickel vnseres Christlichen Catholischen predige soll.
Glaubens/Stück des Christlichen handels vnd
Gottsförchtigen lebens/die Gebott Christi vnd
seiner Kirchen/alle Stück des Christlichen Ca-
tholischen Catechismi/die Liebe GOTTES vnd
vnseres Nächsten/sollen in verkündigung des
Wort GOTTES herfür gebracht vnd erörtert
werden/auff daß der Prediger das Wort GOT-
TES/vnd nit sein wort oder sonsten vergeben-
lichs vnd vnnuzes Gewesch/auff der Cankel
fürbringe.

Die Zuhörer aber des Wort GOTTES/das ^{Ampt der}
ist/alle Christliche Schäßlin vnd Pfarckinder/ ^{Zuhörer.}
haben auch von disem heutigen Judenuöcklin
ein sonderliche nuz vnd notwendige Lehr zu
schöpfen: Dis heutig Böcklin hatte nun ein
lange zeit (als auß dem H. Euangelisten Mat-
theo nit vnfüglich zu ernennen) bey Christo dem
Herren/ sein Predig von ihme zu hören. verhar-
ret/nichts desto weniger eilet vnd lauffet es ihme
noch weiter nach/ ja gar bis in das Holtz hin-
auß/bis in die Büste/bis auff einen hohen Berg
hinanff/ vnd ohne zweifel/ wie Matheus be- ^{Matth. 2.}
zeugt/widerumb nach vollendter Predig/welche
zimlich lang gewesen/ vom Berg hinab bis in
die stadt Sapharnaum/ sein Predig zu hören.
Ja mehrmal seynd sie/ die Jüden/ ihme bis
f S inden

Wort Gottes ist auch ein Speiß.

in den dritten tag/ ohne leibliche Speiß/ seiner geistlichen Speiß theilhaftig zu werden/ nachgeuolget.

Wort Gottes zu hören.

Wie sollen ja müssen sich billich schamen die jenen Christen/ welche kaum in einer Wochen ein stund/ geschwigen etlich tag aneinandern/ Christen das Wort GOTTES hören mögen: kommen nit gern auß dem Nechsten hauß/ vber ein oder zwei gassen in die Kyrchen/ geschwigen vber zwei/ drey/ oder etliche meil in ein Wüsteney/ in ein Holtz/ ja auff einen hohen Berg/ wie diß heutig Judenuöcklin gern/ gutwillig gethon hat. Gewißlich ist es vns Christen ein schlechtes lob/ ja ein grosse schand/ daß wir zu dem Exempel der Jüden gewissen werden/ von ihnen lernen das Wort GOTTES hören. Die weil wir aber vom fleiß vnd vnfleiß das Wort GOTTES zu hören/ anderstwo vnd weit leuffig gehandelt haben/ wollen wir solchs alda lassen anstehn/ vnd nun den andern Theil vorhabender Predig für die hand nehmen/ welcher etwas lengers als diser erste Theil seyn wirdt.

Mat. 5. 6. 7.

Diese heutige Predig/ so der Herr Christus auff dem Berg Thabor/ an einem Montag/ welcher war der vierzehnest Julij/ des ein vnd dreißigsten Jars seines alters/ zu dem Judenuöcklin/ fürnemlich aber zu seinen Jüngern/ gehalten hat/ ist zimlich lang/ begreiff in sich das fünffte/ sechste/ vnd siebende Capittel Matthei/ handelt auch von mancherley sachen/ erstlich aber erzellet er einandern nach die acht Seligkeiten/ seine Jünger/ die

Juden

Jüden / vnd vns Christen anzureißen / solchen nachstellen / vnd so vil vns möglich ins werck zu richten / auff daß auch wir nit verdampft sonder jimmer vnd Ewig selig würden / vnder welchen diß die erste ist: Vnd IESVS sprach im anfang seiner Predig: Selig seynd / die da arm seynd im Geist / dann ihr ist das Himmelreich. Im Geist arm seyn / kan auff zweyer ley weiß verstanden werden. Erstlich seynd diejenigen arm im Geist / so nit stoltz / nit vbermütig / nit hoffertig / sonder vor GOTT vnd der Welt demütig seynd / halten nit vil noch mehr auff sich selbst / dann sie seynd vnd seyn können / vnd sich einem Christen gebürt: lassen einen jeden neben Christen der arm ist / bleiben / verachtē / verlachen vnd vndertrucken niemands. Vnd ein solche Geistliche Armut ist so hoch von nöten / daß Christus zu seinen Jüngern / do sie gefragt / Welcher der größte im Himmelreich seye? gesagt hat: Es seye dann daß sie sich vmbkeren vnd werden wie die kinder / (so Demütig vnd Arm im Geist) so mögen sie nit eyngehn ins Himmelreich. Wie dann auch auff heut der Herr widerumb bekennt: Daß das Himmelreich derjenigen seye / so arm im Geist seynd / so nit Nasweise / auffgeblasene / vbermütige Phariseer oder sonstē stolke Scharhansen / sonder einfeltige / demütige Christen seynd. Fürs ander seynd auch diejenigen Christen Arm im Geist / so gern vnd gutwillig eufferlich an Haab vñ Güter / an Belt vñ Belts werth arm seynd: so die Armut ihnen von GOTT geschickt / gern vnd gutwillig an vnd auffnehmen / so

Im Geist
Arm seyn/
ist demütig
seyn.

Matth. 18.
Esa. 66.

Willig arm
seyn an dem
Gut / ist
Arm seyn
im Geist.

Ursachen/
darumb wlr
gern Arm
seyn s. llen.

lang/wie lang GOTT will/vnd do es der Will
GOTTES were/ auch bis in das Grab vnd en-
de ihres lebens: so GOTT wegen ihrer ober-
schickten vnd nun langwerigen Armut/nit allein
nit fluchen/(wie etliche verruchte/Gottlose/ver-
meynte ja verdampfte Christe thun) sonder auch
mit dem geringsten Wort oder Werck/zeichen
oder gedanken nit effren/seynd wol zu frieden
wie es GOTT mit ihnen machet: Wissen wol
das er nit vnrecht thun kan/wissen wol das
GOTT ihnen solche Armut ohne sonderliche
ursachen nit zuschicket: wissen wol das sie sich der
Reichthumb/do ihnen GOTT solche gebē/ober-
nommen oder doch mißbraucht wurden haben/
vnd also dem leib gedient/die Seel aber zur ver-
dammuß gebracht: wissen wol das Armut lei-
den hie auff Erden ein kurze zeit wehret: wissen
wol das die Himmelische Reichthumb groß/die
zeitliche Armut aber klein ist: wissen wol/wann
sie auff Erden ein zeitlang willig Arm seynd/das
sie droben im Himmel/so bald sich leib vnd Seel
scheiden/desto ein höhere kron immer vnd Ewig
haben werden.

Ein Rei-
cher kan wol
Seligwer-
den.

Sonsten machet die Armut für sich selbst
keinen Selig/gleich wie auch die Reichthumb
für sich selbst keinen zur Helle bringt. Ein Rei-
cher kan wol/wann er nur will/selig werden:
er kan auch/wann er will/verdampft werden.
Do er sich der Reichthumb recht gebraucht/
zum Lob vnd Ehr GOTTES/zu Wolfart seines
Nechsten/zu trost vnd hilff der Armen/ist nit ein
knecht/sonder ein Herr seines Gelds/gibt dassel-
big

big auß/wann vnd do er es nit behalten soll/ behaltet dasselbig/wann vnd do er es nit aufgeben soll/ so kan vnd mag er/vnd nur gar füglich/(do er den Catholischen Glauben hat) selig werden. Do er aber ein knecht des Weltz/vnd dasselbig sein Abgott ist/lasset ihme das Geld vnd Gut/ mehr dann GOTT vnd die Armen beuolhen seyn/nimpt dahin er nit gelegt hat/ behaltet das nit sein ist/gibt weder GOTT noch den Armen/weder dem dienst GOTTES noch an andere bedürfftige örter/nichts: sonder ist immer nur bedacht wie er mehr Geld bekomme vnd reicher werde/ es seye mit GOTT oder mit dem Teufel/mit liegen/betriegem/Bucher/schinden vnd schaben/falsch verkauffen vnd kauffen/mit falscher Maß/Reß/Ein oder gewicht/so faret gewißlich ein solcher dem Teufel zu/desse sein Reichthumb/ja der Mißbrauch derselbigen/ein vrsach gewesen ist.

Reichē können wol verdampft werden.

Also auch die Armut für sich selbst/machet niemand Selig/verdampft auch niemandt. An deme ist alles gelegen/wie ein jeder im Geist oder nit im Geist/das ist/willig oder vnwillig/arm ist. Die jenigen so arm seynd/seynd aber nit gern noch willig/sonder vnwillig oder vber ihren willen arm/murren etwann wider GOTT wegen ihrer Armut/seynd auch dahin bedacht/zu stellen/Rauben/mörden/oder sonsten wie sie können/jekund diß/dann jenes/mit liegen vnd betriegem vberkommen/dise werden ohne zweifel nit Selig/sonder immer vnd Ewig (do nit vor dem tod volkommenliche Puff geschicht) verdampft.

Armut für sich selbst/machet nit selig/verdampft auch nit.

Gebett zu
Gott.

Im Himmels-
reich seynd
vil wohnun-
gen.

Gebett zu
Gott dem
Himmels-
schen Vate-
ter.

dampft. Die jenigen aber so zu GOTT sagen: D
GOTT Vatter/ Schöpffer Himmels vnd der
Erden/du hast mir leib vnd Seel/ vnd alles was
ich hab vnd binn/ ohne meine vorgehende Ver-
dienst/ auß eitel Gnad vnd Barmherzigkeit/ ge-
ben: alles was ich hab vnd binn/ das ist dein/ alles
magstu/ wann vnd wie du wilt/ widerumb von
mir nehmen/ nach deme es deinem Göttlichen
willen wolgefellig. Vnd so es/ D GOTT/dein
Göttlicher will ist/ daß ich hie auff Erden/ eint-
weder mittelmessige oder gar grosse Armut lei-
den soll/ ein zeitlang oder bis an das ende meines
lebens / so binn ich willig/ vnd dein Göttlicher
will geschehe/ Dann ich weiß wol/ daß mir de-
ro wegen ein hoher Sitz/ Wohnung (dañ in dei-
nem Haus seynd vil wohnungen) vnd tron be-
reitet ist. An disem ist es jekund allein gelegen/
daß ich solche Armut/ bis an das ende meines
lebens/ oder so lang es dir gefellig/ im Geist/ das
ist/ gern vnd gutwillig an vnd auffnehme. Der-
halben/ D GOTT Himmelscher Vatter/ ich
bitte dich ganz vnderthenig vnd demütig/ durch
das heilig Rosenfarbes Blut deines Anigen
vnd geliebten Sohns IESV Christi vnseres ei-
nigen Trosts vnd Heilands / sende/ sampt ih-
me/ mir/ den heiligen Geist/ der jekund vnd jeder
zeit/ mir/ mein Herz dermassen erleuchte/ vnd
einen solchen verstand verleihe: Daß ich/ eint-
weder die Reichthumb / so du mir gnediglich
geben/ nicht mißbrauchen/ sonder also brauchen
möge/ daß du ein wolgefallen darüber haben mö-
gest: Oder aber die Armut also an vnd auffnem-
men/

men/ daß ich warhafftig Arm im Geist vnd willig Arm die zeit meines lebens erfunden werde/ Daß ich auch nit wegen der Armut/ auß eyngebung des Teufels/ auß anreitung des Belts/ der Welt/ des Fleisches/ bewegt werde/ meinem Nächsten das sein entfrembden/ sonder mich desjenigen/ so du vnd frumme leut mir geben/ genügen lasse zc.

Hierher/ nämlich in die zal derjenigen/ so im Geist Arm seynd/ werden auch billich dise gezelet/ so an zeitlichem Haab vnd Gut Reich seynd/ werden aber selbstnen/ von sich selbstnen/ ohne gezwungen vnd ohne getrungen willig arm. Vnd diß geschicht auff solche weis: Do einer sein Haab vnd gut/ hauß vnd hof/ wisen vnd äcker/ vnd alles was er hat/ den Armen gibt/ oder verschaffet solchs zum dienst GOTTES in die Gottesheuser/ in die Spital/ Klöster/ Siechenheuser/ Blatterheuser/ oder in anderer armer Leut heuser/ vnd behaltet ihme selbstnen nichts/ gar wenig/ oder doch nit mehr dann allein was die natur vñ notturfft notwëdig erfordert. Also seynd Arm worden die Jünger des Herren/ vnder welchen etliche / als Bartholomeus / Matthens vnd andere/ ein zimliche narung gehabt/ haben aber alles verlassen/ vnd seynd Christo nachgefolget/ dauon der heilig Euangelist Mattheus selbstnen also bezeugt: Als IESVS an dem Galileischen Meer gieng / sahe er zween Brüder/ Simonem der da heisset Petrus/ vnd Andream seine Bruder/ die wurffen ihre netz in das Meer/ dann sie waren Fischer. Vnd er sprach

Alles verlassen/ ist willig Arm seyn.

Die Jünger Christi seynd willig Arm worden.

f 3 4 zu ihnen:

Matth. 4.

zu ihnen: Folget mir nach. Bald verliessen sie ihre netz vnd volgeten ihm nach. Vnd do er von dannē fürbaß gieng/sahe er zween andere Brüder/Jacobum den Sohn Zebedei/vñ Joannem seinen Bruder im Schiff / mit ihrem Vatter Zebedeo/ daß sie ihre netz stückten/ vnd rießet ih-

Jünger ver-
lassen alles/
vnd volgen
Christo
nach.

Matth. 19.

Belohnung
der willigen
Armut.

nen. Bald verliessen sie das Schiff vnd ihren Vatter/ vnd volgeten ihm nach. Ja so gar haben die Jünger des Herren alles verlassen/ vnd willig arm worden/ daß Petrus zu ihm sagen dörrt: Sihe Herr/ wir haben alles verlassen/ vnd seynd dir nachgeuolget / was wirdt vns dann dafür? I E S V S aber sprach zu ihnen: Wahrlich sage ich euch/ daß ihr / die ihr mit seydt nachgefolget/ in der Widergeburt/ da des Menschen Sohn wirdt sitzen auff dem Stul seiner Herrlichkeit / werdet auch ihr sitzen auff zwölff stülen/ vnd richten die zwölff geschlechter Israel. Vnd ein jeglicher der da verlasset Haus/ oder Brüder/ oder Schwester/ oder Vatter/ oder Mutter/ oder Weib/ oder Kind/ oder acker/ vmb meines Namens willen/ der wirdt hundertfeltig widerumb nemmen/ vnd das Ewig leben besitzen.

Wit seynd
willig Arm
worden.

Es seynd aber nit allein die Apostel der gestalt willig vnd gutwillig arm worden/ sonder auch andere vil tausent heiliger Männer vnd Frauen/ so alle ihr Reichthumb verlassen/ vnd sich etwan in ein Büstenei/ etwan in ein Kloster/ begeben haben/ vnd noch teglich begeben/ sich mit rauhen kleidern anziehen/ auff harten betthen liegen/ schmale bißlin essen/ ihren Leib sehr casteyen/ mit

mit embsigem fastē einen grossen abbruch thund/
 GOTT tag vnd nacht mit betten/ singen/ lesen
 vnd anderen Christlichen vbungē mehr/ vleis-
 sig vnd embsig dienen/ sich mit vnd vmb das zeit-
 lich nichts bekümmern/ tag vnd nacht nach dem
 Ewigen trachten. Gewislich seynd solche Leut ^{hite Arm /}
 recht arm im Geist/ dort aber werden sie immer ^{dort Reich.}
 vnd Ewig reich an Leib vnd Seel.

Wie schwer es aber etliche Leut/ vnd beuer-
 auß die Reichen/ ankomme/ also alles verlassen
 vnd sich in die willige Armut begeben/ ist vns je-
 ner Jüngling ein gewisses vnd vnfehlbars Ex-
 empel/ so zu Christo dem Herren gesagt: ^{Matth. 19.}
 Meister/ was soll ich guts thun/ daß ich möge
 das Ewig leben ererben? Er sprach zu ihme: Frage etnes
 Wilt du zum leben eyngehn/ so halt die Gebott. ^{Jünglings}
 Do sprach er zu ihme: Welche? ^{zum Herren.} IESVS sprach:
 Du solt nit tödtē/ du solt nit Ehbrechen/ du solt
 nit stelen/ du solt nit falsche zeugnus geben. Eh-
 re Vatter vnd Mutter/ vñ du solt deinen Rech-
 sten lieben als dich selbstē. Da sprach der Jünge-
 ling zu ihme: Das habe ich alles gehalten von ju-
 gent auff/ was fehlet mir noch? IESVS sprach
 zu ihme: Wiltu vollkommen seyn/ so gehe hin vñ ^{Welche vol-}
 verkauff was du hast/ vnd gibs den Armen/ so ^{können seynd}
 wirstu einen Schaz im Himmel haben/ vnd
 köm vnd folge mir nach. Do der Jüngling diß
 wort höret/ gieng er betrübt von ihme/ denn er
 hat vil Güter. Also/ sprich ich/ geschichts nit ab-
 lein disem Jüngling/ sonder vil anderen Reichen ^{Schaz im}
 mehr/ so ihnen einen grossen Schaz im Himmel ^{Himmel}
 samlen könten/ in deme sie ihr haab vnd gut den ^{famlen.}

Die Reiche
haben das
Gut mehr
lieb/ dann
Gott.

Matth. 19.

Man kan
auch einen
Schatz im
Himmel sam-
len/ do man
nit alles ver-
lasset.

Die Armen
sollen wil-

Armen auftheilten/ vnd sich in die willige Ar-
mut begeben: Das Geld aber ist ihnen zu lieb/
vnd mehrmaln ein vrsach/ daß sie nit allein kei-
nen Schatz im Himmel bekommen/sonder auch
sie etwann selbstn gar darauß geschlossen vnd
verdampft werden/ wie nit vnfüglich auch auß
diesen Worten des Herrē/so er zu seinen Jüngern
geredet/als gemelter Jüngling hinweg gangen/
leichtlich abzunehmen ist: Wahrlich sage ich
euch/ daß ein Reicher schwärlich ins Himmel-
reich kompt. Vnd weiter sage ich euch: Es ist
leichter daß ein Kameel durch ein nadel öhre ge-
he/ denn daß ein Reicher ins Himmelreich kom-
me. Solten derhalben billich alle Christen dahin
bedacht seyn/ do sie ihre Güter nit alle verlassen/
vnd sich in die willige Armut nit begeben wol-
len/ dieselbigen doch also brauchten/ als brauch-
ten oder hetten (wie der H. Paulus sagt) sie kei-
ne: setzten ihr Sinn vnd gedanken nit so gar auff
das Geld vnd Geiz/ trachteten nit tag vñ nacht
wie sie noch mehr bekommen vnd noch reicher
werden möchten/hetten GOTT mehr dann das
Geld lieb: ließen ihnen ihren Nächsten/ vnd be-
uorauß die Armen/ wol benothen seyn/ kemen
ihnen mit ihrer Reichthumb/ mit Almosen ge-
ben/ Speiß vñ tranck/ in ihrer Armut vñ kränk-
heit zu hilff/ so wurden sie ihnen einen Schatz im
Himmel sammeln/ welchen kein Dieb stelen/ noch
der Rost nit verzere kan/ desse sie ohn ende in
Ewigkeit genießten wurden.

Die Armen aber/denen GOTT hie auff Er-
den nit vil zeitlichs Gut geben hat/ sollen willig
vnd

vnd gedultig Arm seyn/ vnd gedencen: Daß es ^{lie} Arm
 also der will GOTTES sey: Daß die Armut hie ^{seyn.}
 auff Erden ein kurze zeit wehret/ daß hergegen
 sie immer vnd Ewig droben im Himmelreich
 seyn werden. Do sie aber Arm/vñ doch nit Arm
 im Geist/ das ist/nit willig Arm seynd/könden sie
 vmb GOTT wol verschulden/ daß sie hie vnd
 dort zeitlich vnd Ewig Arm seyn müssen.

Hie vnd
 dort Arm
 seyn.

Also mercken alle Prediger auß diser kurzen
 Predig: Daß sie/nach dem Exempel Christi vn-
 sers Herren/ embsig vnd vleissig/mehrmaht vnd
 willig/predigen sollen/vnd nit Fabeln/Meerlin/
 oder sonsten Narrentandt/ sonder von hohen
 wichtigen dingen/von Stücken des H. Catechi-
 smi vñ dergleichen/ was zum Catholischē Glau-
 ben vnd Christlichen leben von nöten ist. Es sol-
 len auch die Zuhörer lernē: Daß sie/als die Ca-
 tholischen Schäflein/ die speiß vnd wende ihrer
 Hirten vnd Pfarherren/ vleissig/ so offte ihnen
 möglichen/ besuchen/ das Wort GOTTES ernst-
 lich/ mit lust vnd begirde anhören/ die heiligen
 Sacramenten begirlich empfangen/ vnd sich in
 allen Christlichen dinge/ wie sichs einem Catho-
 lischen Christen gebürt/verhalten. Die Reichen
 sollen sich ihrer Reichthumb also gebrauchen/
 daß sie ihnen einen Schatz im Himmel samlen.
 Die Armen sollen hie auff Erden im Geist Arm
 seyn/auff daß sie dort mögen Reich werden.
 Auff daß solchs desto ehe geschehe/so lasset vns zu
 GOTT also bitten vnd betten:

Beschluß
 diser Pre-
 dig.

B Armherziger GOTT Herr IESV ^{Gebett zu}
 Christ/ der du nit allein hieher auff ^{unserm Hei-}
 Erden ^{land Jesu}
 Christo,

Erden kömten/ vnd dich den versprochenen
 Messiam erkleret/ sonder auch vleissig vnd
 embsig geprediget/ vñ auff heut im anfang
 einer langen Predig/ die acht Seligkeiten
 gelehrt/ vnd fürnemlich vns zur willigen
 Armut ermanet hast: Wir bitten dich erst-
 lich ganz vnderthenig/ vmb solche Predi-
 ger/ die vns/ wie du gethon/ dein Wort/ die
 fürnemste Stück des Christlichen Glau-
 bens vnd Gottsförchtigen Lebens/ embsig
 vnd vleissig verkündigen: Daß auch wir
 solchs mit lust/ liebe vnd andacht anhören/
 behalten/ vnsern Glauben/ Leben/ thun vñ
 lassen/ Wort vnd Werck darnach richten
 mögen. Daß wir auch/ fürs ander/ die
 Reichthumb/ so du vns geben/ dir zu gefal-
 len/ vnserm Nechste zu nutz/ vnser Seelen
 zu trost/ brauchē/ Vnd die Armut also an-
 vnd auffnehmen mögen/ daß wir warhaff-
 tig arm im Geist/ das ist/ gutwillig Arm
 erfunden/ vnd dan nach disem zeitlichen le-
 ben Ewig Reich werden mögen. Hierzu
 bittē wir euch/ O ihr Heiligen GOTTES
 alle/ deren Fest wir Catholische Christen
 auff heut halten/ daß ihr vor dem H. Ange-
 sicht GOTTES/ welches ihr ohne vnder-
 laß sehet/ vnserer Fürsprecher seyn wolt/
 auff daß auch wir zu euch kommen/ vnd
 Ewig bey euch wohnen mögen/ Amen.

Am

An aller Seelen tag Euange-
lium Joannis v.



Warlich warlich sage ich Mar. 5. e
 euch / es kompt die stund / Joan. 11. e
 vnd ist schon jetzt / das die 1. Thess. 4. e
 todten werden hören die
 stimm des Sohn G O T-
 T E S: vnd die sie hören
 werden / die werden leben. Dann wie der
 Vatter das leben hat in ihme selber / also
 hat er auch dem Sohn geben das leben zu
 haben in ihm selber. Vnd hat ihm macht
 geben das Gericht zu halten / darumb das
 er des Menschen Sohn ist. Verwundert Dan. 12. a
 euch des nit / dann es kompt die stund / in Matth. 25. b
 welcher

welcher alle die in den gräbern seynd werden hören die stimm des Sohns GOTTES. Vnd es werden herfür gehen die da guts gethan haben/ zur aufferstehung des lebens: die aber vbels gethan haben/ zur aufferstehung des Gerichts.

Vnd es werden herfür gehn die da guts gethan haben/ zur Aufferstehung des lebens. Ioan.v.

Am 2. No-
uemb.

Estern haben wir das Fest aller Heiligen GOTTES gehalten/ auff heut jährliche Gedechnuß aller Christglaubigen Seelen. Gestern haben wir die jenigen Heiligen/ so albereit bey GOTT im Himmel seynd/ angeruffen/das sie bey GOTT/welchen sie ohne vnderlaß sehen/ vnser Fürsprecher seyn wollen/ auff das auch wir hie auff Erden/wie sie/ Catholisch glauben/ Christlich leben/frumb vñ Gottsförchtig sterben/ vnd endlich selig werden mögen. Auff heut bitten wir GOTT für alle die jenigen Seelen/ so nit in der Hell/ auch noch nit im Himmel/ sonder am dritten ort/ in der zeitlichen straff/ das ist/ im Fegfewr seynd/ auff das sie durch vnser Gebett vnd andere Christliche vbungungen so wir für sie volnbringen/ eintweder ihrer straff gar entledigt/oder doch dieselbig geringert/oder aber die zeit der Peyn gekürzet/vñ sie also auß dem Fegfewr in die Ewigen freud vnd Seligkeit auffgenommen werden.

Di

Diser vrsach (darumb auch/ weil heutigs Eu-
angelium fürnemlich von Auferstehung der
todten handelt/ vnd wir hieruon zu seiner zeit vñ
ort tractiert haben) soll vorhabende Predig in di-
se zween Theil abgetheilt werden: Erstlich/ zeigen
wir mit wenig worten an: Daß die Seelen im
Fegfewr zu vns schreyen/ vnd vnser hilff begerē.
Im anderen/ etliche Vrsachen/ darumb wir den
Seelen im Fegfewr billich sollē verholffen seyn.
Vnd dieweil ich euwer andacht/ ongefärllich vor
zweyen Jaren/ vierzehen Leichpredigē fürgehal-
ten/ wöllen wir jekund die zwölffte auß densel-
bigen widerumb für die hand nemen/ seitemaln
sie eben von disen beiden Pünctlin handelt/ wel-
che ihr mit gedult anhören wolt/ so wil auch ich
euch solche auff das leichtest vnd fürkest gern
fürhalten. GOTT wölle mir vnd euch hierzu
sein Göttliche Gnad verleihen zc.

Heutiges
Euangeli-
um wirdt
auff heut in
diser kleinen
Postill nit
gehandlet.

Theilung
vnd Inhalt
diser Pre-
dig.

ICH vermeyne nit daß je mandts
vnder euch solte erfunden werden/ der
nit selbst vnd jekund glaube/ ohne weit-
leufftge erweisung/ daß die armen Seelen im
Fegfewr/ tag vnd nacht/ vnd ohne vnderlaß/
zu vns Menschen hie auff Erden/ die wir/
ihre/ vnd sie auch noch vnser Mitglieder
seynd eines Hauptis/ welches Christus ist/
schreyen/ vns vmb hilff anruffen vnd bey-
stand begeren/ auß allen ihren kräftten/ vnd ja
so sehr/ daß wann sie jekund auff einerley
weiß selbst mit vns reden solten/ so wurden
wir ohne vnderlaß/ mit grossem geschrey vnd
jämmerlichem klagen/ von ihnen hören/ dise
wort

Die Seelen
im Fegfewr
begeren vns
ser hilff.

Job 19.

wort des H. Jobs/ so er zu seinen freunden geschryen: Erbarmet euch mein/ erbarmet euch mein doch/ ihr meine freunde/ dann die hand

Gen. 40.

GOTTES hat mich gerürt. Vnd wie Joseph zu jenem schreyet: Bedenck meiner wann dir's wol geht/ vnd thu Barmhertzigkeit an mir das du

Segfewr ein
gefengnuß.

Pharao erinnerst/ das er mich auß diser gefengnuß führe.

Ursachen/
darumb die
verstorbenen
vmb hilff zu
uns schreyen.

Was ist aber/ die trübsal Jobs/ vnd die gefengnuß Josephs/ gegen dem Segfewr vnd derselbigen Peyn zu rechnen? Nichts vberal. Ein kühles Meyen thaw/ eitel freud vnd wollust ist jenes gegen disem zu rechnen/ derhalben auch sie/ die Seelen im Segfewr/ vil ein mehrers rüffen/ embsigers schreyen/ seuffcken vnd klagen zu uns haben vmb hilff vnd beystand/ dann obgemelte zu ihren freunden: Vnd dis so vil desto mehr/ dieweil sie gar wol wissen/ das ihnen zu helffen ist/ dieweil sie wol wissen/ das wir ihnen verhilfflich seyn könden/ dieweil sie wol wissen/ das sie nit in der Hell/ noch in der Ewigen verdammnuß/ sonder nur im Segfewr vnd in zeitlicher straff seynd/ dieweil sie wol wissen/ das sie in der Gnad vnd liebe GOTTES seynd/ dieweil sie wol wissen/ das sie selig werden so bald sie gar geleutert vñ gepurgiert seynd/ dieweil sie wol wissen/ das sie nit allein durch ihr Peyn/ sonder auch durch vnser fürbitt/ mögē gepurgiert/ der Sünd oder Straff derselbigen ledig werden/ dieweil sie wol wissen/ das sie noch vnser vnd wir ihre Mitglieder seynd/ dieweil sie auch zu letzt wol wissen/ das wir ihnen/ gleich wie ein Glid dem anderen/

1. Cor. 12.

Gal. 6.

deren/ zu helffen schuldig/ vnd ihnen vnser hilff
vnd fürbitt nit können noch sollen abschlagen.
Darumb/ vnd auß anderen vrsachen/ schreyen
oder seuffzen sie/ tag vnd nacht/ ohn vnderlaß/
ymb vnser hilff vnd beystand/ damit sie auß dem
Fegfewr erlöset / der selbigen Peynn entlediget/
vnd volgendts deffer ehe selig werden.

So wahr ist dieses/ so sekund gesagt/ daß auch
Luther der abtrünnig selbst/ ohn gezwungē/ mehr
als an einem ort in seinen Schrifften bekennet
hat vnd gesagt: Was die Seelen im Fegfewr ma-
chen/ vnd wie es vmb sie gethon sey/ ist gnug daß du wis-
sest/ wie sie in grosser vntreglicher Peynn seynd/ vnd del-
ner hilff begerē zc. Vñ noch ein mal spricht Luther:
Man soll fest glauben/ vnd ich weiß daß wahr ist/ daß
die Armen Seelen vnstätliche Peynn leiden/ vnd man
ihnen zu helffen schuldig ist/ mit Betten/ Fasten/ Almu-
sen/ vnd was man vermag zc.

Luth. Tom. 7.
fol. 121.
Er in Resol.
Indul. Con-
clus. 15.

Luth. Tom. 7.
fol. 6.
Bekantnuß
Lutheri.

Aber/ was fragen oder bedörffen wir Catho-
lischen/ der zeugnissen Lutheri/ des außgesprün-
gen? Nichts/ gar nichts: Den H. Augustinum/
der ein H. Kirchenlehrer gewesen ist/ der nit nur
vor fünffzig Jaren/ wie Luther/ sonder vor eilff
hundert Jaren/ gelebt vnd gelehrt hat/ disen/
sprich ich/ wöllen wir hieruon hören reden/ wie
die Seelen im Fegfewr vnser hilff begeren/ wie
vnd warumb wir ihnen billich sollen zu hilff kom-
men/ vnd wie er/ eben der H. Augustinus/ vns
straffet/ daß wir so faul/ träg/ hinlässig/ vnarm-
herzig vnd vn menschlich handeln/ daß wir ih-
nen/ auch ihr jämertlichs vnd erbärmlichs ge-
schrey ohn angesehen/ so gar nit zu hilff kommen.
Also spricht der H. Augustinus: Die/ so in der
Peynn

Aug. Tom.
10. serm. 44.
ad Frat. in
erem.

Geschrey
der Seelen
im Fegfeyr
zu vns hie
auff Erden.

Bitten für
die verstorb-
nen.

Peynn seynd/schreyen täglich zu vns/ aber deren
seynd wenig/die ihnen antwort geben: Sie heu-
len/vnd niemand ist/der sie tröstet. O ihr meine
liebē Brüder/wol ist diß so ein grosse vnmensche-
lichkeit/dise/ so in ihren leben/vil vbelß von vn-
sertwegen gelitten hetten/schreyen jezund zu vns
täglich/ vnd wir besteissen vns nit/ wie wir
ihnen mögen zu hilff kommen. O/ gewißlich vnd
fürwar/ istß ein grosse vnfreundlichkeit: Si-
he/ ein Krancker ligt vnd schreyet/ vnd er wirdt
vom Arzet getröstet: Ein Schwein das schrey-
et oder runket/ vnd alle lassen nit abe/ mit ihme
zu schreyen: Ein Esel der felt/ vnd jederman ei-
let ihme zu helffen: Aber der gleubig schreyet in
der Peynn/ vnd niemandts ist der ihme antwort
gebe. Sihe/ diß ist euwer vnmenscheit ihr mei-
ne lieben Brüder. Nit also/ ihr meine lieben
Brüder/ sonder gedeneckt/ daß es ein gute vnd
heilsame/ ein Gottsförchtige vnd selige gedan-
ckung/ auch GOTT vnd den Engeln angene-
me ist/ bitten für die Verstorbenen/ auff daß sie
von ihrer Peynn/ so sie wegen ihrer Sünd lei-
den/ entlediget werden. Bishero der H. Augu-
stinus.

So außdruckentlich erweisen dise wort des
H. Augustini/ alles das/ so wir bishero gesagt
haben/ daß ich/ die selbigen mit einem wort
zu widerholen/ vil weniger/ mit verlust der
zeit/ weitleuffig außzulegen/ nit von nören ad-
ten thu.

Dieweil dann deme also/ wie wahr ist/ daß
die Seelen im Fegfeyr/ so inniglich vnser hilff
bege-

begere/ solchen trost vnd zumerficht zu vns ha-
ben/ daß wir ihnen helfen können vnd werden/
vnd wir noch ihre vnd sie vnserer Glider seynd/
vnd ein Glid dem anderen/ wo vnd so vil mög-
lich/ beyzustehn vnd zu helfen schuldig ist: So
vermeyne ich/ vnd meniglich muß selbst bekenn-
en/ daß es billich/brüderlich/Christlich/nützlich
vnd notwendig seye/ daß wir ihnen zu hilff kom-
men/ auß vrsachen wie jekund im andern
Theil vorhabender Predig soll gelehrt vnd ge-
hört werden.

Die erste Vrsach/ darumb wir den ^{1. Vrsach.}
Seelē im Fegfeyr billich zu hilff kom-
men sollen/ ist: Daß wir hierzu in
Göttlicher heiliger Schrift ermanet werden.
Ja darumb/ daß die H. Schrift außdrucklich
bezeugt/ daß das Opffer vñ fürbitt für die Ver-
storbnen/ für welche solches geschicht/ nützlich vnd
gut sey zur vergebüg der Sünd oder nach-
lassung der Peyn/ so sie wege der Sünden
leiden/ Dann also stehet geschriben: Also sam- ^{2. Mach. 12.}
let er (Judas Machabeus) von ihnen/ ein steur/
daß er zusammen bracht auff zwölff tausent Dra-
gmen Silbers/ die schicket er gen Jerusalem/
daß man da opffert/ ein Opffer für die
Sünd der verstorbnen: Dann er hatt ein ^{Aufferste-}
rechts vnd dem Glauben ein gemessigs beden- ^{hung des}
cken von der wideraufferstentnuß. Dann wo er ^{Sielschs.}
nit vermeynt hette/ daß die/ so erschlagen wa-
ren/ solten wider aufferstehn/ so were es je ver-
gebenlich vnd vnnützlich gewesen/ für die/ die todt
waren/

waren/ Gebett vnd Opffer zu thun. Dieweiler auch merckt/ daß die/ so in GOTTES huld vnd rechtem Glauben sterben in guter ruh/ vnd genaden seynd ihnen vorbehalten. Darumb ist ein heilige vnd gute meynung/ daß man für die Todtē bittet/ daß sie von Sünden ledig vnd loß werden.

Die Neuw-
wen Christē
wollen lieber
den Jü-
den dan den
Christē nach-
folgen.

Aug. Tom. 4.
lib. De cura
pro mort.
agend. cap. 1.

Aug. Tom
10. Sermon. 44.
ad Frat. in
erem.

Dieweil diser Text der H. Schrifft gar zu Teutsch/ wissen ihm die neuwen Christen anderst nit zu entrinnen/ dann daß sie auff Jüdische weiß nit allein angezognen Text vnd zeugnuß/ sonder auch das ganze Buch/ darinnen er stehet/ verwerffen: welches doch vns Catholische Christen gar nichts bekümmert/ dann wir vil lieber mit der gangen Christlichen Kirchen/ vnd den H. Vätern/ dise Bücher der Machabeer sampt disem Text annemen / dann solche mit den Jüden vnd Neuwen Christen verwerffen wollen.

So glaubwürdig/ wichtig vnd Canonisch/ seynd vor eilff hundert Jahren in der Christlichen Kirchen/ gemelte Bücher/ vnd angezogne zeugnuß gewesen/ daß sich der H. Augustinus/ deren selbst/ das Fegewur vnd fürbitt der Verstorbnen zu erweisen/ mit disen Worten gebraucht hat: In den Büchern der Machabeern lesen wir/ daß für die Verstorbnen sey ein Opffer auffgeopffert worden 2c. Wo der sagt er: Nemmet war/ was Judas Machabeus gethon habe/ dann er hat gesagt: Es ist ein heilsame vnd gute gedancung/ bitten für die abgestorbnen/ auff daß sie von der Sünd entle- diget

diget werden zc. Vnd noch in vil anderen orten
mehr hat der H. Augustinus in seinen Bü-
chern/ gemelten Spruch angezogen/ vnd eben
das/ was ich begere/ darauff erwisen. Derhalben
auch ich/ vnd nur gern/ mit dem H. Augustino
vnd ganken Christlichen Kirchen/ wider die
Juden vnd neuwen Christen/ gemelte zeugnuß/
für ein zeugnuß vnd spruch der H. Schrift/ hal-
ten thu/ vnd volgentes/ für ein wichtige vnd
gnugsame vrsach/ warumb wir Christen/ billich
vnd mit willen/ auch so vil vns möglich/ den ar-
men Seelē im Fegewr/ sollen zu hilff kommen/
nach dem Exempel des streitbaren Helden Ju-
de Machabei/ nach anleitung der Göttlichen H.
Schrift/ für sie opffern vnd bitten/ auff daß sie
von ihrer Sünd loß vnd ledig/ vnd als dann se-
lig werden.

Zur andern zeit habe ich/ auß zeugnuß Joan-
nis des Apostels vnd Euangelisten/ erwisen/ daß
wir auch für die Sünd der Verstorbenen bitten
mögen/ do er gesagt: Wir sollen für die Sünd/
so zum Todt ist/ nit bitten: welches nit kan von de-
nen/ so noch leben/ verstanden werden/ dann wir
für solche bitten mögen vnd sollen/ wie grosse
Sünder sie immer seynd vnd seyn mögen/ da-
von droben gnugsam gesagt.

Vnd wann schon von disem allem/ in ganker
H. Schrift durchaus nichts geschriben stündte/
so wurde darumb hierauf nit volgen/ daß wir
für sie nit bitten solten/ daß wir darumb für sie
zu bitten nit andere vrsach hetten/ dieweil nit al-
les/ so von nöten/ durchaus/ in der H. Schrift
Joan. 16. 21.
36 3 begrif-

Bücher der
Machabeer
seynd Bi-
blische Bü-
cher.

B. s. die
4. Predig.

1. Joan. 5.

Joan. 16. 21.

Tom. 4. De
cura pro
mort. agen.
cap. 3.

begriffen ist: So möchte ich demochte mit dem
H. Augustino sagen: In den Büchern der Ma-
chabeer lesen wir / daß für die Verstorbenen
ein Opffer sey auffgeopffert worden. Wann
aber gleich solches in alten Schrifften nir-
gents gelesen wurde / so ist doch nit klein
hierinnen die Auctoritet der Kyrchen / so
solches im brauch hat zc. Derhalben wir
abermal / billich / auß bewegung der H. Schrift
vnd ansehen der H. Christlichen Kyrchen / den
armen Seelen im Fegfewr zu hilff kommen
sollen.

2. Ursach.

Die ander ursach ist: Dieweil alle die so im
Fegfewr / vnserer Brüder vnd Schwester seynd /
(nit allein wegen Adam vnd Eua / dauon wir
alle herkommen) sonder auch etwan vnserer eige-
ne Eltern / Vatter vnd Mutter / vnserer eigne
leibliche Kinder / rechte Brüder vnd Schwe-
ster / Blutsfreund seynd / denen wir ja gewis-
lich / vnd vnwidersprechlich / guts nachzuhurt
vnd zu helffen / wa mit vnd so vil vns möglich
ist / schuldig seynd / wie dann ohne weitläuffige
erweisung menigklich bewust ist / auß natürlichen
ursachen vnd brüderlicher liebe.

Vnserer
freund im
Fegfewr.

Vnd wann es schon sach were / daß dir be-
wust solt seyn / wie es dann dir nit bewust ist / daß
du weder Vatter noch Mutter / Schwester
noch Brüder / weder freund / kind noch gesind
im Fegfewr hettest / so werest du doch für die an-
deren so darinnen seynd / zu bitten / schuldig / die-
weil sie noch deine Mitglieder / dieweil sie noch
dein

Vnserer mit-
glieder im
Fegfewr.

dein Nächster seynd/ welche du/ als dich selbst/ lieb zu haben schuldig bist: welches dann nit geschicht/ wann du ihnen in ihr Peynn nit wirst zu hilff kommen. Du kanst/ vñ wirst mir auch nit können in abred stehn/ sonder du must bekennen/ daß/ wann du in solcher Peynn werest/ so begerest du daß dir jederman geschwind vnd als bald zu hilff käme: Also gedenc daß einem anderen auch sey. Wann du derhalben/ deinen Nächsten/ als dich selbst/ wilt lieb haben/ so be- weise ihme eben das/ was du von ihme in solcher Peynn gewarten woltest. Unser Haupt ist Christus/ vñ dieses Hauptes seynd wir alle Glieder/ wir alle/ (alle Christen) im Himmel/ im Fegfeyr vnd auff Erden/ seynd Mitglieder zusamen. Nun ist jedermann bewust/ wie die Mitglieder an einem Leib einander beystehn/ einander so bald zu hilff kommen: so bald der ein fuß straucht/ als bald kommet ihme der ander zu hilff/ auff daß er nit falle: ist die ein hand krank/ so hat die ander ein mitleiden mit ihr ic. Also sollen auch wir Mitglieder thun. Dis aber wirdt geschehen/ wann du dich freundlich vnd diensthafft/ nit allein gegen den Armen auff Erden/ sonder auch gegen den armen Seelen im Fegfeyr/ erzeigen wirst/ mit Bitten/ Betten/ Opfern/ Almusen/ Fasten/ vnd was dergleichen mehr ist.

Darumb hat vns Mitgliedern der Apostel Jacob befolhen/ für einanderen zu bitten: Dar. Jacob. 5. umb hat vns der Apostel Paulus befolhen/ einer des andern Bürde zu tragen/ wie dann Galat. 3. 6.

Liebe des
Nächsten.

Christus
vñser haupt.
1. Cor. 12.
Rom. 12.
Ephes. 4. 5.
Colos. 1.

den Gliedern eines Leibs gebüret / sonsten wurde das Haupt nit wol zu Friden seyn / wan ein Mitglied dem anderen / auch in seiner höchsten Not nit wolt zu hilff kommen vnd könnte doch solches wol thun.

3. Ursach.

Zum dritten soll vns bewegen / ihnen zu helfen / die grosse vnaussprechliche Peen / die sie ohn vnderlaß im Fegfeyr leidē / durch die beraubung der anschawung des H. Angesichts GOTTES vnd des ganken Himmelschen Heers / auch durch das Feyr so sie ohne vnderlaß peiniget / von welchem allem wir nach notturfft zu vor gehört haben: Vnd zumal / dieweil sie ihnen selbst / durch kein ander Mittel / auß diser Peen vnd Fegfeyr helfen könden / dann allein / daß sie solche Peen gedultig leiden / so lang / biß daß sie / von der Sünden oder straffen derselbigen / gänglich geleutert vnd gepurgiert werden / auff daß aber solches desto ehe / füglicher vnd leidenlicher geschehe / ist vnser hilff / Gebett / Dpffer / Almosen ic. gut hierzu.

4. Ursach.

Die vierte ursach / warumb wir denē im Fegfeyr billich vnd gern sollen zu hilff kommen / ist dise: Daß auch wir desse ein belohnung haben werden hie auff Erden / vnd das selbig von denen für welche wir bitten / zum anderen auch von GOTT selbst.

Alle die / so jesund im Fegfeyr seynd / können als bald vnd geschwind / wann sie / eintrweder durch ihr Peen / oder vnser fürbitt / gang vñ gar gereinigt / in den Himmel / darinnen könden sie als dann / sampt anderen Heiligē / auch vns verhilff.

hilfflich seyn/mit vñ durch ihr fürbitt zu GOTT
für vns hie auff Erden. Wirdt derhalben ein
jede Seel/so jekund in der Peen/vnd deiner hilff
vnd gutthat genießet/gewißlich vor dem H. An-
gesicht GOTTES/auch deiner nit vergessen/son-
der so vil/wie vil du ihr verhilfflich gewesen bist
vnd noch mehr/auch dir jekund verhilfflich vnd
ersprießlich seyn/in deme/das sie jekund so wol
GOTT für dich bittet/ als wol du zuuor/ als sie
noch in der Peen war/für sie gebetten hast. Dar-
umb hat hieruon der H. Augustinus / vor eilff-
hundert Jaren/ gar recht also geschriben:
O Mensch/bitte für die Verstorbnē/auff
das auch sie/wann sie nun in das Ewig le-
ben kommen/für dich zu bitten nit vnder-
lassen/dañ sie warten auff vns/das ihnen
durch vns geholffen werde ꝛ.

Aug. Tom. 10.
Serm. 44. ad
Frat. in crem.

Zu dem anderen/bezeugt der H. Augustinus/
nit allein wie jekund gehört/das wir vnser für-
bitts vnd hilff/so wir denen im Fegfewr bewei-
sen/ein widergeltung haben sollen von denen für
welche wir GOTT bitten/sonder von GOTT
selbst/mit disen Worten: **O Mensch/begereß**
du/das sich GOTT vber dich erbarme? so
sihe du/das du dich vber deinen Nechsten
erbarmest. Dann so vil wirdt sich GOTT vber
dich erbarmen/wie vil du dich vber deinen Nech-
sten erbarmest: so vil wirstu empfahen in jenem
Leben/wie vil du thun wirst in diesem Leben.
Derhalben/so bitte für die Verstorbnen/
auff das auch sie hernach für dich bittē ꝛ.

Idē, ibidē.

Vnd hierinnen ist gar nit zu zweifeln. Dann
 GOTT durch die H. Propheten/ Apostel vnd
 Euangelisten offtermaln/ in H. Schrift ver-
 heissen/ daß vns vnser Gebett/ Dpffer/ Almu-
 sen/ sollen von GOTT belohnet werden/ vnd
 nit allein das/ so wir selbst für vns selbst volbrin-
 gen/ sonder auch das/ so wir für andere/ für vn-
 sern Nächsten thun: Vnd/ das noch mehr ist/
 wil GOTT nit haben/ daß wir vnser belohnung
 vnd widergeltung sollen verloren haben/ wann
 wir vnserm Nächsten allein einen kalten trunck
 Matth. 10. Wassers in eines Jüngers namen mittheilen.
 Dieweil dann auch alle die/ so noch im Fegfeuer
 seynd/ vnd noch dareyn kommen werden/ vnse-
 re Nächsten/ ja noch vnserer Mitglieder seynd/ so
 wol/ als die so noch auff Erden leben/ dieweil sie
 auch eben so wol vnd noch vil mehr vnser hilf
 vnd gutthat bedörffen/ warumb solten dann wir
 ihnen nit so wol/ als denen so noch leben/ zu hilf
 kommen? Wil dann GOTT/ vns/ vnser hilf/
 Almosen vnd Gebett belohnen vnd widergeltet/
 so wir nit allein für vns selbst/ sonder auch für
 vnserer Mitglieder thun/ warumb wolte oder sol-
 te dann er solchs für etliche thun vnd nit für alle?
 Warumb allein für die Lebendigen vnd nit auch
 für die Verstorbenen? so doch sie sampt vnd mit
 vns/ vnd wir sampt vnd mit ihnen/ Glieder vnd
 Mitglieder/ des einigen Hauptz Christi seynd/ so
 wol nach als vor dem Tod.

Wir seynd
 Mitglieder/
 so wol nach
 als vor dem
 Tod.

3. Ursach.

Leslich/ sollen wir billich darumb den Ver-
 storbnē gern verhilfflich seyn/ dieweil wir solches
 gar leichtlich vnd mit geringem kosten/ mühe
 vnd

vnd arbeit thun können/ ohne verseumnus vnd verlust des vnseren/ ja mit mehrung/ vnd vnserm verdienst. Was soll es mir oder dir/ lieber Christ/ für ein mühe oder ver hinderung bringen/ eins / zwey oder drey Bätter vnser / für meine oder deine Eltern/ für meine oder deine Geschwisterig / zu betten / vnd diß alle tag/ ein oder etlich mal / alle Wochen / ein oder etlich mal?

Was kan es dir vil schadens an deinem Haab vnd Gut bringen/ wann du für deine Verwanten etlichs Almosen austheilest/ ihnen/ mit Fasten vnd Dpffer der Mess zu hilff kömest? Nichts vberal. Vnd nit allein wirstu dadurch nit ärmer/ sonder GOTT der widergilt dir dise brüderliche Liebe vnd barmherzigkeit / so du deinem Nächsten/ den Armen Seelen im Fegfwr bewisen hast/ nit allein am Ewigen/ sonder auch am zeitlichen Gut/ an einem anderen ort.

Sollen derhalben wir Catholische Christen/ auß disen vnd anderen Ursachen/ so ich alhie/ kürz halben / anzuziehen vnderlasse / billich/ wo vnd wann wir anderst rechte Christen seynd/ GOTT vnd vnsern Nächsten lieb zu haben/ bewegt werden/ vñ furterhin/ nit allein wie bisshero/ sonder noch mehr/ den Verstorbnen/ den armen Seelen/ zu hilff kommen / es murre vnd brumme hierüber der Teufel sampt seinem anhang/ so lang vñ so vil er wölle/ so sollen doch wir vns nit lassen abwendig machen/ sonder also/ nit allein nach dem Christlichen Exempel vnserer Voreltern setzgen/ sonder auch nach anleittung
der


der H. Schrifft/ nach anreickung der H. Christlichen Kirchen/fortfaren/ vnserer Mitglieder/ so wol/ als vns selbst/ lieb zu haben/ ihnen (nit allein den Lebendigen/ sonder auch den Verstorbenen/ so vnser wol vnd gutthat noch bedörffen) so vil in vnserm vermögen/ verhilfflich seyn/ auff das auch hernach/ sie/ wann sie nun entlediget werden/ vns solches widergelten/ vnd endtlich wir/ sampt ihnen/ vnd sie mit vns/ selig werden/ Amen. Hierauff lasset vns zu GOTT also bitten vnd betten:

Gebetlln zu
Gott vn-
serm Hm̄e-
lichen Vat-
ter.

Dieweil es/ O GOTT Himmeli-
scher Vatter/ dise gelegenheit hat/
das nach zeugnuß der Göttlichen
heiligen Schrifft/ wie dan wahr ist/ nichts
befleckt ins Himmelreich eyngehet/ vnd
doch vil Christen/ so nit gar böß vñ nit gar
frumb absterbē/ also/ das sie nit in die Hell/
aber doch auch so gar bald in Himmel nit
kommen/ so lang/ biß das sie zuuor im Seg-
feyr/ von den zeitliche straffen od ja durch
die zeitliche straffen von den läßliche Sün-
den vñ oberbleibunge der erlassenen Todes-
sünden/ gentslich entlediget vnd gereiniget
werden/ vñ sie vns derowegen ohne vnder-
laß vmb hilff vnd beystand zuschreyen/ so
bittē wir dich ganz vnderthenig/ durch das
H. Verdiest deines Sohns vnsero einige
Heilands IESV Christi/ du wollest mit
deinen Barmherzigen augen ansehen/ das
demüß

demütig Gebett/Opffer vñ andere Christliche vñ bungen/ so wir jekund vñd zur andern zeit für sie volnbringen/ vñd sie desto ehe der zeitlichen straff erlassen/ auß dem Fegfewr entledigen/ vñ zur Seligkeit eyntfuren wöllest/ auff daß sie nit mehr gepenyget sonder Ewig getröst werden/ Amen.

Am Feyertag des heiligen Bischoues vñd Beichtigers Martini/
Enanaelium Luc. xij.



Dörcht euch nicht du kleine Herd/ denn es ist eures Vatters wolgefalen euch das Reich zu geben. Verkaufft was ihr

Deut. 1. c
20. b

Matth. 6. c
Ecccl. 29. b

gebt Almufen. Macht euch Seckel / die nicht veralten / einen Schatz der nimmer abnimpt im Himmel / da kein Dieb zukompt / vnd den kein Wotten fressen : denn da eurer Schatz ist / da wirdt auch eurer Herrk seyn.

Verkauft was ihr habt / vnd gebt Almufen. Luc. xij.

Am 11. tag
Novemb.

Siewol gemeinglich auff disen heutigen Feyertag des H. Bischofes vnd Beichtigers Martini / das jenig Euangelium / so da lehret : Wie wir vnser lenden vmbgürten vnd brinnende liechter in vnsern henden tragen sollen / in allen Bistumben Teutscher Nation / im heiligen Ampt der Mess gelesen vnd abe der Sankel geprediget wirdt : habe ich doch dis mal dasselbig anstehn / vnd jekund gehörtes zu handeln fürnemmen wollen / In anschung / das vorgemeltes Euangelium im Winterheil am Feyertag Nicolai gehandelt ist worden / auff das nit in diser kleinen Postill / ein Euangelium mehrmaln / ein anders aber gar kein mal außgelegt würde / wie wir dann auch am tag Willibaldi vnd Henrici besondere Euangelien tractirt haben.

Darumb geschichts auch nit vnfüglich / weil jekund verlesens Euangelium fürnemlich vom Almufen geben meldung thut / vnd eben der H. Martinus ein recht Darmherziger Almufen geber

geber gewesen ist/ ja so reichlich vnd begirig/ daß er auch seinen kriegsmantel verschnitten/ vnd einen theil einem Armen Menschen geben hat. Hiernon hernach.

Wir wollen diß gehörte Euangelium auch in zweyen Theilen abhandlen. Im ersten Theil/ von der vrsach/ darumb sich die kleine herde/ das ist/ alle Christen nit fürchten sollen. Im andern: Wie sie ihnen einen Schaz im Himmel samlen sollen. Welchs ihr mit gedult anhören wölt/ so will auch ich euch vber gebürliche zeit nit auffhalten zc.

Der erste Theil vorhabender Predig stehet in disen worten Christi: Fürcht euch nicht du kleine herd/ denn es ist euwers Vatters wolgefallen/ euch das Reich zu geben. Mit wem Christus unser lieber Herr/ diß mal geredet/ vnd wen er ein kleine Herde genennet habe / ist cinem jeden leichtlich auß den vorgehenden worten zu lernen/ do der Euangelist bezeugt/ er habe mit seinen Jüngern geredet/ vnd also dieselbigen/ deren nur zwölff waren / ein kleines heufflin genennet. Do wir aber alle vmbstenden vnd inhalt diser worten ernstlich erwegen/ finden wir/ daß/ ob er gleich wol diß mal nur mit seinen Jüngern geredt/ doch nit allein seine Jünger/ sonder auch alle Christen/ so domaln gelebt/ jekund leben/ vnd noch biß zum Jüngsten tag leben werden/ verstanden/ vnd vnder disem kleinen heufflin begriffen hat.

Der vrsachen aber/ darumb dise kleine Herde/

diß

Jünger
Christ ein
kleines heuff
lin.

Die Jün-
ger vnd alle
Christe war-
umb sie ihne
nit fürchten
sollen.

Luc. 12.

Getzger/
sind Nar-
ren.

diß klein heufflin der Apostel vnd andere Chri-
sten/zum trost ermanet/ vnd sich nit fürchtē sol-
len/könden alda fürnemlich zwo gelernet wer-
den. Die erste auß den vorgehenden worten heu-
tiges Euangelij. Die ander auß jekund gemelten
worten.

Es bezeugt vns der H. Euangelist Lucas vor
dem anfang diß heutigen Euangelij/ doch auch
im zwölfften Capittel seiner Euangelischen be-
schreibung: Daß ein Mensch zu Christo getret-
ten/ vnd von ihme begert hab: Daß er seinem
Bruder schaffē wölle/daß er mit ihme sein Er-
be theilen sölle. Darauff habe der Herr / seine
Jünger/ sich vom Geiz zu hüten/ ermanet/ vnd
als bald darauff ein Gleichnuß eyngeführt von
einem Geizigen Menschen/ der bey vnd zu sich
selbsten also gesprochen: Was soll ich thun? Ich
hab nit do ich meine frucht hin samle? Vnd
GOTT sprach zu ihme: Du Narr / dise nacht
wirdt man dein Seel von dir nemmen/ vnd wes
wirdt seyn/ das du bereitet hast? Vnd hierauff
redet der Herr seine Jünger an/ vnd sprach zu
ihnen: Sorget nit für euwer leben was ihr es-
sen sollet/ auch nit für euwern leib was ihr an-
thun sollet. Das leben ist mehr dann die speiß/
vnd der leib mehr dann die kleidung zc. Auff sol-
che vnd dergleichen wort noch vil/ spricht er:
Fürcht euch nit du kleine Herde. Als wolte
der Herr zu seinen Jüngern gesagt haben: Ob
gleich ihr meine liebe Jünger/an zeitlichem Haab
vnd Gut/ Haus vnd Hof/ Silber vnd Gold/
vnd was dergleichen zergengliche Reichthumb
mehr

mehr seynd/ nit reich seydt/ Ja habt alles ver-
 lassen/ vnd mir nachgenolget/ vnd nun eben so
 arm als ich seydt/ die wir nit habē dahin wir vn-
 ser haupt legē: so solt ihr euch doch nit fürchten/
 als werde ich sampt meinem Himmelschen Vater
 ter hie auff Erden euwer vergessen/ des Hun-
 gers vnd Dursts sterbē/oder mehr Armut/hun-
 ger vnd not leiden lassen/dann ihr ertragen vnd
 leiden mögt. O Mein. Ich speise die Vögel vnd
 der dem Himmel/welcher wegen ich doch nit/
 weder geporen noch gestorben/welche ich nit zu
 meiner Bildnuß erschaffen/nach am stammen
 des heiligen Creuzes erlöset hab. Warumb sol-
 te ich euch dann/die ihr Menschen/nach mei-
 ner Bildnuß erschaffen/durch meinen tod er-
 löset/die ihr in meinem Weinberg arbeiten/mei-
 nen Namen in der ganzen Welt/nit allein für
 euwer Person befehen/sonder auch andern ver-
 kündigen werdt/lassen mangel vnd not leiden/
 vnd nit nach notturfft/ vnd so vil die Natur er-
 fordert/speisen vnd trefcken? Ihr wisset daß ich
 die Blumen draussen auff dem felde bekleide/
 welche doch weder vernünfftig noch Menschen
 seynd/ vnd ja so herrlich vnd statlich/das der
 Weise vnd mechtige König Salomon/in aller
 seiner Herrligkeit/niemaln also gekleidet gewe-
 sen ist. Warumb solte ich dann euch an zimli-
 cher vnd notwendiger kleidung lassen mangel
 leiden? Derhalben so seyt nit zu sorgfältig/nit zu
 kleinmütig/nit zu forchtsam/als soltet ihr ver-
 lassen werden. Dann mir nit vnbewußt/das ihr
 noch diser zeit/seitemaln ihr den H. Geist noch
 h S nit

Trost der Armen.

Matth. 6.

Matth. 19. nit empfangē/ kleinglaubig/ schwach/ forcht sam/ vnd das noch mehr ist/ gleich anderen leutē/ Geiztig sendt/ diser vrsach habt ihr auff ein zeit zu mir gesagt: Sibe wir haben alles verlassen/ vñ seyndt dir nachgeuolget/ was wirdt vns nun dafür? Was solt euch dafür werdē? Hundertfeltig/ vnd das Ewig leben solt ihr dafür empfahen/ der halben solt ihr euch nit fürchten/ ich will euch weder hie noch dort verlassen.

Warnung/ Ist dise warnung/ vor der Geiztigkeit zu hütten/ vnd ermanung/ sich nit zu fürchten/ als solte vor der Geiztigkeit sich zu enthalten/ ist diser zeit sehr von nöten. GOTT jemandes verlassen/ den Jüngern ein mal von nöten gewesen/ so ist sie gewißlich vns Christen/ die wir auch auß der zal der selbigen kleinen Herde seynd/ noch mehr/ ja tausent mal mehr/ dann ihnen/ von nöten/ vnd ja so notwendig/ beyden/ den Reichen vñ den Armen/ wie notwendig vns essen vñ trincken/ auch nach diesem zeitlichen leben das Ewig ist.

Sorcht vnd sorg der Geiztigen leut. Wir sehen vnd hören täglich/ ja/ wir müssen sehen vnd hören/ daß die Reichen Geizhals die ser zeit/ so sorgfältig vnd forcht sam seynd wegen des zeitlichen zergenglichen Gelds/ daß sie schier weder essen noch trincken/ schlaffen noch ruhen können/ haben immer sorg/ es werde ihnen vnd ihren kindern zerrinnen: nit angesehen daß sie mehr maln wol wissen/ daß/ wann ihnen GOTT nur das jenig vergönnet vnd gedeyen liesse/ so sie albereit haben/ daß sie die tag ihres lebens/ nit allein für ihr Person/ sonder auch für ihre kinder vnd Gesind/ gnug vnd volauff betten/ dennocht lassen sie sich nit genügen/ lauffen tag vnd nacht

nacht berg auff vnd thal ab/ durch Schnee vnd
 Wasser/ frů vnd spat/ stechen mit dem Juden-
 spieß redlich nach dem gelben ringlin/ fürchten
 vnd schamen sich nit weder vor GOTT noch
 vor der Welt/ ihren Nechsten zu vbernehmen/
 mit kauffen/ verkauffen/ mit allerley liegen vnd
 betriegen/ mit zu geringer Maß/ mit kleinem
 Meß/ mit kurzer Eln/ mit falscher Münz/ mit
 betrieglicher verlegner waar / mit leichtem Ge-
 wicht/ vnd endlich mit dem Gottlosen Bucher/
 vnd mit allerley Betrug vnd Finankerey/ wie
 dan solche Gefellen dergleichen Schliff vñ griff
 in grosser anzal wissen. Vnd noch vber diß alles
 ist diß der leidige Teufel selbst/ daß die Gei-
 gen/ sich/ zu keiner zeit/ vnd mit keinem Gelt er-
 settigen lassen: je mehr sie haben/ je mehr sie noch
 haben wollen: vñ do sie auch diß bekommen/ seynd
 sie noch nit zu friden/ sonder wollen/ do es mög-
 lich/ alles haben. Do ein recht Geiziger alle Kelch
 auß der Kyrchen geraubet/ ist er dennoch nit zu
 friden biß daß er die Paten/ guldine vnd Silber-
 rin Monstranken/ Crucifix/ vñ was dergleichen
 mehr ist/ auch heraus stilet. Ein geiziger/ wann
 er ein Dorff erschunden / will er dise oder jene
 Stadt/ Land/ Königreich/ vnd endlich / do es
 möglich/ auch die ganze Welt haben. Do man
 einem recht Geizigen Menschen/ der das Gold
 mehr dann GOTT lieb hat/ einen grossen kar-
 nier an halb hengeret / vnd leget ihme Gold
 dareyn/ so vil er tragen möchte/ vnd dasselbige
 solte ihme gescheneckt seyn / so halte ich/ daß er
 jummer vnd so lang hineyn legen ließe/ biß daß er

Eigenschafft
 der Geiz-
 gen.

Geizige/
 seynd nit zu
 ersettigen.

umbfiel/ ja biß daß ihme der Wendel den halß abschnitte. Vñ köndte zwar mehrmaln nit schaden/ daß solche Geißhals/ mit einem Pfeil/ daran die Kälber gebundē werden/ oder mit einer Parfüßser Gürtel/ erschossen würden/ auff daß die Armen leut vor ihrem Bucher vñ Schinderey sicher weren.

**Straff vnd
ermanung
zu den Ar-
men.**

**Der teib ist
mehrmaln
arm/ die seel
aber reich.**

Matth. 5.

Den Armen vnder vns Christen seynd dise heutige wort Christi / Fürchtet euch nit. auch wol zu beherzigen. Dann deren vnder vns nit wenig seynd/ so immer sorg haben sie müssen des Hungers vñ Dursts sterben/ GOTT werde sie verlassen/ GOTT feñe sie nit/ GOTT förde oder werde ihnen nit mehr helfen/ sonder immer in tieffer angst vñ not/ in Armut vñ krankheit stecken lassen/ vnd auch das jenig/ was die Natur vnd kotturfft erfordert/ nit mittheilen. Zu solchen spricht der Herr: Fürchtet euch nit/ ich will euch nit verlassen / sonder/ was euch zu leib vnd Seel nutz vnd notwendig ist/ hie zum zeitlichen vnd dort zum Ewigen leben bedürftig/ will ich euch gern mittheilen. Daß ich euch nit allwegen gib/ was ihr begert oder was ihr gern hettet/ geschicht euch zu gutem / auff daß zu zeiten der leib einen mangel habe/ die Seel aber Ewig gnug vnd das Himmelreich bekomme. Ihr wist (will der Herr zu seinen Jüngern vnd vns Christen sagen) daß ich gesagt hab: Selig seynd die jertigen/ so Arm im Geist/ das ist/ willig Arm seynd. Ist derhalben besser ein zeitlang Arm vnd Ewig Reich wie Lazarus/ dan ein zeitlang Reich vnd Ewig Arm wie der Reiche Mann.

che Mann. Darumb so fürchtet euch nit/ Ich
 will euch weder zeitlich noch Ewig / weder am
 leib noch an dem jentigen so der Seel von nöten/ Gott verlas-
 nit verlassen/ den es ist euwers Vatters wol- Gott verlas-
 gefallen/ wann ihr hie auff Erden an dem je- set die Ar-
 nigen so er euch gibt/ für gut vnd lieb nemmet/ men zu fet-
 euch nach disem zeitlichen lebē das Ewig Reich ner zeit.
 zu geben/ nämlich die Seligkeit / alda ihr bey
 ihme wohnen solt ohn ende in Ewigkeit.

Die ander vrsach / darumb der Herr seine
 Jünger vnd vns Christen alle tröstet/ Wir sol-
 len vns nit fürchten/ ist darumb geschehen/ weil
 sie domaln/ auch wir Christen jekund/ ein kleine Das heuff-
 Herde/ ein kleins heufflin seynd/ gegen den jent- lin der auß-
 gen zu rechnen/ so domaln nit Apostel noch Jün- erwölten ist
 ger Christi/ auch jekund Jüden/ Türcken/ vnd fiem.
 Ungleubig seynd.

Dann/ (Menschlich dauon zu reden/ wie dan
 die Apostel auch nur Menschen / vnd zwar ehe
 daß sie den H. Geist empfangen/ Menschlich vnd
 vnuerstendig gnug waren) möchten die Apostel/
 deren nur zwölff / vnd die Jünger deren nur
 zween vnd sibentzig (oder derselbigen zeit noch
 gar wenig) waren/ sampt MARIA der heiligen
 Mutter GOTTES vnd andern etlichen gedacht
 haben: Sollen dann wir/ deren vnser doch gar
 wenig/ das rechte außervölte Volck GOTTES
 seyn/ den rechten wahren Glaubē in GOTT ha-
 ben/ so lasset es sich/ Menschlich dauon zu reden/
 nit ansehen/ darumb weil die Welt groß vnd al-
 senthalben vnzalbarlichs vil Volck ist / welchs

h 3 . doch

Schwach-
glaubige
Christe ge-
dencken.

doch vnsern Glauben / daß Christus der ver-
sprochenne Messias vnd Natürliche Sohn GOT-
TES seye/nit hat zc. Also möchten villeicht auch
diser zeit etliche Christen gedenccken: Gegen der
ganzen Welt zu rechnen / so ist die Herde der
Christen / vnd beuorauff der Catholischen Chri-
sten/nit groß. Der Hauff der Unglaubigen / Jü-
den / Türcken / Kezer vnd anderer Mamelucken/
ist vil grösser / solte derhalben billich vil mehr der
grosse dan der kleine hauff Selig werden. Fürch-
tet euch nit / darumb / daß ihr ein kleines Heuff-
lin seyd. Dann ob gleichwol (wil Christus zu
vns allen sagen) GOTT mein Himmlischer
Vatter / sampt mir vnd dem H. Geist / gern wol-
te / daß nit allein der grösser hauff / sonder die
ganze Welt selig würde / will doch die Welt nit
selig werden / vnd diß nit auß meiner / sonder
auß ihrer schuld / weil sie sich der verordneten
Mittel / so hierzu von nöten / nit gebrauchen will.
Darumb fürchtet euch nit. Vil seynd beruffen /
aber wenig auß erwölt. Fürchtet euch nit / dar-
umb / das Heufflin der auß erwölte klein ist /
denn es ist euwers Vatters wolgefallen /
darumb / daß ihr euch nit geergert / sonder bey
dem kleinen heufflin gebliben / dabey biß an
das ende euwers lebens verharret seyd / euch
das Reich zu geben droben im Himmel / do
ihr anderst auch biß in euwer grab bey diser klei-
nen Catholischen Herde / Glauben / vnd empfan-
hung der heiligen Sacramenten / verharren
werdet.

Also

Also behalten wir auß dem ersten Theil diser Predig: Daß wir vns nit fürchten sollen/als ob GOTT vns hie auff Erden verlassen werde. Mein/die seinigen die ihn lieb haben/fürchten/ vnd seine Gebott halten/hat er niemaln verlassen. Sollen derhalben/ an dem jenigen so er vns zuschickt/es sey vil oder wenig/für lieb nehmen/ ihme nit maß noch ordnung fürs schreiben wie ers mit vns machen solle. Sollen vns den Beiß nit vberwinden lassen/sonder die Reichthumb/welchem GOTT solche geben/recht/GOTT zu lob vnd Ehren/vnserm Nechsten zu gutem/vnser Seel zu trost/gebrauchen/vnd nit immer wie lenger je mehr haben wollen. Sollen auch nit zweifeln/sonder wissen/das wir Catholische Christen/ ob gleich die Herde nit sehr groß/das außervölte vnd rechtglaubige Volck GOTTES seynd/allein das wir also biß an das ende verharren.

Beschluß
des ersten
theils vor
habender
Predig.

In andern Theil diser Predig betreffend / Wie nämlich die Catholischen Christen ihnen einen Schatz im Himmel sammeln müssen / haben wir die Antwort in vnd auß dem heutigen Euangelio/welche auß dem H. Mund GOTTES selbst kommen: Verkauft was ihr habt/vnd gebt Almosen. Macht euch Sackel die nit veralten/einen Schatz der nimmer abnimpt/im Himmel do kein Dieb zukompt/vnd den keine Motten fressen: denn wo euwer Schatz ist/do wirdt auch euwer Herz seyn.

Wie wir einen Schatz im Himmel sammeln müssen.

Schatz im Himmel ein hohekron.
 Auff vilerley weiß vnd wege/durch vilerley Mit-
 tel vnd Christliche vbungen/ können ihnen die
 Christē einen Schatz im Himmel samlen/durch
 welchen Schatz/ wir nit vnfüglich verstehn/ de-
 sto ein höhere kron vnd Sitz im Himmelreich/
 desto mehr Herrligkeit / vnd desto ein größere
 klarheit in der Ewigen frewd vnd Seligkeit /

Vil wohnün- gen in vn- sers Vat- ters Reich.
 seitemaln vil wohnungen in vnfers Vatters
 Reich/ vnd volgents einandern/ so vil die zusel-
 ligen frewd belangen thut/vngleich/dañ auch die
 Seelen darinnen einandern so vngleich/ als wie
 die Sternen am Himmel seynd. Nämlich kan
 man einen Schatz im Himmel samlen durch al-
 lerley Christliche vbungen/ durch allerley gute
 Werck/durch allerley Werck der Barmherzig-
 keit. Durch die eusserliche oder leibliche Werck
 der Barmherzigkeit/ als/die hungerigē speisen/
 die dürstigen trencken/ die nackenden kleiden/die
 gefangnen entledigen/ die frembden herbergen/
 die francken heimsuchen. Dann alle dise gute
 Werck/ nit den Armen/ sonder Christo selbstē
 (als er mit seinem H. Mund bekennet/ Matt. 25.)
 durch die Armen erzeigt werden. Auch können
 wir vns einen Schatz im Himmel samlen durch
 die Geistlichen Werck der Barmherzigkeit/ als
 da seynd: Die sündigen straffen/ die vnwissen-
 den lehren/ den zweifelhaffrigen recht rathen/
 für das heil des Nächstē GOTT bitten/die be-
 trübten trösten/ die widerwertigkeiten geduldig
 leiden/ die beleidigung geru nachlassen. Hieher
 dienen auch/vleissig betten/ embsig fasten/ gern
 vnd oft die H. Mess vnd Predig hören/ vñ was
 dergleichen

Eusserliche Werck der Barmher- zigkeit.

Geistliche Werck der Barmher- zigkeit.

dergleichen Christliche vbungem mehr seynd.

Auß allen disen Mitteln/ dadurch wir vns einen Schatz im Himmel sammeln könden/ erzellet vnd nennet der Herr auff heut nur eins/ nemlich: Das Almusen gebē. Vñ zwar nit das bloße vnd gemein Almusen geben/ aldo einer einen theil seines Gelts vnd Reichthumb den Armen gibt/ behaltet ihme aber noch einen vnd etwann den besten vnd größten theil: sonder ein solchs Almusen geben schreibet er vns auff heut für/ dadurch wir vns nit allein einen Schatz im Himmel sammeln/ sonder volkommen werden/ nemlich: **Verkaufft was ihr habt/ vñ gebt Almusen.** Von diser willigen Armut/ dareyn sich auch die Reichen begeben/ habē wir an aller Heiligen tag gehört. Wiewol die Apostel/ vnd vnzalbarlich vil Christen zur Apostel zeit/ auch hernach/ vnd jeder zeit/ solchs gethon/ noch ihren nit wenig täglich thun/ nemlich alles verlassen vnd Christo nachfolgen/ alles verkauffen/ den Armen geben/ vnd ihnen gar nichts oder doch nit mehr behalten/ dann nur was die täglich notturfft erfordert: so ist es doch diser zeit/ vnd beuor auß den Reichen diser Welt/ so schwerlich vnd verdrüsslich zu hören/ als jenem Reichen Jüngling/ der **Matth. 19.** alles gethon hett was zur erlangung der Seligkeit von nöten war/ do er aber vom Herren vernam/ wie er möchte vnd müste vollkommen werden/ nemlich alles verkauffen/ den Armē geben/ vnd ihme nachfolgen/ do gieng der Jüngling von ihme/ wurde betrübt/ dann er war Reich. **Alles ver-**
Also geschichts noch auff heut: Wir wolten alle lassen ist ein

h 5 gern

herbes oder
biters kraut

Einfeltiger
bericht.

Reiche mö-
ge selig wer-
den/ wann
sie nur selb-
sten wollen.

Fremdes
Gut muß
man wider
geben.

gern Selig vnd vollkommen seyn/ in vnserm
Kopff aber könden wir nit bringen/ daß wir al-
les verkauffen vnd verlassen sollen.

Zu mehrerm bericht den einfeltigen: Alles
verkauffen was man hat/ vñ den Armen geben/
ist kein Gebott GOTTES/ sonder ein Rath. Ist
auch zur erlangung der Seligkeit so notwendig
nit/ daß man ohne solche verkauffung nit möge
Selig werden. Dann/ do alle Menschen ver-
kauffen müsten/ wer würde kauffen? Do alle
Reichthumb durch auß den Armen müste geben
werden/ so wurden die Armen all Reich/ vnd die
Reichen all Arm/ müsten also die jenigen disen
jhr empfangen Almosen widerumb geben. Also/
daß die Reichen/ wie Abraham/ Isaac/ Jacob/
David/ Salomon/ etc. do sie gleich nit alles ver-
kauffen/ wol selig werden mögen/ vnd durch das
Gebott GOTTES nit verbundē alles verkauf-
fen vnd verlassen. Doch/ daß sie auff etliche
Pünctlin wol achtung geben. Erstlich: Daß sie
jhr Haab vnd Gut/ mit GOTT vnd mit Ehren/
durch rechtmessige Erbschafft/ durch ihr Kunst/
handarbeit/ oder sonsten durch Christliche vnd
gebürliche Mittel bekommen haben: Wo nit/
sonder haben ein erwucherts Gelt ererbt/ oder
selbsten erwuchert/ sonsten mit list/ liegen vnd be-
triegen bekommen/ so sollen sie solchs vnbillichs
Gelt vnd Gut nit behalten/ sonder widerumb
geben den jenigen von welchen sie solchs durch
Wucher oder sonsten betrug abgenommen ha-
ben: wo nit/ so mögen sie nit selig werden. Zum
andern müssen sie ihr eigen Gut recht gebrau-
chen/

hen/nit zum bracht/ vberfluß/ vbermut/ zu vn-
 ehren/ dem Nechsten zu schaden/ oder zur Er-
 gernuß. Dann sie von GOTT nit Herren son-
 der Schaffner/ nit verschwöder sonder getrew-
 liche außspender/ nit Geißhalsß sonder (in billi-
 chen sachen) als freygebige Verwalter gestelt
 seynd worden. Zum dritten müssen sie ihr Haab
 vnd Gut/ so ihr ist/ vnd billich bekommen ha-
 ben/ nit Herr vnd Meister noch ihren Abgott
 seyn lassen/ sie müssen Herr vnd das Gelt
 knecht/ vnd nit das Gelt Herr vnd sie knecht
 seyn: sie müssen das Gelt/gleich wie nit vnnüt-
 zlich verschwenden/ also auch nit zu geizig behal-
 ten/ sonder GOTT/ dem Gottesdienst/ den
 Gottesheusern/ den Armen damit verholffen
 seyn: wann sie je nit nach dem trewlichen Rath
 Christi/ alles verkauffen/ verlassen/ den Ar-
 men geben/ vnd vollkommen seyn wollen/ so
 müssen sie nach dem Gebott GOTTES Almu-
 sen geben/ die hungerigen speissen/ die dürstigen
 trencken/ kleiden/ herbergen/ vnd was derglei-
 chen mehr ist. Dann ja gewißlich nit allein die
 liebe GOTTES/ sonder auch des Nechsten/ ein
 außdrucklicher beuelch vnd Gebott GOTTES
 ist/ in beiden/ im alten Testament/ vnd im neu-
 wen/ vnd ja so wichtiges/ ernstliches/ notwen-
 diges Gebott/ daß an disem/ sampt der liebe
 GOTTES/ alle Befah vnd Propheten hangen.
 Es ist aber nit zu glauben/ ja vnmöglich ist
 es: Daß du deinen Nechsten lieb/ vil weniger
 so lieb als dich selbst/ habest/ wann du ihn si-
 best angst vnd not/ hunger vnd kummer/ Armut

Eigens
 Gut soll
 man recht
 gebrauchē.

Almosen ge-
 ben ist ein
 Gebott
 Gottes.

Deut. 6. 22.

Eccle. 15. 25.

Tob. 5.

Malach. 2.

Matth. 5.

10. 18. 22.

Mar. 4.

Luc. 10.

vnd

Joan. 13. 15. vnd krankheit/hitz vnd frost leiden/vnd du kommest ihm nit zu hilff/ wo nit mit deiner ganzen
 Phillip. 2. Haab vnd Gut/doch mit einem zimlichen Almusen/
 1. Thes. 2. 4. 5. mit etlichem Gelt/ Speiß vnd tranck/ Kleider vnd Herberg/was in deinem vermögen vnd
 Heb. 10. 13. sein grosse not erfordert: seitemaln du gern wolest das man dir verhilfflich were/wann du in
 1. Pet. 1. 4. solche not vnd Armut gerathen soltest/ also/ gedencke du/seye einem andern auch. Do du dann
 1. Joan. 2. 3. 4. ihm zu hilff kommest/ so hastu ihn so lieb als
 Rom. 12. 13. 15. dich selbst/ vnd samlest dir einen Schatz im
 Gal. 5. 6. Himmel/ welchen dir kein Dieb stelen/ noch die
 1. Cor. 10. 1. Ephes. 4. 5. Motten fressen/ auch der Roste nit vmbbringen
 Phillip. 2. Eccle. 7. kan.

Wil man nit alles geben/ soll man doch einen guten theil geben.

Do dann je die Reichen nit alles verkauffen vnd Almusen geben/ sonder auch ihnen vnd ihren kindern einen guten theil behalten wollen/ sollen vnd müssen sie doch desto mehr geben: weil sie vil von GOTT empfangen/ müssen sie desto mehr widerumb verrechnen. Vnd je mehr sie Almusen geben/ je einen grössern Schatz werden sie droben im Himmel haben. Dann alles was sie den Armen geben/das geben sie GOTT/ ja ihnen selbst: denn sie legen alles zusammen in einen kassen vnd Schatz/ welchen sie bey sich finden werden/ so bald sich Leib vnd Seel scheiden/ nach der Seel/ am Jüngsten tag mit Leib vnd Seel.

Arme leute gehen arme Almusen.

Die Armen/ so nit vil von GOTT empfangen/ seynd zu solchem grossen Almusen nit verbunden/ seitemaln es nit in ihrem vermögen. Dann manche Handwerck sleut mit ihnen selbst/

sten/ ihrem Weib vnd Kindern so vil zu schaf-
 fen/ daß sie sich kaum ernehren vnd des herben
 Hungers erwehren könden. Doch sollē auch sol-
 che/ Almusen nach ihrem vermögen zu geben/
 nit vnderlassen/ sonder/ wo nit vil/ doch etwas/
 wo nit einen Gulden/ doch einen Pfennig oder
 Heller/ geben. Dann GOTT sihet an bey den Armen
 mit die Gaab vnd Almusen/ welches klein
 ist/ sonder den willen/ das Herz/ den eifer/ der
 gern mehr geben wolt/ wañ mehr vorhanden vñ
 im vermögen were. So ist auch diß gewiß/ vnd
 den Armē ein grosser trost: Daß ein Armer mit
 einem kleinen Almusen ein grössern Schatz im
 Himmel samlen kan/ dann ein Reicher mit ei-
 nem zimlich grossen Almusen. Dañ die Reichen
 geben Almusen von ihrem oberflus/ vnd behal-
 ten noch mehr als sie bedörffen: Die Armen
 aber geben das jenig so sie selbstē wol bedörf-
 fen. Wie dann auch der Herr im Tempel zu Je-
 rusalem/ das jenig arm Weiblin/ so nur zween
 Heller in Stock gelegt/ mehr gelobt hat/ dan die
 Reichen/ so auß oberflus ihrer Güter mehr eyn-
 gelegt/ aber doch noch mehr behalten haben.

Disen Himmelschen Schatz hat ihme auch
 zu samlen begert/ vnd gewißlich gesamlet/ der H.
 Bischove Martinus/ welcher auff ein zeit/ (ehe
 dann er Bischoff wordē) als er den Armen Al-
 musen zu geben kein Gelt mehr bey sich her-
 te/ mit seinem Schwerdt seinen Mantel ent-
 zwey geschnitten/ vnd ein stück dauon einem
 Bettler geben hat/ wie alle Historien von ihme
 bezeugen.

Diser

Diser S. Martinus/ desse Feyertag wir Catholische Christen auff heut halten/ ist in Ungern zu Pannonien auß Heydnischen Eltern geporen/ in Belschland aber zu Ticino aufgezogen/ als er kaum zehen Jar alt war/ lieffe bisweilen in die Kirchen der Christen vnd Klöster/ vnd wolt ein Catechumener werden. Als er fünffzehen Jar alt war/ solte er in die Fußstapfen seines Vatters treten/ so ein gewaltiger Kriegsmann gewesen ist/ welches er/ wiewol vngern/ doch vber drey Jar nicht getriben/ vnd zwar so tugentlich/ daß man ihne ehe für einen Monach/ dann für einen Kriegsmann gehalten hett. Domaln begab es sich daß in der Ambianenser Stadt ihme ein Bettler begegnet mitten im Winter/ deme niemandts nichts geben wolt: Welches der S. Martinus gesehen/ vnd doch auch nichts bey sich hette dann nur wie er gienge vnd stundte/ ziehet bald sein Schwert auß der Scheide/ schneidet einen theil von seinem Kriegsmantel/ gibt denselbigen dem armen Bettler/ hüllet oder wickelt den andern theil wider vmb seinen Leib. Im achthneften Jar seines Alters lieffe er sich tauffen/ vnd (als er sich des weltlichen Kriegs gentslich entschlagen hette) kame er gen Pictavis zum Erbschoff Hilario/ von deme er/ als er nun ein zeit bey ihme gewesen/ ein Exorcista geweyhet ist worden. Reiset auß verwilligung Hilarii widerumb in sein Vatterland/ alda er sein Mutter vom Heydnischen vnglauben entlediget/ den Vatter aber als einen verzweifelten Pagan vnd

vnd Heyden müssen bleiben lassen. Als aber da-
 selbst/ vnd besouder in Jlyrien/die Arrianisch
 Kekerey vberhand genommen hett/welcher er
 redlich widerstanden/warde er gefangen/ ver-
 triben/ vnd kame wider in das Welschland/vnd
 enthielte sich ein zeitlang zu Weiland in einem
 Kloster: Dann auch Hilarius nicht mehr zu
 Pictauis war/ seitemaln derselbigen zeit die Ar-
 rianeray auch Gallien vergiffet hett. Auxenti-
 us ein Arrianischer Keker/könte Martinum zu
 Weiland/ weil er so gut Catholisch war/ nicht
 gedulden/ vertriebe ihn auch. Da kame er in
 ein Insel Gallinaria genant/ da behalff er sich
 mit Wurzeln vnd Kreutern bis er ein fart
 nach Rom thet/ daselbst Hilarium anzutreffen.
 Vmb dise zeit hat der H. Martinus einen Cate-
 chumener/ so von ihme den Glauben gelernet/
 vnd vor der Tauff gestorben ist/ widerumb von
 den Todten aufferweckt/ welcher darnach ge-
 tauft ist worden/vnd noch vil Jar Gottselig ge-
 lebt hat/ derhalben Martinus demaln für einen
 Apostolischen Mann gehalten worden ist. Ein
 zeitlang hernach/ machet er widerumb durch die
 krafft GOTTES lebendig eines Reichen mañs
 armen Knecht/der sich für angst selbst erhengt
 hett. Solches gerücht brach auß/ also daß er zu
 Turen zu einem Bischoff erwölet worden ist.
 In seinem Episcopat behielte er seine Tugenten/
 so er zu vor gehabt hat/ also daß sich meniglich
 darob verwundert. Hat vil Wunderzeichen
 gethon/ vnd auch den dritten vom Tod auffer-
 wecket. Ist nicht gemartert worden/ aber hat
 son

Martinus
 hat todten
 aufferweckt.

sonsten vil verfolgung vñ Paganen vnd Arrianern erlitten. Als er nun die zeit seines Tods vor ihm gewußt/ visitiert er vor sein Bistumb/ machet allenthalben frid vnder den Geistlichen: Kommet widerumb in sein Kloster/ leget sich krank zu Beth/do erhub sich aller Brüder heulen vnd weinen. Vatter/ sprachen sie/ warumb wiltu vns also verlassen? Oder weme wiltu vns einsame lassen? Dann die reißenden Wölff werden in dein Herde fallen. Wer wirdts disen wehren können/ wann der Hirt geschlagen ist? Diese vnd dergleichen wort mehr betrachtet der H. Martinus/ vnd do er sahe daß jedermann weinet/sprach er zu GOTT: Herr/ wañ ich deinem Volck lenger nutz vnd nötig binn/ so solle mich die arbeit nicht verdriessen/ dein will geschehe. Bettet tag vnd nacht/lag auff der Erden in seinen härinen Kleidern/ In deme sahe er den bösen Geist neben sich stehen/ zu deme sprach er: Du Blutig thier/ was thustu hie? Du vnseßger wirst nichts an mir finden/ Abrahe Schöß wirdt mich zu sich nemmen. In vnd mit disen Worten ist der H. Martinus in GOTT verschiden/ nach der Geburt Christi 412/ seines Alters 81/ als er 26 Jar Bischoff gewesen/ vnder Kayser Arcadio vnd Honorio. Seuerus Sulpitius/ so den H. Martinum gekennt/ mit ihm geredt/ hat ein besonders Buch von den Wunderzeichen des H. Martini geschriben. Seine Reliquia vnd Heiligthüb seynd erhabē 64 Jar nach seinem Abschied. Diser H. Martinus wölle jehud vnd jeder zeit/ vor dem H. Angesicht GOTTES/ aller

aller Catholischen Christen Fürsprecher seyn/
von GOTT Gnad zu erlangen/auff daß sie sich
von aller Geizigkeit enthalten/vnd nach vermö-
gen Almosen geben/ihne einen Schatz im Him-
mel/ja das Ewig leben erlangen mögen/dero-
wegen spricht mir nach mit mund vñ mit Herz
folgendts Gebett:

D Allmechtiger/Ewiger/Gütiger Gebett zu
unserm Hei-
land Jesu
Christo.
GOTT Herr IESV Christ/der
du nit allein deine liebe Jünger/
sonder auch vns Christen alle/im letzten
Abendmal getröstet vñ ermanet hast/ Daß
wir vns nit fürchten sollen/ als soltest du
vns hie auff Erden grosse not vnd vnlei-
denliche Armut leiden lassen/oder als sol-
ten wir darumb nicht dein außervöltes
Volk seyn/seitemaln das Heufflin der
Catholischen klein ist. Gelehrt hastu auch/
wie wir vns einen Schatz im Himmell sam-
len sollen. Weil dan/D GOTT/hierzu/
dein Göttlicher Segen sehr von nöten/ so
bitten wir dich vmb Gnaden/auff daß wir
allen also nachkönnen/vns derowegen nit
fürchten/einen Schatz im Himmell
samlen/vnd also immer vnd
Ewig selig werden mö-
gen/Amen.

i3

Am

Am Tag Cuniberti/ zum theil
zu Cöln feyerlich.Am 12. tag
Nouemb.

Dies ist der tag der begrä-
nuß des heiligen Bischoffs Cu-
niberti. Als diser ein Knab an
Königs Dagoberti Hof war/
sah der König in einer nacht
den ort/ da diser Knab schlieff/ mit einem gros-
sen Himmlischen Liecht erglanken/ darauff sein
zukünfftige heiligkeit vermerckt ward. Vnd da
er nun zum Bischoff gemacht/ vnd das geheim-
nuß vnser Erlösung in S. Ursule kyrchen opf-
fert/ sahen alle beystehende Menschen ein weiß-
se Tauben auff seinem Haupt sitzen/ zu bestet-
tigung/ daß er warlich ein würdiger Priester
Christi were. Verschiede endlich in Christo sel-
iglich.

L Vangelien vnd Predigen/ wie an
tagen der H. Beichtiger Wilibald-
di/ Henrici/ Martini/ Nicolai ge-
sezt.

Am Tag des H. Beichtigers Leo-
poldi/ zum theil im Passauerischen
vnd Wienerischen Bistumben/
feyerlich.

Am 15. tag
Nouemb.

Dies ist der tag des heiligen/
edlen Leopoldi/ welcher zur zeit
Henrici des vierten/ ein Herzog
in Osterreich war/ sampt seinem
Ehe

Ehegemahel Agnete / sehr aeneigt zu andacht
vnd geistlichkeit / bauwete vil Klöster / war ein ge-
rechter Christlicher Fürst / ruhet seligklich im
Kloster Newburg / welches er auch gebawen /
der wölle GOTT für vns bitten.

Evangeliën vnd Predigen / wie hie
vor von Cuniberto vermerckt.

Am tag des H. Abts vnd Beichti-
gers Dithmari / zum theil im Costen-
ker Bistumb feyerlich.

Auff heut ist der tag des H. Am 16. tag
Abts vnd Beichtigers Dithmari / Nouemb.
im Teutschland geboren / fürtreff-
lich in heiligen vbungem / auch ein
Abt des Klosters S. Galli / ist aber
von den Gottlosen in ein Insel des Rheins vn-
billich ins ellend verdampt worden / daselbst er
nach vil erlitten arbeit seligkeiten im Herren ent-
schlaffen. Sein Leib ruhet aber jetzt zu S. Gal-
len im Kloster.

Evangeliën vnd Predigen / wie hie
vor von S. Cuniberto.

Am tag der H. Witfrauen Eli-
zabeth/ zum theil im Costenker Bi-
stumb vnd zu Wirzburg
feyerlich.

Am 19. tag
Nouemb.

Sist heut der Geburtstag der
heiligen/ Edlen/ berühmten Wit-
frauen Elizabeth/ welche des
Bngerischen Königs Andree vnd
Bertrudis tochter war. Dienete
GOTT fleißig in Jungfrewlichem/ ehlichem/
vnd Witwen stand/ dann von Jugend auff trug
sie ein geistlich gemüt gegen GOTT. Ward zu
donico dem Landgrauen in Thüringen verhe-
rath/ beflisse sich/ so vil sie mocht/ in Gottseli-
gen vnd demütigen vbungem. Da ihr Man wi-
der die Saracenen in das heilig Land zohē/ vnd
starb/ da leget sie alle weltliche zier vnd schmuck
hinweg/ gürtet sich mit einem strick/ gieng in
schlechten grauwen Kleidern/ barfuß daher/ er-
zeiget sich ein recht Apostolische Witwen vnd
Dienerin der Armen: bauwet ein Spital für
die Armen vnd Waisen/ dienet ihnen daselbst
mit andern Mägden/ welche sie durch ihr Ex-
empel bekeret hett/ biß an ihr end. Da sie ster-
ben wolt/ steng sie an lieblich zu singen. Ver-
schid also seligklich/ da sie 26 Jar ein Witwe
gewesen.

Euangelium vnd Predigen/ wie an
S. Künigundis oder Margarethe
tag.

Am

Am tag MARIAE Opfferung.

499

Am Feyertag MARIAE
Opfferung.

S Gut ist das Fest/ als die seligste
Mutter GOTTES vnd allweg
Jungfraw MARIA/ in ihrer zarten
Jugent/ da sie nemlich drey
Jar alt war/ gen Jerusalem zum
Tempel gefürt/ vnd von ihren heiligen Eltern
dem Herren auffgeopffert vnd zugeeignet ward.
Dauon schreibt auch Nicephorus. Von dersel-
bigen zeit fieng an die edle/ zarte/ reine Jungf-
raw/ GOTT je lenger je mehr zu erkennen/ zu
lieben/ zu preisen/ vnd zu ehren/ mit Herzen/
Mund vnd Wercken/ wie kein Jungfraw vor
oder nach je besser vnd vollkommer GOTT gedie-
net vnd wolgefallen hat. Nachdem sie aber im
Tempel geweyhet/ vñ in aller Gottsforcht auff-
erzogen war/ verharret sie daselbst bis in das 14
Jar ihres alters/ hatt solche lust vnd andacht zu
GOTT/ daß sie erstlich vnder allen Jungfraw-
wen dorfft ein gelübd thun/ das doch gar vnge-
wönlich/ vnd auch verächtlich war/ ihre stete
Jungfrawschafft zu behalten/ wie dauon S.
Augustinus schreibt. Das Leben aber MARIAE
ist so tugentreich vnd vollkommen/ daß darinnen
ein klarer Spiegel vnd lebendig ebenbild der
Gottseligkeit scheinbarlich erleuchtet. Sie war
vast demütig im Herzen/ dapffer in Worten/
fürsichtig im Gemüt/ vernünfftig in der Red/
gestiffen im Lesen/ andechtig im Gebett/ embsig
in Wercken/ züchtig in den Sitten/ hoch in der

Am 21. tag
Nouemb.

13 3 . Ver

Betrachtung/erleucht im Verstand/inbrünstig
in der Liebe GOTTES/ barmherzig gegen den
Armen/gehorsam gegen den Obersten/willig vñ
fridsam gegen jederman. Summa/ MARIAE
ihun vnd lassen ist aller Menschen zucht vnd Re-
gel: Kein Junckfraw keuscher von herzen vnd
leib/ kein Ehfraw erbarer vñ seliger/ kein Heilig
völler gnaden/vñ von GOTT mehr gebenedey-
et. Zum höchsten hat sie sich demütiget als ein
Dienstmagd des Herrē/ darumb ist sie auch zum
höchsten erhebt/ daß alle Geschlecht der Men-
schen vnd Heiligen sie nit gnugsam rhümen vnd
loben können. Von ihrem leben schreibt S. Am-
brosius. Welche jezund vñ jeder zeit ihren Sohn
für vns bitten wölle.

E Vangelium vñ Predig/wie an der
Geburt MARIAE/ als droben am
8. tag Septemb. gesetzt.

Am Feyertag der H. Junckfraw
wen vnd Marterin Katharine/
Euang. Matth. xxv.

In d zeit wirdt das Him-
melreich gleich werde zu
hen Jungkfrauen/ die
ihre ampeln namen/ vnd
giengen auß/ dem Brew-
tigam vñ der Braut ent-
gegen. Aber fünff vnder ihnen waren tö-
richt/ vnd fünff waren klug. Nun namen
die



die törichten ihre ampeln/ aber sie namen
 nicht öle mit ihnen: die klugen aber namen
 öle in ihren gefessen/ sampt ihren ampeln.
 Do nun der Breutigam etwas verzog/
 wurden sie alle schläfferig/ vnd entschlieffē.
 Zu mitternacht aber ward ein geschrey/
 Sihe der Breutigam köpft/ gehet auß ihm
 entgegen. Do stundten die Jungfrauen
 alle auff/ vnd rüsteten zu ihre ampeln. Die
 törichtē aber sprachen zu den klugē: Gebt
 vns von euerm öle/ dann vnser ampeln
 verleschen. Da antwortten die klugen/ vñ
 sprachen: Auff daß villeicht nit vns vnd
 euch gebreche/ so gehet ehe hin zu den die
 das verkauffen/ vnd kauffts euch. Vnd da
 sie hingingen zu kauffen/ kam der Breutigam:

13 4 gam:

Matth. 7. b

Luc. 6. c

Matth. 24. d

Luc. 12.

gam: vnd welche bereit waren / giengen mit ihm hineyn zur Hochzeit / vnd die thür ward zugeschlossen. Zu lest kamen auch die andern Jungfrawen / vñ sprachen: Herr Herr / thu vns auff. Er antwortt aber vnd sprach: Warlich sag ich euch / ich kenne euwer nicht. Darumb so wachet / dann ihr wisset weder den tag noch die stunde.

Gebt vns von euwerm Del / dann vnser Ampeln verleschen. Matth. xxv.

Am 25 tag
Nouemb.

Dann wir die Messbücher jeder Bistumben vñ Postillen jeder Prediger etwas vleissigs durchsuchen / so finden wir / daß auff disen heutiggen Feiertag der H. Junckfrawen Katharine / verlesens Euangelium nit von jeden gesungen vnd gepredigt wu di / sonder von etlichen / das jenig / so von einem Schak / der im Acker verborgen / meldung thut. Weil wir aber am Feiertag der H. Junckfrawe Margarethe vom Schak so im Acker verborgen / gehandelt haben / nemmen wir billich auff heut / jesund gehöretes Euangelium von den zehen Junckfrawen zu tractiren für die hand. Darumb auch / weil eben dise heilige Katharina gewißlich eine auß den fünff weisen Junckfrawen gewesen ist / so nit allein die Ampel / sonder auch Del in ihre geschirr genommen / also vleissig gewacht / auff

auff den Herren gewartet / vnd als er kommen / mit ihme zur Hochzeit / das ist / in die Ewige freud vnd Seligkeit eyngangen ist. Davon wir jekund in vorhabender Predig / vnd auslegung diser Euangelischen Gleichnuß / weitlauffiger handeln wollen.

Durch dise heutige Euangelische Gleichnuß / wil vns der Herr Christus / fürklich anzeigen / Was es mit ihme / mit vns / mit dem Jüngsten Gericht / mit den Seligen vnd verdampften / zur zeit wann ein jeder empfahen soll nach deme er verdienet oder verschuldet hat / für ein gelegenheit haben werde : Wie zu vor alle Menschen widerumb von den todten aufferstehn / als bald vor ihme erscheinen / vnd vmb alles rechnungschafft geben / vnd darauff etliche in die Seligkeit / etliche in die Ewige verdammnuß gehn müssen.

Auff das aber wir solche Gleichnuß desto richtiger handeln / vnd ihr sie desto süßlicher verstehen mögt / soll solche (nach vnserm brauch in diser kleinen Postill) in zween Theil abgetheilt werden. Im ersten wollen wir anzeigen : Was sich begeben / ehe dann dise Junctfrauwem dem Breutigam entgegē gangen. Im andern : Was

Inhalt vnd
Theilung
diser Pre-
dige.

sich verlossen nach seiner ankunfft / biß dahin / daß die fünf Weisen ins Himmelreich eyngelassen / die anderen fünf torechtigen aber außgeschlossen seynd worden.

Welchs ihr mit gedult anhören wölt / so wil auch ich mich / euch solchs auff das leichtest vnd kürzest fürzhalten nit beschweren.

Al einem Dinstag oder (wie er an
 etlichen orten genennet wirdt) Erichtag/
 welche war der zwey vnd zwenzigste des
Matt. 23. 24 Merckens/ im drey vnd dreissigsten Jar Christi
 vnser Herrs/ war er sampt seinen Jüngern/
 zu Jerusalem im herrlichen Tempel Salomo-
 nis/ lehret vnd straffet die Jüden wegen ihrer
 Pharisäischen Gleisnerey vnd Bosheit/ auch/
 daß sie die zeit ihrer heimsuchung nit erkennen
 wolten ic. Als er auff solchs zum Tempel hin-
 auß gieng/ tratten seine Jünger zu ihme/ auff
 daß sie ihme zeigten das gebew des Tempels/
 darauff ihnen der Herr geantwortet: Daß
 wahrlich an disem Tempel (mitler zeit) nit ein
 Stein auff dem andern bleiben werde. Vnd
 als sie zur stadt hinauß gangen / vnd er auff
 dem Oelberg saß / tratten seine Jünger zu ih-
 me vnd fragten ihne: Wann dann solchs ge-
 schehen werde? Antwortet er ihnen: Daß solche
 stund niemands wisse/ auch die Engel im Him-
 mel nit/ dann allein GOTT/ derhalben sollen
 sie immer wachen vnd warten/ auff daß/ wann
 der Herr komme / sie bereit erfunden werden.
 Dann vnfürschenlich / gleich wie der Sünd-
 fluß zur zeit Noe/ werde er kommen. Vnd nach
 langer vnderichtung redet er zu ihnen dise heu-
 tige Gleichnuß mit solchen worten: Dann
 wirdt das Himmelreich gleich werden ze-
 hen Juncckfrauen / die ihre Ampeln na-
 men / vnd giengen auß dem Breutigam
 vnd der Braut entgegen. Wiewol der Tempel

pel zu Jerusalem von Tito vnd Vespasians den
 Römern / zwey vnd vierzig Jar nach der Him- **Zerstörung**
 melfart Christi / zerstört ist worden / **Jerusalem.**
 auch alle vnd jede Menschen / so bald sich hie
 auff Erden Leib vnd Seel scheiden / nach der
 Seel (dann der Leib ruhet bis zum Jüngsten
 tag) die Ampeln nehmen / vor dem gerechten
 Richter Christo erscheinen / vnd nach deme sie
 hie auff Erden Glaubt vnd thätig / oder Un-
 glaubt vnd nit thätig ist gewesen / gutes oder bö-
 ses empfahen müssen: so redet doch alda Chri-
 stus der Herr nit von derselbigen zerstörung
 Jerusalem / so vor tausent vnd fünfshundert
 Jaren geschehen / auch nit vom besondern Ge-
 richt eines jeden Menschen / sonder von der ge-
 meinen zerstörung vnd erneuerung Himmels
 vnd der Erden / von dem gemeinen Gericht /
 nämlich vom Jüngsten tag / vnd spricht:
 Dann / nämlich / wann solchs geschehen wirdt /
 daß diser Tempel vnd alle gebew auff Erden / ja
 Himmel vnd Erden zergeren werden (wie dann
 der Herr eben auff heut selbst zu ihnen gesagt:
 Himmel vnd Erden werden zergeren / aber mein **Matth. 24.**
 Wort wirdt nit vergehen.) wirdt das **Himmel-**
reich gleich werden zehen Junctfrauen.
 Durch das Himmelreich verstehen wir in gemeyn / **Das Hime-**
 nit vnbillich / die Christliche Kyrch / den hauf- **melreich / ist**
 fen / die versammlung aller Christglaubigen Men- **die Christo-**
 schen. Nun wirdt dieselbig vnderscheidet. Eine **lich Kyrch.**
 wirdt genennet die Triumphirend Kyrch. Das **Die Kyrch**
 seynd die jenigen / so droben im Himmel vnd **zwofach oder**
 albereit nach der Seel (zu welcher am Jüng- **zweyerley.**
 sten

Streitbare
Kyrch.

sten tag auch der leib widerumb kommen/ vnd Ewig mit ihr selig seyn wirdt) ohn ende selig seynd. Vnd dieselbige versamlung wirdt nit verglichen disen zehen Jungkfrauen/ deren die fünf Weiß vnd fünf torechtig seynd/ Dañ im Himmel seynd keine torechtige noch gebrechliche/ sonder nur weise/ fromme/ vnd Selige Seelen. Die ander Kyrch ist vnd wirdt genennet die Streitbare Kyrch/ welche ist die versamlung aller Christen hie auff Erden/ welche noch nit albereit/ wie die droben im Himmel selig/ fridlich vnd rüwig ist/ sonder hat immer zu streitten/ kempffen vnd sechten/ jekund wider den Teufel/ seine böse eyngebungen/ ansechtungen/ nachstellungen/ vnd wider allen seinen Anhang/ jekund wider die Hoffertige stolke vbermütige Welt/ jekund wider das Gelt vnd verfluchten Geiz/ jekund wider das eigen Fleisch/ böse gelüst/ wider die feind/ wider die Tyrannen/ wider die Keker/ wider die verfürische Predicanten/ wider die falschgleubigen vnd Mundt Christen/ vnd was dergleichen feind mehr seynd.

Dises Himmelreich/ dise Kyrch/ die streitbare Kyrch/ der hauff aller Christgleubigen Menschen hie auff Erden/ wirdt als dann/ am Jüngsten tag/ verglichen zehen Jungkfrauen. Durch die zehen Jungkfrauwē/ werden nit nur zehen/ auch nit allein die Jungkfrauen/ sonder alle Menschen auff der ganken Welt/ Gleubig vnd Vngleubig/ frumb vnd vnfrumb/ die jekund so Selig vnd dise so verdampft werden/ verstanden/ (Wie dann Christus der Herr als bald selbst/

selbsten/ durch dise zehen Jungkfrauen/ vnder
 allen Menschen/ den Seligen vnd verdampften/
 einen vnder schid gemacht/ vnd durch die fünff
 Weisen Jungkfrauen alle Seligen/ vnd durch
 die fünff torechtigen/ alle verdampften verstan-
 den hat (wie dann mehrmaln vor diser zeit auch
 in anderen Gleichnussen/ als mit den guten vnd
 bösen Fischen/ mit dem Weizen vnd Unkraut/
 von ihme beschehen ist. Dise Gleubige Jungk-
 frauen alle zehen (dann welche nit glauben/
 die hilfft weder Ampel noch Del / weder Liebe
 noch gute Werck/ vber sie ist auch albereit das **Mar. 16.**
 vrtheil der verdammuß gefelt) namen ihre
 Ampeln / vnd giengen auß dem Breutig-
 gam vnd Braut entgegen. Alle Menschen/
 frumb vnd vnfrumb / auff der ganken weiten
 breiten Welt / vnd beuor auß die Catholischen
 Christen / wissen nit allein auß dem H. Mund
 GOTTES: Daß sie am Jüngstē tag/ von Chri- **Matth. 25.**
 sto dem Herren/ gerichtet vnd geurtheilt/ Selig
 oder verdampft gesprochen werden/ nach ihren
 guten oder bösen Wercken/ nach deme sie den
 hungerigen / dürstigen / nackenden / frembdlin-
 gen/ francken/ gefangnen/ mit speiß vnd tranck/
 kleidung vnd Herberg/ entledigung vnd tröstung
 gedient oder nit gedient haben. Auch wissen
 sie nit allein auß seinem H. Mund: Daß dise/ **Joan. 5.**
 so gutes gethon haben / herfür gehn werden
 zur aufferstehung des lebens / die jenigen aber
 so böses gethon haben / zur aufferstehung des
 Gerichts. Sonder wissen auch auß dem H. Pau- **2. Cor. 3. 5.**
 lo vnd andern Aposteln: Daß sie all am Jüng- **1. Cor. 2.**
 sten

Rom. 14. Apoc. 14. sten tag (ja als bald sich Leib und Seel scheiden) vor dem Richterstuhl Christi geoffenbart müssen werden/ vnd daß ein jeder empfahen muß an seinem Leib/ (die eigne des Leibs) wie er die vollbracht hat/ es sey gut oder böß. Sie wissen auch:

Rom. 2. Apoc. 22. Daß GOTT einem jeden widergelten wirdt nach seinen Wercken. Vnd: Mein Lohn ist bey mir einem jeglichen zu widergelten nach seinen Wercken. Sie wissen auch: Daß der Glaub ohne gute Werck todts/ vnd ohne die Liebe nichts ist. Diser vrsach lauffen die zehen Jungfrauen zur zeit ihres todts oder ja des jüngsten gerichtts/ ihren Sentenz vnd vrtheil der Seligkeit oder verdammuß zu empfahē/ dem Breutigam nämlich Christo ihrem Herren vnd Richter entgegen/ nit mit leeren henden/ nit mit dem blossen lieblosen vnd todten Glauben/ sonder namen auch mit sich ihre Ampeln/ ihre vbunggen vnd volbringung der guten Werck/ der Werck der Barmherzigkeit/ so sie den Armen erzeiget hatten/ diese namen sie mit sich. Dann ihnen wol bewust/ daß sie derselbigen zur Seligkeit notwendig bedörffen wurden/ vnd so vil oder wenig geniessen/ wie vil oder wenig sie derselbigen hie auff Erden gewirckt/ vnd jekund mit sich bringen wurden.

Gute werck
seynd von
nöten.

Wie muß dann ein Einfeltiger Christ ver-
stehn: Daß vnder diesen zehen Jungfrauen
fünff weise/ vnd fünff torechtige gewesen/
deren doch alle Ampeln gehabt/ auch all ihre Am-
peln mit sich genommen/ aber doch nit all selig
oder

oder zur Himmelfischen Hochzeit eyngelassen
 seynd worden? Dife zehen Jungfrauen ha-
 ben alle/ neben dem Glauben in Christum/ gute
 Werck gethon/ aber doch nit auff einerley weiff/
 auch nit auß einerley vrsachen. Erstlich von
 den fünff Törrichtigen Jungfrauen. Die
 Vngleubigen/ als Jüden/ Heyden/ Türcken/
 Mamelucken/ Ketzer/ thund auch zu zeiten guts/
 geben zu zeitē Almosen/ vben andere gute Werck
 mehr/ seynd ihnen aber zur Seligkeit nit er-
 spriesslich/ ob sie gleich ihre Lampeln vnd alle gu-
 te Werck mit ihnen für den Richter Christum
 bringen/ Darumb/ sie seynd in Christum nit
 gleubig gewesen/ vnd alles was von ihnen außser-
 halb des Glaubens geschehen/ ist des Ewigen
 lebens nit verdienstlich. Die Gleubigen aber/
 doch Gottlosen Christen/ das seynd die jenigen/
 so ohne Reu vnd leid/ ohne Beicht vnd Puff in
 todesünden/ gute Werck thund/ vnd sterben al-
 so vnpußfertig in der sünd/ werden nit selig/ ihre
 gute Werck helfen ihnen nit zur Seligkeit/ nit
 angesehen daß sie derselbigen nit wenig gethon/
 vnd sie am Jüngsten tag hauffrechtig mit sich
 bringen werden/ Darumb/ sie seynd außserhalb
 der Gnad vnd liebe GOTTES geschehen/ vnd
 die vngepüßte Todesünden haben fürgetrun-
 gen vnd sie verdampft. Zum dritten/ findet man
 deren leut nit wenig (wie dan auch dife fünff tö-
 rrichtige Jungfrauen gewesen) so gute Werck
 thund/ aber nit auß rechtmessigen vrsachen/ nit
 auß rechter Christlicher liebe/ so sie zu GOTT
 vnd ihrem Nächsten haben vnd halten solten.

Nur

Antwort.

Vngleubi-
 ge vnd Was
 catholische
 thun zu zeitē
 auch gute
 Werck.

Gleubige
 Todesänder
 werden nit
 selig.

Vergeben-
liche gute
Werck.

Matth. 6.

Was durch
das Del al-
da verstan-
den werde.

Vergle-
chung.

Nit darumb thund sie gute Werck / daß sie
GOTT oder ihrem Nechsten dadurch dienen/
sonder zum schein/daß sie der Welt gefallen/von
ihrem Nechsten gelobt vñ gesehen auch geprisen
werden wöllen. Solche leut habē Ampeln/ haben
(also zu reden) gute Werck/ aber derselbigen vor
vnd von GOTT kein belohnung/ dann sie seynd
nit vmb GOTTES sonder vmb eigens lobs wil-
len geschehen. Von solchen leuten vnd guten
Wercken hat der Herr vor langst diß vrtheil ge-
felt: Sehet euch für/ daß ihr eurer gerechtigkeit
nit thut vor den Menschen/ auff daß ihr von ih-
nen gesehen werdet/ Sonsten werdet ihr keinen
lohn haben bey euwerm Vatter der im Himmel
ist ꝛc. Diser vrsach sagt auch der Herr selbst im
heutigen Euangelio von den fünff toechtigen
Jungkfrauen: Nun namē die toechtigen
ihre Ampeln/ aber sie namen nit Del mit
sich. Durch das Del (wie gesagt) verstehn wir
die Liebe/ dadurch die guten Werck soltē verbracht
seyn worden vnd gewirckt haben/ ja wircklich/
möglich vñ ersprießlich worden seyn. Derhalben
hetten auch dise toechtige leut Ampeln/ das ist/
(als sie vermeynten) gute Werck/ hettē aber kein
Del darinnen. Vnd gleich wie ein Ampel/ dar-
innen kein Del ist/ nit leuchtet/ also seynd auch die
Werck/ so ohne die Liebe vñ rechtmessige vrsachē
volbracht werden/ taub vnd tod/ leuchten vnd
brinnen nit/ seynd vmb sonsten vnd vergebens.

Von den klugen Jungkfrauen redet der
Herr auff solche weiß: Die klugen aber namē
men

men Del in ihren gefessen / sampt ihren Ampeln. Diß wußten die klugen/das ihre Ampeln/darinnen solche gute Werck so ohne die Liebe volbracht/nit lang brinnē kōnden/ja zur zeit wann sie aller nōtigsten brinnen solten / werden sie verleschen/namen derhalben noch andere gefeß/nemlich/jhr eigens Gewissen/Gemüt vnd alle innerliche krefften/darinnen haben sie Del gefasset/nemlich die Liebe/ vnd wichtige notwendige vrsachen/darumb sie gute Werck gethon haben/auff das ihre Ampeln nit leer/ noch ihre gute Werck bloß/sonder mit Del versehen weren/ vnd also mit brinnenden vnd nit aufgelochnen Ampeln dem Brutigam entgegen kommen möchten.

Do nun der Brutigam etwas verzog/ wurden sie alle schlāfferig vñ entschliefen. Wir haben gesagt/ das durch den Brutigam der Herr Christus verstanden werde. Durch diß verziehē/wirdt verstandē der verzug zum Jüngsten Gericht/ auch zur stund vnser tods/ auch zur straff wegen vnser Sünd/welchs alles doch vns zum besten geschicht/auff das wir vns zu bekeren/Puß zu thun/ zum tod vnd Jüngsten tag zu bereiten/ vrsach vnd gelegenheit haben. Das alle Junckfrauen/die Weisen vnd Törichtigen/in deme der Herr verzogen/ entschliefen/wirdt verstanden/das alle Menschen/Gleubig vnd Ungleubig/ frumb vnd böß/ die jenen so selig vnd die jenen so verdampft sollen werden/sterben müssen. Vnd nit vnbillich ver-

Brutigam
ist der Herr
Christus.

Alle Men-
schen müssen
sterben.

f R gleichet

Posaunen
der Engel.

Genes. 7.
Psal. 73.

gleichet der Herr den Tod dem Schlaf. Dann ihm ist vil leichter einen todten/dann vns einen vom schlaff/aufferwecken. Als sie nun alle/die Weisen vnd Torechtigen/schlieffen/gedachten wenig an die zukunfft des Breutigams / Das ist/zur zeit/ als die Welt sorglos vnd hinlessig/in sünd/schand vnd laster/in spilen/fressen/sauffen/Vnzucht vñ Gottlos lebet/als alle verstorbene in dem staub der Erden ruheren/ kam zu mitternacht ein geschrey/ **Sihe/der Breutigam kompt / gehet auß ihm entgegen.** Durch diß Geschrey/ so alle Menschen/ wie vil ihr von Adams zeit bis zum Jüngsten tag geporen seynd vnd werden/ zum Gericht/ auß ihren Gräbern fordern wirdt/ verffehn wir/ das Posaunen der Engel oder sonst ein Göttliche berufung/deren alle Menschen gehorsam leisten müssen/ Gleubig vnd Ungleubig/ frumb vnd vnfrumb/ die jenigen so Selig vnd die anderen so verdampft werden. Diß geschrey vnd berufung zum Jüngsten Gericht/wirdt geschehen zu mitternacht/ das ist/zur zeit die wir nit wissen. Wann wir vermeynen wir seyen am aller sichersten/frisch/gesundt/ wol auff/vor dem tod vnd Jüngsten tag wol sicher/so wirdt es vns ergehn/wie den jenigen so zur zeit Noe gelebt haben/so im Sündtfluß ersoffen seynd. Wie den Vögeln so draussen auff dem Vogelherd hin vnd her hupffen/singen vnd springen/essen vnd trincken/beforgen sich nichts/vermeynen sie haben niemaln einen solchen guten mut gehabt. Was

Was geschicht? In einem Augenblick ligt das Garn vber sie/ vñ seynd arme gefangne Vögel. Also wirdt es auch vns ergehn/ derhalben sollen wir immer wachen/ vnd warten wann der Herr kompt/ auff daß wir ihme nit allein entgegen/ sonder mit den fünff weisen Jungkfrauen zur Hochzeit eyngehn mögen. Vnd diß vom ersten Theil diser Predig/ was sich verlossen habe ehe daß die Jungkfrauen dem Breutigam entgegen kommen seynd.

WAs sich nū/ nach deme der Breutigam kommen/ weiter vnd biß zum ende diser Euangelischen Gleichnuß begeben/ wirdt vns diser ander Theil zu verstehn geben. Do nun das geschrey erschollē/ der Breutigam komme/ Da stundien die Jungkfrauen alle auff/ vnd rüsteten ihre Ampeln. Durch dises auffstehen der zehen Jungkfrauen/ wirdt die gemeine Aufferstehung aller Menschen verstanden. Dann alle Menschen so je geporen vnd gestorben/ so noch biß zum Jüngsten tag geporen vnd sterben werden/ sie seyen Gleubig oder Vngleubig/ frumb oder vnfrumb gewesen/ müssen am Jüngsten tag widerumb aufferstehn. Ein jede Seel muß mit dem Leib/ in welchem sie zuuor gewesen/ widerumb vereiniget/ vnd vor dem Richterful Christi erscheinen/ rechnungschafft geben/ vnd die belohnung oder straff empfaben/ nach deme sie auff Erden/ neben dem Christlichen Glauben/ guts oder böses gewirekt hat. Welchs

Gemeine
Aufferstehung aller
Menschen.

auch diese zehen Jungfrauen/ die Weisen vnd
 Törrichten/ wol gewist haben/ derhalben haben
 sie/ so bald sie auffgestanden/ ihre Ampeln ge-
 rüstet/ nach dem Glauben/ ihre gute Werck
 erwegen/ Ob sie derselbigen vil oder wenig ge-
 thon/nachgedacht. Fürs ander/ Ob dieselbigen
 auß liebe GOTTS vñ des Nächsten/ auß wich-
 tigen vrsachen/ oder wegen der Welt vnd eigent-
 lob zu erjagen/volbracht seyen worden/vnd also
 so/ ehe dann sie zum Breutigam kommen/ bey-
 leuffig wissen mögen: Ob sie bestehn oder nit be-
 stehn/ zur Hochzeit eyn oder nit eyn mögen ge-
 lassen werden. In solcher rüstung vnd zubereit-
 ung befinden die fünff Weisen Jungfrauen
 daß sie nit allein neben dem Catholischen Glauben
 gute Werck/ sonder daß sie dieselbigen auch
 in vnd auß rechter liebe/ auß rechtmessigen vrsachen/
 volbracht haben. Die fünff Törrichten
 finden auch gute Werck/ aber ohne liebe
 vnd rechtmessige vrsachen/ seynd von ihnen nit
 volbracht worden GOTT zu lob/ dem Näch-
 sten zu gutem/ ihrer Seelen zu trost vnd hilff/
 sonder ihnen selbst zu weltlichem rhum vnd
 lob/ daß sie von den Menschen haben wollen ge-
 sehen vnd gelobt werden: solche gute Werck
 (wann sie anderst billich gute Werck mögen ge-
 nennet werden) scheinen vnd leuchten nichts
 vor GOTT/darumb sprechen sie zu den klug-
 gen/ Gebt vns von euerm Del/ denn vn-
 sere Ampeln verleschen/ seitemaln sie nit Del
 haben/ seitemaln vnser gute Werck auß liebe
 nit

nit geschehen seynd/ auff das wir nit vor dem
Breytigam mit leeren vnd erloschnen Lampen
erscheinen/ vnd der vrsach von der Hochzeit auß-
geschlossen werden/ denn wir sehen das ihr noch
vil vberigs Del vnd also einen guten theil hinze-
leihen habt/ volnbringet derhalben Christliche lie-
be an vns/ vnd gebt vns dürfftigen auch von eu-
werm Del.

Auff solchs anhalten der Törrichtigen Jung-
frauen/ antworten die fünff klugen/ vnd
sprechen: Auff das velleicht nit vns vnd
euch gebreche/ So gehet ehe hin zu denen
die das verkauffen/ vnd kauft euch. Am
Jüngsten tag/ ja so bald sich leib vnd Seel schei-
den/ ehe das die Seel/ im besondern Gericht/
oder leib vnd Seel zu maln im gemeinen Ge-
richt/ das ist (wie gemeldet) am Jüngsten tag/
vor dem strengen vnd gerechten Richter Chri-
sto erscheinet/ fürchtet sie immer sie werde nit
gnugsam bestehn/ hat immer sorg es werde ihr
etwas mangeln das sie nit zur Hochzeit eynge-
lassen werde. Also hetten auch dise fünff Jung-
frauen sorg/ wann sie vil Del hin leihen solten/
es möchte ihnen hernach selbstē zerrinnen. Dar-
umb auch haben sie ihnen nichts mitgetheilt/
das sie nit gekönt/ vnd die Törrichtigen nichts
geholfen hett. Dann diß ein mal gewiß vnd
wahr ist/ das der jenigen Seel/ so nach ihrem ab-
schid vom leib/ die Ewigen verdammuß verschul-
det/ in Ewigkeit nimmer mehr zu helfen ist: für
ein solche Seel könden die Engel vnd Heiligen

Den ver-
dampfen ist
nit mehr zu
im heissen.

Für welche
zu bitten.

Rom. 2.
Apoc. 22.

Am Jüng-
sten tag
wirdt das
Himmelreich
zugeschlos-
sen.

im Himmel nichts erbitten/ die frommen Men-
schen auff Erden nichts erhalten / (ein andere
meynung hat es mit den jenigen so noch leben/
für solche könden nit allein die Heiligen im Him-
mel/ sonder auch die frommen Menschen auff
Erden bitten/ also ist auch von den jenigen See-
len so im Fegewr seynd/ zu antworten) nach des-
ser gemeinen Regel/ Auß der Hell ist kein erlö-
sung mehr: könten derhalben sie solchs Del we-
der entlehen noch kauffen/ weder zur Hochzeit
eyngehn noch selig werden. Dann da sie hin-
giengen zu kauffen/ vnd sich bey den vermeyn-
ten Predicanten/ von welchen sie gelernet het-
ten/ Allein der Glaub mache Selig/ Die gu-
ten Werck seyen weder nüglich noch notwendig
zur Seligkeit / zu beklagen/ vnd wolten erst an-
fangen vil guts thun nach ihrem tod vnd Auf-
erstehung/ kam der Breutigam Christus zum
Gericht/ jeden nach ihren Wercken zu widergel-
ten/ vñ welche bereit/ nebē der Ampel auch mit
Del versehen waren/ giengen mit ihme hin-
eyn zur Hochzeit/ nemlich in die Ewige Freud
vñ seligkeit/ vñ die thür ward zugeschlossen/
vnd allen den jenigen/ so domaln nit mit dem
Breutigam hineyn gängen/ hernach eyngelien
versagt worden. Dann nach dem Jüngsten tag
werden nit mehr / wie jezund / leut auff Erden
wohnen/ nit mehr weder geporen werden noch
sterben/ volgens auch nit mehr weder Selig
noch verdampft werden / sonder / so bald das
Jüngst Gericht gehalten / (welches in gar kurzer
zeit)

zeit/ nach deme es angefangen/vollendet wirdt)
werden die Seligen in Himmel gehn/vnd Ewig
darinnen bleiben. Die verdampften werden in
die Hell gehn/vnd auch Ewig darinnen bleiben.
Die dritten/aber/ so zur selbigen zeit im Fegfeyr
erfunden werden/vnd noch ein zimlich lange zeit
darinnen abzubüssen hetten/die werden als dann
vom Fegfeyr/vñ dem jenigen Feyr so dem Her-
ren vorgehn vnd die ganze Welt leutern wirdt/
desto schärpffer vnd hart er gepeyniget werden/
auff daß/ was ihnen an der zeit abgeheth/ an der
straff erstattet/vnd sie also desto ehe gereiniget/
mit den außervölten zur rechten Christi gestelle
vnd endlich Selig werden.

Wie sich nun die fünff Törichtigen Jungf-
rauwē/ nach deme das Himmelreich verschloß-
sen/verhalten haben/wollen wir zum beschluß di-
ser Predig auch anhören: Zu letst/ das ist gar
zu spat/ kamen auch die anderē Jungf frau-
wen vnd sprachen: Herr Herr / thu vns
auff. Er antwortt aber vnd sprach: War-
lich sage ich euch/ Ich kenne euch nit/ nem-
lich als solche so des Ewigen lebens wirdia sey-
en/wegen euwer hinleßigkeit vnd vnderlassung
der guten Wercken/so auß rechter liebe vñ wich-
tigen oder rechtmessigen vrsachē von euch billich
soltten volbracht seyn worden.

Etliche/vñ zwar nit geringe Merckpünctlin/
so diser zeit zu erörtern notwendig/vnd menig-
lich zu wissen nützlich weren/ möchten alda ange-
zogen vnd erklet werden/wider etliche leut diser

zeit. Seiternaln aber dise Predig nun mehr ihr gebürliche leng erreicht/ kan solchs dismal nach notturfft mit geschehē/ sonder müßens bis zu seiner zeit lassen anstehn/ wöllē jekund nur mit wenig worten melden welchs dieselbigen seyen.

**Betrug der
Lutherischē
Predicantē.**

Die Lutherischen Predicanten lehren vnd verkeren diser zeit vil volcks mit disem betrug: Allein der Glaub mache selig/ sonsten seye kein Mittel zur Seligkeit/ ja auch die gute Werck nit von nöten/ vil weniger verdienstlich. Daß dise lehr falsch/ vnd ein verdambliche lehr seye/ bezeugt vns dis heutig Euangelium/ vnd die fünff torechtigen Jungkfrauen seynd vns desse ein Exempel/dann sie haben glaubt/ seynd dennoch nit selig worden. Daß sie aber glaubt haben/ist leichtlich auß ihrer selbst eignē bekantnuß zu lernen/do sie vnd nit nur ein sonder zwey mal zum Sohn GOTTES geschryen/ Herr Herr/ vnd haben die Seligkeit von vnd bey ihme begert/ welchs sie nimmer mehr wurden gethon haben/ wann sie nit wahrlich glaubt hetten daß er der Sohn GOTTES seye.

**Der ander
betrug.**

Fürs ander/lehren sie auch felschlich/daß der Glaub die Art vnd Eigenschafft habe/daß er gute Werck notwendig bey sich haben müße. Dañ die fünff Jungkfrauen in Christum geglaubt/ vnd dennoch kein Del oder gute Werck/ so auß rechter liebe geschehen/ gehabt haben. Wie auch der Paulus bezeugt: daß aller Glaub ohne die liebe nichts seye. der H. Apostel Jacobus: Daß der Glaub ohne die Werck todt sey. Hiernon zu seiner zeit vnd ort weitleuffig.

1. Cor. 13.

Jacob. 2.

Die

Die vrsach/ darumb der Herr seinen Jüngern vnd allen Christen dise Gleichnuß fürgehalten/ ist dise: Darumb so wachet/ den ihr wisset weder den tag noch die stund euwers tods vnd Jüngsten tags. Vnd dis ist gewißlich wahr/ daß wir alle sterben vnd als bald darauff für das Gerichte stehen müssen/ daß auch ein Jüngster tag vñ gemeines Gericht künfftig seye wissen wir auch wol: wann aber/ wie bald/ wie lang/ heut oder morgen/ wissen wir nit. Darumb sollen wir bereitet/ mit dem Catholischen Glauben/ mit der liebe GOTTES vnd des Nächsten/ mit guten Wercken vnd Christlichen tugenden begabt seyn/ auff daß wann das stündlin kompt/ wir bereit vnd zur Seligkeit taugenlich erfunden/ nit mit den fünff Torchtigen außgeschlosssen/ sonder mit den fünff klugen eyngelassen vnd mit dem ganken Himmelschen Heer Ewig selig werden.

Ein gemeines
Gerichte

Vnd dis auch nach dem Exempel der heiligen Jungfrauen Catharine/ welche gewißlich auch eine auß den klugen Jungfrauen ist/ dann sie von jugend auff nit allein Christum/ sonder auch ihren Nächsten als sich selbst geliebt. Hat nit allein ein Lampen sonder auch Del darinnen gehabt. Hat nit allein in Christum glaubt/ sonder auch gute Werck in rechter Liebe/ auß rechtmessigen vrsachen volbracht/ vnd ja so inbrünstig vnd oberflüssig/ daß sie auch den Tod/ vmb Christi vnd des Catholischen Glaubens willen/ gelitten hat. Dise H. Catharina war des Königs Costi Tochter in der Hauptstadt

† R 5 † stadt

Stadt Salamina in Cypern/ im 13 Jar ihres al-
 ters kam sie mit ihren Eltern gen Alexandria.
 Als ihr Vatter daselbst in kurz starb/ ward sie
 von einem grossen Fürstē zum weib begert/ aber
 sie schlugs ab/ kam zu einem Einsidel/ ward von
 ihme im Glauben vnderwisen/ vnd von Christo
 in einem gesicht mit einem materlichen ring ver-
 mähelt. Da sie 18 Jar alt war/ vnd der Keyser
 Maxentius allen menschē gebote den abgöttern
 zu opffern/ trat sie zu ihm in Tempel/ strafft ihn/
 disputirt mit ihm/ vnd vberwand ihn/ darumb
 er auß allen Landen fünffzig wolberedter heid-
 nischer Philosophen gen Alexandria beruffet/
 daß sie die Jungkfrauwē mit disputirē vberwin-
 den solten/ vnd wiewol sie sich zu hoch darzu be-
 dunckten/ fert sichs doch wunderbarlich vmb/
 vnd werden die Dratorm von der Jungkfrauwē
 bekert vnd im Glauben zur marier gesterckt/
 darumb schlug man die heilige Jungkfrauwē
 mit Scorpionen/ vnd peynigt sie mit hunger
 zwölff tag im gefencknuß/ da dann der Haupt-
 man Porphyrus mit sampt zweyhundert Kriegs-
 knechten vnd der Keyserin Faustina/ durch ein
 wunderbarlich gesicht/ vnd Himmlich liecht be-
 kert werden. Darnach ließ der Tyrann vier rā-
 der gegen einander zurichten/ vnd dareyn schar-
 sach vnd spizig eisen nāgel stecken/ vnd wolt S.
 Katharinam damit peynigen/ aber durch ihr ge-
 bett werden die rāder/ vnd bey vier tausent Hei-
 den erschlagen. Nachdem sie aber vil grewliche
 peyn vberwunden/ auch grosse verheißne wollust
 vnd schenckung des Keyfers verachtet/ ist die Kön-
 igt.

nigliche Jungfraw enthaupt worden/ Da zu einer waren zeugnuß ihrer Jungfrewlichen reingkeit/ anstatt des bluts/ milch auß ihrem halß geronnen. Der leib aber ward von den Engeln auff den berg Synai geführt vnd daselbst begraben. Von ihrem gebein fleuß ohn vnderlaß Del/ welches zu viler francken menschen gesundtheit dienet/ wirdt darumb nit allein von den Christē/ sonder auch von den Saracenen heimgesucht vñ geehret. Vnder allen H. Jungfrauen begehrt die Kyrch sonderlich das Fest S. Catharine/ welche iekund vnd jeder zeit/ GOTT/ desse heiligs angesicht sie ohne vndlaß sihet/ für vns bitten wölle/ auff daß wir nit allein in Christum glauben/ sonder auch in vnsern Lampē jeder zeit Del haben/ vnd mit ihr Selig werden mögen/ Amen. Hierauff sprecht mir nach mit mund vnd Herz volgendts Gebettlin:

B Armherziger GOTT/ Herr IE: Gebettlin zu Christo vnserm Heiland.
 s v Christ/ der du dein Kyrchen hie auff Erden/ das ist/ alle Gleubige Menschē/ frumb vñ böß/ zehen Jungfrauen/ deren die fünff klug/ die fünff aber toerechtig waren/ verglichen/ vñ den klugen die Seligkeit geben/ die toerechtigten aber dauon außgeschlossen hast/ darumb/ weil jene nit allein den Glauben sond' auch gute Werck auß rechter Liebe volbracht/ dise aber nur den Glauben mit etlichen guten Wercken/ doch ohne Del/ das ist/ ohne vnd außser der Liebe vnd rechtmessigen vrsachen

522 Am tag des H. Bischoues Conradi.
sachen gewirckt. Wir Christen alle wissen
wol/ daß wir nit allein durch den Glauben
müssen noch könden selig werden/ sonder/
müssen noch andere Mittel mehr gebrau-
chen/ vns dein heiligs Creukuerdiest theil-
hafftig zu machen. Derhalben bitten wir
dich samplich vnd sonderlich/ vmb Gnad
vnd beystehung/ daß wir sekund vnd jeder
zeit/ in rechtem wahrem Glaubē/ auß rech-
ter Liebe vnd ebenmessigen vrsachen/ gute
Werck volnbringen mögen/ auff daß/
wan du vns abforderst auß disem Jamer-
thal/ wir nit leere Lampen/ sonder auch
Oel/ so vil von nöten/ haben/ vnd also mit
den fünff klugen Jungkfrauen/ vnd mit
der H. Katharina zur Hochzeit vnd Sel-
igkeit eyngehn mögen/ Amen.

Am tag des H. Bischoues vnd
Beichtigers Conradi/ zum theil im
Costanker Bistumb feyerlich.

Am 26. tag
Nouemb.

Sut ist der tag des H. Conra-
di Bischoffs zu Costank vñ Beich-
tigers/ auß hoch Teutschland von
edlem stammen geboren/ Ward in
seinen kindtlichen tagen gen Co-
stank in die schul gethon/ zur zeit Keyfers Otho-
nis des ersten/ da Noringus Bischoff daselbst
war/ hielt sich in allen dingen vnsträfflich/ ward
darumb billich nach Noringi tod/ von dem heil-
gen

gen Augspurgischen Bischoff Ulricho/ auch von
der Clerisey gemelter Kyrchen zum Bischoff
gemacht vnd auffgenommen/ war im Glauben
vnd Religion so groß/ daß er auff dem Wasser
wanderte/ lehret sein Volck trewlich/ bauwet
Spitäler vnd Kyrchen/ nam auff die Armen/
ligt in S. Mauriken Kyrchen begraben/ vnd
bittet GOTT für vns.

Euangelien vnd Predigen/ wie am
Tag Wilibaldi/ Henrici/ Mar-
tini &c.

Am Tag der Kyrchweyhung/
Euangelium Luc. xix.

In der zeit zog IESVS
hinew/ vnd gieng durch
Jericho. Vnd sihe/ da
war ein man/ genant Za-
cheus/ der war ein ober-
ster vnder den Publica-
nen/ vnd war reich/ vñ begerte IESVM zu
sehen/ wer er wär/ vnd vermogts nit für
dem volck/ denn er war klein von Person.
Vnd er lieff fur hin/ vnd stieg auff einen
wilden feigenbaum/ auff daß er ihn sehe/
den da solt er her kofien. Vnd als IESVS
kam an die selbē stett/ sahe er auff/ vñ ward
sein gewar/ vñ sprach zu ihm: Zachee/ steig
eilends herab: den heut muß ich bleiben in
deinem hause. Vnd er stieg eilends herab/
vnd



vnd nam ihn auff mit freuden. Do sie das
 sahen/murmelten sie alle/das er bey einem
 Sünder eynkeret. Zacheus aber stunde/
 vnd sprach zu ihm: Sihe Herr/die helffe
 meiner güter gebe ich den armen. Vnd so
 ich jemand betrogē hab/das gebe ich vier-
 fältig wider. IESVS aber sprach zu ihm:
 Heut ist disem hause heil widerfaren/dar-
 umb das auch er ein Sohn Abrahams ist.
 Denn des Menschen Sohn ist kommen
 zu suchen vnd selig zu machen/das verlo-
 ren war.

Matth. 13.

Zachee/ steige eilends herab/ dann heut
 muß ich bleiben in deinem
 hauß. Luc. xix.

Die



Ie vrsach/ darüb wir alle auff
 heut hieher in diß Gottshauß zu-
 samen seynd kommen/ wissen wir
 wol/ oder sollen doch solche billich
 wissen. Seiternaln diser Tempel

Vrsach diser
 versammlung.

oder kyrch/ vor etlichen Jaren/ auff disen heu-
 tigen tag geweyhet / das ist/ GOTT dem All-
 mechtigen zu lob vnd Ehren/ allein ihme vnd sei-
 nem Dienst/ als darinnen zu Predigen/ auffopf-
 fern/ die H. Sacramēten reichen/ Bitten/ Bet-
 ten/ danck sagen/ genslich zugeeignet ist worden/
 vnd also forthin Weltliche hendel darinnen nit
 sollen volnbracht werde/ kommen wir auff heut
 widerumb zusammen/ derselbigen Weyhung vnd
 zueignung jährliche Bedechnuß zu halten / vnd
 abermal zu volnbringen das jenig/ was sich al-
 hie als im Gebetthauß (wie es der Herr selbst
 genennet) zu verrichten gebüren wil.

Diser rechter gebrauch der Kyrchweyhung/ **Kyrchwey-**
 wirdt diser zeit nit allein von Vncatholischen/ **hung wurde**
 welche alle oder doch nit wenig kyrchen zer- **mißbraucht.**
 schleipffen/ vnd alles was vnser Catholische
 Eltern durch den Namen GOTTES dareyn
 geschenckt / herauß nehmen/ sonder auch von
 den Catholischen/ mißbraucht/ vnd machen auß
 einer kyrchweyhung ein kuchenweyhe/ kommen
 nit von der kyrchen/ sonder von der kuche we-
 gen/ vnd erwan gar nit zum Ampt der H. Mess/
 sonder nur zum schlamp/ weder zur hörung des
 Wort noch Dienst GOTTES/ sonder zum es-
 sen vnd trincken/ dabey man es doch jekund nit
 bleiben lasset.

Wie.

Wiewol es diser zeit sehr nützlich/ oder doch gewiß notwendig were/ weitleuffig vnd außfürlich von disen beiden handeln/ nemlich vom rechten gebrauch vnd mißbrauch der Kyrchweyhung/ wil solchs doch vnser fürhaben diser kleinen Postill nit gestatten. Wöllen derhalben heut/ wie diß Jar auch in anderen Euangelien beschehen / bey dem Text diß jekund verlesens Euangelij bleiben / vnd gemelte Puncten biß auff künfftiges Jar (do vns GOTT das leben/ gesundheit vnd sein Gnad verleihen wirdt) anstehn lassen.

Theilung
vnd Inhalt
diser Predig.

Was sich im heutigen Euangelio zwischen Christo vnd Zacheo biß dahin verlossen/ daß er den Herren zur Herberg auffgenommen/ wöllen wir im ersten Theil diser Predig anhören. Im andern: Was sich volgents biß zum ende begeben. GOTT wölle mir vnd euch solchs zu reden vnd anhören sein Gnad mittheilen ic.

Luc. 18.

Wann sich
diß heutg
Enägeltum
begeben.

In dem anfang diß heutige Euangelij bezeugt der H. Euangelist Lucas: Das Christus der Herr (nämlich an einem Donnerstag/ welcher der sibenzehnest Martij/ des drey vnd dreißigsten Jars Christi gewesen ist) mit seinen zwölff Jüngern von Galilea hinauff gen Jerusalem gangen sey/ vnd auff dem wege angezeigt: Wie er zu Jerusalem gefangen/ getödtet vnd widerumb aufferweht werde ic. Vnder solchem begibts sich daß ein Betler so blind gewesen/ heraussen vor d Stadt Jericho gesessen vnd geberlet/ diser/ als er von anderen vernommen/ daß IESVS von Nazareth

reth fürüber gieng/ steng er an zu rieffen vnd
 vmb hilff schreyen daß er möchte sehend werden/
 vber welchen sich der Herr erbarmet vnd gese-
 hend gemacht hat. Auff solchs volget diß heutig
 Euangelium also: In der zeit (wie jekund ge-
 meldet) zog IESVS hineyn/ vnd gieng
 durch Jericho. Wir haben jekund gehört wo
 IESVS diß mal hingezogen ist/nämlich gen Je-
 rusalem. Die vrsach aber seines hin vnd her rei-
 fens im Jüdischen/Galileischen land/vnd ande-
 ren örtern mehr/haben wir diß Jar zweifels oh-
 ne mehr als nur ein mal angezeigt/ könden sol-
 che auch schier auß allen Euangelien/ vnd nur
 leichtlich abnehmen/darumb: Daß er suchen
 wolt das verloren war/nit allein diser vrsach/
 daß er die francken gesundt machen vnd andere
 Wunderzeichen mehr volnbringē wolt/sonder/
 daß er sich selbstē mündtlich durch seine Predi-
 gen den Sohn GOTTES/den wahren ver-
 sprochnen Messiam nennen/bekennen vnd zu er-
 kennen geben wolt/wie dan beschehen/auff daß
 sich volgens niemands seines Unglaubens in
 ihn zu entschuldigen hett/vnd do jemandts dar-
 über verdampft würde/beschweren könnte. Diser
 vrsach ist er auch dißmal (nach deme er von Za-
 cheo geschiden) gen Jerusalem auff einer Ese-
 lin eyngeritten/vnd als bald darauff im Tempel
 geprediget.

Ursachen
 der reiffen
 Christi.

Als er noch ein tagreiß gen Jerusalem het-
 te vnd gen Jericho kommen/ sihe/da war ein
 Man genant Zachheus/der war ein Ober-

12

ster

ster vnder den Publicanen/ vnd war reich.
 Die Publicanen/ das ist/ die jenigen leut/ so im
 Namen vnd auß beuelch des Keyfers zu Rom
 vnd anderer Herrschafften den zol vnd was der
 gleichen mehr ist/ von den Jüden vnd Heyden
 eyngebracht haben/ wurde von den andern Jü-
 den auch Heyden sehr gehasset/ für Gottlose leut/
 vnd grosse ja gemeine vnd öffentliche Sünder
 vnd Schinder gehalten/ vnd villicht nit vnbil-
 lich. Dann als nit zu zweiffen/ wirdt domaln dis
 gemein Sprichwort im gang vnd schwang ge-
 wesen seyn: Es ist (nit bey allen/ aber gewißlich
 bey ihren vilen) kein ämptlin es ist hecken-
 werth. Ob gleich dem Keyfer zins/ steur/ rent
 vnd gült/ zol vnd dergleichen/ weder geben noch
 eynbringen nit vnbillich noch Sünd ist/ wegen
 Schutz vñ schirm/ wege Brucke/ Wege/ Stege/
 Pflaster vnd dergleichen/ so lassen doch die Zöl-
 ner/ Pfleger/ Kastner/ Bögt/ Amptleut/ Schrei-
 ber vnd was dergleichen (etlich vnder ihnen)
 Schrifftgelehrten vnd Phariseer mehr seynd/
 bey dem rechten tax/ zol vñ zins nit gern bleiben/
 machen immer ein strichlin zum Nulla auff das
 zehne darauff werde/ damit sie/ wo nit mehr/ doch
 auch einen solchen theil dabey haben/ dauon sie
 auff das wenigste ihre schuch schmiren/ dauon
 mehrmaln Keyser/ König/ Fürsten vnd Herren
 nit vil wissen/ aber doch nichts desto weniger die
 armen vnderthonen/ vnd die jenigen so zu Wa-
 gen/ Pferd oder fuß vber land reisen/ in ihrem
 beutel wol empfinden. Solche Zölner/ Schin-
 dessel/ vnd wie mans auff Teutsch anderst nen-
 net/

Publicanen
 Sünder vñ
 Schinder.

Gemein
 Sprich-
 wort.

net/waren auch domaln die Zölner bey den Jüden/welchs die anderen Jüden wol gewist/ vnd derhalben ihnen so feind als dem Teufel gewesen/vñ nit gern gesehen/ja herziglich (wie auch im heutigen Euangelio) hat es sie verdrossen/wann sie gehört daß Christus der Herr bey einem Zölner eynkert hat.

Ein solcher Zölner/ ja ein Oberster vnder den Zöllnern war diser heutig Zacheus/ welcher/ als der Euangelist bezeugt/ reich war. Warumb vnd wie diser Zacheus reich sey worden/ bedarff nit vil fragens. Ist leichtlich auß obgemelten worten zu lernen/ nämlich mit seinem schinden vnd vbernehmen der armen leut mit dem zol vnd anderer finankerey vnd betriegeren mehr. Dem Keyser hat er ein- weder den zol abkaufft vmb ein genante Summa auff ein oder so vil Jar/ vnd volgens das arme Volck vbernommen wie er gewolt hat. Oder aber er hat dem Keyser den zol gefordert vnd ihme selbstem auch einen. Dann es ist nit der brauch bey grossen Herren/ daß sie den Zöllnern/ Schreibern/ Sanklisten/ Bögten zc. vber zwenzig oder dreissig/ ja etwan kaum ein ganzes Jar zehen gulden geben: Den Juristen/ Amptleuten/ Råthen achtzig/ erwann sechzig/ hundert/ oder gerath es wol anderthalb hundert gulden/ also/ daß sie gnug beschaffen/ daß sie sich selbstem/ Weib/ Kind vnd gesind ernehren. Daß aber Zacheus mit einer so kleinen besoldung so reich ist worden/ daß/ wie vnd warumb erwann auch obgemelte

Zacheus
warumb vil
wie er reich
sey worden.

(nit alle/ sonder etliche) in wenig Zaren eigne
 Heuser/ Schlöffer/ Dörffer bekommen/ in guld-
 nen fetten hereyn treten/ schreibet Lucas im
 heutigen Euangelio nit vil dauon: Judas mit
 seinem Beutel/ vnd Longinus mit seinem Ju-
 denspieß/ damit er Christum in sein seiten gesto-
 chen/ also/ daß Blut vnd Wasser heraus gelof-
 fen/ wissen besser hierauff zu antworten dan ich.
 Die Fürsten/ Herren erfarens zu zeiten/ aber
 gemeinglich zu spat/ wann nemlich sie so arm
 werden/ daß sie auch blut vnd wasser spenen
 möchten/ wann sie ihr eigen Gelt von ihren
 Råthen entlehen/ vnd grossen Bucher dauon
 geben vnd ihnen etwann zu letst gar weichen
 müssen/ also/ daß sich hieher nit vbel füat das
 jenig lächerlich Sprichwort: Do der Papp
 zum Keyser/ Bauern/ vñ Juristen saget: Ich
 bitte für euch alle drey. Der Keyser/ Ich beschli-
 ke euch alle drey. Der Bauer/ Ich arbeite für
 euch all drey. Der HofChrist/ Ich frisse euch
 all drey zc.

Friss daß
 dir der
 Fresser ge-
 segne.

Zacheus
 auß einem
 Sünder ein
 Papper.

Jedoch, müssen wir mit Zacheo etwas mil-
 ters handeln/ darumb/ weil er diser zeit kein Zöb-
 ner/ Sünder oder Schinder/ sonder ein Papper
 war/ hette sich des liegens vnd betriegens abge-
 reit abgethon/ vñ dis nit allein/ (dan dis die Ge-
 ligkeit zu erlangen nit gnug gewesen were) son-
 der auch seinen Diebstal/ Betrug vnd Bucher/
 vnd noch mehr widerumb geben/ dauon im an-
 dern Theil diser Predig.

Diser Zacheus begeret IESVM zu sehen
 wer er wår. Dise heutige reise Christi des Her-
 ren

ren gen Jerusalem/ ist wenig tag vor seinem H.
 Leiden vnd tod geschehen/ also/ daß der Herr vor
 diser zeit mehrmaln zu Jerusalem gewesen ist/
 derowegen diser Zacheus vil von ihme gehört
 hat/ von seiner Lehr/ von seinen Wunderzeichen/
 von verzeihung. der Sünd/ aller der jenigen so
 ihne auß innigkeit ihres Herzes bitten. Ist der-
 halben nit vngleublich/ daß diser Zacheus den
 Herren/ neben anderen vrsachen auch darumb
 gern gesehen hette: Ob ihme auch/ wie Mattheo
 der auch ein Zolner gewesen/ wie Marie Mag-
 dalene so ein gemeine Sünderin/ vnd jener Eh-
 brecherin/ von ihme Guad/ heil/ nachlassung vñ
 verzeihung seiner Sünd widerfahren möchte/ set-
 temaln er rew vnd leid darüber habe/ vnd albe-
 reit dauon abgestanden sey/ sene auch willig vnd
 vrbittig seine Sünd ihme Christo dem Herren
 namhaftig zu erzellen vnd beichten/ vñ vber diß
 alles wölle er auch alles vnbillichs bekommen
 gelt vnd gut/ vnd noch mehr darzu/ widerumb
 geben. Vnd/ das noch mehr ist/ wölle er auch
 würdige frucht der Pusz/ nämlich den dritten
 theil/ die Gnugthuung für die hand nehmen/
 vnd den halben theil seiner Güter den Armē ge-
 ben/ also/ daß an seiner Pusz nichts mangeln
 noch an ihme abgehn solt.

Seitemaln aber dem Herren Christo auch
 dißmal/ vil Volcks vor vnd nachvolget/ vñ Za-
 cheus von Person klein war/ könnte er doch
 auß herrlicher begirdē nit vnderlassen den Her-
 ren zu sehen/ gedencet hin vnd her wie ihme
 doch zu thun daß er den Herren sehen möchte/
 12 3 lieffe

Sünder
sollen von
Zacheo ler-
nen.

lieffe derhalben vorhin / vnd stiege auff
einen Wildenfeigenbaum / auff das er
ihn sehe / denn da solt er fürüber kommen.
Wolte GOTT das auch wir Sünder alle / nach
dem Exempel Zachei / ein herziglichs verlan-
gen hetten Christum zu sehen / verzeihung vn-
ser Sünd vnd sein Göttliche Gnad zu erlan-
gen / vnd diß wie bald er je besser / welchs wir ge-
wislich / was wir nur selbstn wolten / wol thun
könten / wann vnd wie bald wir wolten. Ist
auch nit von nöten / wie dem Zacheo / das wir
weit lauffen oder hoch steigen / alle augenblick /
an allen orten könden wir Christum finden / zu
allen zeiten wann wir nur wollen wil er sich fin-
den lassen. Versprochen hat er vns mehrmalt
im alten vnd newen Testament / das er vns er-
hören wölle / so bald / wie bald wir zu ihme schrey-
en werden. Er wölle vns vnser Sünd verzei-
hen / wie bald vnd wann wir Pusz thun wer-
den : dann so wahr er lebe / so begere er nit den
tod des Sünders / sonder / das er sich bekere vil
lebe. Vnd alle die jenigen so mit waserley anli-
gen beladen seynd / sollen nur fecklich zu ihme
kommen / so wölle er ihnen gern helfen. Lasset
vns derhalben (ihr geliebten in GOTT) fort-
hin nit / wie etwann bishero geschehen / in der
Sünd stecken / sterben vnd verderben / sonder
mit Zacheo zu Christo lauffen / ihne sehen /
vnd vmb hilff bitten / so wirdt er vns gewislich /
so wenig als Zacheum außschliessen / sonder
gern annehmen / vnd zu vns wie zu ihme sagen.
Zachee

Zachee steige eilends herab / denn heut
 muß ich bleiben in deinem hause. Mehr
 hat Zacheus erlangt dann er begert hat / ja
 mehr weder er hette dörrffen begeren. Er begert
 RESVM zu sehen / er hat ihne gesehen. Dieweil
 dann der Herr sein gemüt / sinn vnd gedanken / **Gott erkette**
 bekerung vnd Pus gewist / wolte er auch in sei- **alle hertzen.**
 nem Haus eynteren vnd Herberg darinnen ha-
 ben. Vnd gewislich nit allein leiblich in sei-
 nem hauß / sonder auch Geistlich mit seiner
 Gnad in seinem Herten. Wie sich aber hierauff
 Zacheus verhalten hab / spricht der Euangelist :
 Vnd er stige eilends hernider / vnd name
 ihn auff mit frewden. Gewislich muß sich
 Zacheus ober diser freundlichen zusprechung
 vnd begeren Christi / sehr vnd hoch erfreuwet
 haben / ja so sehr / daß ihme selbstn solche frewd
 außzusprechen nit möglich gewesen were. Lieber
 ist ihme gewislich dise borschafft gewesen / dann
 wann man ihme vil Gelt vnd Gut geschenckt
 hette / darumb / daß er doch seinem herten ein-
 mal recht raumen solt / erzellen seine Sünd / sein
 fürnemen vnd Pus eröffnen / wie leichtlich auß
 dem jenigen so im Text hernach volget / abze-
 nemmen ist.

Also müssen ihme auch wir Christen thun. **Lehr an alle**
 Wan wir nur als Sünder zu Christo geloffen / **Christen.**
 ihne vmb verzeihung gebettē / vnser Sünd ihme
 vnd seinem Kirchendiener bekennē / Absolution
 vnd verzeihung derselbigen erlangt / sollen wir
 GOTT nit allein höchstes lob vnd danck sagen /

sonder Christum IESVM mit aller frewd zur Herberg an vnd auffnehmen/ vnd diß solcher gestalt: Im H. Sacrament des Altars ist Christus IESVS vnder gestalten Brot vnd Weins (wann die wort der Eynsetzung von einem Catholischen Priester darüber gesprochen werden) mit Leib vnd Seel/ fleisch vnd blut/ Gottheit vñ Menschheit/ dasselbig sollen wir/ willig/ mit andacht vnd höchster Ehrerbietung empfangen/ so herbergen wir Christum nit nur eufferlich/ sonder auch innerlich vnd leiblich/ nit in vnserm hauß/ sonder in vnserm Herzen/ welchs wir wann wir nur selbstn wollen/ alle tag velnbringen könden. Vnd diß sey gnug vom ersten Theil diser Predig.

Noch ist außzulegen vberig das Besprech/ so Christus der Herr vnd Zachaeus miteinander gehalten habē. Zuor wollen wir anhören was die Phariseer sampt anderen Jüden dazu gesagt/ daß Christus bey einem Zolner eynkert hat? Da sie das sahen/ murmelten sie alle/ daß er bey einem Sünder eynkeret. Diß ist die mißgunst der alten Schlangen des Teufels sampt seines anhangs/ gegen Christo dem Herren vnd den seinigen. Dise Bleibnerische Phariseer fragten nit vil nach Christo dem Herren/ begerten nit von ihme/ daß er bey ihnen solt eynkeren/ vnd mißgönten dem Zachaeo/ daß eben er als ein Sünder ihne zur Herberg auffnehmen solt. Sie selbstn wolten nit weder frumb noch gundt

Mißgunst
des Teufels
vnd
seines an-
hangs.

sunde werden / thut ihnen doch zorn / daß Za-
cheus den Arzet bey sich hat / der ihme an der
Seel helffen kan / vnd gern wil / vnd geholffen
hat. Noch seynd vnder oder neben andern zwo
vrsachen / darumb dise Phariseer vnbillich ge-
murmelt haben. Erstlich / daß sie gesagt: Chri-
stus habe bey einem Sünder eynfert / welches
nit wahr war / seitemaln Zacheus domaln nit
mehr ein Sünder / sonder ein Puffer / war nit
mehr ein Zolner vnd betrieger / sonder ein wi-
derumb geber des jenigen was er vnbillich be-
kommen hat / wie dann als bald auß seiner
selbst eigen bekantnuß erweisen soll werden. Dar-
umb fürs ander / weil sie die vrsach nit gewist
haben oder ja nit haben wollen wissen / warumb
der Herr Christus auff Erden kommen / vnd
mehrmaln mit den Sündern gessen vnd ge-
truncken / gehandelt vnd gewandelt / geredet
vnd gemeinschafft gemacht hat. Dit darumb /
daß er ihme die Sünd gefallen liesse / als ob er
die Sünder in ihrer bosheit loben wolte / vil
weniger darumb / daß er sich ihrer Sünd theil-
hafftig machen vnd mit ihnen sündigen wolt.
Nein / sonder diser vrsach / wie er selbst im
beschluß diß heutigen Euangelij bekennet hat:
Denn des Menschen Sohn ist kommen /
zu suchen / vnd selig zu machen / das verlos-
ren war. Ein gesunder bedarff keines Arzts /
sonder der franck. Weil dann Zacheus noch
franck gelegen an der Seel / mußte er einen
Geistlichen Arzt haben der ihne gesundt machet /

Warumb
der Herr ge-
meinschafft
mit den sün-
dern gehabt.

diser war Christus GOTT vnd Mensch/ GOT-
TES vnd MARIAE Sohn/diser wolt Zacheum
gesundt machen/diser konte Zacheum gesunde
machen / diser hat Zacheum gesunde vnd aller
Sünd ledig gemacht/ nit weniger als Mariam
Magdalenam / zu welcher er gesagt: Ihr wer-
den vil vergeben/dann sie hat vil geliebt. Also
mögen sich auch alle Beichtuäter vnd vorste-
her der Kyrchen / gegen den vngesährlichen
Sündern vnd denjenigen so vom Catholischen
Glauben versürt vnd abgewichen seynd/ verhal-
ten. Nit von nöten/weder nützlich noch rathsam
ist es/ daß man an einem Sünder vnd Vncatho-
lischen Menschen als bald verzweifeln / ge-
schwind dem Teufel vnd der Ewigen verdam-
nuß vbergebē/ dem Züchtiger in sein hand schen-
cken oder des Landts verjagen wölle. Nein/ sie
sollen zu vor ein ja etliche mal angeredet werden/
daß sie vom sündigen leben abstehn vnd den
Catholischen Glauben widerumb annemen
wollen/ sollen auß Göttlicher heiliger Schrifft
vnderrichtet vnd ihres irrthums vberwisen
werden/ ihnen des Catholischen Glaubens/ vnd
fürnemlich derjenigen Artikel vnd Puncten
darinnen sie zweifeln/ satten vnd gründlichen
Bericht geben. Dann das ist gewiß (wie ichs
selbsten im ein vnd zwey vnd sibentzigsten Jar
in augenscheinlicher erfahrung gehabt) daß man-
cher Mensch vom Catholischen Glauben zu
einer Sect vnd neuwen Vnglauben so buck-
let kompt/ daß er gewißlich selbsten nit weiß wie
oder warumb: solchen ist noch zu helffen/ solche
soll

Wie man
sich gegen
den Sün-
dern vnd
Vncatholi-
sche verhal-
ten soll.

fol man in irrthumb nit stecken lassen / sonder widerumb heraus helffen. Do aber der Sünder ein Sünder / der Kezer ein Kezer bleiben / verharren / also sterben vnd verderben wil / soll man einen solchen / nach der Regel des H. Pauli / seitemaln er vber drey mal ermanet / sich aber doch nit bekeren wollen / meiden / vnd für einen solchen halten / als der auß seinem eignen vrtheil verdampft ist. Mit einem solchen / an welchem alle lehr / ermanung vnd vnderricht / gute vnd böse wort / Chrisam vnd Tauff verloren ist / mag man wol dem küfenster zu lauffen / vnd immer faren lassen wohin er wil / oder auch wohin er nit wil. Vnd diß von der vrsach darumb Christus bey Zacheo cynkert hat / vnd wienerr mit den Sündern vnd Vncatholischen gemeinschaft zu machen sey.

Kezer send auß eignem vrtheil verdampft.

Was Zacheus zum Herren gesagt / wollen wir jezund auch anhören: **Sihe Herr / die helffte meiner güter gib ich den Armen. Vnd so ich jemand betrogen hab / das gebe ich vierfeltig wider.** Diß hat Zacheus nit diser vrsach gesagt / als ob er sich selbstn dadurch loben / berümen vnd preisen wolt / wie frumb / wie barmherzig er sey / oder daß er von Christo vnd andern vmbstehenden / so solchs von ihme gehört / gelobt würde. Nein / sonder / weil er sich nit geschampft hat weder vor GOTT noch vor der Welt / öffentlich zu sündigen / fürchtet er sich auch nit öffentlich vor GOTT vñ der Welt sein Sünd vnd sein Puß zu bekennen / auff daß ihme

GOTT

Zacheus lobet sich selbstn nit.

GOTT dise vnd alle seine Sünd gnedig verzeihen wölle.

Gar recht vnd wol hat diser Zacheus/ so ein Zolner/ ein grosser Sünder vnd Schinder/ ein Bucherer vnd betrieger gewesen ist/ sein Pusz angestellt vnd vollendet/ gewislich nit auff Lutherische sonder durchaus auff Catholische weis. Ja die drey Hauptstück Catholischer Pusz/ hat er vollkommenlich gehabt/ gebraucht/ vñ derhalben der Sünden ledig vnd gewislich des Ewigen lebens theilhaffrig worden.

Drey theil
Christlicher
Pusz.

Kew der 1.
Theil der
Pusz.

Erstlich hat er gehabt die Kew vber seine Sünd so er bösslich begangen hat. Vnd diser vrsach ist er vom sündigen leben abgestanden/ vnd nit mehr gewuchert/ gelogen noch betrogen/ sonder mit Mattheo vom Zolhaus hinweg gangen. Dan ohne die Kew ist alles anders Püssen vmb sonsten vnd gentslich vergebens.

Beicht der
2. Theil der
Pusz.

Fürs ander hat er gehabt die Beicht. Dann/ ob gleichwol domaln/ weder er/ Mattheus/ Petrus/ Magdalena vñ andere Sünder zur Priesterlichen Beicht nit verbunden/ seitemaln zur selbigen zeit noch keine Priester des neuwen Testaments waren/ seitemaln Christus seinen Jüngern vnd anderen domaln den H. Geiss noch nit gegeben/ die schlüssel des Himmelreichs/ das ist/ den Gewalt die Sünden lösen vnd binden/ noch nit vberantwortet/ hette domaln den tod am Creuz noch nit gelitten/ auß welchem Creuzuerdienst alle Sacramenten (volgens auch das heilig Sacrament der Pusz/ welche im alten Testament kein Sacrament/ sonder ein

ein tugend gewesen ist) ihr krafft vnd wirckung haben / vnd derhalben denen im alten Testament die innerliche Beicht zu GOTT gnug war / denn ihre Priester hetten von GOTT keinen gewalt empfangen die Sünd zu verzeihen / als wie die Priester im newen Testament / sonder nur vber den leiblichen vnd eusserlichen aussatz hetten sie zu vrtheilen. Dis alles ohne angesehen / sprich ich / hat dennoch Sachens nit allein GOTT / sonder auch einem Priester / ja dem Obersten Priester / welcher ein Priester ist nach der Ordnung Melchisedechs in Ewigkeit / nemlich Christo I E S V sein Sünd bekennet / daß er die leut betrogen hab nit geleugnet / vnd eben diser vrsach gebe er widerumb was er vnbillich eyngenommen hab / vnd noch mehr vber dasselbig.

Sacramenten woher se wirckung.

Zum dritten / auff daß ihme durch die wahre hergliche Reu vnd mündliche Beicht / nit allein die Sünd verzeihen vnd Ewige straff nachgelassen / sonder auch die zeitliche straff geschencket werde / gebraucht er sich auch des dritten Theils Christlicher Puff / vnd hat ihme selbstn wirdige frucht der Puff / nämlich ein Gnugthuung auffgelegt / als Almosen geben / vnd zwar den halben theil seiner Güter. Dise Puff war nit Lutherisch / alda man nur glaubt vnd sonstn nichts mehr oder doch gar wenig thut / darumb hat er auch verzeihung seiner Sünden erlangt. Also müssen auch alle Sünder auff den heutigen tag Puffen : Erstlich von grund ihres Hergens Reu vnd leid vber ihre Sünd haben. Zum andern / solche

Gnugthuung der dritten Theil Christlicher Puff.

solche GOTT vnd dem Priester beichten. Zum dritten/die aufferlegten Pusz gern annehmen vnd erfüllen.

Zwey not-
wendige
Punctlin.

Noch seynd auß diser Pusz Zachei zwey Punctlin wol zu mercken. Eins betrifft ein vollkommenliche Pusz. Das ander/das Almusen geben. Das muß ein Sünder/iekund ein Puffer/wissen vnd wol mercken / wann er anderst recht Pussen vnd selig werden wil : Hat jemandts gestolen/gewuchert/ oder sonsten etlichs Gelt mit liegen vnd betriegen / mit falsch kauffen oder verkauffen/vnbilllicher weiß bekommen/so ist es nit gnug das man vber dieseibige Sünd reu vnd leid hab/ es ist auch nit gnug das man dieselbige Sünd beichte/ es ist auch nit gnug das man nit mehr stele noch betriege : sonder man muß das vnbillich bekommen Gut alles/ oder so vil noch im vermögen/ widerumb geben den jennigen/ welchen solchs vnbillich abgenommen/ oder ihren Erben/ oder/ do deren keiner mehr im leben/ in die Armen heuser/ vnd nit an statt eines Almusen / sonder zur Gnugthuung vnd widergebung. Also hat ihme auch Zachaus gethon. Nit nur das jenig so er vnbillich bekommen/hat er widerumb geben/ sonder noch drey mal so vil als er gefunden oder gestolen vndergen hat.

Mentiglich
wol zu mer-
cken.

Hilff lieber GOTT hilff/ Wann diser zeit alle Christen/ wie sie dann bey verlust ihrer Seelen heil schuldig seynd/ das jenig Gelt vnd Gut so sie vnbillich bekommen haben/ widerumb geben solten/wie bald wurde die ganze Welt sehen. Ob

Ob die Armen oder die Reichen mehr Fuchse
schauben / Guldine ketten / Silber Dolchen /
Schlöffer / Dörffer vnd heuser hetten. Einem je-
den so begert selig zu werden / wilichs ernstlicher
zu bedencken vorbehalten haben.

Das Almusen betreffend: Wil jemandts daß
es GOTT angenehm vnd ihm verdienstlich seye /
so muß er wie Zacheus Almusen geben / näm-
lich / von seinen vnd nit von frembden oder an-
der leut gütern. Darumb spricht er: Den halben
theil meiner Güter gibe ich den Armen. Von eignen
Diser Zacheus hat zweyerley Gelt gehabt. Et- gütern muß
lichs / das er billich bekommen: Etlich / das er man Almu-
sungen geben.
vnbillich ingehabt. Wolt nun jemand Zacheus
Almusen geben wie sichs gebürt / mußte er zu-
vor das frembde vnd vnbillich bekommenes
Gelt hinweg thun vnd widerumb geben / als
dann erst Almusen geben von seinem eignen
vnd billichen Gelt. Vnd diß ist wider solche
leut diser zeit / so etwas stelen / vnd eben dassel-
big widerumb Almusen geben vnd vil damit
verdienen wollen: noch mehr wider die jenigen /
so ein Roß stelen / geben ein Pfeiffen Almusen /
auff daß sie auff dem Roß in die Hell reiten
könden.

Auff solche Puff Zachei bekennet der Herr
Christus / daß seinem Haus heil widerfas-
ren sey. Nit allein ihm Zacheo / sonder auch
seinem Haus / seinem Weib / kindern vñ gansen
Gesind. Dann alle die jenigen so sich wissent-
lich vnd williglich frembdes Guts vnd Gelts
theil

Frembdes
guts vnd
frembder
sünd theil-
hafftig mer-
den.

Beschluß
difer Pre-
dig.

theilhafftig machen / werden auch der Sünd
theilhafftig. Weil dann Zacheus alles vnbillich
bekommens Gelt widerumb geben / ist nit allein
er / sonder auch sein ganges Haus / sein ganges
Hausgesind / der Sünd vnd straff derselbigen
sünd entlediget vnd heil widerfahren. Vnd diß
seye auff diß mal von kürzster Auflegung des
heutigen Euangelij gnug gehandelt. Vnd be-
halten wir kürzlich auß dem ersten Theil di-
ser Predig : Daß wir nit wie die Zölner (etlich
auß ihnen) mehr fordern vnd eynnehmen dann
sich gebürt / daß wir vns von allem frembden
Gut / ja von allen Sünden / so vil menschlich vnd
möglich / enthalten. Do es aber sach were / daß
wir sündigen wurden auß schwachheit vnser
fleischs / auß anreißung des Teufels / der Welt /
des Gelts / sollen wir doch ohne verzug mit Za-
cheo widerumb Christum suchen / zu ihme lauf-
fen / vnser Sünd bekennen / vnd vmb verzei-
hung bitten / dann auch ihne / im H. Sacrament
des Altars / in vnser Herß zur Herberg auffnem-
men. Doch (vnd diß auß dem andern Theil) daß
wir vber vnser Sünd / von grund vnser Her-
ßens Reu vñ leid habē / solche nit allein GOTT /
sonder auch dem Priester beichten / würdige
früchte der Buß wircken / alles frembde Gut
widerumb geben / forthin Gottes-
fürchtig / frumb vnd endt-
lich selig werden /
Amen.

Wir

Wir bitten dich O gütiger GOTT
 Herr IESV Christ vmb deinen
 H. Geist/der vns vnser Herr er-

Gebitt zu
 Christo vna-
 serm Hei-
 land.

leuchten vnd jeder zeit also beystehn wölle/
 daß wir vns nit allein vom frembdē Gelt/
 sonder auch von allen Sünden enthalten
 mögen/auff daß wir nit auch Zölner/offne
 Sünder oder Bucherer/vñ volgentis ver-
 dampft werden. Weil aber O GOTT vn-
 ser fleisch schwach/der Teufel vñ die Welt
 listig vñ betrüglich/vñ also wir bald in die
 Sünd gerathen/wölle der H. Geist vnser
 Herr dahin richten/daß wir mit Zacheo
 herziglich dich zu sehen/suchen/beichten/
 Püssen/das frembde Gut widerumb gebē/
 dich mit fleisch vnd blut im H. Sa-
 crament empfahren/also frumb
 vnd endelich selig wer-
 den/ Amen.

LAVS DEO, VIRGINI QVE MATRI,
 Saluo in omnibus SS. Sedis Apostoli-
 cæ iudicio.

m M

Res